


H. I. 20.

PIA EXERCITIA
CHRISTIANA
Ex diversis Operibus.
JOANNIS S.R.E. CAR-
DINALIS
B O N A.

Præcipuè
Ex Horologio Ascetico.
Ex Psalmidia Divina.
Ex Via Cõpendij ad Deum.
Pro utilitate & eruditione, de-
votæ Animæ Christianæ
EXCERPTA.
Et in unum Volumen
COLLECTA.



V A R S A V I Æ
Typis Collegij Scholarum Piarum,
ANNO Dñi. 1704.



APPROBATIO.

PIA hæc EXERCITIA CHRI-
STIANA, ex diversis operibus
CARDINALIS BONA excerpta,
& pro utilitate devotæ animæ in
unum Volumen collecta, cum so-
lam in DEUM pietatem spirent,
Cor in amorē illius inflāment: quò
magis omnium spirituali utilitati
prodesse possint in publicum edi-
ta; pro muneris mei authoritate,
ut typis mandentur permitto. Die
13 Aprilis, Anno Domini 1704.

STEPHANVS WIERZBOWSKI
Gnesnensis, Varsaviensis Cantor,
Canonicus Posnaniensis, Officia-
lis Generalis Varsaviensis.





Augustissimæ Cælorum
REGINÆ
MARIÆ
DEIPARÆ

Operis Dedicatio.

*Adsto pavens, ac tremens altari
tuo, Gloriosissima Virgo, &
hunc laboris mei sætum, quẽ tuâ poten-
ti manu auxiliante in lucem edidi,
pedibus tuis venerabundus advolvo.
Audies hic psallentis Ecclesiæ Filij tui
dilectissimæ sponse Mysticam Harmo-
niam; audies ploratum multum capti-
væ filie Sion ab hoc miserrimo exilio,
in quo incolatus ejus prolongatur, su-
spirantis ad patriam; audies mæstas
A preces*

preces, quæ labia fidelium eructant celestis tue Hierusalem emulantium gaudia: audies, inquam, & exaudies. Quid enim suavius potest in auribus tuis resonare, quam preces & Hymni servorum tuorum Deum iugiter collaudantium, & ad ipsum clamantium die ac nocte? Hoc hujus mei laboris argumentum est, hic scopus. Sacras siquidem preces ex ascerica institutione tum & alijs de divina laude tractatibus te inspirante pro utilitate pie animæ Christianæ colligere conatus sum teq. adjuvante in lucem edidi. Indignus forem deinceps tuo patrocínio Clementissima Mater, ni hoc tuum beneficium ad te rediret. Suscipe igitur, quâ soles benignitate hoc qualecunq. munusculum, quod Altari tuo inter tot, quæ circumpendent Imaginibus tuis, aurea & argentea à fidelibus oblata anathemata,

Sancti

*Săcti Nominis tui infimus cultor affigo:
 nec enim minus pretiosū, vel tibi gratū
 confido fore, quā si ex auro vel gem-
 mis compactū esset. Excipe illud & fove
 munifico amplexu; placidissimus afful-
 geat illi obtutus tue incomparabilis pie-
 tatis tanquam solare jubar, & per om-
 nes orbis Ecclesias radios emittat, ut
 modum laudandi Numinis omnibus in-
 dicet, atq; in eternum gloria tui No-
 minis elucefeat. Posside me ut rem
 tuam o Suprema Cœlorum Regina, &
 cum volueris aegris mortalibus tot im-
 pendere beneficia, nè me indonatū hinc
 patiaris abire. Innova signa, immuta
 mirabilia. Si cecorum oculos discussâ
 caligine, ut solem aspicerent, aperuisti;
 oculos mentis mee clarissimâ tuâ luce
 perfunde, ut lumen vultûs Dei, quod
 signatum est super nos, puro semper in-
 tuitu perspiciam. Si obturatas surdorū*

*aures reſeraſti; da gaudium & letitiam
 auditui meo interno, ut audiā vocem
 Sponſi loquentis in ſilentio ad cor Hie-
 ruſalem. Si mutarum linguarum vin-
 cula dirupiſti; tribue ori meo ſermonem
 rectum & bene ſonantem, ut cum divi-
 nas pſallo laudes, placeant verba mea
 in conſpectu eterni Regis. Si malè af-
 fectis priſtinam valetudinem depulſo
 morbo reſtituiſti; ſana me diuturnā in-
 firmitate laborantem, ut integer ani-
 mus meus ſine ulla egritudine prave
 affectionis in die noviſſimo inveniatur.
 Id precor humillimè ante imaginem
 tuam in genua proſtratus.*

*Surgens mane è lecto, & cubitum
eundo, humi procumbens, Deum
adora, dicens.*

LAudo, glorifico, & adoro te, San-
ctissima TRINITAS, unus DEUS,
& nihilum meum agnoscens, infra
omnes creaturas, me prorsus abijcio, &
offero, ad omne beneplacitum tuum,
in tempore, & in æternitate. Osculor
terram hanc, humiliando me, ante
Thronum Majestatis tuæ, & profiten-
do, me terram, & minimum pulverem
esse, & cito in terram reversurū. Psal-
lo cum Cælestibus Spiritibus Hymnum
gloriæ tuæ, *Sanctus, Sanctus, Sanctus, Do-
minus Deus Sabaoth.* Pleni sunt cæli, &
terra, gloria tua. Benedicta sit Sancta
TRINITAS, atq; individua Unitas,
confitebimur ei, quia fecit nobiscum,
misericordiam tuam. Anima mea desi-
ravit te in nocte, sed & spiritu meo,
in præcordijs meis, de mane vigilavi
ad te, DEUS meus, spes mea, amor
meus, & omnia. Humiliter petens, ut

A 3

tua

tua multiformi gratia, penetralia cordis
mei visites, & igne tui amoris, vehemen-
ter accendas. Amen.

Orationes Matutinæ.

*Septem Actus, singulæ continentes,
quorum unam, pro ratione tem-
poris, & commoditate, devo-
tè, recitabis.*

PROLIXIOR I. ADORATIO.

OMnipotens æterne DEUS, Rex cæ-
li, & terræ, & Creator univerfo-
rum. Ego indignissima creatura tua,
in centro nihilitatis meæ, ante Maje-
statem tuam, humiliter provolutus,
terræ adhærens, ex qua plasmasti me,
& in quam reversurus sum, omni ma-
jori affectu, attentione, & reverentia,
quibus scio, & possum, adoro te. In
quo autem deficio, quia non novi te,
nec sufficiens est affectus meus ad infi-
nitatem tuam, ut par est recognoscen-
dam, suppleas tu, o Trinitas Indivi-
dua.

dua. Si enim te cognoscerem, & comprehenderem, aliqua ex parte, altitudinem divitiarum, sapientiæ, & scientiæ tuæ, tunc perfectiùs te adorarem, & cum omni militia cælestis exercitus, Hymnum canerem, gloriæ tuæ. Sed tabescet in me anima mea, quia incolatus meus, de die, in diem prolongatur, & jam tædet animam meam, vitæ meæ, dum dico mihi quotidie, ubi est DEUS meus? Nam quis sum ego, vermiculus terræ, & opprobrium hominum, ut audeam faciem meam levare, ad te, & aspicere altitudinem cali? Gaudeo tamen, quod sine te, nihil sum, nihil possum: nec vellem aliquid esse, aut posse, nisi dependenter à te. Et ideo omni momento peregrinationis meæ, cum infima mentis, & corporis demissione, intendo te adorare, tibiq; offero, in supplementum imperfectionis meæ, omnes adorationes, Domini mei, JESU Christi, Beatæ Virginis, omniumq; Angelorum, & Electorum tuorum, atq; eorum affectu, & veneratione, adoro te. Utinam omnis lingua

viventium, quasi calamus scribæ, velociter scribentis, semper, & ubiq; lætanter, exprimeret, & omne cor, tibi eructaret, verba hæc, dulciora super mel, & favum. Adoro te.

II. Gratiarum Actio.

Tibi laus, tibi gratiarum actio, Domine DEUS, quia ab initio, & ante sæcula, nullis meis præcedentibus meritis, prædestinasti me, conformem fieri, imagini Filij tui, atq; ut salutem consequerer, media necessaria sapientissimè præordinasti. Licet enim ignorem, utrum amore, vel odio dignus sim, cum omnia in futurum reservantur incerta, spero tamen in infinita tua bonitate, me futurum vas misericordiæ, per merita JESU Christi, Domini mei. Benedico te Pater, Domine; cæli, & terræ, quia cum placuit tibi, ex nihilo cuncta creasti, ut notam faceres potentiam tuam. Me verò tempore præfinito, ex Christianis Parentibus, nasci voluisti, quorum cura, & diligentia, repleta fide, bonisq; moribus, imbutus fui.

Sed

Sed & Angelos tuos, spiritus, fecisti propter me, ut custodirent me, in omnibus vijs meis, & ab innumeris malis, & periculis præservarent. Omnia autem quæ fecisti, continua quadam creatione conservas, quoniam tua sunt omnia, & custodis me omni momento, in fasciculo viventium. Sicut enim occidente sole, lux definit esse, ita te subtrahente concursum, universa hæc machina, dissolveretur. Quia verò propter peccatum, primi parentis, totum genus humanum, miserabiliter perierat, cum perditos homines, in æternum damnare potuisses, misericordiam præstare miseris maluisti, & qualem misericordiam? Ut servum redimeres, Filium tradidisti. Gratias itaque ago, omni qua valeo virtute, infinitæ pietati tuæ, pro copiosa redemptione, qua nobis perditis, subvenire dignatus es, per eundem Filium tuum, qui mortuus est, propter delicta nostra, & resurrexit, propter justificationem nostram, & nunc sedens, ad dexteram tuam, interpellat pro nobis, constitu-

tus à te, Judex, vivorum, & mortuorum. Magna autem sunt beneficia, quæ in assumpta humanitate, præstitit nobis: Sacramenta enim instituit, quibus lavamur, mundamur, roboramur, nutrimur, & ad vitam æternam, præparamur. Exemplis quoq; , & doctrinis, instruxit nos, ut simus Sancti, & immaculati, in conspectu ejus. Non tamen omnibus prodest, Justissime DEUS, efficacissima Christi redemptio! nam multi sunt infideles, inimici tui, qui Filij tui Evangelium, vel ignorant, vel contemnunt. Me verò nasci fecisti, in Ecclesia tua, extra quam, non est salus, nec vita, corpus insuper aptasti mihi, aptum ad animæ functiones, & fortitus sum te largiente, animam bonam. Impulsus sæpè fui, ut caderem, & tu me suscepisti, circumdederunt me mala, quorum non est numerus, & tu me liberaisti. Absconderunt laqueum mihi, inimici mei, & tu eo contrito, eripuisti me. Nullus erit finis, si cuncta bona, recensere voluero, quæ fecisti mihi, quorum multa occulta sunt, quæ-

quæq; quotidie multiplicantur, donec perveniam, ad cumulum omnium bonorum, ad gloriam, quam præparasti, diligentibus te. Pro his omnibus, gratias ago tibi, præsertim, quod hanc noctem tranquillam, & incolumem concesseris: & pro omnibus item donis, quæ singulis creaturis contulisti, quia ut tibi totus servirem, omnia quæcunq; fecisti, meæ commoditati, & saluti, prodesse voluisti. Sit nomen tuum benedictum, in sæcula, & tibi pro me, gratias agant, omnes Angeli, & Sancti tui, teq; exaltent, quantum possunt, quia major es, omni laude.

III. CONTRITIO.

SED væ misero, quia tot beneficijs tuis ingratus, non cessavi peccare, & offendere te. Non enim feci voluntatem tuam, sed omnem justitiam tuam, prævaricatus sum, & legem tuam, non custodivi. Cecidit super me infelicitas Caim, vagus enim, & profugus, erravi longe à te, currens sine fine, per creaturas, quarum species, decepit me.
Et

Et nunc, recolo vias meas, nequissimas, in amaritudine animæ meæ, & confiteor, dedecora mea, in laude tua. Doleo ex toto corde, quod offenderim te, quem amo, super omnia, & statuo firmiter, non peccare amplius, atq; omnia potius tormenta perpeti, quam quidpiam scienter perpetrare, quod tuæ displiceat Majestati. Confirma Domine, hanc voluntatem, & qui mihi dedisti cognoscere flagitia mea, da ea ex toto corde detestari, & perfice dolorem meum, sana langviores meos, medicamento poenitentiae, & fac me, dignè, pro transactis culpis, satisfacere. Quia verò non est sufficiens, quidquid passus fuero, ad promerendam delictorum veniam, quibus te offendi, DEUM meum, cujus magnitudinis, non est finis: ideo acerbissimam Passionem Filij tui, offero tibi, merita quoq; Beatissimæ Virginis, & omnium Sanctorum, & cum his, omnia opera mea, & gemitus meos, quos ipse nosti. Ignosce Domine, placare Domine, attende, & fac. In tua siquidem bonitate con-

te confido, quod per merita pretiosi sanguinis, Salvatoris mei, JESU Christi, remissurus sis mihi, omnia delicta mea, & gratiam uberem largiturus qua vitam sanctè instituere, tibiq; perfectè, usq; ad finem, servire valeam.

IV. PETITIO.

INclina aurem tuam, ad preces meas, Domine DEUS, refugium meum, & custodi me hodie à rugientibus præparatis ad eseam, ab incurso, & dæmonio meridiano. Notam fac mihi viam, in qua ambulem, & doce me facere voluntatem tuam. Da cordi meo, te desiderare, desiderando quærere, quærendo invenire, inveniando perfectè amare. Expelle à me, spiritum elationis, & extingue desideria carnis. Pone custodiam ori meo, ut non delinquam in lingua mea. Da patientiam in adversis, continentiam in prosperis, terrenà despiciere, & amare cælestia. Vilescant mihi omnia transitoria, nec aliquid cupiam extra te. Auge in me Fidem, Spem, Charitatem, & da thesaurum humi-

mili-

militatis tuæ. Ad illum scientiæ gra-
 dum, fac me pertingere, quo pervenit
 Apostolus tuus, cum dicebat, se nihil
 scire, nisi Christum, & hunc Crucifi-
 xum. Deduc me, in semitam mandato-
 rum tuorum, & quod à me requiris, ut
 faciam, tribue ut sciam. Tu scis Domi-
 ne, quid à te, petere debeam, id tu mi-
 hi largire, qui solus omnia potes. In
 te enim confido, & scio, quia non
 erubescam.

V. OBLATIO.

Timor, & tremor, venerunt super
 me, dum recogito dies meos, qui-
 bus perditè vixi, bibens aquam Ægy-
 pti, qua sitis, non sedatur, & avolans
 à te, quasi columba, seducta, non ha-
 bens cor. Veruntamen, ego loquar,
 ad te, cum sim pulvis, & cinis, & effun-
 dam in conspectu tuo, querimonias,
 mei afflictì cordis interpretes, & nun-
 tias, ardentissimi desiderij, quo concu-
 pisco redire ad te, & meipsum tibi, in
 holocaustum offerre, in unione illius
 sacrificij, quod pro me in Cruce litatum
 est

est. Hæc est spes mea, multa nimis, in qua singulariter constitutus, non erubescam surgere de pulvere & excusso mundi jugo, accedere ad te, & dicere. Suscipe me Domine, secundum eloquium tuum, & vivam, & non confundas me, ab expectatione mea. Multæ quidem sunt iniquitates meæ, quibus iram merui, sed multo major est, misericordia tua, cujus non est finis. Et si ego indignus sum gratia tua, respice in faciem Christi tui, pro me in Cruce pendentis; nam ipse veniam postulat pro me, gemitibus inenarrabilibus. In ipso, & per ipsum, offero tibi, omnia peccata mea, ut ea comburas, igne ardentissimo, charitatis ejus, meq; dealbes in sanguine ipsius. Offero etiam tibi, post scelera mea, quæ verè sunt mea, omnia bona, quæ sunt in me, quæ verè sunt tua: tu enim dedisti mihi, & velle, & perficere, præveniens me, in benedictionibus tuis, & omnis sufficientia mea, ex te est. Trado igitur tibi animam meam, omnia viscera mea, sensus meos, & ossa mea,

mea, ut possideas me totum, tanquam
 rem tuam, & adimpleas me, lætitia,
 cum vultu tuo. Suscipe me in bonum,
 cum omnibus verbis, actionibus, affe-
 ctibus, motibus, cogitationibus, respi-
 rationibus meis, in unione illius oblati-
 onis, qua dilectus Filius tuus. se, & sua
 obtulit tibi. Et quia particeps ego
 sum, omnium timentium te, offero ti-
 bi, omnia bona, quæ hodie fiunt, in
 militanti Ecclesia, ut ea suscipere di-
 gneris, in supplementum, imperfectio-
 nis meæ. Quidquid dixerò, quidquid
 fecero, vel cogitavero, totum opto,
 ut tuum sit, & ad maiorem tui glori-
 am, cum omni pura, & simplici, ac
 Deiformi intentione, quam unquam
 habuit, Beata Virgo, & omnes Sancti,
 & ipse Sanctus Sanctorum, Redemptor
 noster, JESUS Christus. Et nunc Do-
 mine sacrifico tibi, quidquid in me, &
 extra me est, renovans vota mea, ut
 totus tuus sim, nec aliqua creatura in
 me habeat quidquam. Tu etenim su-
 scepthor animæ meæ, & posuisti signum
 in faciem meam, ut nullum præter te,

ama-

amatorem admittam. Trado ergo me tibi, tanquam lutum, in manu figuli, ut sive me constituas vas ad ignominiam, sive ad honorem, satis superq; gloriosum mihi est, in manibus tuis esse, & per eas quocunq; modo contrectari. Fiat voluntas tua, in me, per me, & de me, in tempore, & in æternitate.

*VI. Invocatio Deiparæ &
Sanctorum.*

Dulcissima Virgo Maria, Mater Dei, & Domini nostri JESU Christi, refugium peccatorum, & Mater misericordiæ, me hodie, & semper, in tuam singularem custodiam, humillima devotione commendo. Statue me juxta te, & protege ab omnibus inimicis, visibilibus, & invisibilibus. Dic animæ meæ, salus tua ego sum. Dirige me, servum tuum, in omnibus vijs, & actionibus meis, consolare in omnibus ærumnis, & angustijs, tuere, & præserva ab omnibus malis, & periculis. Convertte faciem tuam ad me, cum fi-

B

nis

nis advenerit vitæ meæ, & in hora illa
 tremenda, consolatio tua, lætificet spi-
 ritum meum. Omnia potes, quæcun-
 que vis, in cælo, & in terra, nec est,
 qui possit resistere, voluntati tuæ. O-
 mnia enim quæ petis, obtines ab Omni-
 potente. Exaudi ergo, & suscipe pre-
 ces meas, & noli me aspernari, de tua
 pietate confidentem. Ecce procido
 coram te, Benignissima Virgo, proci-
 do, & adoro in te, Filium tuum, tua-
 que suffragia imploro, ut obtineas de-
 leri peccata mea, ut concilies cordi
 meo, cor Filij tui, ut possideat me, &
 faciat me hominem, secundum cor su-
 um. Adeste mihi Angeli Sancti, signa-
 cula Divinæ similitudinis, pleni sapien-
 tia, & perfecti decore; adeste, & de-
 fendite me, ab incursum malignorum
 spirituum, ab hostium fraudibus, &
 insidijs. Succendite me illo igne, quem
 Dominus misit in terram, & voluit ve-
 hementer accendi. Vos septem Spiri-
 tus, qui astatis ante Dominum, ad nu-
 tum ejus semper parati, succurrite pe-
 regrinanti, in hac valle lachrimarum.

pur-

purgate me ab omni forde, & infundite menti meæ, Sanctorum splendorem, ut absumpta omni materia, Divino amore totus ardeam, & unus cum Deo spiritus efficiar in æternum. Tu Sancte Michaël, cælestis militiæ Princeps, gloriosissime, adjutor populi Dei, & electarum animarum susceptor, qui pugnavisti cum dracone, ejusq; victor exististi, veni in adjutorium meum, in hoc ancipiti prælio, quod mihi inermi, & fragili, cum eodem potentissimo hoste, quotidie gerendum est, ut ei fortiter resistere possim, nunc, & in hora, mortis meæ. Occurre animæ meæ, è corporis ergastulo exeunti, & perduc eam tecum in Paradisum. Et tu Angele mi Custos, qui semper vides faciem Patris, semper assistis mihi, plenus gratia, & fortitudine, protege me, ab incursione diaboli, vigilantem, dormientem, ac ubicunq; fuero. Gratias ago tibi, pro custodia, & pro dilectione, quam mihi indigno exhibes, tibi que commendo hodie & quotidie, animam meam, & corpus meum. Excita me

torpentem, consolare mærentem, confirma labentem, subleva oppressum, adjuva periclitantem. Sicut mandatum dedit tibi Pater, sic fac, & custodi me, in omnibus vijs meis, nè unquam offendam, ad lapidem pedem meum. Nè deferas me, in extremo agone versantem, & esto morienti singulare solatium, qui es viventi salutare præsidium. Salvete Sancti, & amici Dei, Regni cælestis incolæ felicissimi, vitæ nostræ duces, & defensores. Salvete, & gaudete, quia transacto mortalitatis pelago, ad Beatæ tranquillitatis portum, jam securi pervenistis. Memores estote Fratrum vestrorum, qui adhuc navigant, hoc mare magnum, & spatiosum, in quo sunt horribilia monstra, hianti ore parata, ad prædam. Eripite nos de aquis multis, & de limo profundi, fusis precibus ad eum, qui dominatur potestati maris, ut statuatur procellam ejus, in auram, & sileant fluctus ejus. Mihi autem primitus, adeste gloriosissimi protectores, & tutelares mei N. N. ad vos enim præcipuè, dirig-

rigitur oratio mea, ut me ab omni malo, vestra tuitione, liberetis. Vos reliqui Sancti, & Sanctæ Dei, quorum me patrocínio, jam pridem commisi, subvenite mihi, misero peccatori, sedenti in tenebris, & in umbra mortis, solvite vincula captivitatis meæ, ut semper sim memor, mandatorum Dei, ad faciendum ea. Miseremini mei, saltem vos amici mei, Filij matris meæ, quæ sursum est, & liberate me, à tumultuantium affectionum turba, ut discam mihi ipsi mori, & illi soli servire, qui est vera vita, & salus animæ meæ, & merces mea, magna nimis.

VII. Postulatio pro Vivis & Defunctis.

EXaudi orationem servi tui, Domine DEUS noster, misericors, & clemens, & ostende faciem tuam, super Ecclesiam tuam, quam ædificasti tibi, in fortitudine tua, & in magnitudine brachij tui. Percute dorsa inimicorum ejus, & qui oderunt eam, non consurgant.

gant. Conserva eam, quietam, & tranquillam, usq; ad mundi consummationem, & portæ inferi, non prævaleant adversus eam. Nè despicias populum tuum, quem redemisti tibi, pretioso sanguine, Filij tui, permaneat in sanctitate Ecclesia tua, & nè claudas ora, canentium te, ut omnes gentes agnoscant, quia tu es DEUS, & non est alius præter te. Auge in nobis puritatem fidei, & munditiam sanctitatis. Convertite omnes infideles, errores omnes extirpa, ut fiat unum ovile, & unus Pastor. Misere Romani Pontificis, quem Ecclesiæ tuæ præesse voluisti, ut verbo, & exemplo, cunctis præluceat. Da illi jucunditatem cordis, fieri pacem in diebus suis, amplificare gloriam tuam, & populum tuum corroborare. Sit gregi sibi commisso, forma justitiæ, sanctimonix speculum, pietatis exemplar. Recordare omnium, qui laborant in vinea tua, ut palmites ejus extendant, usq; ad mare, & per universam terram, propagines ejus. Effunde miserationes tuas, in omnes Reges, &

Ca-

Catholicos Principes, junge eos pace tua, & dita observantia mandatorum tuorum. Fac eos diligere justitiam, & facere judicium, in omni tempore. Præmijs bonos, & malos pœnis, afficiant, tuaq; protectione muniti, de hostibus Sanctæ Crucis, lætam victoriam obtineant. Tuum etiam auxilium, cunctis Magistratibus præbe, ut pacata gubernatione, subiectos regant, teque semper timeant, in judicijs suis, & tibi jugiter placere contendant. Memento pijsime Pater, Parentum meorum, omniumq; affinium, & consanguineorum, fac eos Domine, sic transire per bona, temporalia, ut non amittant æterna. Tu qui in misericordia disponis omnia, exaudi me, clementiam tuam, implorantem, pro universis, qui in carcere, & captivitate sunt, pro ægris, tentatis, tribulatis, desolatis, & afflictis, pro his, qui in peccato mortali obdurati sunt, & computrescunt, in sordibus suis: Pro his, qui persecutionem patiuntur, pro constitutis in agone mortis, aut in aliqua

gravi necessitate, ut ex tua largitate,
 libertatem salutem, consolationem,
 victoriam, gratiam, donum contritio-
 nis, felicem mortem, suarumque ne-
 cessitatum remedium, consequantur.
 Supplex item rogo te, Benignissime
 DEUS, pro omnibus inimicis meis,
 quos intimè diligo: pro ijs, qui pravo
 affectu & mala voluntate, erga me
 sunt, vel aliquid contra me moliantur,
 quos ego unquam offendi, aut scan-
 dalizavi, & ad peccatum induxi, vel,
 qui me factis, aut verbis, offenderunt,
 vel ad peccatum induxerunt, ut eis in
 omnibus benefacias, & pro infamia,
 qua me affecerunt, honorem, pro de-
 tractionibus bonam famam, pro odio
 in me, sanctissimum amorem tuum, &
 pro omnibus malis, adversum me ir-
 rogatis, bona temporalia, saluti eorum
 necessaria, & æternam vitam, retribu-
 as. Illos verò, quos ego offendi, aut
 scandalizavi, protege, & defende, ab
 omni malo, & gratiam tuam eis infun-
 de, ut per veram emendationem, &
 confessionem omnium debitorum, ve-
 niam

niam consequantur. Miserere omnium hominum, quos creasti DEUS, & ostende universis populis, lumen miserationum tuarum. Immitte timorem tuum, super barbaras nationes, ut cognoscant, quia non est DEUS, nisi tu, & enarrent magnalia tua. Illumina omnes gentes, à fide alienas, Turcas, Ethnicos, Judæos, Hæreticos, atque Schismaticos, aufer velamen à cordibus eorum, & in domum Ecclesiæ tuæ, eos intrare compelle. Lugeo coram te, Domine hos fratres meos, qui te non noverunt, & si possem, omnium istorum intellectibus, in te crederem, omnium voluntatibus, te amarem, omnium viribus, tibi servirem. Vincat te pietas tua, Rex æterne, cui omnia vivunt, & propitiare animabus, omnium fidelium defunctorum, Parentum meorum, consanguineorum, affinium, amicorum, & benefactorum, super quos invocatum est, nomen tuum. Ostende illis faciem tuam, & pone in conspectu tuo, preces Ecclesiæ tuæ, sponsæ tuæ, quæ pro illis clamat, ad te,

die ac nocte. Libera eas, de ore leonis, ut cantare incipiant, canticum novum, misericordias tuas fideles, teque collaudent, cum cæteris Sanctis tuis, gloriosum, & benedictum, in sæcula, sæculorum. Amen.

Brevior.

AD te, à quo sum, & per quem vivo, sentio, & intelligo, ad te summum bonum meum, qui es principium meum, & finis ultimus, ad te levo manus meas, & cor meum, Sanctissima Trinitas, unus DEUS, teque omnium creaturarum possibili affectu, laudo, glorifico, & adoro, toto corde, & corpore prostratus, atq; in centrum terræ, meique nihili, infra omnes creaturas, me prorsus abdo, & demitto. Dignus es Domine, omni honore, & gloria, & gratiarum actione, quia cum non essem, creasti me, ad imaginem, & similitudinem tuam, & cum perditus essem, pretioso sanguine, Filij tui, redemisti me, & Sancti Spiritus gratia, sanctificasti me, à multis malis, me præ-
fer-

servasti, peccantem tolerasti, & ad poenitentiam expectasti. Pro his, & alijs innumeris, beneficijs, quæ mihi misericorditer præstitisti, præsertim quod hanc noctem, tranquillam, & incolumem, concesseris, gratias ago tibi, rogans humiliter, ut delicta mea, multa, & magna, dimittas mihi, ea enim agnosco, & confiteor, cum vero proposito emendationis. Utinam te infinito amore dignissimum, semper perfectè amassem, & nunquam tot peccatis, & negligentijs, offendifsem. Doleo de his omnibus, & singulis, ex totis præcordijs meis, purè propter te, **DEUM** meum, summè amabilem. Ignosce mihi Domine, & infunde timorem tuum sanctum, fidem vivam, firmam spem, ardentem charitatem, & omnes virtutes, quibus indigeo. Custodi me hodie, ab omni malo, & doce me facere voluntatem tuam. Dirige omnia verba, cogitationes, & opera mea, ad majorem tui gloriam, & salutem animæ meæ, & fac me ita creaturis uti, nè me separent, ab amore tuo. **Portas sensuum**

um meorum, ita custodi, nè quis eas intret, nisi missus à te. Propter te, DEUS meus, conabor hodie, omnia peccata, & defectus, cavere, præsertim loquacitatem, & proficere in virtutibus, præcipuè in humilitate. Da tu quod jubes, & jube quod vis. Credo Domine, quidquid per Ecclesiam tuam, Catholicam, credendum proposuisti, omnem spem meam, in tua bonitate, meritisque Domini mei, JESU Christi, repono. Diligo te totis viribus, tota mente, tota virtute. Tux legi obediens ero usque ad mortem, quam pro tuo amore, & honore, lubens subire paratus sum, quacunque hora tibi placuerit. Adversa omnia, de manu tua, libenter accepto, omnes amicos, & inimicos, propter te, & in te, diligere volo, si aliter fecero, errantem revoca, & meam etiam rebellem, ad te propitius compelle, voluntatem. Renovo vota mea, quæ distinxerunt labia mea, eaque tibi offero, & cum illis, quidquid habeo, quidquid sum, quidquid possum. Offero tibi, Filij tui, ardentissimum

mum in te amorem, Beatissimæ Mariæ
 Virginis sanctitatem, puritatem Ange-
 lorum, Patriarcharum fidem, Prophe-
 tarum constantiam, labores Apostolo-
 rum, pœnas Martyrum, Confessorum
 patientiam, castimoniam Virginum,
 omniumque Justorum virtutes, ut ipsi,
 qui tibi placent, pro me intercedant,
 & meam suppleant imperfectionem.
 Quod si mihi tot vitæ forent, quot
 stellæ in cælo, si omnia Regna, & divi-
 tias totius mundi possiderem, cuncta
 libenter Majestatis tuæ obsequio, im-
 penderem. Confirma Domine, hanc
 voluntatem, & exaudi orationem servi
 tui. Tu quoque post DEUM, summa
 ratio spei meæ, Beatissima Virgo Ma-
 ria, Domina, & Patrona mea clemen-
 tissima, adesto mihi miserrimo pecca-
 tori. Gratias ago tibi, quod tuis meri-
 tis, & Patrocinio, usque ad hanc ho-
 ram perveni. Ego me hodie, & quo-
 tidie, tuæ fidei, & tuitioni committo.
 Suscipe me Mater amabilissima, in ser-
 vum, & filium tuum indignissimum, &
 præserva ab omni malo, animam me-
 am,

am, nec me deferas, in hora mortis. Impetra mihi, omnium peccatorum remissionem, impetra perfectam mortificationem, & introversionem, ut sim homo, secundum cor Dei. Et tu Angele Sancte, potentissime, & fidelissime Custos, animæ meæ, defende me, ab omnibus insidijs, malignantium spirituum, omnes peccandi occasiones amove à me, sanctas cogitationes inspira, dirige verba, & opera mea, secundum DEI voluntatem, tuere me, in ultimo vitæ agone, & pro me semper intercede. Gratias tibi ago, pro custodia, quam indigno clienti tuo, hac nocte impendisti, omnesque tecum, Beatissimos Spiritus, imploro, ut in omnibus necessitatibus, & angustijs meis, assistant mihi. Vos item invoco, Sancti, & Electi DEI, omnes, vos presertim, Patroni mei suavissimi, & quandoquidem de vestra salute, securi estis, de mea, solliciti esse, dignemini. Laudate, benedicite, & superexaltate, Dominum mecum, & pro me, mihiq; gratiam obtinete, illum perfectè, cognoscen-

scendi, & amandi in via, ut demum in Patria, eo perfruar vobiscum, in æternum. Sed nunc iterum, effundo coram te, orationem meam, Domine DEUS meus, tibi que omnes hodie commendo, ad tuam confugientes misericordiam, ut in cunctis necessitatibus suis, opem tuam, sibi sentiant adesse. Respice Ecclesiam tuam, eamque pacificare, & coadunare digneris, una cum Papa nostro, N. cunctoque Clero, fac eos in tuo servitio ferventes, ut cum grege sibi commisso, ad vitam perveniant sempiternam. Respice Reges, & omnes Principes Christianos, da illis sapientiam, & concordiam, zelumque justitiæ, & religionis. Commendo tibi, omnes domesticos meos, & familiares, consanguineos, & affines, & adversarios: concede omnibus, & singulis, quod scis, eis expedire, ad salutem, mentis, & corporis. Da afflictis consolationem, infirmis sanitatem, peccatoribus veniam, justis perseverantiam, vivis pacem, & requiem defunctis. Amen.

Brevissima.

ANte thronum gloriæ Tuæ, mente, & corpore procumbens, o Beatissima Trinitas, Pater, Fili, & Spiritus Sancte, **DEUS** meus, & omnia, tanquam figmentum manuum tuarum, à te in omnibus, & per omnia dependens, omni qua possum humilitate, & devotione adoro te, atque ex intimis visceribus, tibi gratias ago, pro creatione, redemptione, conservatione, Sanctissimis Sacramentis, & pro alijs innumeris beneficijs, mihi, & toti mundo concessis, præsertim verò, quod ad initium hujus diei, me incolumem perduxisti. Milia millium cælestium agminum ministrantium tibi, & decies millies, centena millia, assistentium tibi, te ex me glorificent: atque omnes creaturæ colaudent, & nomen tuum gloriosum, superexaltent, in sæcula. Mihi verò Domine, rubor confusionis est, neque audeo oculos meos levare ad te, quia peccavi tibi, & omnem justitiam tuam, prævaricatus sum. Ignosce confidenti,

tenti, Pater misericordiarum, & vide
dolorem meum. Detestor omnia pec-
cata mea, abominor ingritudinem
meam, & malo incurrere omnem pœ-
nam, quam deinceps te offendere. Si
lapsus fuero, operi manuum tuarum,
porrige dexteram, & dirige gressus
meos, in semitis tuis. Aufer à me,
quidquid tibi displicet, & da, quidquid
tibi placet. Posside me jugiter, secun-
dum beneplacitum tuum, ut gaudium
meum, sit plenum. Da ut hodie, &
semper, tibi soli vivam, te solum quæ-
ram, & universa despiciam. Perfunde
me spirituali jucunditate, ut te in o-
mnibus, & ubique inveniam, & tan-
dem per felicem mortem, ex amore, &
in amore tuo, ad te merear pervenire.
Tibi me totum æterne DEUS, omnes-
que animæ, & corporis vires, quid-
quid intra me, & extra me est, offero,
& immolo. Omnes cogitationes, o-
mnia verba, & opera hujus diei, &
totius vitæ meæ, suscipe obsecro, uni-
ta, operibus, verbis, & cogitationibus,
Filij tui, ad majorem tui gloriam, &

C

proxi-

proximorum salutem. Tibi enim sincerè, servire desidero, propter te solum, DEUS meus, quia ex te, in te, & pro te, sunt omnia, qui es summum bonum meum, & finis ultimus. Ostende mihi, & omnibus viam, in qua ambulemus, libera nos, ab omni malo, & da fidelibus defunctis, requiem sempiternam. Adeste, & vos beatarum agmina mentium, tuque imprimis, Beatissima Virgo Maria, unica post Deum, spes, & protectio mea, tu Angèle mi Custos, cum omni Angelorum exercitu, vos Sancti mei Tutelares, vos omnes Electi Dei, inopem iuvate, jacentem erigite, & peregrinanti, in hoc exilio, atque in tenebris sedenti, lumen, opem, & perseverantiam, impetrate. Pax, & benedictio Domini mei JESU Christi, & virtus Sacratissimæ Passionis ejus, signum Sanctæ Crucis, titulus triumphalis, JESUS NAZARENUS REX JUDÆORUM, integritas Purissimæ Virginis Mariæ, custodia Sanctorum Angelorum, & suffragia omnium Sanctorum, sint inter me,

me, & inimicos meos, visibiles, & invisibiles hodie, & semper, & in hora, mortis meæ. Amen.

Oratio Vespertina.

EXaltabo te, DEUS meus, Rex, & laudabo nomen tuum, in sæculum sæculi, quia de excelsa cælorum habitaculo, respicere dignatus es, super me, indignissimum servum tuum. Venite, audite, & narrabo, quanta fecit animæ meæ. Ab æterno ordinavit me, ex antiquis, antequam terra fieret, & videns me, in communi, & infelici sorte, filiorum Adam, ob labem originalem, damnationi obnoxium, ab alijs innumeris pereuntibus, segregavit me, & dilexit, priusquam essem. Cum verò jam esse cæpisssem, alijs pluribus, præmatura morte raptis, me ad gratiam Baptismatis, perduxit, & in gremio Ecclesiæ constituit, corpusque aptavit mihi, integrum, & ad animæ functiones idoneum, & sol intelligentiæ ortus est mihi, ut scirem viam iustitiæ, & semitas perfectionis. Crescen-

te autem ætate, creverunt erga me
 misericordiæ ejus, & cum sacrilega
 perversitate, ab eo recessissem, in regi-
 onem dissimilitudinis, præferens Crea-
 tori, creaturam, hostem Redemptori,
 ipse me attraxit, ad se, & in sortem
 suam vocavit, ut filius ejus, per gra-
 tiam, nominarer, & essem. Vicit ni-
 mirum malitiam meam, charitas ejus,
 & benignitas ipsius, peccata mea supe-
 ravit. Quid retribuam tibi, Domine
 DEUS meus, pro omnibus, quæ tribu-
 isti mihi, aut quis me separabit, à cha-
 ritate tua. Tu propitiatus es, iniqui-
 tatibus meis, tu liberaſti me, de inimi-
 cis meis, tu sanasti, omnes infirmitates
 meas, tu sanguine pretiosissimo Filij
 tui, redemisti, de interitu vitam me-
 am, & replevisti animam meam, omni
 benedictione. Tu in dulcedine tua,
 mensam parasti mihi, habentem omne
 delectamentum, mensam prorsus Di-
 vinam, in qua anima mea, de te, Deo
 meo, saturatur. Et quis sum ego, vi-
 lissimus terræ vermiculus, ut inven-
 rem gratiam, in oculis tuis, & tot bo-

nis cumularer? Tuam itaque magnificientiam, in æternum cantabo, gratias tibi agens, pro tam innumeris, & maximis beneficijs, quæ ex momento conceptionis meæ, usque ad hanc horam, de tua benignitate, suscepi, pro innumerabilibus, quæ in hoc temporis momento, à te suscipio, pro infinitis, quæ usque ad finem vitæ meæ, & per totam æternitatem, sum accepturus. Omnia præterea beneficia, quibuscunque concessa, tanquam mea suscipio, & eo magis te laudo, & glorifico, quominus quidam ex illis, quibus benefecisti, te agnoscunt, & benedicunt. Et hæc quidem præstitisti mihi, quamvis ego pulvis, & cinis, & vapor, ad modicum parens, injurius tibi fuerim, & quotidie peccatis meis, contristaverim spiritum tuum. O quam doleo, ex amore tui, quod unquam offenderim te, & mandata tua prævaricatus sim! Ignosce Domine, placare Domine, attende, & fac, propter te ipsum, & per merita dilectissimi Filij tui, Redemptoris nostri, in quo tibi

bene complacuit, per ejus acerbissi-
 mam Passionem, & mortem atrocissi-
 mam, quâ peccata nostra portavit, per
 merita quoque, & intercessionem,
 Sanctissimæ Virginis Mariæ, Sanctorum
 Angelorum, & omnium Electorum
 tuorum, nè reminiscaris iniquitatum
 strarum. Perveniant voces, & sin-
 gultus, omnium ad te clamantium, ne-
 que perdas nos, cum iniquitatibus no-
 stris, quia tu es DEUS, longanimis,
 & misericors, & placabilis, super ma-
 litias hominum, & secundum multitu-
 dinem bonitatis tuæ, pœnitentiam de-
 crevisti, ijs, qui peccaverunt, & verè
 contritis promisisti remissionem. Me-
 mor esto fragilitatis nostræ, & charita-
 tis tuæ, & projice in profundum maris,
 omnia delicta nostra, quibus iram tu-
 am provocavimus, ut loti & reconcili-
 ati, in sanguine Filij tui, canamus
 laudes tuas, in sempiternum. Respice
 in faciem Christi tui, & nè avertas
 vultum, electorum tuorum, tecum in
 cælo regnantium, per quorum merita,
 & intercessionem, obsecro clementiam
 tuam,

tuam, ut mihi miserabili servo tuo, omnia necessaria, ad salutem animæ, & corporis, largiri digneris. Da sincerè, & perseverantèr, servire tibi, fortia agendo, & dura tolerando. Da contemptum omnium rerum terrenarum, veramque resignationem, & cum tua voluntate concordiam. Reple totum mundum fide, ac scientia tua, & omnes infideles, ad te converte. Da inimicis meis quos intimè diligo, amorem tuum, & pacem quam Filius tuus, reliquit nobis. Da fidelibus defunctis, ut ad te cito perveniant, atque regnantem videant, in sæcula sæculorum. Commoveant Paterna viscera tua Domine, pericula nostra, & propter gloriam nominis tui, libera nos, ab omni malo, neque enim in justificationibus nostris prosternimus preces ante faciem tuam, sed in miserationibus tuis multis, & in immensa charitate, unigeniti Filij tui, quem pro nobis tradidisti, ut esset salus, & propitiatio nostra. Hujus meritis onustus ad te accedo, & ea offero tibi, simul cum meritis, & precibus,

Beatissimæ Genitricis ejus, omnium-
que Angelorum, & Sanctorum, in gra-
tiarum actionem, pro universis bene-
ficijs tuis, quæ mihi misericorditer con-
tulisti. Memento omnium, pro quibus
sanguinem suum pretiosum effudit, di-
lectus Filius tuus, & præsta, per mor-
tem, & Passionem ipsius, ut peccato-
res, & tepidi ad vitam bonam, & fer-
ventem convertantur, ut tentati, &
afflicti, liberentur, & consolentur, ut
Sancti in Ecclesia tua multiplicentur,
perfectèque vivant, & perseverent, ut
ego tandem ad apicem sanctitatis, sem-
per aspirem, plenusque meritis, mor-
riar, liber ab omni culpa, & pœna
obligatione Amen.

Alia Oratio.

COnfitebor tibi, in toto corde meo,
DEUS meus, bonitas infinita, &
narrabo mirabilia tua, quia magnifi-
cata est hodie, misericordia tua super
me, & liberaisti animam meam, à per-
ditione. Et unde hoc mihi, ut recor-
deris mei, præveniens me tot benedi-
ctioni-

tionibus dulcedinis, & charitatis tuæ.
 Tu ab æterno dilexisti me, & in splen-
 doribus Sanctorum, vidisti, tenebras
 meas. Tu me ex nihilo condidisti, &
 è numero pereuntium misericorditer
 exemisti. Tu ex utero matris meæ, fa-
 ctus es Protector meus, & segregasti
 me, in servum tuum. Tu propter me,
 omnia gubernas, & regis, & quæ ad
 me pertinent, efficacissima providentia
 disponis. Tu me hac die, ex innumeris
 ereptum periculis, mirabilibus benefi-
 cijs cumulasti, & in me ostendisti, di-
 vitias tuæ immensæ bonitatis. Et quis
 sum ego, ut invenirem gratiam in ocu-
 lis tuis, meque respicere dignareris,
 de sublimi throno gloriæ tuæ, & hæc
 dona tua largiri mihi? Tu Potētissimus,
 & immensus, ego vapor, & nihil, tu
 sapientia, & lumen, ego tenebræ, &
 ignorantia, tu fons bonitatis, ego ver-
 mis, & non homo, & omnes justitiæ
 meæ, sicut pannus menstruata. Et ta-
 men non cessas diligere me, & egenam
 animam meam, bonis tuis locupletare.
 Ideo benedicam te omni tempore,

quia eripuisti animam meam de morte, & pedes meos à lapsu, cum tamen ego miserabilis peccator, & servus ingratus, contristaverim hodie spiritum tuum, peccatis meis. Et nunc Domine, pœnitet me peccasse, miserere mei, secundum magnam misericordiam tuam. O! si nunquam te offendissem, o si præcepta tua nunquam transgressus fuisssem! Atque utinam DEUS meus, cras tibi perfectiùs serviam, & omnia creata spernens, te unum timeam, & diligam. Quid enim mihi prodest, quod hodie talia dixerim, viderim, audierim. Tu solus potes animam meam satiare, DEUS cordis mei, & pars mea DEUS in æternum. Quando venies ad me, & me totum possidebis! Veni Domine, fac me unum tecum, & cor meum abstractum, ab omni creatura, tibi soli impollutum conserva. Nam quid proderit universa vanitas, cum veneris sicut fur, in nocte? Revela igitur oculos meos, ut considerem novissima mea, & prospiciam saluti meæ. En vitæ, & salutis, incertus, perve-

perveni ad finem hujus diei. In manus tuas commendo, spiritum meum. Redime me, & miserere mei, quia unicus, & pauper sum ego. Credo tibi summa veritas, in te spero, salus mea, te diligo, & amplector, toto corde, tibi que renovo vota mea, omnia enim quæ fecisti, magna voce clamant, ut diligam te, cum sis unicum, & omne bonum meum. Aperi mentes omnium, quos creasti, ut tibi Regi sæculorum immortalis, honor, & gloria, ab omnibus tribuatur. Radicitus extirpa omne peccatum, & vitium, discordiam, infidelitatem, errores, opiniones: peccatoribus, pœnitentiam, justis perseverantiam, afflictis consolationem, inimicis nostris charitatem, largire. Sit in omnibus patientia, benignitas, humilitas. Miserere omnium animarum, in pace quiescentium, & da illis requiem sempiternam. Tu suavissime amator omnium, diei, ac noctis vices, summa sapientia disposuisti, ut diurno labore fessas vires, somni quies reficeret. Sed licet capiendæ quieti tributa sit nox,

an

an non licebit etiam noctu, te diligere. Amor enim quies est animi, & te amare, quiescere est. In tuum igitur amorem tanquam in somnum suum, incumbat cor meum, o meta! o finis! o centrum animæ meæ! Veni Domine, amator, & tu mihi somnia dispone. Da mihi, trahere anhelitum, in mellifluo corde tuo, da sanctè, & pudicè, somnum trahere, sitque omnis respiratio mea, omnium Angelorum, affectibus imbuta. Vos Angeli Sancti, vigilantes cæli, agite pro me, dum dormio, excubias amoris, & vestro semper vigilantia, affectu, summum bonum, diligite. Sit opus vestrum, quod meum est votum, & amabilis DEUS, nunquam intermisso amoris sacrificio, ab omnibus colatur. Tu Angele gloriose, qui mei curam suscepisti, assiste mihi hac nocte, hostemq; nostrum comprime, nè noxijs Phantasmatibus, animæ, & corporis puritatem lædat. Tueri me ab omni malo, & crastina die, statuto tempore, excita, ad reddendas DEO laudes. Adeste Sancti, & Electi Dei,

Dei, vos præsertim Patroni mei N. N. supplete vices, fragilitatis meæ, & custodite, hujus noctis vigilias, super me, Deumque pro me laudate, dum ego dormio, & me ab omni malo defendite. Tu denique Beatissima Virgo, Mater pulchræ dilectionis, protege me hac nocte, sub umbra alarum tuarum. Monstra apud tuum Filium, te esse Matrem, Matrem gratiæ, & misericordiæ, mihi que impetra, cor castum, & purum, ut in eo quiescat, hac nocte, dilectus Filius tuus, Dominus noster, qui pascitur inter lilia, & qui est benedictus, in sæcula, sæculorum Amen.

*Protestationes ad DEVM sæpius
renovande.*

IN conspectu Divinæ Majestatis tuæ, Omnipotens DEUS, ac totius Curiaë Cælestis, ego miserabilis creatura, & indignissimus peccator, considerans, & volvens animo, infinitam bonitatem, & misericordiam tuam, qua dignatus es, de me ab æterno, tam amanter cogita-

gitare, & in tempore creare, ad imaginem, & similitudinem tuam, & quando venit plenitudo temporis, redimere me, sanguine, unigeniti Filij tui, toties mihi parcere, & quotidie peccantem, benigne tolerare, usque ad diem hunc, expectans me, ad pœnitentiam, post iniquitates, & scelera mea: itemque considerans, me tam fœde, violasse fidem, in Baptismate datam, toto corde, & spiritu, ante thronum, justitiæ tuæ prostratus, me reum ultro profiteor, læsæ Majestatis Divinæ, reum mortis, & passionis, JESU Christi, Filij tui, ac propterea, æternis supplicijs, cum rebellibus angelis, puniendum. Sed postea convertens me, ad Thronum misericordiæ tuæ, quoniam benignus, & misericors es, & præstabilis super malitia, omnia peccata mea, omnium verè pœnitentium affectu, detestans, & de his dolens, ac veniam humiliter petens, per merita passionis, Domini mei, JESU Christi, quibus innitor, professionem fidei, & sancta proposita, renovo, quæ in Baptismate promi-

promiseram, iterumque renuntio, diabolo, mundo, & carni, eorumque pompis, vanitatibus, suggestionibus, & concupiscentijs, omnibus diebus, vitæ meæ, avertens me, ab omni creatura, & convertens me in toto corde meo, ad te, Dominum DEUM meum, qui nunquam despicias, revertentes ad te. Dixi: Confitebor tibi adversum me, injustitiam meam, & tu remisisti iniquitatem peccati mei. Dixi, & mox eructasti verbum bonum, dicens, remittuntur tibi peccata tua, quoniam rogasti me, quoniam dilexisti me. Ex quis non diliget te o infinita Bonitas! Aperis enim mihi cataractas, miserationum tuarum, & torrente misericordiæ tuæ, mundasti, & inundasti me. Ideo propono, & statuo, irrevocabiliter, tibi soli servire, teque medullitus diligere, nunc, & in æternum. Quod si contingat, vel ex satanæ incurso, vel ex lapsu humanæ fragilitatis, me quidquam cogitare, loqui, vel facere, quod huic deliberationi, contrarium sit, ex nunc, propono, tua favente gratia, statim resurgere, sanctique propositi

viam, ferventiùs arripere, & tibi jugiter adhærere. Tu Domine, qui universorum es cognitor, tu nosti, quia amo te. Nè quæso despicias, hoc sacrificium, contriti cordis, & præsta, ut hæc desideria, quæ tua inspiratione concepta, nulla possint, tentatione mutari. Profiteor, & protestor, coram te, DEUS meus, & coram Angelis, & Sanctis tuis, me in hac vera, & Catholica Fide, & vivere, & mori velle, quam Sancta, & Apostolica, tenet Ecclesia, & confitetur, pro qua millies mori, paratus sum. Ignosco omnibus, sincero corde, qui quovis modo, injuriam mihi aliquam, sive molestiam, attulerint: omnesque rogo, ut vicissim, ignoscant mihi, & si aliquod, remanet in me peccatum, quod in confessione, vel non ritè confessus sum, si aliqua obligatio, cui non satisfecerim, revoca ea in mentem, o scrutator cordium, ut confitear, & satisfaciam, antequam veniat nox, in qua nemo potest operari. Agnosco, & fateor, me hætenus non vixisse, in sanctitate, & justitia,
coram

coram te, sicut status, ad quem me vocasti, & beneficia tua, multa nimis, exigebant. Agnosco, inquam, & doleo, quantum possum, quod te dereliquerim aliquando, fontem aquæ vivæ, & tui oblitus fuerim, vita mea, qui omni momento, quasi cæterorum oblitus esses, nunquam oblitus es mei. Et nunc Domine, ad te revertor, & propono, deinceps, tibi soli, & nō mihi vivere, & omnes justificationes tuas, custodire. Tu eris mihi in Deum, & ego tibi, in servum fidelem, usque ad extremum vitæ meæ. Si quis insidietur hostis, si quis allatret, pelliciat, incan-
 tet, teneat, & surrepat, tu eris timor meus, spes mea, amor meus. In te confido dulcissime Salvator, minima enim guttula, pretiosissimi Sangvinis tui, in Cruce effusi, sufficiens est, pro redemptione, totius mundi; sub tuo præsidio, & Beatissimæ Matris tuæ, omniumque Angelorum, & Sancto-
 rum, & vivere cupio, & mori volo, absque ulla hæsitatione, aut desperati-
 one, ob multitudinem, & gravitatem,

D

pecca-

peccatorum meorum. Hac munitus
 protectione, tuus ero, neque irride-
 bunt me, inimici mei, etenim universi,
 qui te expectant, non confundentur.
 Paratum cor meum DEUS, paratum
 cor meum, facere semper voluntatem
 tuam, eamque omni affectu, beatorum
 spirituum, te ardentissime amplecti,
 atque omnium creaturarum vocibus,
 te laudare, & glorificare. Hoc arden-
 tissimum, votum meum, & desiderium,
 respice Clementissime DEUS, dum
 tempus est miserendi, & cor meum su-
 scipe, in holocaustum, cunctosque ho-
 mines, & quaecunque externam ima-
 ginem, in eo extingue, & me in corde
 omnium hominum, ut mihi mundus
 crucifixus sit, & ego mundo. Oculi
 mei te solum videant, & in te omnia;
 aures meæ non audiant vocem alieni,
 sed tuam duntaxat, lingua mea, & la-
 bia mea, te solum loquantur, tuasque
 laudes jugiter resonent; manus meæ
 amplectantur te: pedes mei ad te gra-
 dianter, omnes vires meæ, in tuis vul-
 neribus, & morte tua, consumantur,

omnia

omnia denique membra, & ossa mea, dicant, Domine, quis similis tibi? Abnego omnia terrena hæc, quia in te uno omnia habeo, abnego me, quia tuus ego sum, & vivo ego, jam non ego, vivis autem in me, JESU Christe, & diligo te, ex toto corde meo, ex tota anima mea, ex tota mente mea, ex totis viribus meis. Da ut ab omnibus contemni, & abijci, desiderem, nulli placere appetam, nulli verear displicere, nisi tibi: nec quidquam concupiscam, nisi gratissimam voluntatem tuam. Hæc sunt desideria mea, hæc vota, in quibus contestor, coram te, DEUS meus, me vivere, & mori velle, hæc quotidie, & omni momento, renovare intendo, nec unquam te favente, ea revocabo. Quod si, vel morbi, vel hostis fallacia, quidquid dixerò, vel cogitavero, huic voluntati, & deliberationi, contrarium, id nullum esse cupio, in tribunali tuo, Justissime DEUS, qui voluntatem timentium te, semper exaudis, idque omninò detestor, abominor, abjuro, & abrenuntio,

Da

nihil

nihil de me ipso præsumens, sed in sola spe gratiæ, & protectionis tuæ, confidens. Hanc autem voluntatem, paratus sum sanguine meo, signare, & pro te millies mori, ut tibi vivam, Dulcissime JESU, cui omnia vivunt, & in te moriar, qui pro me mori, dignatus es. Amen.

De Oratione Mentali.

Nulla dies præterire debet, qua per horam, vel saltem per mediam, huic orationi, non incumbas, alioquin, nullum, vel admodum exiguum, facies in virtute profectum. Hæc est enim, basis, & fundamentum, Christianæ perfectionis. Hæc hominem sæculo disjunctum, omnem mortalitatem transilire facit, & Angelicis Choris, sociatum, ad celestium gaudiorum consortium, & ad Beatissimam cum Deo, unionem, attollit. Nemo paruit vitijs, nemo carni obsecutus est, nemo desertor Religionis fuit, qui non ante, orationis studium projecit, & conculcaverit. Mentalem itaq; Orationem, inchoaturus, præmisso signo Crucis, & versiculo. Deus in adjutorium &c. cum Glo-

Gloria Patri &c. Deum præsentem, fide viva concipies, circa te existentem, intra te manentem, per essentiam, præsentiam, & potentiam, cordis tui intimos recessus penetrantem, opus quod facis agnoscentem, & ad ipsum te adjuvantem. Tum Deum præsentem, adorabis, actumque contritionis elicies, & gratiam bene orandi, postulabis, sequenti, vel simili formula.

Oratio Preparatoria.

Domine, lux sapientissima, bonitas ineffabilis, potestas insuperabilis, qui universorum es conditor, conservator, & rector, qui es felicitas, & beatitudo nostra, in quo speramus, peccatorum veniam, meritorum gratiam, præmij gloriam, quæ omnes, beatorum spirituum ordines, amant, laudant, & admirantur: ecce ego, indignissimus peccator, adsto coram te, ut de tua infinita perfectione gaudeam, meque tibi omni conatu subijciam. Te igitur adoro, te veneror, te omni honore, & laude prosequor, ac dignissimum iudico, qui ab omnibus Angelis, & homi-

nibus, & ab universis creaturis, magnificeris, & in summo pretio, habearis. Doleo autem ex toto corde, quod offenderim te, & summoperè desidero, emendare, quod feci. Ignosce mihi DEUS meus, & adesto propitius precibus meis, & meditationi meæ, cui nunc incumbere intendo, ad maiorem gloriam, & honorem nominis tui, ut placeam tibi, & consulam, salutis animæ meæ. Nè despicias me, Domine, nè avertas faciem tuam à me, sed da mihi, abundantissimam gratiam tuam, ut coram te adstare possim, hac hora, quemadmodum tibi placet, Domine DEUS. Offero tibi, & consecro, animam meam, ut eam perficias, & extollas, ad te. Offero memoriam, ut eam, sanctis cogitationibus imbuas: Offero intellectum, ut luce tua illustratus, considerare possit, mirabilia tua, offero voluntatem, ut amore tuo inflammata, affectus tibi gratos, & mihi congruos, eliciat, offero tibi omnes cogitationes meas, omnia verba, & opera, ut in his, quæ tibi sunt placita,

sem-

semper occupentur, offero corpus meum, & vitam meam, ut de me, secundum beneplacitum tuum, in tempore, & in æternitate disponas. Respuo omnes curiositates, & distractiones, tibiq; soli, & mihi attendere propono, ac si tu, & ego, soli essemus, in hoc mundo. Lubens patiar, omnes desolationes, & ariditates, quoniam indignus sum consolatione, & dulcedine. Hanc autem Meditationem, offero tibi, in unione meditationum, & Orationum, Domini mei, JESU Christi, ut ipse suppleat, defectus meos, & bene orandi gratiam, mihi tribuat. Adjuva me, Domine DEUS meus, per merita, & intercessionem Beatissimæ Virginis Mariæ, omniumque Angelorum, & Sanctorum tuorum. Virgo Maria, Angele mi Custos, Sancti mei, advocati, assistite mihi, & orate pro me.

Meditationem terminabis, addita in fine Oratione Dominica, vel aliquo Psalmo, sive alia oratione vocali, cujus formula hæc esse poterit.

Oratio

Oratio post Meditationem.

Domine DEUS, & DEUS meus,
 Ego pulvis, & cinis, in tot periculis
 constitutus, quam frigide, & distractè,
 ob negligentiam custodiæ, sensuum
 meorum, & cordis mei, tecum locu-
 tus sum; coram Curia tua universa,
 quæ toto corde te laudat, sicut, & ani-
 mæ omnes justæ. Miserere mei, in-
 fantis, omnium egeni, vix valentis, in
 summis periculis, opem tuam implora-
 re. Suscipe, si quid boni feci, gratia
 tua, in unione meritorum, vitæ, &
 mortis, Beatissimæ Virginis, & Sancto-
 rum tuorum? Dispone de servo tuo,
 sicut tibi visum fuerit, sive consolari
 libeat, sive relinquere me, tua volun-
 tas fiat. Dignus verè sum, si me respi-
 cis, quem derelinquas, sed si te, & vul-
 nera tua, erit unde me non despicias,
 ut sit misericordia tua, super omnia
 opera tua. Da mihi dulcissime JESU
 ut quod me docuisti, ad salutem, &
 solatium, animæ meæ, pro amore tuo
 promptè, exequar, cum manifestè co-
 gnove-

gnoverim, voluntatem tuam. Tu scis, qui nosti omnia, ardentissimum desiderium, & quod abominer, imperfectiones meas. Sed nisi miseratio tua, magna sit super me, peribo utique, in infirmitate mea. Quomodo enim mihi, qui nihil sum, & nihilo peius, confidere potero? Esto refugium meum, Domine DEUS meus, fiducia mea, & da mihi, spiritum bonum, ut omnia opera mea, perfecte faciam, sicut proposui, nè tot exempla tua, & documenta, sint mihi, in singultum, & dolorem cordis, in die Judicij, quod toties me visitaveris, & visitatio tua, non custodierit spiritum meum, toties me paveris, & non sum saturatus, toties vitam dederis, & tamen mortuus sum. Nè despicias servum tuum, clamantem ad te, & te sequi desiderantem. Ecce enim, de manu tua cruces, & adversitates, libenter accepto, ut tibi, & Sanctis tuis, similis sim, ut pro peccatis meis satisfaciam, ut te perfecte amem, ex tota anima mea, o bonitas infinita! Pone te, ut signaculum,

D 5

super

super cor meum, ut signaculum, super brachium meum, ut nemo mihi, deinceps molestus sit, ut agnoscant, omnes qui viderint, quoniam servus tuus, ego sum, tibi soli vivere, & mori cupiens, & omnes te glorificent, cum Patre, & Sancto Spiritu, laudabilem, & gloriosum, in sæcula, sæculorum. Amen.

De Examine Conscientiæ.

Perfectio, & puritas Christianæ vitæ, hoc à nobis exigeret, ut quæcunq; agimus, attentè, semper examinaremus, ita, ut vita nostra, continuum examen esset, sed quia paucorum, est hæc virtus, id saltem in fine, cujuslibet diei, agendum est. Die igitur peracta, antequam cubitum eas, singulas actiones tuas, internas, & externas, cum omnibus circumstantijs, attentè discussies, & quas, à regula perfectionis descivisse reperies, acri censura, coram Deo reprehendes. Hoc autem examen, inchoaturus, gratias ages DEO, pro beneficijs, communibus, & particularibus, tum præteritis, tum illius diei, imò & pro futuris, pro occultis, item

item & ignotis, idque brevissimè, & ferventer, hac, vel simili ratione, addita petitione gratiæ, qua culpas tuas dignoscere, valeas, & defectus investigare.

Oratio ante Examen.

GRatias tibi ago, Domine DEUS meus, pro universis beneficijs tuis, quæ mihi hodie, & toto tempore, vitæ meæ, misericorditer contulisti. Tu enim Benignissime Pater, ex æternitate vidisti, & dilexisti me, tu ex nihilo, me creasti, & usque ad hanc horam, conservasti, atque propter me, omnia sapientissimè regis, & gubernas, tu me redemisti, pretioso sanguine, Filij tui, tu me Christianum fecisti, atque ab innumeris peccatis, & defectibus, præservasti, vitæ perfectæ desiderium dedisti, bonos instinctus, & Sanctas inspirationes immisisti, emandationem meam, patientissimè expectasti, longiusque spatium tibi serviendi, & lucra spiritualia congregandi, tribuisti. Sit nomen tuum benedictum, in sæcula, quia gratiæ tuæ munitus præsidio, à multis

multis hodie calamitatibus, & miserijs, corporalibus, & spiritualibus, te præservante, liber evasi. Pro singulis etiam naturæ, & gratiæ, donis, his præsertim, quæ ipse cæcus non video, & ignoro, pro innumeris beneficijs, mihi, & omnibus creaturis, exhibitis, & exhibendis, ex totis præcordijs meis, gratias ago, & meo, & omnium creaturarum, nomine, & affectu, atq; id continuare desidero, purè propter te, in omnem æternitatem. Nunc verò Domine, his beneficijs tuis, per eandem charitatem tuam, erga me, aliud adijce, & adjunge, illuminans tenebras meas, & gratiam tribuens, omnia peccata, & negligentias meas, agnoscendi, detestandi, & emendandi, ut tibi deinceps per omnia placeam, & dignos faciam, pœnitentiæ fructus.

*Expedita conscientie discussione, summo cum fervore, doloris ætum elicies, non solum de occurrentibus noxijs, & imperfecti-
nibus, sed etiam de peccatis occultis, & de reliquis, totius vite, & alienis, qui dolor, ex amore Dei profectus ipsi Deo summopere placet, Formula hæc esse poterit.*

Ora-

Oratio post Examen.

IN his, & alijs multis, quæ propter
 læcitatem meam, ignoro, peccavi,
 coram te hodie, Domine DEUS, mise-
 ricordia mea, & pro omnibus bonis,
 quæ tribuisti mihi, mala tibi retribuui,
 & ingratitude. Doleo de his o-
 mnibus, & ea detestor, super omnia,
 alia mala, propter te Domine, quem
 super omnia bona diligo, nec mea so-
 lum peccata, maximopere mihi displicent,
 sed & omnia, totius mundi, quæ
 utinam impedire possem, ut omnes te,
 infinite amabilem agnoscerent, ama-
 rent, & glorificarent. Ignosce mihi,
 & omnibus, Pater misericordiarum,
 omnes enim offensas hujus diei, & to-
 tius vitæ meæ, ac totius mundi, in
 abyssum projicio, infinitæ misericordiæ
 tuæ, & per mortem Filij tui, rogo te,
 dimitte, quidquid peccatum est, & da
 gratiam, ut deinceps, purius vivam.
 In te confido Domine, & sperans, in
 adjutorio gratiæ, firmiter propono,
 non peccare amplius, & mores meos
 emen-

emendare. In satisfactionem verò, peccatorum meorum, offero tibi, DEUS meus, vitam, passionem, crucem, & mortem, Domini mei, JESU Christi, merita Beatissimæ Virginis Mariæ, & omnium Sanctorum, illorumq; plenarias, & tibi gratissimas, satisfactiones, totam insuper vitam meam, animam meam, & corpus meum, ad omne beneplacitum tuum, in tempore, & in æternitate, cum vero, insatiabili desiderio, plenius justitiæ tuæ, satisfaciendi, & hanc mulctam quam mihi impono.

Mulcta autem hæc erit, Orationem Dominicam, cum Angelica salutatione, vel aliquem Psalmum, flexis genibus recitare, terram aliquoties osculari, cilicio per diem carnem affligere, & alia, ejusdem generis, secundum dictamen conscientie, & gravitatem delictorum.

De Generali quadam Confessione spiritualiter peragenda.

Optimum exercitium, ad purgandam animam

animam à peccatis est, aliquoties in anno, ante præcipuas festivitates, generalem totius vitæ confessionem, non Sacramentalem, sed Spiritualem, peragere. Differt hæc, à Sacramentali, quod illa Sacerdoti, hæc Deo fit, illa suos habet effectus, ex opere operato, ut ajunt Theologi, hæc ex opere operantis, illa necessaria, supposito peccato, hæc voluntaria est, illa voce, hæc solo corde, fieri potest, illa à Christo instituta fuit, in novo testamento, hæc ab ipso mundi exordio, incepit, eaque utebantur antiqui Patres, in lege scripta, estque etiam in usu, in lege gratiæ, imò Sacramentali præmitti debet, ad quam, nemo accedit, quin prius recognoverit admissa peccata, in amaritudine animæ suæ. Commoda quæ adfert, plurima sunt. Per hanc enim, disponitur animus, ad Sacramentalem, acquiritur sui notitia, augetur meritum, & quin plus otij in hac est, agendi cum Deo prolixius, quam cum Sacerdote, indulgere mens potest, actibus contritionis, peccatiq; gravitatem, magis perpendere, & detestari. Methodus servanda in hac confessione hæc erit.

Excitato ardenti desiderio, hanc tanti momen-

dem remissis. Percurre omnia, recolendo diversa vitæ tempora, ab usu rationis, usq; ad hanc horam, sequendo seriem præceptorum Dei, & Ecclesiæ, teq; severissimè abjurga, & in terram abijce, cum maximo affectu doloris, & humilitatis.

Sic autem, per præcepta Decalogi, discurre, addendo singulis, quæ specialiter, in hac materia, commisisti.

Domine DEUS meus, confunder, & erubesco, levare faciem meam ad te, quoniam iniquitates meæ, multiplicatæ sunt, super caput meum, & delicta mea, creverunt usq; ad cælum. Sed sto coram Iudice reus, coram Redemptore servus, ideoq; attollo mentem, & spem meam, ut propitius fias, peccatis meis, & deleas omnes iniquitates meas. Converte, me & convertar, quia tu Domine, DEUS meus es. Fac ut memor sim, unde exiverim, & pœnitentiam, ac prima opera, faciam.

1. Debui Creatorem meum amare, ex toto corde meo, idem tecum velle, & nolle, & in te solo, confidere, &

E

tibi

tibi credere. Sed heu? Divisum fuit cor meum, & posui carnem, brachium meum, & ad nihilum redactus sum. Dereliqui te, fontem aquæ vivæ, & fodi mihi, cisternas dissipatas, nec me humiliavi, sub potenti manu tua, cum in te solo, vivere, & moveri possim. Insuper hæc, & hæc, &c. commisi.

2. Quemadmodum autem, cor meum abiit in vanitates, ita etiam lingua mea, inflammavit rotam nativitatis meæ, quæq; debuerat esse, lignum vitæ, te laudare, de te loqui, ô omne bonum, mihi alijsq; mortis occasionem dedit. O Beatum, & perfectum, qui non est lapsus, in lingua. O ter felicem! qui vota sua, quæ distinxerunt labia sua, tibi perfecte reddidit, ego verò multipliciter ea violavi, nomenq; tuum, minimè sanctificavi.

3. Atq; utinam saltem, delectatus in te fuisset, & sabbatū delicatum servassem, in officijs tuis fervens, & exultassent labia mea, cum cantarem tibi, & in voce laudis tuæ, omnia ossa mea, jubilassent! inebriata enim esset terra mea,

mea
tuæ,
fert
omn
rò, l
cont
tione
hi in
defec

4.
cibus
tuam
Prop
obed
Spiri
parvi
xisti,
autem
gressu
cessari
vi, cu
ex mi

5.
bet!
facto l
sed pa

mea, & locupletata, in ubertate domus
 tuæ, pingvia facta fuissent, speciosa de-
 ferti, & campi potentia animæ meæ,
 omnibus bonis abundarent. Nunc ve-
 rò, lingua mea, adhæsit faucibus meis,
 contabuerunt omnia ossa mea, & ora-
 tiones meæ, & sacrificia, facta sunt mi-
 hi in peccatum, propter innumeros,
 defectus meos.

4. Quod si te, ut par est, dilexissem,
 cibus meus fuisset, facere voluntatem
 tuam, id est superiorum meorum.
 Propter te, alacriter, & perseveranter,
 obedivissem illis, neq; dura cervice,
 Spiritui Sancto, aliquando, etiam in
 parvis, restitissem, tu enim ad illos di-
 xisti, qui vos audit, me audit. Hoc
 autem mandatum multis modis, trans-
 gressus sum, sed & subditis meis, ne-
 cessaria non providi, onera non porta-
 vi, cum tu tibi fieri dixeris, quod uni
 ex minimis tuis fit.

5. O quantus hic esse stimulus de-
 bet! nè ullum cogitatione, verbo, &
 facto lædam: nè alicui injuriam faciam,
 sed pacem servem, quoad fieri potest,

cum omnibus, pacem tuam, quæ exsuperat omne gaudium! sumus enim filij tui, qui solem tuum oriri facis, super bonos, & malos. Ego verò legis immemor, naturalis, quæ mihi fieri ab alijs noluissem, ipsis feci, vixq; amicos, & benevolos dilexi, quod etiam Ethnicici faciunt, & feræ. Te nimirum imitari recusavi, & in numero filiorum tuorum, censerì, cum ipse præceperis, dicens. Diligite inimicos vestros, ut sitis filij, Patris vestri, qui in cælis est. Quod si jubes, inimicos amari, quem debeo odisse?

6. Certè in extremo Judicio, à te agnosci, & inter filios tuos, computari vellem. Non studui tamen, longè fastidiosa, ut mundo corde te, aliquando viderem, nec diligentissima oculorum, & sensuum custodia, repuli à me jacula ignita, igne illo candentia, qui ad interitionem devorat, & sancta omnia, profanat. Violavi templum tuum, corpus meum, & denigrata est super carbones, facies mea. Libera me, ab omni

omni immunditia, mentis, & corporis, tu qui solus, de immundo, mundum facere potes: carnis concupiscentiam, longè fac à me, & spiritum rectum, innova in visceribus meis.

7. Restringe etiam, concupiscentiam oculorum, nè cupiditate, radice omnium malorum, accensus, aliena capiam, abscondam, retineam, damna inferam, nè rem proximi desiderem, nè malum illi aliquod, inferri patiar, qui juxta mandatum tuum, tribuere debeo mea, ac omnia potius derelinquere, quàm perdere te.

8. Et hæc quidem, displicent Majestati tuæ, sed longè magis, os bilingue, & mendax, quia veritas es, DEUS meus, uti & proximum, lingua percutere, famam illius denigrare, servum alienum judicare. Te enim dirè vulnerat, qui sic pungit fratrem suum, te cruciat, qui affligit, & contemnit illum, quem tanto pretio, redimere dignatus es. Hæc sciebam, Salvator meus, hæc credebam, & credo, & nihilominus, contrarium operatus sum, lingvâ Christianus,

nus, moribus autem peior infideli.
Eodem modo te accusabis, de commissō,
contra præcepta Ecclesiæ, & de quo grava-
tam sentis, conscientiam tuam.

Sic facta accusatione, gravitatem pecca-
torum tuorum ponderabis, ut ea efficacius
detesteris. Peccasti enim, contra Deum, qui
est summum bonum, quo sperto, ad umbram
boni conversus, in rebus caducis, tuam po-
suisti felicitatem, quod est genus quoddam,
idololatriæ. Elicies actum odij, & abomi-
nationis, erga teipsum, qui solus auctor pec-
cati es, & peccando, majora tibi damna in-
tulisti, quam unquam inferre, omnes demo-
nes, & homines, potuissent, quamvis hostes
fuiſſent capitalissimi, & crudelissimi. Qua-
re te odio habere debes, atq; hostilem in mo-
dum persequi, dicendo, in corde tuo. Hæc
cine reddidisti Domino, stulte, & insipiens?
Nunquid non ipse est, Pater tuus, qui posse-
dit, & fecit, & creavit te.

Sequitur contritio, cum firmo proposito
non peccandi amplius, & faciendi fructus
dignos pœnitentiæ. Addeſ autem, sequen-
tes affectus, vel similes.

Aqua

A Quæ multæ, peccatorum meorum, non potuerunt extinguere, charitatem tuam, DEUS meus, quam tot, tantisq; beneficijs, declarare dignatus es. Ideo memoria, memor ero, tantæ tuæ charitatis, & tabescet in me, anima mea, præ desiderio tui, & liquecet sol justitiæ, ad radios amoris tui. Utinam sicut fluit cera, à facie ignis, sic pereant hodie peccata, & imperfectiones meæ, à facie tua, DEUS meus. Lavi pedes meos, nunquam amplius, inquinabo illos. Non faciam, Bone JESU, gratia tua, sed diligenter cavebo, nè quid in me displiceat, purissimis oculis tuis; ambulabo coram te, corde perfecto, & gratissimum mihi erit, quidquid sanctissimæ voluntati tuæ, libitum erit, omnes peccandi occasiones, evitabo; & virtutibus studebo, quas antea, per vitia contraria, violavi, ut in quo, te magis contempsi, magis honorem. Id profiteor, hodie, coram te, & universa Curia tua cælesti, testem illam invocans, desiderij mei, & adjutricem, infirmitatis meæ.

*Facta contritione, te ad pœnam, in hac
vita subeundam offer, humiliq; prostratus dic,
confusus, & dolore plenus.*

Domine, Pater vitæ meæ, nulla est
in mundo, condigna pœna, demer-
itis meis, nulla, quâ possim, satisfacere
malis, quæ imprudenter commisi.
Si hoc tibi gratum scirem, libenter me,
morti traderem, in pœnam delictorum
meorum. Sed quia me interficere non
possum, nec debeo, tu me miserrimum
occide, aut mitte Angelum, gladiator-
em tuum, qui de me vindictam sumat.
Arma creaturarum tuarum, excita
contra me, ut vindicent causam tuam.
Irruant in me, omnes ægritudines,
dolores, adversitates, injuriæ, contem-
ptus, calamitates: omnia lubenti ani-
mo, sustinebo, per gratiam tuam,
dummodo in fine, placidum mihi o-
stendas, vultum tuum. Vultum tuum
Domine, requiro, quo civitas tua læti-
ficatur, vultum tranquillum, & jucun-
dum, quo Angeli beatificantur. Osten-
de mihi faciem tuam, sonet vox tua,
in auribus meis, vox gaudij, & conse-
latio-

lationis, qua dicas servo tuo. Remittuntur tibi peccata tua, vade in pace.

De Confessione Sacramentali.

Formidabilis est, & non sine horrore audienda, Apostoli comminatio, dicentiu. Quicumq; manducaverit Panē hunc, vel biberit calicē Domini indignē, reus erit corporis, & sanguinis, Domini. Quare ad sumendum Corpus Christi, accedenti, revocandum est, in memoriam, ejusdem præceptum. Probet autem seipsum homo, & sic de pane illo edat, & de calice bibat, qui enim māducat, & bibit indignē, judiciū sibi māducat, & bibit. Et quidē probatio, omninō necessaria, est, ut nullus sibi conscius, mortiferæ labis, ad mensam Domini, præsumat accedere, non præmissa, Sacramentali Confessione, quantumvis sibi, contritus videatur, alioquin, Panem vitæ, in mortem, & condemnationem, accipit. Ut verò, ex hoc Divino convivio, quod sanctis animabus, inexplicabiles præbet delicias, mens abundantius reficiatur, non solum à mortalibus, sed etiam à venialibus culpis, & ab omni terreno affectu, eam expurgare

oportet, & puram, ac vacuum, Deo exhibere, gratiæ suæ donis, implendam, & exornandam.

In ipsa autem confessione, vitanda prolixitas, & nimia diligentia, in levioribus culpis, recensendis, satis enim est, de illis, dolere, & per devotam cordis, ad Deum conversionem, eas expiare, quàm in ijs, ad instar historiæ, sine firmo proposito emendationis, sicut ut plurimum contingit, enarrandis immorari. Precipua, & essentialis, huius Sacramenti pars est, dolor & contritio, ob admissa facinora, huic maximè insisteres, præmissa brevi consideratione, alicujus motivi, ejusdem contritionis, qualia, hæc sunt.

1. Gravitas peccatorum, quibus offenditur DEVS, cujus bonitas infinita, nec levissimè quidem, lædenda foret, etiam ob salutem, totius mundi.
2. Atrocissima damna, quæ tam in ista, quàm in altera vita, ex peccato oriuntur.
3. Inscrutabilitas, judiciorum Dei, sæpe ingratos deserentis, & tepidos, evocantis.
4. Brevitas, & incertitudo, temporis gratiæ, quo potest offensa Dei, expiari.
5. Memoria æternitatis, ejusq; interminabilis durationis.

6. Inæstimabilis dignatio Dei, qui tanta passus est, ut te à peccatis liberaret.

7. Magnitudo beneficiorum, tibi à Domino collatorum, pro quibus turpissimum est, non te gratum, benè vivendo, exhibere.

8. Sublimitas æterni præmij, & facilitas mediorum, ad illud acquirendum.

9. Infinita amabilitas Dei, infinito obsequio, propter se dignissimi, quia ipse, est summum bonum, qui te amore incomprehensibili, prosequitur.

Hæc motiva, si attentè consideraveris, facile poteris, summam in te contritionem, excitare. Sic autem dispositus, ad pedes Confessarij accedes, quasi ad lavacrum sanguinis, IESV Christi, in quo, te ab omnibus, iniquitatibus tuis, dealbandum fore confides. Duos ibi Sacerdotes, adesse putabis, visibilem unum, alterum invisibilem, qui penetrabilia cordis, intuetur. Imò humillimè quasi filius prodigus, respiscens, benedictionem petes, & gratiam benè confitendi, præmissaq; generali Confessione, magna interiori, & exteriori, reverentia, quæ judici solet, à reo, exhiberi, peccata tua, Sacerdoti, qui Christum, Iudicem representat, confiteberis,

beris, nudè, sincerè, humiliter, non ex habitu, & consuetudine, sed plorans, coram Deo, flagitia tua, cum rubore, & confusione. Cum verò Sacerdos, profert verba, absolutionis, Actum Contritionis elicies, teq; à Christo, ceu filium prodigum, osculo excipi, nova stola ornari, amplexu constringi, putabis, additis ab eodem illis verbis. Remissa sunt tibi, peccata tua, jam amplius, noli peccare. Quare gratias ei ages, dicens, cum Propheta, Nunc cœpi. Et incipies, ab illa hora, vitam sanctius instituere.

Post Confessionem, id quod impositum tibi, fuerit pro satisfactione, statim absolves, Deoq; offeres, in unione, Passionis, Christi. Deinde examinabis, an vera fuerit, contritio elicitæ, an intima cordis penetraverit, an diligentem discussionem præmiseris, an culparum gravitatem agnoscas, an aliquid prætermiseris, an tibi ex ignavia ignoscas, an teipsum arguas, & ad seriò pœnitendum impellas.

Oratio

*Oratio ante Confessionem, &
Actus Contritionis.*

AD te Pijssime JESU, refugium me-
um, & consolatio mea, ad te mæ-
rens, & tristis, venio, recogitans mihi
annos meos, & delicta mea, in amari-
tudine animæ meæ. Ad te verba do-
loris effundo, misericordiam tuam im-
plorans, ut facias opus tuum, quod est
misereri, & parcere, tollens peccata
mea, quæ sunt, maxima miseria mea.
Nè despicias voces, & singultus, ovis
perditæ, & filij prodigi, ad tuam pieta-
tem redeuntis, de regione longinqua,
non enim lætaris, in perditione mori-
entium, qui ut ego, non morerer, mor-
tem subire dignatus es. Vermis terræ,
retribuit tibi mala, pro bonis: & heu
quot mala, & quàm gravia, peccata,
pro tantis, & tam eximijs bonis. Et ta-
men loqueris, ad sponsam tuam, præ-
varicatricem animam meam, postquam
fornicata est, cum amatoribus multis,
ut revertatur ad te, & suscipies eam,
quia

quia misericordia tua, super omnia,
opera tua, & major est bonitas tua,
quàm iniquitas mea. Surgo igitur, &
venio ad te, corde contrito, & humi-
liato, venio, ut laver, ô fons æternæ
vitæ! ad quem sitio, sicut cervus, ad
fontem aquarum: venio, ut illuminer,
ô lux mea! & amem te, & confitear,
adversum me, injustitiam meam. Emit-
te lucem tuam, & veritatem tuam, &
illumina mentem meam, ut omnia
mala, quæ commisi, & bona, quæ omi-
si, distinctè cognoscam, & integrè con-
fitear; nec me permittas, computre-
scere in sordibus meis, tu qui omnium
misereris, & nihil odisti eorum, quæ
fecisti. Fac me, assveta mala relinque-
re, & tibi placitis operibus, occupari,
ut ubi abundavit delictum, tua gratia
superabundet, & sicut fuit sensus me-
us, ut errarem, à te, decies tantum,
iterum conversus, requiram te. Do-
leo, benignissime JESU, de omnibus,
& singulis, peccatis meis, eaquæ dete-
stor, super omnia mala, non solum
arido, & imperfecto corde meo, sed
corde

corde etiam, & affectu, omnium verè
 poenitentium, ex gratuito, tui amore,
 quia DEUS es, infinito amore, dignis-
 simus, firmiterq; propono, quælibet
 potius subire mala, quàm iterum pec-
 cato consentire. Exactissimè item,
 confiteri volo, tibi, & proximo,
 integrè satisfacere, atq; omnes pec-
 candi occasiones, deinceps evitare.
 Quidquid verò mihi deest, suppleat
 mors tua, sanguis tuus, & superabun-
 dantia merita tua, quibus fretus, ve-
 niam obtinere spero, & gratiam, mo-
 res meos, corrigendi, & in bono, usq;
 ad finem, perseverandi. Et tunc Do-
 mine, qui dedisti mihi, cognoscere fla-
 gitia mea, perfice contritionem meam,
 & perduc ad finem, satisfactionem
 meam. Ure me, igne amoris tui, & se-
 para à me, quidquid displicet, Maje-
 stati tuæ. Purifica omne, quod tibi
 placet, in me, ut in te vivam, non in
 me, & in te moriar, ac propter te, Sal-
 vator meus. Qui vivis, & regnas,
 in sæcula, sæculorum.

AMEN.

Oratio

Oratio post Confessionem.

GRatias ago tibi, Domine, Pater, & Dux vitæ meæ, quia non secundum peccata mea, fecisti mihi, sed super exaltasti misericordiam, iudicio, & projecisti in profundum maris, omnia delicta mea. Atq; utinam possem, tantam in me contritionem excitare, quantum habuerunt, pro peccatis suis, Sanctus Propheta David, vir secundum cor tuum, Sanctus Petrus, Princeps Apostolorum, ac reliqui poenitentes: quam libenter, totus in lachrimas diffluerem, donec lavarentur iniquitates meæ, & ostenderes mihi placidum, vultum tuum! Sed facta est anima mea, sicut terra, sine aqua tibi, & aruit, sicut testa, virtus mea: cumq; omni virtute, destitutus sim, hoc solum habeo residui, ut oculos meos extollam, ad Redemptorem meum, ejusq; lachrimas offeram, tibi, quas ille, pro me, uberrimas effudit, ut ijs placatus, aperias mihi, januas misericordiæ tuæ, & suscipias me, servum fugitivum, venien-

nientem ad te, & ab inimicis fugientem. Respice in me, & miserere mei. Domine patiens, & misericors, loquere ad petram, cordis mei, & percutere, virgâ virtutis tuæ, ut fluant aquæ, compunctionis, aquæ salutare, quibus sanabitur, & dealbabitur anima mea. Confirma hoc, quod operatus es in me, tibiq; grata, & accepta sit confessio mea, atq; omnem ejus defectum, suppleat pietas, & misericordia tua. Misericordiam tuam imploro, & veniam postulo, cum inviolabili proposito, deinceps non peccandi, & studio virtutum, sedulò incumbendi, te mihi vires subministrante, qui non deseris, sperantes in te. Nè patiaris me, diutius vagari, post vanitatem vitæ hujus, transeunt enim dies, & dies, anni, & anni, & ecce nihil proficio. Convertere ergo, & deprecabilis esto, super me, indignissimum servum tuum, & noli sic attendere malum meum, ut obliviscaris bonum tuum: nam si ego commisi, unde me damnare potes, tu non amisisti, unde me salves, & recipias,

pias, in gratiam tuam DEUS meus, adiutor meus. Qui vivis, & regnas, in sæcula, sæculorum. Amen.

Actus diversarum Virtutū ante Communionem.

Fidei.

Quis mihi det, suavissime JESU, ut sub candido, specierum Sacramentalium velamine, vultum tuum intueri possim, in quem desiderant Angeli, prospicere? Quis mihi det, ut pateant mihi fontes saluberrimi, quinque vulnerum tuorum, quæ oculis fidei, in toto corpore cerno, fontes aquarum viventium, in ablutionem peccatricis, animæ meæ? O venæ salientes! in vitam æternam, effundite super me, aquam gratiæ, quæ sitim meam, satiet, ut gaudio repletus, & fide bona imbutus, exclamem, cum Thoma Apostolo, DEUS meus, & Dominus meus. Credo enim firmissima fide, te in Augustissimo Sacramento, corporis, & san-

gvi.

gvinis tui, verè præsentem esse, Deum meum, & Dominum meum, & pro hac assertionem, millies mori, paratus sum. Credo inquam, quod in hoc Sacramento, Corpus tuum gloriosissimum, verè adest. Sole splendidius, electum ex millibus, cum ea integritate, pulchritudine, majestate, quâ in cælo existit, & quâ, nulla major concipi potest. Ibidemq; est sanguis, olim pro nostra, omniumq; salute, effusus. Ibi est anima, omni gratia, & sapientia plena, in qua sunt, omnes thesauri virtutum, & scientiæ Dei. Ibi deniq; latet Divinitas tua, verbum scilicet omnipotens, per quod Pater dicit omnia, & quia tu in Patre, & Pater in te est, adest etiam Pater, te Verbum suum generans, adest & Spiritus Sanctus, utriusq; nexus, & amor. Hoc est compendium, omnium mirabilium tuorum, hoc summum prodigium, omnium creaturarum, mentium, captum excedens, hæc veritas infallibilis, quam te largiente, per gladios, & ignes, profitebor.

S P E I.

IN te solo, spem meam colloco, dulcissime JESU, quia tu salus, & virtus mea, tu refugium, & firmamentum meum, tu fons omnium bonorum, quomodo enim auderem, ad hoc tremendum Sacramentum accedere, teq; in eo suscipere, nisi fiduciam tu mihi præberes, qui me tuo sanguine redemisti? De tua igitur benignitate confisus, accedo ad te, ut ovis morbida, ad Pastorem, ut infirmus, ad Medicum, ut reus morti obnoxius, ad Advocatum, ut tu me foveas, protegas, corrobores, & sanes. Abyssus nihili mei, abyssum invocat, bonitatis tuæ, nam licet peccata mea plurima, & gravissima sunt, ea tamen nihil sunt, quamvis plura, & graviora forent, si cum misericordia tua, & pretio sanguinis tui, conferantur. In ipso reposita est, tota fiducia mea, & gaudeo, quod nihil in me sit, in quo possim confidere. Miserere mei, & salva me, qui nunquam deseris, sperantes in te.

Chari-

CHARITATIS.

O quanta vis amoris, cor tuum succendit, amantissime JESU, cum transiturus de hoc mundo, ad Patrem, mensam parasti nobis, habentem omne delectamentum, & omnem saporem suavitatis. Grande quidem fuit, & admirabile, opus amoris tui, quod naturam nostram assumere dignatus sis, sed longe præstantius, & mirabilius est, quod Corpus tuum, in cibum, & sanguinem, in potum, reliqueris: in illo liquidem, nostram suscepisti humanitatem, in hoc tuam largiris divinitatem. Sic totum thesaurum gratiæ tuæ, in nos effudisti, ut immensa hac dilectione, præventi, amoris vicem, tibi rependere, totis viribus satagamus. Amo igitur te, unicum meum solatium; in hoc exilio, unica spes, languentis animæ, unica mea felicitas, & summum bonum, quo in terris, frui licet. Amo te, toto corde, tota mente, tota virtute, atq; utinam omni momento, te ferventiùs semper amarem! Hoc est ar-

dens desiderium meum, huc feruntur
 gemitus mei, & suspiria cordis mei.
 Ad te enim trahis, omnes vires animæ
 meæ, dum teipsum, transfundis in me:
 dum quantum fieri potest, me similem
 tui facis: dum esurientem animam
 meam, non cibo aliquo terreno, sed
 pretioso tuo Corpore, & sanguine nu-
 tris, satias, & saginas. Pro hac tua in-
 effabili largitate, amo te, DEUS meus,
 & ut nunquam cessem amare te, amo-
 rem meum teipso inflamma, qui esca,
 & pabulum amoris es. O ignis jugi-
 ter ardens! & nunquam deficiens, ure
 renes meos, & cor meum, ut ardeant,
 amore tuo. Ignem, venisti mittere,
 in terram, accende illum, & eventila,
 ut semper crescat. Te enim amabo,
 si amandi vires præbueris, & eò am-
 pliùs amabo, quò uberiores amandi
 gratiam, infundas: nunquam te amabo
 ut dignus es.

DESIDERII.

Quemadmodum desiderat cervus,
 ad fontem aquarum, ita desiderat
 anima

anima mea, ad te Salvator meus, Do-
 mine JESU, desiderat inquam anima
 mea, accedere ad te, teq; offerre, DEO
 Patri, ac de fontibus salvationis tuæ,
 vinum lætificans, in gaudio haurire.
 Sitio enim, Domine, lassatus in via ini-
 quitatis, sitio ad DEUM meum, ve-
 nam aquarum viventium, sitio sangui-
 nem tuum, quem mihi in potum, mi-
 rabiliter tribuisti. Ad te venio, &
 clamo post te, liberator meus, esuriens,
 & sitiens. Miserere mei, Fili David,
 & da mihi panem tuum, da vinum,
 quod miscuisti, ut refocilletur anima
 mea. Atq; utinam possim, omnium
 Sanctorum affectus, & inflammata de-
 sideria, habere, teque, semper sitire,
 fontem vitæ, fontem sapientiæ, fontem
 æterni luminis, torrentem voluptatis.
 Utinam te semper esuriam, cor meum,
 Panem Angelorum, refectionem, ani-
 marum sanctarum, & dulcedine sapo-
 ris tui, repleantur viscera, animæ meæ.
 Renuit consolari anima mea, donec
 suscipiam te, omne bonum meum,
 Domine JESU, quem solum ardentis-

simè concupisco, cum omni affectu, & devotione, omnium Electorum tuorum, tecum epulantium, in mensa tua, quorum divitias offero tibi, in supplementum, inopiæ meæ. Esto tu solus, gaudium meum, tranquillitas mea, refectio mea, & thesaurus meus, in quo, mens mea, quiescat. Nihil desiderem extra te, & omnia mihi vilescant, propter te, DEUS meus, dulcedo mea, & unicum centrum, cordis mei.

GRATITUDINIS.

Quis sum ego, Bonitas infinita, ut me, Divinæ mensæ tuæ, astare volueris, & sumere Hostiam immaculatam. Unde inveni gratiam, in oculis tuis, ut ostenderes in me divitias misericordiæ tuæ? Venite, & audite, omnes Angeli, & Sancti Dei, & narrabo vobis, quanta fecit Dominus, animæ meæ. Mortuum in peccatis, de pulvere erexit me, & stola alba, clementiæ suæ, præcinxit, & dignum fecit, ut comederem panem, & biberem vinum, in mensa tua, omnibus die-

diebus vitæ meæ. Quas ergo tibi gratias agam, Clementissime JESU, Salvator mundi, aut quid retribuam tibi, pro omnibus, quæ tribuisti mihi? verè enim, de te Sponso Ecclesiæ, illud Canticorum intelligitur. Si dederit homo omnem substantiam domus suæ, pro dilectione, quasi nihil, despiciet eam. Tu omnia quæ habes, mihi largitus es, corpus, sanguinem, animam, & divinitatem tuam, & si ego retribuam tibi, omnem substantiam domus meæ, corpus, animam, & libertatem, cum omnibus, quæ nunc habeo, vel habere possum, hoc quasi nihilum reputabitur, comparatione immensi, & inæstimabilis doni tui. Tantum tibi debeo, quantum ipse vales, qui infinitus es: quare debitum meum, omnem meam facultatem excedit. Audeo tamen, rogare te, quia benignus, & misericors es, & tu nosti, paupertatem meam, audeo rogare te, nè despicias munusculum, quod tibi offero, in simplicitate cordis mei, dicens cum Sponsa. Dilectus meus mihi, & ego illi. Nam

sicut tu, totum te mihi tradidisti, in nutrimentum animæ meæ, ita ego me totum servituti tuæ consecro, & quidquid habeo, quidquid sum, quidquid possum, tibi pœnitus trado, ut me totum, tibi vendices, nec quidquam mei, mihi patiaris, superesse.

TIMORIS.

AD mensam convivij tui, à te vocatus, & invitatus, Domine JESU, summum bonum meum, & felicitas sempiterna, parere quidem vocanti vellem, teq; amanter, & devotè, suscipere, sed contremisco valde, cum meam intueor fœditatem, contremisco, à voce Apostoli tui, dicentis; *Si quis manducaverit Panem hunc indignè, reus erit corporis, & sanguinis Domini.* Mira enim res est, & portento simillima. Pascor cœlesti Pane, quo saturari possunt, infiniti mundi, potor præclarissimo vino, quo ardentissima, Angelorum sitis, extingvitur, & fame, ac siti, aresco: omne cœli gaudium, intus fero, & terræ illecebris irretiri, non desino,

desino, vanaq; solatia, à creaturis
 emendico ad DEUM excelsum, fon-
 tem omnium bonorum, accedo, &
 sub specie Panis, & Vini, ipsum sumo,
 & non solum non rapior, cum Paulo
 ad tertium cælum, sed terræ totus ad-
 hæreo, omnisq; mea sollicitudo, terræ
 famulatur, & corpori, nulla cælo.
 Hæc est angustia, quæ me undiq; pre-
 mit, hæc consternatio mea, magna ni-
 mis, vereor enim, nè quod in salutem
 constituisti, in iudicium, & condemna-
 tionem, accipiam. Nunquid ergo fu-
 giam, à facie tua, cum impio Cain,
 aut abscondam me, cum Adamo, eo
 quod nudus sim, & audierim vocem
 tuam? Absit scio enim, quia major est,
 misericordia tua, quàm miseria mea:
 major est clementia tua, quàm iniqui-
 tas mea, si foedus, si infirmus, si nudus
 sum, tu me potes mundare, sanare,
 vestire. Ad te igitur, cum timore, &
 tremore confugio, ut me vestias, sa-
 nes, & purifies. Abstrahere cor meum,
 à cæteris omnibus, extra te, in qui-
 bus, nihil est, nisi vanitas, & afflictio
 spiri-

spiritus. Sentiat mens mea, dulcedinem præsentiæ tuæ: gustet quàm suavis es, ut amore tuo capta, nihil quærat, extra te. DEUS cordis mei, & pars mea, DEUS, in æternum.

HUMILITATIS.

Immense, tremende, potentissime, & incomprehensibilis DEUS, quis es tu, & quis sum ego, ut digneris venire ad me, mecū epulari, & mansionem apud me facere? Heu, quanta est, dignatio tua, quanta miseria, & ingratitude mea? Tu Rex Regum, & Dominus Dominantium, qui respicis terram, & facis eam tremere, tu fons sanctitatis, coram quo, Angeli non sunt puri: tu sol, claritatis æternæ, qui lucem habitas inaccessibleem, ego verò animal immundum, omnium calamitatum, ludibrio expositum, insanis perturbationum motibus, agitatum: omni vanitati subiectum, vas contumeliæ, filius iræ, & tenebrarum. Et quomodo potest, lucis tuæ, ad tenebras meas, esse conventio? Quomodo præsumam, ad
te ac-

te accedere, vermiculus terræ, in quo nullus ordo, sed sempiternus horror inhabitat? Qua fiducia, coram te apparebo, justissime Judex, ante cujus conspectum, columnæ cæli contremiscunt? Longe enim recessi à te, qui tamen ubiq; es, & miserabilis anima mea, quam tibi in Baptismate desponsaveras, fornicata est, cum amatoribus multis, te repudians, Creatorem, & Redemptorem, ut fallacibus creaturis, adhæreret. Tu me segregasti, ex utero Matris meæ, & vocasti per gratiam tuam, ut lucerem coram hominibus, virtute, & bonis operibus, ego verò, in tenebris vixi, non quærendo, quæ tua sunt, sed quæ super terram. Tu parasti mihi mensam, in dulcedine tua, & suspiravi, ad ollas, carniū Ægypti. Tu potasti me, sanguine tuo, & converti me, ad poculum Babilonis. Verùm tamen, ego loquar ad te, cum sim pulvis, & cinis. Respice servum tuum, & suscipe me, quem tam amanter, invitas, ad te. Jam enim cognovi, quia sine te, nihil sum, nihil possum,

sum, & extra te, non est salus, nec vita. Proijce ergo, post tergum tuum, omnia peccata mea, & amplectere me, quamvis indignissimum, gratia tua, ad te revertentem, juxta verbum Prophetæ tui dicentis: Sacrificium DEO, spiritus contribulatus, cor contritum, & humiliatum, DEUS non despicies.

Commemoratio Domini- cæ Passionis.

MEmoria memor ero, Clementissime Pater, & tabescet in me anima mea, omniumq; dolorum, & passionum, atq; acerbissimæ mortis Filij tui, Domini mei, JESU Christi, cum gemitibus, & lachrimis, recordabor, quia ipse salus, & vita mea, ante oculos tuos pependit, in ligno, offerens se tibi, in holocaustum, pro mea, & totius mundi, salute. Hanc autem oblationem, vivam, quam tu misisti, in miseratione multa, ad Altare Crucis immolandam, pro nobis, hanc eandem tibi nunc offero, Passionem ejus, &
mor-

mortem, recolens, ac repræsentans:
 sicut ipse præcepit, cum dixit, ut idem,
 in ejus commemorationem, faceremus.
 Recordare itaque, humilitatis ejus,
 patientiæ, charitatis, mansuetudinis, &
 obedienciæ. Respice labores ejus, je-
 junia, contemptus, contumelias, vin-
 cula, irrisiones, & iniquam condemna-
 tionem. Respice, in faciem Christi
 tui, & intueri speciosum forma, præ-
 filijs hominum, opprobrijs, injurijs,
 verberibus, livoribus, contusionibus,
 ita deformatum, ut non sit ei species,
 neq; decor. Vide, caput nobilissimum,
 spinarum punctationibus, transfossam,
 & percussionibus attritum. Vide, ge-
 nas modestissimas, sputis fœdatas, ala-
 pis cæsas, sanguine cruentatas. Vide
 oculos benignissimos, lachrimis perfu-
 sos, & ad ignominiam velatos. Vide
 os suavissimum, siti ardentissima cru-
 ciatum, & felle, atq; aceto, potatum.
 Vide dorsum, supra quod, fabricave-
 runt peccatores, verberibus, dilania-
 tum, & humeros Crucis pondere op-
 pressos. Vide, brachia amabilissima,
 funi-

funibus devincta, & in Cruce crudelissimè extensa. Vide manus, innocentissimas, durissimis clavis perforatas. Vide, pedes delicatos, tot itineribus defatigatos, ac Cruci tandem affixos. Vide, corpus venerabile, pro nobis in cruce suspensum, vulneratum, mortuum, & sepultum. Vide, sanguinem pretiosissimum, usq; ad minimam guttam, pro nostra salute, misericorditer effusum. Hæc enim, tibi offero, & repræsentò, omni, quo possum, devotionis affectu, suppliciter orans, ut ipsa pietas, qua Filium tuum, pro nobis tradidisti, te omnibus, misereri compellat, pro quibus, ille factus obediens, usq; ad mortem, Crucem subire, dignatus est. Amen.

Oratio ante Communionem ad Deum Patrem.

Respice clementissime Pater, de sanctuario tuo, & de excelsò, cælorum habitaculo, & intuerè, hanc immaculatam Hostiam, quam tibi offert, Magnus

gnus Pontifex noster, JESUS Christus, Filius tuus, Salvator mundi, pro peccatis, fratrum suorum, & esto placabilis, super multitudinem, malitiæ nostræ, quia vox sanguinis, Domini nostri, clamat ad te de Cruce. Hic est justitia mea, & sanctificatio, ac propitiatio mea. Averte faciem tuam, à peccatis meis, & respice in faciem Christi tui: ejus enim meritum, offero ad te, omnemq; fiduciam, in eo desinam habeo. Impellit serviendi tibi necessitas, terret conscientia, indebiti obsequij, sed rogo te, nè despicias, hoc sinceræ voluntatis obsequium, licet in me, boni operis, testimonium, non agnoscas. Nè me repellas, ad Divinissima dona tua, percipienda venientem, ut inculpatè accedens, ad gloriam tuam, dignus sim, qui operiar protectione Unigeniti Filij tui, & illuminatione Spiritus Sancti tui, atq; pro peccatis meis, deprecans exaudiar, te præstante, DEUS meus, Pater misericordiarum, qui cum eodē Filio tuo, in unitate, ejusdē Spiritus S. vivis, & regnas, in sæcula, sæculorū. Amen. G Ora-

*Oratio ad Dominum IESU-
M Christum.*

GRatias ago tibi, Domine JESU
Christe, pro ineffabili tua charita-
te, qua transiturus, de hoc mundo, ad
Patrem, mensam mihi parasti, in dul-
cedine tua, mensam prorsus regalem,
omne delectamentum, in se habentem,
mensam pretiosissimam, Corporis, &
Sanguinis tui, ut adipe, & pingvedine,
repleatur anima mea, & secreto illa-
psu, nutritionis tuæ, roboretur, infir-
mitas mea. Et unde hoc mihi, glorio-
sissime, Fili Dei, ut me permittas veni-
re ad te, & cum cæteris commensali-
bus tuis, epulari? Atq; utinam, ab
omni culpa liber, purus ab omni labe,
ab omni vitio purgatus, & ab omni in-
ordinata affectione perfectè emunda-
tus essem, ut ad hanc mensam, super
cælestem, accedere possim fervens cha-
ritate, niveus innocentia, & omnium
virtutum decore, exornatus. Sed quia
miserrimus ego sum, & omni orna-
men-

mento, destitutus, obsecro te imprimis, benignissime Salvator, cujus charitas, immensa & bonitas infinita ut sanguine tuo, animam meam lavare, & super nivem dealbare, meritis tuis induere, illoq; igne, ardentissimi tui amoris, succendere digneris, qui te compulit, ad hoc vivificum convivium, instituendum. Obsecro deniq; Beatissimam Virginem, Matrem tuam, & omnes Electos tuos, ut tibi pro me offerant charitatem, fidem, & devotionem, quâ hoc Sacramentum, susceperunt, ab initio institutionis ejus, usq; ad præsentem diem. Et quia participes ego sum, omnium timentium te, offero tibi omnium fidelium, hac die, communicantium, pietatem, & puritatem. Offero omnium justorum ab origine mundi, usq; ad ejus consummationem, virtutes, ac merita; & pios affectus erga te. Dulcissime JESU, in Venerabili Sacramento, existentem: firmissimæ nimirum fidei, & vivæ apprehensionis, earum rerum, quæ de hoc maximo mysterio, credendæ sunt,

perfectissimæ charitatis, & intimæ tecum familiaritatis: famis & flagrantissimi desiderij, te omne bonum suscipiendi filialis fiduciæ & spei de tua misericordia tam mirabili modo declarata: zeli divinæ gloriæ: admirationis tantæ dignitatis, & profundissimæ humilitatis: gaudij, & jubili in te, & de te: laudis, gratitudinis, adorationis, & devotionis. Hos inquam, aliosque affectus, offero tibi, in supplementum, imperfectionis meæ, & insufficientiæ, & eos si possem elicerem, cum maxima intentione, ad laudem, & gloriâ tuam, quia dignus es. Suscipe Domine, hoc desiderium meum, meritisq; placatus Electorum tuorum, nè à mensa tua repellas me, quatenus hoc cibo satiatus, hoc recreatus potu, vitam habeam, & abundantius habeam, hîc, & in æternum. Amen.

Alia Oratio ad eundem.

Veni Domine JESU, unica spes, animæ meæ, & infunde pectori meo, multitudinem dulcedinis tuæ, ut nihil
amem,

amem, nihil desiderem, præter te. Veni gaudium, & felicitas mea, veni spes, & robur meum, quia tecum sunt divitiæ, & gloria; tu vita, & consolatio mea, tu Paradisus voluptatis. Atq; utinam te, veniente ad me, vertantur mihi, in amaritudinem, omnes mundi deliciæ, ut tibi unitus, in hoc cælesti convivio, à te nunquam separer, in æternum. Frustra expenderem argentum meum, non in panibus, & laborem meum, non in saturitate, licet omnes Ægypti escas compararem, si carerem hoc Pane, qui præbet, delicias Regibus, & vino tuo destitutus essem, cujus suavitas, in infinitum excedit, omnia hujus sæculi, oblectamenta. Et unde mihi, tantum bonum, ut tecum epulari merear, Rex tremendæ Majestatis, ego indignissimus servus tuus, qui quotidie pecco, & incorrigibilis persevero: Sed major in infinitum, misericordia tua, quam miseria mea, & tu dulcissima refectio mea, me in virum alterum transformas, & verbo virtutis tuæ sanas, omnes langviores

meos. Ad te igitur venio, de tua pietate confisus, & in te sperans, non confundar. Lætifica animam servi tui, & supple, quod mihi deest, tu Benignissime Salvator, qui omnes ad te vocare, dignatus es dicens. *Venite ad me omnes, qui laboratis, & onerati estis, & ego reficiam vos.* Refice me teipso, quia in te sunt, omnes cæli deliciæ, in copiosissimo flumine gaudiorum Dei, cum tanta plenitudine, emanantes ut omnes, dignè ad te accedentes, inexplicabili lætitia, replere possint. Uni intimè tecum, animam meam, & fac me dignum, ut huic mensæ supercælesti, cum debito virtutum ornatu, assistam, & dulcedine perfruar, præsentis Divinitatis. Amen.

Oratio ad S. Spiritum.

Veni Sancte Spiritus, Amor Patris, & Filij, mundator scelerum, curatorem vulnerum, fortitudo fragilium, mærentium consolator, fulgor intellectus, & vindex libertatis. Veni, è Patria felicitatis, & cordis mei penetrabilibus,

bus, tam fortiter illabere, ut vitia omnia, & defectus, tuo igne consumas, & omnia peccata mea, remittas. Emitte in animam meam, lucis tuæ radium, quo illuminante, intellectum, quæ tibi sunt placita, videam: quo affectum inflammante, ad ea prosequenda, tota virtute incumbam. Fac me dignè percipere, Sacratissimum Corpus Domini, & Redemptoris mei, JESU Christi, meque torrente tuæ voluptatis inebria, ut cælesti suavitate, in hac divinissima mensa degustata, nihil venenatæ mundi dulcedinis, liceat ampliùs degustare. Imbuat me, & perficiat, septiformis Spiritus tuus, & ad illum scientiæ gradum, fac me pertingere, ad quem pervenit Apostolus tuus, dum dicebat, se nihil scire, nisi Christum, & hunc Crucifixum. Roboretur infirmitas mea, fortitudine tua, vincat bonitas tua, malitiam meam, & deformitas mea, tua pulchritudine coretur. Sursum erige me, per æternorum affectionem, copula tecum per amoris unionem, conserva, per finalem perseverantiam,

ut tuo ductu, revolet anima mea, ad te, principium, & finem meum, à quo nunquam separetur. Amen.

Oratio ad B. Virginem.

Gloriosissima Mater Dei, Virgo Maria, tota fiducia mea, & unicum solatium, langventis animæ meæ, precor te, ut mihi miserrimo peccatori, assistere digneris, hac hora, qua pretiosissimum Filij tui Corpus, & sanguinem sumpturus sum, sicut amans, & dolens, eidem Filio tuo in Cruce pendenti, & se pro nostra salute, offerenti, adstitisti. Nè me deseras, Mater misericordiæ, ob intollerabilem peccatorum meorum fœditatem, neque avertas faciem tuam à me, quem Filius tuus, tanto amore dilexit, ut pro me mori dignatus sit. Plena es gratiarum, plena rore cælesti, innixa super dilectum tuum, delicijs affluens. Ciba ergo pauperem tuum, de superfluitate mensæ tuæ, tuarumq; virtutum vestibus, indue me, ut his ornatus, Divino conspectui gratus, appaream. Memento

mento illius charitatis, quâ Verbum Dei, ex te carnem assumpsit, ut tu fieres, Mater nostra. Aperi manum tuam, & imple me benedictionibus, quibus te DEUS benedixit, in æternum, ut te interveniente, tremenda mysteria, acceptabiliter perficere, & Sancta Sanctorum, dignè merear degustare.

Oratio ad SS. Angelos.

Sancti Angeli, purissimi spiritus, ministri Dei Altissimi, qui facitis voluntatem ejus, & orantium preces, ad cælum desertis. Tuq; præcipue, fidelissime, custos meus, stete mecum, juxta aram, ad quam, totius mundi pretium, Sacratissimam Eucharistiam sumpturus sum, & in vestris thuribus, incensum orationum mearum, suscipite, ut fumus aromatum, hujus Divini mysterij, ascendat per manus vestras, in conspectu Dei. Purgate, illuminate, perficite, & dirigite me, vestramq; puritatem, & innocentiam, impetrate mihi, ut appaream coram Deo, decenter ornatus. G 5 San-

Sancti Archangeli, Duces militiæ
cælestis, instruite me, ut hæc sancta
mysteria, percipiam, fidemq; vivam,
& efficacem hujus Sacramenti, in me
excitate.

Altissimi Principatus, vera pace in-
terna, animam meam componite, ut in
ea jugiter commoretur, Dominus, de
quo scriptum est. Et factus est, in pa-
ce, locus ejus.

Sanctissimæ virtutes, assistite mihi,
ut proficiens, de virtute, in virtutem,
DEUM Deorum, dignus sim, oculo
fidei cernere, intus recipere, ac tandem
in Patria, clarè vobiscum intueri.

Inviictissimæ Potestates, dæmonum
impetus cohibete, nè mihi, ad sacram
mensam accedenti, appropinquent, ut
sine impedimento, dignè merear, Deo
servire. Potentissimæ Dominationes,
veram mihi, & sanctam libertatem ob-
tinetes, ut nec peccato serviam, nec
corporis mei appetitui, & sensibus sub-
dar. Throni stabiles, & sublimes se-
des, pulcherrimæ Dei, discam à vobis
veram humilitatem, & subjectionem,

ut

ut fiat anima mea, gratissimum domicilium Deo, qui superbis resistit, & super humilem, & quietum, requiescit.

Clarissima, & nobilissima cæli lumina, Cherubin illustrate mentem meam, plenitudine scientiæ, ut summam utilitatem meam, hujusq; Sacramenti, infinitam excellentiam, agnoscam.

Supremi Spiritus, Seraphin, ardentissimi amatores Dei, solvite gelu cordis mei, & vestrum, in eo ignem succendite, ut DEUM, vobiscum ardentè amem, atq; utinam, sicut vos.

Invocatio Omnium Sanctorum.

SANCTI DEI omnes, cives supernæ Patriæ, inclinate aures vestras, & demittite lumina ad me, meamq; orationem exaudite. Ad vos clamo, pauper, nudus, & infirmus, cui omnia defunt, ornamenta virtutum, ad vos clamo, & vestram imploro benignitatem, succurrite infirmitati meæ, fidem meam, & spem roborate, excitate in me, igniculum amoris vestri, induite
me,

me, veste nuptiali, ornate donis, quibus abundatis, ut sine rubore, introire valeam, in locum tabernaculi admirabilis, in aulam, cælestis convivij, in conspectu Divinæ Majestatis.

Sancti Patriarchæ, & Prophetæ, qui Christum Dominum nostrum, dictis Prophetastis, & ardentissimis desiderijs è cælo in terram traxistis, hujusq; Sacramenti mysteria, varijs typis, & umbris præfigurastis, preces fundite pro me, ut ipsum DEI Filium, sanctè tractare possim, & puro corde complecti.

Sancti Apostoli, quos Christus, in Cœna primos seipso cibavit, vos supplex exoro, ut vestra adjutus ope, gratiam non negligam, ejusdem Cœnæ participationis, mihi collatam, sed magno quotidie, augeam incremento.

Sancti Martyres, qui Christo Regi, pro nobis Crucifixo, vicem, quam potuistis, vitæ oblatione, per martyrium rependistis, ipsum pro me orate, ut ignem sui amoris, accendat in corde meo, quo succensus, & purificatus, meipsum mactem Deo, hostiam vivam,
& ei

& ei placentem, sicq; paratus, & probatus, ad hoc Divinum Sacramentum accedam.

Sancti Pontifices, & Confessores, mysteriorum Dei, fidelissimi dispensatores, qui Hostiam placationis, frequenter pro populo obtulistis, pro me obsecro, intercedite, ut hoc meum officium, DEO sit acceptabile, mihiq; propitiabile.

Sancti Monachi, & Eremitæ, qui cibo, potuq; cælesti, sæpius refecti, pravas concupiscentias, & vitæ hujus pericula, superastis, adjuvate me, orationibus vestris, ut sacris, hisce mysterijs armatus, meipsum vincam, & omnes inimicos, animæ meæ, contemnam, sub pedibus meis.

Sanctæ Virgines, DEO amabiles, quæ studio castitatis, dignum in vobis, Filio DEI habitaculum, præparastis, & nunc in cælo, canticum novum concinnitis, quod nemo potest dicere, nisi fuerit, virginitatis prærogativa eximius, impetrate mihi, perfectissimam castitatem, quâ corpus, & animam, in omni
puri-

puritate, contineam, ut Christo Domino, qui pascitur inter lilia, gratum in corde meo, exhibeam, domicilium.

Sancti mei Tutelares, N. N. & Patroni mei, singulares, vestro confisus Patrocinio, accedo nunc, ad sumendum Corpus, & Sangvinem, JESU Christi, Domini nostri, comitate me, euntem ad Altare, fulcite meritis vestris, ornatè virtutibus, ut hoc Sacramentum, viva fide, ferventi charitate, & plena devotione, percipiam, perq; ejus continuum, & salutiferum usum, vestro dignus consortio, tandem inveniar. Amen.

Post Communionem

Actus Amoris.

AMo te, Domine JESU, jucunditas mea, & requies mea, amo te, summum, & unicum, bonum meum, ex toto corde, ex tota mente, & tota anima, ex totis viribus meis, & si tu, vides me, in hoc deficere, saltem desidero, amare te: & si satis id non opto, saltem deli-

desidero, id multum desiderare. Suc-
 cende Domine, igne tuo ardentissimo,
 viscera mea, & quandoquidem, non
 nisi amorem, petis à me, da, quod ju-
 bes, & jube, quod vis. Nisi enim, de-
 deris mihi, velle, & perficere, peribo
 utique, in infirmitate mea. Sonet vox
 tua, in auribus meis, vox illa dulcissi-
 ma, & efficacissima, volo: Nam si vis,
 potes me mundare, & illuminare, potes
 me, ad supremum amoris gradum,
 elevare. Sicut voluisti pro me pati, &
 mori, ita etiam velis, ut appareat in
 me fructus Passionis, & mortis tuæ.
 Memento verbi tui, sermo tuo, in quo
 mihi spem dedisti, tu enim dixisti; *qui*
manducat meam carnem, & bibit meum
sanguinem, in me manet, & ego in illo.
 O dulcissimum verbum! tu in me, &
 ego in te. O quantus amor! tu in me,
 vilissimo peccatore, & ego in te, DE-
 US meus, cujus Majestas, incompre-
 hensibilis est. Unum est mihi necessa-
 rium, & hoc solum quæro, in te vive-
 re, in te quiescere, à te nunquam sepa-
 rari. Felix est, qui te quærit, felicior,
 qui

) III (

qui te possidet, felicissimus, qui in hac possessione perseverat, & moritur. O dies infelices! quos turpiter transégi, diligens vanitatem, & recedens à te. Et nunc Domine, qui venisti in hunc mundum, ut peccatores salvos faceres, redime animam meam, in sola fiducia, miserationum tuarum, respirantem, & aufer à me, omnia amoris tui impedimenta. Procul sit à me, omnis terrena delectatio, nihil sapiat mihi, nihil me alliciat, nisi tu. Vive, & regna semper in me, fidelissime amator, animæ meæ, in te enim sunt, omnia bona, & jam deinceps, paratus sum, omnia potius mala perpeti, quam, ut unquam cessem, amare te. O Corpus Sacratissimum! quinque vulnerebus sauciatus, pone te, ut signaculum super cor meum, & imprime illi charitatem tuam, obsigna pedes meos, ut sequar vestigia tua, obsigna manus, ut bona semper opera exerceam: obsigna latus, ut ferventissimos amoris tui actus, proferam in æternum. O sanguis pretiosissime! qui omnem hominem abluis, & pu-

& purificas , lava animam meam , & pone signum, in faciem meam , ut nulum præter te , amatorem admittam. O dulcedo cordis mei! & vita animæ meæ, sicut tu in Patre, & Pater in te est, ita ego, per gratiam tuam, unus tecum sim amore , & voluntate , mihiq; mundus crucifixus sit , & ego mundo. Amen.

Gratiarum Actio post Communionem.

GRatias tibi ago , benignissime DEUS, quod me vilissimum peccatorem, admittere dignatus sis, ad vivificum tuæ mensæ Convivium. Et quis sum ego, pulvis, & cinis, ut apponeres erga me Cor tuū, inclinans cælos tuos, & descendens, ut sanguine tuo purissimo, sordes meas lavares , & deficientem præ fame , animam meam , non manna de cælo, sed carne tua , immaculata, reficeres, & satiares. Si cæli cælorum te capere non possunt, & Angeli non sunt mundi, in conspectu tuo,

H

quis

quis ego sum? & quæ domus mea, ut
 ad me venire, ac in me commorari vo-
 lueris? Quid in me invenisti Rex tre-
 mendæ Majestatis, quod à templo glo-
 riæ tuæ, traheret te, & descendere fa-
 ceret, in abyssum miseriarum? Vos
 Angeli Sancti? Vos omnes Electi Dei,
 venite, audite, & narrabo vobis quan-
 ta fecit DEUS, animæ meæ: cum enim
 essem pauper, & abominabilis, nec au-
 derem, oculos meos levare, ad cælum,
 præ multitudine iniquitatum mearum,
 ille me de pulvere suscitavit, erexit de
 stercore, ut sederem cum Principibus,
 & de mensa ejus comederem, omnibus
 diebus vitæ meæ. Gratias illi agite,
 ex me, vos amici mei fidelissimi: ego
 enim puer sum, non annis, sed sensu,
 & nescio loqui, nec verba invenio,
 quibus possim, ut par est, tam copio-
 sum munus gratiæ, extollere, & præ-
 dicare. Quis enim amor, infinitæ cha-
 ritati à me reddi potest, qui frigus, &
 gelu dici, non autem amor, mereatur?
 Quæ laus, quæ adoratio, quale obse-
 quium meum erit, quod nullum non
 red-

reddat, infinita ejus perfectio, & dignitas, & ima, & summa indignitas mea? Sed tu Domine, miserator, & clemens, & immensæ bonitatis, tu nosti figmentum meum, nè despicias humillimam gratiarum actionem, quam tibi offero, de paupertate mea, & Sacrificium laudis meæ, honorificabit te. Tua est magnificentia, tua est gloria, & tibi laus, in perpetuas æternitates, pro tam excelso, & incomparabili beneficio. Tibi laudes concinant, tibi mecum gratias agant, universi populi, tribus, & lingvæ; omnes Angeli, & Sancti tui, quoniam misericordia tua, magnificata est super me, & miserationes tuæ, super omnia opera tua. Jubilent tibi, omnes creaturæ, quæcunq; cæli, terræ, & abyssi ambitu continentur, laudem tibi perpetuam dicant, quæ à te exiens in te refluat omnium rerum principium, & finis. Jubilent tibi, & gratias agant, cor meum, & anima mea, vires, sensus, potentiæ, & omnia membra, corporis mei, tibiq; soli, sit honor, & glo-

gloria, à quo, per quem, & in quo, sunt omnia: qui es DEUS benedictus, & laudabilis, in sæcula, sæculorū. Amē.

Oblatio post Communionem.

Servus tuus ego sum, Domine Deus meus, & pro tributo servitutis meæ, aliquid tibi offerre vellem, quod Majestati tuæ dignum, & acceptabile foret: sed excedit omnem facultatem meam, debitum meum, quia tantum tibi debeo quanti tu vales qui infinitus es. Et ex me quidem nihil possum, nihil sum: habeo tamen ex gratia tua donum præclarissimum, quod nullo modo recusare potes: habeo dilectissimum Filium tuum Dominum nostrum JESUM Christum, qui ita se mihi communicavit, ut ego in illo, & ille in me sit. Quare verba Prophetæ tui aptissimè usurpabo & dicam. *Benedic anima mea Domino, & omnia quæ intra me sunt nomini sancto ejus.* Ipse enim Filius tuus dignè pro me nomini tuo benedicet, teq; amabit & glorificabit, nam intra me sacramentaliter existens factus

factus est unum mecum, & ego unum cum illo. Ipsum igitur offero tibi velut Thymiana suavissimi odoris ad maximam tui gloriam & honorem, in gratiarum actionem pro universis beneficijs tuis; in remissionem peccatorum meorum, & totius mundi, ad impetrandam mihi, & omnibus omnia subsidia vitæ temporalis & æternæ, & pro animabus omnium fidelium defunctorum. Suscipe Domine cum hac sacratissima oblatione animam meam, & corpus meum, omnes vires, & affectus meos, ut sim perpetuum holocaustum jugiter ardens Majestatis tuæ. Præsta ut deinceps nec membra, nec sensus, nec potentias, nec vitam habeam nisi ut te amem, & serviam tibi. Tu sapientia mea, tu lux mea, tu fortitudo mea, & robur meum: doce me, illumina me, corrobora me, ut cognoscam, & faciam voluntatem tuam. Offero me tibi in servum perpetuum, meq; totum resigno in beneplacitum tuum, abjecta de me omni cura & sollicitudine. Quidquid mihi evenire

H 3

per-

permiseris à Divina manu tua amantissimè suscipiam. In tempore, & in æternitate id volo quod tu ab æterno de me decrevisti, sive prosperum illud sit, sive adversum. Vivat semper & regnet super me beneplacitum tuum, quod in omni verbo, actione, cogitatione, & levissimo quoq; motu adimplere desidero. Domine ante te omne desiderium meum, & gemitus meus à te non est absconditus. Desunt enim mihi verba quibus explicem affectum meum, sed projicio me in ardentissimam fornacem amoris tui, quo succensus ad me venire dignatus es, & mansionem apud me facere. Succende me Domine, inflamma cor meum, viscera combure, ut jugiter tibi ardeam, in te vivam, & in te moriar. Amen.

Petitiones post Communionem.

Dulcissime amator Domine JESU
Christe, qui me Corpore tuo immaculato, & pretiosissimo Sangvine re-
feci-

fecisti, ignosce obsecro indignitati
 meæ, & quidquid deliqui in hujus Sa-
 cramenti perceptione misericorditer in-
 dulse. Agnosco enim, & confiteor
 præsumptionem meam, quia ad hoc
 tremendum mysterium accedere ausus
 sum sine debita præparatione, reveren-
 tia, humilitate, & charitate. Respice
 in me oculis misericordiæ tuæ, & sup-
 ple excessu meritorum tuorum meam
 nimiam imperfectionem. Heu quoties
 venisti ad me, ut pauperrimam ani-
 mam donis tuis locupletares? Ego au-
 tem contempsi te, & abii in regionem
 dissimilitudinis post prava desideria
 mea. Cumq; inutiliter omni dissipata
 substantia ad te nudus, & fame con-
 sumptus reversus sum, tu suscepisti me,
 & omnium iniquitatum mearum obli-
 tus es. Bonum mihi quod amasti me,
 amore æterno & infinito: nisi enim
 infinita esset bonitas tua, nullo modo
 posses tolerare miseriam meam. Vin-
 cat igitur, & absorbeat, bonitas tua
 malitiam meam. Riga me lachrimis,
 quas fudisti pro me, unge me myrrha

doloris tui, astringe vinculis, ablue
 sanguine, Cruce erige, morte vivifica.
 Penetret amor tuus viscera mea, ut
 omnem alienum amorem expellat.
 Abscedat phantasmatum multitudo,
 meq; totum in te transforma, ut in te
 pereat omnis substantia mea, meque
 amplius non inveniam, nisi in te. Im-
 prime cordi meo amorem crucis &
 humilitatis, qui ut me redimeres, nec
 uno quidem momento sine Cruce esse
 voluisti. Nè patiaris me sine fructu à
 te recedere, sed operare mecum mira-
 bilia tua, sicut cum Sanctis tuis opera-
 tus es, & fac me ambulare in fortitu-
 dine cibi istius usque ad montem per-
 fectionis. Succende me ignita vi amo-
 ris tui, ut sim tecum consummatus in
 unum omninò abstractus à me ipso, &
 ab omni creatura. Omnibus quoque
 famulis tuis pœnitentibus, da pacem,
 salutem, & tuam benedictionem. Con-
 verte miseros peccatores ad te, revoca
 Hæreticos, atq; Schismaticos, illumina
 infideles, te ignorantes. Adesto omni-
 bus qui in aliqua necessitate, & tribu-
 latio-

tatione constituti sunt. Esto propitius propinquis amicis & benefactoribus meis; miserere omnium adversantium mihi, vel qui me aliqua molestia affecerunt, da vivis veniam & gratiam, da fidelibus defunctis lucem & requiem sempiternam. Amen.

*Aspirationes post Communionem ad B. Virginē,
Angelos, & Sanctos.*

Respice in me Gloriosissima Virgo MARIA, quia dignum objectum oculorum tuorum factus sum. Loquere pro me bona dilectissimo Filio tuo, qui me corpore & sanguine suo suavissimo refecit, & offer ei merita tua in supplementum imperfectionis meæ. Gratias age ei pro me, & impetra mihi ut Sacramentali sua præsentia non discedat à me, nisi relinquat post se animæ meæ largissimam benedictionem.

Angeli Sancti Ministri DEI altissimi, facientes verbum illius, aspici-

Primogenitum Patris æterni, quem introcuntem in orbem terrarum jussu Patris adorastis, & facite me in eo spiritu, & veritate illi servire, qua vos eadem in hac vita ministrastis, & nunc in cælesti Patria servitis.

Sancti Patriarchæ & Prophetæ viri desideriorum conscij secretorum Dei, intuemini promissum ab initio mundi Redemptorem, quem tam ardentem desiderastis, & tanto tempore expectastis, nec videre potuistis, facite me toto affectu ad ipsum suspirare, ut reliquæ promissiones ejus fideles inveniantur, & sentiam promissos Sacramenti effectus.

Apostoli JESU Christi, ejusque Evangelij clarissimi Prædicatores aspici-
cite in me ipsum dilectissimum Magistrum vestrum, quem tantoperè dilexistis, & impetrate mihi, ut intimis visceribus ipsum super omnia amem, ejusq; fervoris particeps fiam quem tunc experimentaliter gustastis quando hoc cibo de manu ejus refecti fuistis.

Inviictissimi Martyres Christum re-
spici-

spicite Crucifixum, pro cujus amore sanguinem vestrum tam libenter fuditis, ipsumq; orate ut me semper in cruce vivere, & mori faciat, quatenus vicem quam possum, ejus dilectioni rependam.

Beati Pontifices Dominici gregis custodes, & Pastores vigilantissimi, agnum cernite immaculatum, quem omnipotenti DEO in Sacro Altari toties immolastis, & vestris precibus facite me dignum tanti sacrificij, ut me ipsum bonis operibus perpetuò immolem tam sacræ oblationi associatum.

Servi fideles Christi Sancti Monachi & Eremitæ, videte dulcissimum Dominum vestrum, pro quo omnia mundi hujus oblectamenta & affectu, & re ipsa reliquistis, & facite me pro ejusdem amore prospera mundi despicere nulla ejus adversa formidare, & ad fastigium sanctitatis quantociùs pervenire.

Purissimæ Virgines Sponsum vestrum intueamini, cui cum summa exaltatione virginitatem vestram consecratis,

craftis, illibatam mihi mentis & corporis virginitatem obtinete, ut hujus vitæ cursu peracto mundus ab omni labe in conspectu Domini merear præsentari.

Omnes Sancti & Sanctæ Dei, consolatio pauperculæ animæ meæ, vos præsertim Patroni & Protectores mei, aspiciite Magistrum, auctorem, & præmium sanctitatis vestræ, ac universam vestram felicitatem, intra viscera mea manentem, mihiq; ab ipso, cui vos tantoperè verbo & exemplo in hac vita conformastis, vestris intercessionibus impetrate, ut vestra semper vestigia sequar, & ut ad scopum mihi propositæ perfectionis, ac tandem plenus meritis ad vestrum merear consortium pervenire. Amen.

Aspirationes post Communionem sæpe per diem repetendæ.

Quis me separabit à charitate tua
Do.

Domine DEUS meus? non timor mortis, quia tu es vita mea: non amor mundi, quia ipsum sperno, & omnes pompas ejus: non tribulatio, quia tu dum tribulor mecum es; non fames, non nuditas, non paupertas, quia tu es cibus meus, operimentum meum, & divitiæ meæ; non persecutio, non gladius, quia hæc dulcia mihi sunt propter te: non creaturæ, quia ante te sunt nihil.

Quando educes me de isto carcere, cui te relicto adhæsit anima mea? quando trahes me post te, captum specie tua, & pulchritudine tua? quando mihi, & toti mundo mortuus ero, ut in te solo vivam, & tu vivas in me? O si semper te amarem! te semper possiderem, à te nunquam discederem, in te prorsus converterer.

Quid possum extra te desiderare, cum in te sint omnia bona. Nimis avarus est, cui tu non sufficis.

O amor! qui omnia potes, quando facies, ut diligam te toto corde, tota anima, totis viribus. Quid mihi est in
cælo

cælo, & à te quid volui super terram?
 Jam plenum est desiderium meum,
 plenum gaudium cordis mei, quia tu
 es plenitudo mea, omne bonum, &
 desiderium meum.

Refice Domine esurientem animam
 meam, accende frigiditatem meam igne
 amoris tui, illumina cæcitatem meam,
 claritate præsentiae tuæ.

Verte mihi omnia terrena in amari-
 tudinem, omnia intima & creata in
 contemptum, & oblivionem.

Erige cor meum ad te in cælum,
 & nè permittas me vagari super ter-
 ram.

Penetret quæso hujus Sacramenti
 virtus, omnia intima mea, & quidquid
 in me pravum, quidquid vitiosum est,
 mortificet & eradicet.

In te JESU suavissime sit omnis de-
 lectatio mea, tædeat me gaudij quod
 est sine te, amara mihi sit omnis quies,
 quæ non est in te.

Emitte ex te Benignissime JESU,
 amoris tui radios, qui me succendant,
 & quidquid terrenum in me est com-
 burant,

burant, & consumant, ut igne inextingvibili charitatis tuæ ardeam, & vetus in me homo totus deficiat.

Utinam me rapiat ignita vis amoris tui, quæ me transformet in te, & in te absorbeat, ac me tecum unum efficiat.

ORATIO

*Circa Communionem, vel ante
Sanctissimum SACRA-
MENTUM dicenda.*

Ave dulcissime JESU, verus DEUS, & verus homo, qui ex voluntate Patris cooperante Spiritu Sancto, te mihi, nascens in socium, convescens in edulium, moriens in pretium, regnans, in præmium, dare dignatus es; ave, & benedic calamitoso exuli tuo, meque recipe in tui amoris suavissimos amplexus. Avete manus venerabiles pro me crucifixæ. Avete pedes speciosi, pro me clavis confixi. Ave latus divinum pro me lanceâ vulneratum. Ave mitissimum cor, mei peccatoris indignissi-
mi

mi amore, faucium. Ego pulvis & cinis indignus conspectu tuo, ob innumera peccata mea, de quibus doleo, te Dominum meum, & Deum meum, hic verè præsentem omnium creaturarum possibili affectu, saluto, adoro, laudo, & glorifico, & ab omnibus amari, laudari, & glorificari, desidero in æternum & ultra. Offero tibi Domine in perpetuum holocaustum voluntatem meam, arborem tuam, ut nec bona vel le liceat mihi, nisi tu id per inspirationes tuas significes. Quid enim scit puer tuus Benignissime Pater, quid expediat sibi, quam viam teneat cæcus in tot periculis, & ignarus viæ? Tibi cura est de me ab æterno, tu me dirige in viam mandatorum tuorum. Si me vis esse hic minimum, ut sim maximus in regno tuo, nonnè infinita est misericordia tua? Si vis me in omnibus obedire, & ab omnibus contemni, sequar vestigia tua suavissime Redemptor, qui DEO Patri æqualis obediens ei fuisti, usque ad mortem, mortem autem Crucis, & cum sceleratis reputatus es.

Quod

Quod si immemor promissionis meæ,
 quā me tibi in servum spontè obtuli
 toties, optans fieri unicam voluntatem
 tuam, jam corporis & sensuum com-
 moda quæro. Si obliviscor prævarica-
 tionis meæ, & tui JESU felle potati,
 si honorifica affecto, & vilem me agno-
 scens, vilis haberi nolo, quanta mihi
 confusio in die illa in conspectu tuo.
 Absit hoc à me Domine, ut detraham
 de holocausto tibi dudum oblato, ut
 non sequar semper voluntatem tuam.
 Quæ est enim spes mea, & fiducia mea,
 & amor meus à juventute mea? Non-
 nè tu Domine DEUS meus? In te er-
 go sperans non confundar, te sequens
 non errabo, te diligens non timebo.
 Posside JESU bone cor meum, & re-
 ple illud gratia tua. In te vivam, in
 te moriar, & tam in vita, quàm in
 morte cantabo tibi, quia bonus es, &
 in æternum misericordia tua. Laudent
 te mecum cæli & terra, pro tot, ac
 tantis beneficijs tuis. Tu me amasti ab
 æterno, etiam si prævideres me aliquan-
 do te osurum: tu me conservasti &
 I rede-

redemisti, qui toties te vendidi pro vilissima creatura: tu prodigum expectasti: justificasti impium, fragilem præservasti, & fugientem proditorem tuum misericorditer vocasti, ut collocares cum Principibus tuis. Et non sufficit adhuc tanta charitas tua, ut amore lique scat anima mea? Sed quod omnem superat gratiam passus es pro me extasim amoris, parasti in conspectu meo hanc Divinissimam mensam, in qua carnem tuam in cibum & sanguinem in potum tribuisti, trahens me ad te in funiculis Adæ in vinculis charitatis. Quis jam me separabit ab amore tuo? quis me impediet nè me intime tecum uniam? Dixisti enim, *qui manducat meam Carnem, & bibit meum Sanguinem, in me manet, & ego in illo.* O dulcissimum verbum! Tu in me, & ego in te. O quanta dignatio! Tu in me, & ego in te. O quantus amor! Tu in me vili sterquilinio, & ego in summo bono. O qualis commutatio! Tu in me, & ego in te. Quid ultra petere & sperare possum. Vilitas nos certe in

tè in salutari tuo, ad videndum in bonitate Electorum tuorum. Et quomodo potero declinare à te, non jugiter adhærere tibi, qui tam copioso munere gratiæ locupletasti me, mihiq; præsens semper assistis in memoriali passionis tuæ in hoc compendio mirabilium tuorum. Laudo, & glorifico te dulcissime hospes animæ meæ, quod hoc Sacramentum in ultima Coena instituiti, & in eo permanere nobiscum usq; ad consummationem sæculi voluisti. Omnes Beatorum Spirituum ordines te mecum magnificent, & exaltent, & gratias pro me indigno referant, quod à me immundissimo peccatore sumi non sis dedignatus. Gratias item ago tibi pro tribulationibus, tentationibus, & confusionibus, quas ad salutem meam esse voluisti, & me offero ad hæc, & postulo veste tua indui, obtestans per viscera misericordiæ tuæ, ut retribuas illis, qui suo fortè crudeli damno & pœna tibi luenda tantum bonum mihi attulerunt. Cupio tecum bajulare crucem, nudus nudum sequi, in te vive-

re, pro te mori, Hæc est ultima voluntas mea, velut hodie morituri, coram te Iudice & Patre amantissimo, & Curia Sanctorum, quos testes habebam infidelitatis, & tepiditatis, si deterior evasero. Averte Domine, & dele in me servo tuo quidquid tibi displicet. Fac ut temporalium omnium fastidium habeam, cum hæc satiari nunquam possunt. Tu verò Domine omne bonum es, qui es & felicitas mea, & sola satiatio animæ meæ. Quis ergo mihi tribuat, ut te solum diligam, te quæram toto corde, te in omnibus amem, qui in omnibus es, & operaris? Veni, Bone JESU, JESU dulcissime, suavissime, pulcherrime, potentissime, sapientissime, gloria mea, & exaltans caput meum, veni, & ure cor meum, inebria me charitate tua, & fac me unum tecum, sicut tu, & Pater unum estis. Dispone, & ordina me creaturā tuā, secundum beneplacitum tuum. Tuus enim sum, & esse volo, in sæcula, sæculorum.

A M E N.

ORA.

O R A T I O

Ad quinq; vulnera Christi.

Salve vulnus benedictum dexteræ manus Domini mei JESU Christi crucifixi pro me, & omnium hominum salute, roseo stillans cruore. Protege me Domine dextera tua, nè quando dicat inimicus meus, prævalui adversus eum, quem tu sanguine tuo redemisti. Deducat me mirabiliter dextera tua, ut omnes cogitationes meæ, & sermones mei semper rectà tendant, & dirigantur ad te, utpotè scopum & finem meum. Da mihi gestare semper ardentem lampadem oleo charitatis instructam, ut dignus habear qui tecum ad cælestes nuptias intromittar, ut cum sæculum judicaturus adveneris, ad dexteram tuam constitutus audire merear cum Electis tuis. Venite Benedicti Patris mei, percipite Regnum vobis paratum à constitutione mundi Amen.

Salve beatificum vulnus sinistræ manus Salvatoris mei JESU Christi,

pretiosissimo ejus sanguine purpuratum. Manu tua forti, & brachio excelso ad nihilum redige Domine, quidquid sinistrum & perversum moliuntur adversum me, qui cogitant mihi mala. Comprime vires hostium, qui quærunt animam meam. Tuere me, & adesto mihi in omnibus adversitatibus, & tribulationibus meis. Dic animæ meæ: Salus tua ego sum, ut de manu inimicorum meorum liberatus in sanctitate, & justitia serviam tibi omnibus diebus vitæ meæ. Amen.

Salve gloriosum vulnus dextri pedis Domini mei JESU Christi, sanguine Agni Immaculati conspersum. Perfice Domine pedes meos tanquam cervorum, ut indefesso cursu per viam mandatorum tuorum incedam, eaque semper inquiram quæ placita sunt tuæ Divinæ voluntati. Dirige gressus meos in virtutem, donec videam DEUM Deorum in Sion. Lucerna pedibus meis sit verbum tuum, & lumen semitis meis, ut etiam proximis lucis exempla præbeam, quatenus tu DEUS meus
in

in omnibus, & ante omnia glorificeris
nunc, & in æternum. Amen.

Salve venerabile vulnus sinistri pe-
dis JESU Christi, sanguine madefactum.
Evelle Domine pedes meos à laqueo,
quem statuerunt mihi inimici mei.
Custodi animam meam à lapsu, nè fiam
hostibus meis in prædam. Non veniat
mihi pes superbiæ, sed in simplicitate
cordis mei incedam coram te omni
tempore. Edoce me vias tuas, ut sci-
am quid acceptum sit coram te, & ope-
re compleam universa quæ præcepisti
mihi. Amen.

Salve vulnus saluberrimum cordis
JESU Christi, crudeli cuspide inflic-
tū, è quo sanguis & aqua copiosè emanâ-
runt in ablutionem peccatorum no-
strorum. Vulnere cor meum Domine
amoris tui jaculo, ut te in omnibus &
super omnia colat, teque, & proxi-
mum propter te ferventi semper amo-
re prosequatur. Munda me purissi-
mo sanguine, & aqua salutari, ut ab
omni labe emundatus te DEUM Sal-
vatorem meum, quem soli mundo
14 corde

corde videbunt in omni æternitate me-
rear contemplari. Amen.

Paraphrasis Anagogica Dominicæ Orationis.

Pater.

TU es ille, qui filios spirituales pro-
generas mediante vivificativo ger-
mine, & ideo verè tunc filius tuus ero,
quando te vero amore constringam.
Tu Pater omnia potes, quia omnia fe-
cisti ex nihilo, da ut serviam tibi filiali
amore, teque intimis visceribus ample-
ctar, & tibi soli adhæream.

Noster.

Qui ratione tuæ latissimæ bonitatis
omnes spiritus rationales per
immissos à te radios ad te trahis, & non
est qui se abscondat à calore tuo: quan-
do te tam ardentè amabo, ut tua bo-
nitas in me appareat. Nam si verè te
amarem, tunc aliquid in me tuæ latissi-
mæ diffusionis stillares.

Qui

Qui es in cælis.

SED in terris quoq; es per essentiam, præsentiam, & potentiam. Verùm alio modo in cælis es quàm in terra. In cælis enim sunt Angeli & Beati, qui cæli cælorum sunt, in quibus adeo ineffabiliter es, ut esse in rebus cæteris non videaris. Cæli enim sunt Sancti Viri, qui à terrenis rebus elevati, puri, simplices, illuminati in cælis semper conversantur: in quibus es per gratiam, quæ tanti est pretij, ut sine ea quidquid in mundo est, nihil est. Quando igitur anima mea nitida, & clara instar cæli efficietur, & diversarum virtutum sideribus adornata? Tunc enim in me habitabis, cum per flammam amoris ab omni fæce purgatus mundum tibi & immaculatum cordis hospitium exhibebo.

Sanctificetur Nomen tuum.

SINE terra efficiatur in me Nomen tuum quod est mirabile. Nisi enim depulsa omni carnalitate te super omnia

omnia diligam, terrenæ concretionis pondus spiritum terræ alligatum tenebit. Quando igitur sanctificabitur notitia tua in me. Quando in me habitabis per gratiam & amorem, ita ut terra nullum in me habeat locum. Quando depulsa omni mortalitate unus tecum spiritus efficiar per mysticam unionem.

Adveniat Regnum tuum.

VT non regnet peccatum in meo mortali corpore. Vult quidem regnare in me, quandoq; inanis gloria, quandoq; luxuria, sed ego nolo quemquam in me regnare, nisi te Domine Rex Regum, qui solus habes immortalitatem. Tunc autem in me regnabis, cum te ardentem amavero, qui enim te amat, tecum regnat, & qui te possidet, omnia possidet in æternum. Valeant omnia Regna mundi, & omnis gloria eorum. Melior est mihi dies una in atrijs tuis, quàm mille anni in tabernaculis peccatorum. Exul sum, & peregrinus super terram ad hoc natus, ut
futu-

futuram civitatem inquiram, in qua tu regnas : & hoc est regnum quod opto; nam si hoc quaesiero, & justitiam ejus, tu me de cæteris fecisti securum.

*Fiat voluntas tua sicut in
cælo & in terra.*

Regnum enim tuum nemo potest possidere, nisi rectus fuerit. Rectus autem esse nequit, nisi qui tuam fecerit voluntatem: voluntatem verò tuam nemo facere potest, nisi ex dono tuo, quia nemo venit ad te, nisi tu traxeris eum. Propterea fiat à te voluntas tua, mihi scilicet donetur à te, ut per gratiam faciam in terris voluntatem tuam, sicut in cælo fit à Beatis per gloriam tuam. Purifica cor meum, o ignis ardentissime! ut expellam perfectè amorem proprium, & rejiciam propriam voluntatem, ut planè fiat in me voluntas tua, & mea pereat. Pereat in me omnis proprietas, teque solum diligam ex toto corde, & glutino amoris tecum unitus tibi soli adhæreā, & consentiam.

Panem

*Panem nostrum quotidi-
anum da nobis hodie.*

Non peto quod voluptati serviat,
sed quod langventi animæ sufficiat.
Non carnis consolationem quæro, sed
affectionem super cælestem. Panem
volo Angelorum, augmentum videlicet
amoris, quo solo afficitur, & satiatur
anima mea. Quando fiet istud optime
Pater, ut te flammigeris affectionibus
contingens panem amoris comedam in
saturitate. Hunc Panem da mihi sem-
per, ut eodem cibo in præsentī nutriar,
quo Angeli Sancti in gloria satiantur,
ut de micis comedam quæ cadunt de
mensa Domini mei. Inquietum est
cor meum, donec Pane isto divino ali-
quantulum confortetur, qui ideo quo-
tidianus dicitur, quia quo plus come-
ditur desiderio quotidiano reficit abun-
dantiùs.

Et dimit-

Et dimitte nobis debita nostra, sicut & nos dimittimus debitoribus nostris.

Multipliciter enim tibi debitor sum. Nam quis potest numerare peccata quæ feci, quis tolerare, quæ quotidie perpetro? Hæc sunt debita, quæ mihi opto dimitti. Solus autem amor uniendo me tibi, te quondam mihi offensum, placatum efficiet, & reddet gratiosum. Quando igitur ô bone Creditor te vero amore constringam, ut omni peccato dimisso te mihi placatum sentiam notitia experimentalis? Non differas secundum multitudinem bonitatis tuæ dimittere mihi, quia & ego verè dimitto debitoribus meis, paratus eis benefacere, ubi, & quando oportuerit.

Et nè nos inducas in tentationem.

Perfice Pater quod cœpisti, & misericordia subsequatur me omnibus die-

diebus vitæ meæ. Scio enim quòd qui perseveraverit usque ad finem hic salvus erit. Nemo autem perseverare potest sine te, quia totus mundus laqueis & tentationibus plenus est, & nos in tenebris ambulamus, atq; inimicos habemus, qui non dormiunt die ac nocte. Hoc itaq; peto amoris, glutino inseparabiliter colligari, quia tunc securus ero, cum tibi totaliter adhærebo.

Sed libera nos à malo.

NON à malis, quæ me pati oportet in hac vita, ut prober in camino tribulationis; hæc enim pati, & libenter ferre paratus sum tua gratia opitulante. Sed à malo poenæ infernalis, quæ hominem separat à te, à malo quoque Purgatorij, non ut effugiā tormenta, sed nè diu ibi detentus desiderio frauder videndi faciem tuam, in quam desiderant Angeli prospicere. Verùm si ego te ardentè diligere, amoris flamma peccatorum rubiginem exureret, & sic in hora mortis meæ flammigeris affectionibus expurgatus ad te diu desideratum

ratum sine dilatione evolare. Quando ergo hoc ardore te diligam, qui & pœnam excutiat, & à dilatione absolvat? Hoc ipse præstare digneris, qui vivis, & regnas DEUS per omnia sæcula sæculorum. Amen.

PARAPHRASIS Angelicæ Salutationis

Ave.

MAter Dei, Mater gratiæ, Mater misericordiæ, quæ Deum & hominem peperisti. Ave Regina cæli & terræ, quæ sine væ peccati semper fuisti, ab omni miseria immunis, & verè in omnem æternitatem beatissima. Ave fons salutis, ejus privilegiorum multitudo innumerabilis est. Ave pax, & gaudium mundi, quæ cælum terræ, nos Deo reconciliasti.

Maria.

NOmen dulcissimum super mel, & favum, Nomen post Filij tui Nomen

men, super omne Nomen, in quo flectitur omne genu cælestium, terrestrium, & infernorum. MARIA illuminatrix omnium spirituum, ad cujus lucem mores effingimus: Domina nostra, cuius pio famulatu felicitatem adipiscimur sempiternam: Stella maris, cujus perpetuo afflatu, & splendore illustramur, & ad portum salutis dirigimur. Mare gratiarum, & sanctitatis, è quo exeunt omnium virtutum exempla, omnia Sanctorum Charismata & beneficia.

Gratia plena.

IRa enim & maledictio in omnes filios Adæ, tu autem invenisti gratiam apud Deum. Singulis gratia data est in partes; in te tota effusa est gratiæ plenitudo. Tu gratia plena, quæ nulli unquam peccato aditum aperuisti, gratia inquam plena, quia omnia opera ex gratia fecisti, & in cunctis virtutibus excelluisti. Fuere quidem & alij Sancti gratia pleni, sed tu valdè differenter ab illis, quia ubi major abundantia li-
quo-

quoris, ibi major capacitas vasis. Quanta autem capacitas tua fuit, quæ illum tuo gremio contulisti, quem cæli capere non possunt.

Dominus tecum.

TECUM in corde, tecum in utero, tecum in auxilio, tecum Filius, quem carne induisti, tecum Spiritus Sanctus, de quo concipis, tecum Pater, qui eum genuit ab æterno, quem tu paries in tempore. Dominus tecum, & in te, uti Rex in folio, sponsus in thalamo, amicus intimus in amico, imò multò intimiùs, & arctiùs. In te etiam Dominus est, quomodo enim subsisterem sine illo? Sed in te multò excellentiùs per maiorem gratiam, per maiorem bonorum communicationem, per assumptionem humanæ naturæ.

Benedicta tu in mulieribus.

VERè benedicta, quæ à communi maledictione, mulierum libera, nec sterilis fuisti, nec virginitatem amisisti, nec in tristitia peperisti.

K

Por-

Portasti Deum, qui portat orbem, genuisti genitorem tuum, nutrivisti omnium viventium nutritorem, virum non novisti, & virum utero tuo circumdedisti. Verè benedicta, quæ fuisti excelsior cælo, latior terra, major universo illum gerens in ventre, qui nullo clauditur termino. Verè benedicta, quia carne ex te assumpta Filius Dei humanū genus ab omni maledictione liberavit.

*Et benedictus fructus ventris
tui IESUS.*

Quia sine corruptione conceptus, sine dolore natus, & ut peccati destructor in lucem editus. Merito benedictus, qui est super omnia DEUS benedictus in sæcula, quem Pater caput Angelorum & hominum constituit, & sine mensura omni gratia & benedictione replevit. Tu arbor vitæ fuisti in Ecclesiæ Paradiso sita, ex qua tam dulcis, tam utilis, tam pretiosus exit fructus, qui & te benedictam fecit, & nos eripuit à maledictione & morte pec-

peccati, & omni benedictione cum-
lavit.

Sancta Maria Mater Dei.

Quæ Sancta es, & sanctitatis prodi-
gium, donorumq; & gratiarum
pelagus inexhaustum. Vera Mater
Dei, quæ Deum hominem factum pe-
peristi: Pia Mater nostra, quæ erga
nos maternum geris affectum, & Mater
peccatorum vocari non erubescis.

Ora pro nobis peccatoribus.

Non dicimus quid ores, quia tu scis
quid expediat nobis. Tu Sancta es,
& quid nobis nisi sanctitatem postula-
bis. Tu gratia plena, quid petes nisi
gratiarum abundantiam. Ora igitur
pro nobis.

Nunc & in hora mortis nostræ.

Duplex auxilium nobis est necessa-
rium, alterum ut sanctè vivamus,
alterum ut sanctè moriamur. Utrum-

que nobis impetra, ut in præfenti tempore ab omnibus malis animæ & corporis liberati in sanctitate progrediamur, & perseveremus, & cum hora mortis nostræ advenerit, ab omnibus insidijs diaboli erepti, Sancti & immaculati hinc decedamus, & perpetuo Dei aspectu in cælesti Patria perfruemur. Amen.

ORATIO

Ad Sanctissimā Trinitatem.

O Summa TRINITAS, una virtus, indiscreta Majestas, unus in substantia, trinus in personis, numeraliter innumerabilis, mensuraliter immensurabilis, invisibilis, ineffabilis, admirabilis, incomprehensibilis, imperscrutabilis. DEUS Magnus sine quantitate, sine qualitate bonus, sine tempore sempiternus, sine situ ubiq; præsens, sine loco ubiq; totus, omnia implens sine extensione, sine indigentia omnia creans, sine motu omnia movens. In magnitudine infinitus, summus in bonitate,

te, in virtute omnipotens, in sapientia
inæstimabilis, terribilis in consilijs, in
verbis verax, in operibus Sanctus, ju-
stus in judicijs, in misericordia patien-
tissimus, erga delinquentes pijsimus,
pijsimus erga poenitentes, cui nec præ-
terita transeunt, nec futura succedunt:
cui nec origo initium dedit, nec tem-
pora dant incrementum, quem nec
spatia dilatant, nec voluntas variat, nec
mæsta perturbant, nec læta demulcent.
DEUS Sancte Sanctorum, DEUS spiri-
tuum & cunctæ carnis, à cujus conspe-
ctu tremit cælum & terra, cujus nutui
obediunt omnia elementa vivificans
me lumen illuminans me. Aperi mihi
clamanti portas justitiæ, & ingressus in
eas confitebor tibi. Te adoro, te lau-
do, te glorifico labijs & corde, omniq;
qua valeo virtute te benedico, & pro-
cumbens humiliter sub pedibus magni-
ficentiæ tuæ gratias ago tibi, quia per
illustrationem gratiæ tuæ illuminasti
me, & per Matris Ecclesiæ documenta
in fide tua confirmasti me. Et unde
hoc mihi factor cæli & terræ, qui bo-

norum meorum non eges, unde mihi
 hoc, quod amasti me? Quid tibi dedi,
 & retribuisti? Ubi eram antequam fie-
 rem, & ut inciperem bonum? Sed tua
 gratia factus sum, & innumerabilibus
 donis tuis ornatus sum, perfice ergo
 me, qui fecisti me; perfice usque ad
 formam plenam imaginis tuæ, & simi-
 litudinis, ad quam creasti me. Te in-
 voco ô Beata TRINITAS ut venias ad
 me, & templum me facias dignum glo-
 riæ tuæ. Rogo Patrem per Filium, ro-
 go Filium per Patrem, rogo Spiritum
 Sanctum per Patrem, & Filium, ut
 omnia vitia elongentur à me, & omnes
 sanctæ virtutes plantentur in me. DE-
 US immense, à quo omnia, per quem
 omnia facta sunt, custodi me opus ma-
 nuum tuarum in te sperantem, & in
 tua solummodò misericordia confiden-
 tem. Custodi me quæso hic & ubiq;
 nunc, & semper, ita ut in me nullus
 pateat locus insidijs inimicorum. Ad
 te Beatissima TRINITAS anima mea
 suspirat, quoniam à te infeliciter exu-
 lat. Discedens à te quantis se intrica-
 vit

vit erroribus, doloribus, timoribus?
Cor meum conturbatum est, & inde
dolor, derelinquit me virtus mea, &
inde pavor: lumen oculorum meorum
non est mecum: & inde error. Ve-
rùm tamen in te speravi Domine, quo-
niam adhuc confitebor tibi, cum error
videlicet à ratione, à voluntate dolor
atq; à memoria timor omnis recesserit,
& successerit illa quam spero mira se-
renitas, plena suavitatis æterna secu-
ritas.

Æterne Pater, ingenite, innascibilis,
principium, sine principio, auctor bo-
norum, fons Deitatis, ac totius entita-
tis origo. Deitas tua me totum reple-
at, ejusq; gloriæ participem faciat
quam Filius tuus mihi promeruit. San-
ctifica me in veritate, & tui præsentia
imple memoriam meam, ut cum timo-
re & tremore semper stem in conspe-
ctu tuo, nec unquam mens mea à te
avertatur. Fili unigenite non poste-
rior nec minor Patre, eique omninò
coæqualis & consubstantialis, DEUS
de DEO, lumen de lumine, candor
K 4 lucis

lucis æternæ. Verbum incarnatum,
 virtus omnipotens, sapientia quæ ex
 ore altissimi prodijsti, imago Patris,
 splendor gloriæ, & figura substantiæ
 ejus, illumina intellectum meum, ro-
 bora infirmitatem meam, ut te cogno-
 scam, & diligam, & tanquam unicum
 præsidium meum omnibus præferam.
 Sanctissime Spiritus à Patre, & à Filio
 procedens, utriusq; amor & arctissi-
 mum vinculum, charitas essentialis, &
 totius charitatis principium, ignis
 consumens, flamma vitalis supe-
 rans omne donum, à quo omnia bona
 in nos descendunt, inflamma volunta-
 tem meam ferventissimo tui amore, &
 constanti charitate, ut te solum quæ-
 ram, & universa despiciam. Adstringe
 me tibi, & Patri, & Filio, ut nec in-
 tellectu, nec affectu à vobis divellar,
 Sancta & adoranda TRINITAS DEUS
 meus, & omne bonum meum; abre-
 nuntio propter te omnibus mundi
 pompis & honoribus. Detestor omnē
 carnis & sensuum voluptatem, anathe-
 ma divitijs & vanitatibus sæculi. Glo-
 ria

ria mea hæc sit, pro te contemni, mea voluptas, tibi adhærere, meæ divitiæ, tibi servire in sæcula sæculorū Amen.

Affectus Animæ amantis
DEUM.

Domine DEUS, qui lucem habitas inaccessibilem, principium omniū, & ultimus finis, qui me creasti ex nihilo, & constituisti mihi terminos vitæ hujus mortalis, quos præterire non potero ut amem te, & serviam tibi, donec ad aliam meliorem vitam assumas me, in qua tecum per omnem æternitatem beatus sim. Domine DEUS meus, ecce pronus & supplex adoro te, & subijcio me tibi usq; ad imum nihili mei secundum infinitam & indeterminabilem distantiam tui à me; tu inquam qui solus, & omnia es, à me qui ex nihilo & nihil sum coram te. Laudo, & benedico te fontem omnium bonorum, & quia vis amari à me, & cor meum avidissimè postulas, illud tibi totum cedo & dono, ut jam non

ego amem te, sed tu ipse te ames corde meo, jam non meo, sed tuo. Amo te illo ardentissime Creator meus, & omne bonum meum, amo te quia dignus es: utere illo ad omne arbitrium tuum, postposito omni arbitrio meo, in tuum transfero, ac tuæ prorsus voluntati trado, permitto & resigno. Sed cur tantoperè cor meum desideras DEUS meus? quia nimirum pro nihilo habes, ore & lingua diligi, si cor tecum non est. Hoc est quod vis & petis, nec quemquam admittis in partem possessionis ejus. Ideo præcipis mihi, ut convertar ad te in toto corde meo, ut toto corde te quæram, toto corde te diligam, te sequar, & obediam tibi. Dignus enim es omni amore, quia omnis bonitas & perfectio, omnisq; ratio amabilitatis in te est, & tu prior dilexisti nos indignos amore, & dignissimos odio, quia sic fuit placitum ante te. Quasi enim non haberes objectum in te, totum tuum amorem quantumvis infinitum adæquans, extendisti extra te amorem tuum, & dilexisti me ab æter-

æterno propter immensam bonitatem
 tuam. Atque utinam Domine DEUS
 tantum tibi amorem rependere possem,
 quantum mihi impendisti, quam liben-
 ter te amarem amore immenso, infini-
 to, inenarrabili! Sed miser sum, &
 pronus ad malum ab adolescentia mea,
 nec possum qualitercunq; amare te,
 nisi tu dederis mihi ut te amem. Da
 igitur quod jubes, & jube quod vis.
 Hoc est enim omne bonum meum de-
 sursum descendens à te, amare te pro-
 pter te solum, qui dilectione dignissi-
 mus es: nec propter hoc bonum, aliud
 bonum volo, aut cognosco. Utinam
 nulla hætenus fuisset, nulla deinceps
 sit vitæ meæ actio, nulla corporis &
 animi motio, nulla functio sensuum &
 potentiarum, nulla virium exercitatio,
 quæ non fuerit aut sit ad maximam tui
 gloriam, amorem, cultum, & oblecta-
 tionem, cooperante & offerente Filio
 tuo sine quo nihil sum, nihil possū. Hoc
 volo, hoc desidero, hoc intendo, & in-
 cipiendo ab actione ista quam hoc mo-
 mento ago, reliquum omnes & singu-
 las

las usq; ad ultimum halitum vitæ meæ,
 & per totam æternitatem tibi offero
 per Filium tuum, & si quam in parti-
 culari offerre omiserò, id quæso ut tri-
 buas oblivioni meæ, & incogitantia,
 & hoc præsens propositum respicias,
 in quo semper perseverare, & quoties
 respiravero, id semper renovare cum
 perpetuo amoris in te mei augmento
 opto & desidero. Utinam instar thu-
 ris & Thymiamatis totus consumar in
 purissimum & acceptissimum Divinæ
 Majestatis tuæ holocaustum cum omni
 afflictione, & contemptu, & perfecta
 mei abdicatione in omnem voluntatem
 & beneplacitum tuum sine ulla proprii
 commodi admixtione. Amen.

Actus Humilitatis.

Quid fui Domine? quid sum, &
 quid ero? Fui nihil, nihil sum,
 & ero fortè nihilo peius. Fui conce-
 ptus in originali peccato, sum plenus
 peccato actuali, & quis scit, an ero
 condemnatus pœna gehennali? Fui mi-
 serabilis in ingressu, sum miserabilior
 in pro-

in progressu, miserrimus ero in egressu. Cum nihil essem, fui sine periculo damnationis, & sine spe salutis: & jam sum in spe dubia & gravi periculo: ero aut ex re sperata felix, aut ex periculi successu infelicissimus sic fui ut damnari non possim, sic sum ut salvari vix possim, sic ero ut in æternum damnatus, aut in æternum salvus. Quid fuerim scio, quia fui pessimus, quid sim nescio, quia de gratia incertus, quid ero ignoro, quia de salute dubius. Quid fui Domine ignosce, quid sum corrige, quod ero dirige: dirige inquam à malo præterito, in bono præsenti ad præmium futurum. Heu quanta est abyssus fragilitatis, vilitatis, & nihili mei, quoad esse, posse, & operari! quanta nihili moralis ob tot, & tanta peccata, quæ feci, facio, & fortè facturus sum, & quæ fecissem, facerem, facturus essem, nisi à Deo Creatore, & Redemptore meo, singulari gratia & providentia præservarer! Quam merito ergo me humiliare profundissimè deberem! Seraphim ex intimo sensu
humi-

humilitatis velant alis faciem coram
 Divina Majestate: quid ego vermicu-
 lus, pulvis, & nihilum facere debe-
 rem, qui bibo sicut aquam iniquitatem?
 Excedit hoc intelligentiam meam, &
 parem affectum non invenio. Agno-
 sco tamen, & profiteor coram te Deus
 meus, nihilum meum prout possum,
 Nihil sum sine te, quidquid facio,
 quidquid possum, tuum est, solum ni-
 hilum malitiæ meæ meum est. Tibi
 ergo omnis laus, honor, & gloria,
 mihi autem omnis confusio, & igno-
 minia, quia peccavi, & adhuc gravius
 peccassem, si gratia tua defuisset mihi.
 Ideo in abyssum nihili mei infra omnes
 etiam vilissimos & pessimos secundum
 id quod ex me sum, & possum, me de-
 mitto, & abijcio. Si quid boni in me
 est, tuum est, si quid in me non est,
 mera gratia tua est. Sic sentio de vi-
 litate mea, & infinita Majestate tua:
 sic in æternum sentire desidero intel-
 lectu, non meo duntaxat, sed omnium
 Electorum tuorum, Angelorum, & ho-
 minum, omniumq; possibilem creatu-
 rarum.

rarum. Imperfectum meum viderunt Domine DEUS meus oculi tui, sed in ipsius supplementum offero tibi omnium Sanctorum, maximè Beatissimæ Virginis humillimæ Matris tuæ, intensissimos sensus, affectus, actusq; internos, & externos, atq; excessus intimæ humilitatis, quos olim elicuere, & elicient unitos actibus & affectibus, quos tu in terris exercuisti. Suscipe, & offer æterno Patri, & satisfac pro me superbissimo peccatore. O cæcitatem arrogantiam & malitiam meam! quam parum hucusq;, quàm obiter, quàm raro inspexi abyssum nihili mei. Quoties putavi me aliquid esse cum nihil sim? quoties dixi in corde meo, dives sum locupletatus, & nullius indigeo, & nescivi, quia miser ego sum, & miserabilis, & pauper, & cæcus, & nudus? Quàm raro actus humilitatis exercui gratijs præventus, tot exemplis provocatus, tot oblatis occasionibus invitatus? Atq; utinam te nunquam offendissem tot actibus superbiæ DEUS meus. Doleo de his quantum possum,
eos-

eosq; detestor affectu meo, & omnium
 Sanctorum, & in compensationem tam
 tepidæ compunctionis meæ, offero ti-
 bi contritionem, & lachrimas omni-
 um verè poenitentium, quæ suæ vel
 alienæ superbæ maculas perfectissimè
 expiârunt. Paratum cor meum DEUS,
 paratum cor meum, nè desis tu mihi
 gratia tua, quâ aspirante conabor de-
 inceps oculos mentis meæ crebrius de-
 figere cum profunda admiratione in
 abyssum vilitatis meæ, & sublimitatis
 tuæ, quam fateor me nunquam satis
 posse penetrare, nec me satis posse hu-
 miliare, & despicere, nec ab alijs con-
 dignè humiliari & contemni, frequen-
 tando tales actus internos & externos,
 cum actuali reflexione: Suborta præ-
 fertim occasione seu tentatione inanis
 gloriæ, contemptus aliorum, confusio-
 nis, correptionis, admonitionis, &
 ignominie, recogitando me infinito
 contemptu dignissimum. Istos autem
 exiguos conatus meos offero tibi æter-
 ne Pater, & offerre semper intendo
 affectu omnium Sanctorum in unione
 per-

perfectissimorum exercitiorum humili-
tatis Christi Domini, Beatæ Virginis,
omniumq; Electorum tuorum. Tu qui
humilia respicis in cælo & in terra,
respice in faciem Filij tui dilectissimi
humiliantis se usque ad mortem Crucis;
humillimæ Matris ejus, & tot Sancto-
rum per humilitatem tibi placentium,
& da gratiam eos imitandi ad maxi-
mam tuam æternamq; gloriã. Amen.

Ante Missæ Sacrificium
ORATIO.

Clementissime Pater misericordia-
rum, & DEUS totius consolationis,
qui sic mundum dilexisti, ut Filio tuo
unigenito non parceres, sed cum pro
nostra reparatione, & salute, acerbissi-
mæ passioni, & morti traderes; cujus
gratissimam oblationem quotidie in
Ecclesia renovari voluisti, ut illius in
nobis fructum renovares: da mihi ob-
secro huic tam admirando, & salutari
Divinæ tuæ potentia, sapientia, ac bo-
nitatis mysterio sic interesse, ut cruenti
L illius

illius Sacrificij participationem per
 hujus incruenti oblationem quam effi-
 cacissimè consequi valeam. O quot
 suspirijs! quàm ardentibus votis ipse
 coæternus tibi Filius desideratus à cun-
 ctis gentibus fuit, donec tandem mis-
 sus à te formam servi accepit, & no-
 stra mortalitate indutus Majestatem
 Deitatis carnis velamine obtexit, tibiq;
 obediens factus usque ad turpissimam
 mortem crucis, nos morte sua ab æter-
 na morte redemit. Hoc opus tam im-
 mensæ charitatis in hoc Missæ Sacrificio
 recolitur, cui utinam assistere possim
 ea devotione, & reverentia quam exi-
 git Divinæ Majestatis præsentia, tot
 Angelorum assistentium frequentia tot
 mysteriorum quæ hic geruntur magni-
 ficentia. Tu quæso Domine posside &
 rege cor meum gratia tua, ut hoc
 meum obsequium, tibi placeat, & pro-
 fit animæ meæ. Doleo ex intimo
 corde meo, quod unquam offenderim
 te, qui tantoperè amasti me. Credo
 in te viva fide, o æterna Veritas!
 Spero in te firmiter, o vera salus ani-
 mæ

mæ meæ! Amo te ex toto corde meo,
 o summum bonum meum! Absorbeat
 me ardentissima vis amoris tui, ut nihil
 unquam separet me à charitate Christi
 Salvatoris mei, qui ex summo amore
 carnem suam & sanguinem mihi dedit,
 & ut sub speciebus panis & vini per-
 petuo nobiscum esset mirabiliter esse
 voluit. Cum quo, & Spiritu Sancto
 vivis, & regnas DEUS, per omnia sæ-
 cula sæculorum. Amen.

Ad Elevationem.

ADoro te JESU Christe, qui exaltatus
 es à terra, ut omnia traheres ad te
 ipsum, trahere me post te in funiculis
 charitatis, tuus sum, & ero in æter-
 num, posside me, & totum conforma
 voluntati tuæ. Tu Rex gloriæ Chri-
 ste, tu Patris sempiternus es Filius, tu
 ad liberandum suscepturus hominem,
 non horruisti Virginis uterum, tu de-
 victo mortis aculeo, aperuisti creden-
 tibus regna cælorum, Tu ad dexteram
 Dei sedes in gloria Patris, Judex cre-
 deris esse venturus. Te ergo quæsu-
 mus

mus tuis famulis subveni, quos pretioso
 sanguine redemisti. Æterna fac cum
 Sanctis tuis in gloria numerari. Amen.

Ad finem Missæ
ORATIO.

SUSCIPE Sanctissima TRINITAS unus
 DEUS hoc Sacrosanctum Sacrifici-
 um Corporis & Sanguinis Domini no-
 stri JESU Christi, quod ego indignissi-
 mus peccator Divinæ tuæ Majestati
 per hujus Sacerdotis manus offero uni-
 tum Sanctissimo Sacrificio ab eodem
 Domino nostro in ultima Cœna, & in
 Ara Crucis oblato, omni possibili pie-
 tatis affectu ex puro amore tuæ infini-
 tæ bonitatis, juxta intentionem ejus-
 dem Salvatoris nostri, & Sanctæ Ma-
 tris Ecclesiæ, ad maximam æternamq;
 gloriam tuæ Divinæ Majestatis, in
 protestationem supremæ excellentiæ,
 & Dominij tui, & nostræ subjectionis
 ac dependentiæ à te, in perpetuam com-
 memorationem passionis ac mortem
 ejusdem Domini nostri: in honorem
 au-

augmentumq; gloriæ Beatissimæ Virginis Mariæ, ac totius curiæ triumphantis, in gratiarum actionem pro universis beneficijs Sanctissimæ Humanitati Domini nostri, Beatæ Mariæ Matri ejus, omnibus Sanctis & Electis, cunctisq; creaturis, mihiq; ingrato atque indigno hucusq; collatis, & conferendis in æternum, in satisfactionem peccatorum meorum, omniumq; fidelium vivorum & defunctorum, ad impetrandum mihi, & omnibus omnia subsidia vitæ temporalis & æternæ. Horum omnium miserere Creator & Redemptor noster, & mei imprimis maximi peccatoris gratiam concedens, ut à peccatis emundatus ad altissimum gradum perfectionis ascendam, nec unquam separer à te in sæcula sæculorum. Amen.

Fasciculus Aspirationum.

1. **D**omine JESU spes mea, & unicum solatium animæ meæ, hodie propter te abrenuntio omnibus quæ in mundo sunt, omnibus amicis &

propinquis, omnibus delicijs & dignitatibus, omnibus divitijs & voluptatibus, omnibus solatijs & recreationibus, & quibuscunq; caro allici, & anima inquinari potest, paratus his carere, quomodocunq; volueris. Te verò eligo in gubernatorem vitæ meæ, & refugium meum in omnibus necessitatibus, quia non est salus extra te, nec vita sine te.

2. O amor potentissime JESU mi dilectissime! extrahe quæso cor meum à me, illudq; pacifica & renova, & ab omni sorde expurgatum, absconde in vulnere aperti lateris tui, ut ab eo deinceps egredi nequeat. Vivam ego sine corde, & tu esto cor meum, vita mea, & anima spiritus mei.

3. Sancta TRINITAS unus DEUS, qui me creasti ad imaginem & similitudinem tuam, reforma in me hanc tuam imaginem, ut cum anima mea è corpore separabitur, dignus inveniar præsentia tua, & consortio Sanctorum. Quia verò perditè vixi in omnibus diebus vitæ meæ, & tempus mihi inutiliter

ter elapsum est, ut illud irreparabili
 jactura amissum aliquomodo recupera-
 re valeam, avertō me quantum possum
 ab omni loco & tempore, totisq; viri-
 bus in illud nunc æternitatis recipio,
 in quo tu essentialiter existis. Ibi enim
 neq; præteritum, neq; futurum est,
 ibi omnia deperdita reperiuntur. At-
 que utinam omni tempore sic laudabi-
 liter vixissem, sicut omnes Electi tui
 vixerunt. Utinam deinceps sic vivam,
 ut nihil in me reperiatur, quod oculis
 Majestatis tuæ displiceat. Hoc votum
 meum est, hæc firmissima voluntas.
 Præsta tu per gratiam tuam, ut quod
 inspiratione tua concepi nulla possit
 tentatione mutari.

4. Largire mihi Domine; ut plan-
 gam peccata mea, & pro ijs satis-
 faciam, antequam moriar. Fiant
 oculi mei fontes lachrimarum, & da
 mihi omnium verè pœnitentium con-
 tritionem. Adjuva me clementissime
 Pater indignum filium tuum claman-
 tem ad te, & adesto mihi in omni pe-
 riculo & necessitate. Erue animam

meam de limo profundi, & lava me in sanguine dilectissimi Filij tui. Intercede pro me gloriosissima Virgo Maria, & obtine mihi à Filio tuo finalem perseverantiam. Monstra te esse Matrem, & fac me esse filium. Monstra te esse Dominam, & fac me esse servum, monstra te esse Magistram, & fac me esse discipulum.

5. Domine JESU, miserere mei, neq; abijcias me propter peccata mea, ex me enim est culpa, & perditio, ex te gratia & miseratio.

6. Da mihi Domine perfectissimam patientiam, ut omni contemptu & pœna me dignum existimem, nam tibi soli debetur omnis honor, mihi autem nisi ignominia.

7. Rogo te Domine, ut de me, & per me fiat beneplacitum tuum, meamque voluntatem sic unias tibi, ut nihil omninò velle possim nisi quod tu vis.

8. Da mihi Domine sedium tuarum assistricem sapientiam, quæ intellectum meum illuminet, & affectum meum inflammet ad cognoscendum, & amandum

dum te in omnibus , & super omnia.

9. Domine JESU Christe , si mihi optionem dares , & promitteres te mihi daturum quæcunq; peterem , nihil aliud quàm hoc peterem , ut tua laudabilissima voluntas in me , & de me semper fiat in tempore , & in æternitate.

10. Pone Domine custodiam ori meo , & ostium circumstantiæ labijs meis , ut non delinquam in lingua mea. Da mihi hanc gratiam , ut non loquar , nisi quæ necessaria sunt , & fac me purum , & incontaminatum ab omni detractatione , ab omni verbo inutili , & otioso.

11. Diligam te Domine virtus mea toto corde , tota mente , tota virtute , & proximum in te , & propter te. Da ut omnium salutem quæram , & promoveam , & ut omnes adversantes mihi non verbo solum & lingvâ , sed opere , & veritate perfectissimè diligam. Aufer à me omnem iram & amaritudinem , omnem indignationem & suspensionem , ut neminem judicem , & de omnibus benè sentiam in simplicitate cordis , & in spiritu humilitatis. 12.

12. Amator dulcissime bone JESU, inebriet me ardentissima vis amoris tui, ita ut omnium creaturarum obliviscar, & totus ardeam tui desiderio. Accende in me ignem ardentissimum, quem nulla creatura possit extinguere.

13. Exaudi me Domine, & da mihi humilitatem tibi maximè acceptam. Extingve in me omnem appetitum honoris & gloriæ, ut gaudeam nesciri, contemni, opprobria pati, ac pro nihilo reputari.

14. Excita cor meum Domine, & illumina ut requiram, & inveniam te. Posside cor meum, ut requiescam in te, & obliviscar omnium quæ sunt extra te. Fac me tibi indissolubili vinculo colligari, ut nihil sit quod me possit à te separare.

15. Utinam Domine JESU, vulnera tua cordi meo semper fixa permaneant, ut dolor passionis tuæ quotidie in me excitetur, & ardor tuæ dilectionis in me quotidie augeatur.

16. Spiritus Sancte DEUS miserere mei, & luce tuæ visitationis illumina
cor

cor meum, & tui amoris in me ignem accende. Imple & confirma me septem donis tuis, & hoc ipsum in me operare, quod olim in Apostolis ut quidquid terrenum est in me pereat, tuique amor ferventissimus inebriet me, & in te transformet.

17. Utinam dulcis JESU amore tui jugiter ardeam: utinam omnibus creaturis moriar, & tibi soli inhæream. Quidquid videro, quidquid audivero, quidquid sensero, me in tui cognitionem perducatur, & tuo amore accendatur. Tu solus me possideas, & sis mihi omnia in omnibus.

TESTAMENTUM

Sive præparatio ad mortem.

Vigilate quia nescitis diem neque horam. Matt. 25.

In Nomine Sanctissimæ & Individuæ
TRINITATIS Patris, & Filij, &
Spiritus Sancti. Amen.

Inter multos eosque gravissimos errores,
temerè & inconsultò viventium, nihil
damna-

damnabilius, nihil nocentius, quam quod plerique mortalium, cum certo sciant se morituros, diem vero & horam migrationis ignorent, nunquam tamen de morte cogitant, nunquam se ad illud terribile momentum præparant à quo pendet eternitas, ac si pactum cum inferno pepigissent, & mors ad illos nullo modo pertineret. Quod vitium commune nostræ mortalitatis sæpe considerans, ego infra scriptus indignus peccator, vocemque Salvatoris audiens, qua nos hortatur ad vigilandum, quia nescimus diem neque horam: memor item scripturæ præcipientis. Memento Creatoris tui in diebus juventutis tuæ antequam veniat tempus afflictionis, & revertatur pulvis in terram suam. Cum præsertim viderem amicos & propinquos meos paucis ante diebus repentina morte sublato in manus Dei viventis incidisse, nè mihi contingat subito hinc tolli, & ad tribunal districti iudicii cum sordibus iniquitatum mearum perducì, statui, & decrevi cum sensus vigent corporis, & viræ animæ ea quæ sunt novissima (Divinâ favente gratiâ) providere, & meam ultimam voluntatem in hunc, qui sequitur modum declarare.

Timor

TImor enim, & tremor venerunt super me, comprehenderunt me laquei mortis, dolores inferni circumdederunt me, quia omnia in futurum reservantur incerta, nescitq; homo utrum odio an amore dignus sit. Tinnunt aures cordis mei à voce tonitruum magni terribiliter intonantis. Oportet nos præsentari ante Tribunal Christi, ut referat unusquisq; quæ gessit in corpore suo sive bonum, sive malum. Metuo diem extremam tribulationis & angustiae, diem calamitatis & miseriae, diem tenebrarum & caliginis, ego scelestus, ego maximus peccator, ubi apparebo? Contremisco valdè à dentibus bestiae infernalis, à rugientibus præparatis ad escam, & cupio ante mortem maturè mori, nè moriar in æternum.

Christi igitur Redemptoris mei nomen invoco, ante thronum Majestatis ejus toto corde & corpore prostratus, in præsentia Deiparae Virginis quæ Mater misericordiae jure vocatur, atq; Angeli mei Custodis, Sancti Michàélis
Prin-

Principis Ecclesiæ, adstantibus etiam atque in speculo lucidissimo Divini Verbi, hæc omnia audientibus & videntibus Divis, Joanne Baptista præcursores Domini, Petro Principe Apostolorum, Joanne Evangelista & Apostolo, Sanctis Patronis meis N. N. N. quos omnes humillimè deprecor, ut huic meæ ordinationi proposito, & voluntati testes infallibiles assistant. Fidem imprimis quam corde ad justitiam teneo, sic ore profiteor ad salutem.

Credo, & profiteor, quod unus est DEUS verus, omnipotens, immutabilis, & incomprehensibilis, ineffabilis, & æternus, Pater, & Filius, & Spiritus Sanctus. Pater ingenuitus, Filius à solo Patre genitus, Spiritus Sanctus à Patre & Filio æternaliter procedens: non sicut à duobus principiis aut duabus spirationibus, sed ab utroq; tanquam ab uno principio, & unica spiratione. Hæ tres Personæ sunt unus DEUS, non tres Dei, una essentia, una substantia, una immensitas, unum principium

pium. Nullus alium aut præcedit æternitate, aut excedit magnitudine, aut superat potestate; sed absq; initio, & sine fine, Pater est generans, Filius nascens, Spiritus Sanctus procedens.

Hæc Sanctissima TRINITAS secundum communem essentiam individua, & secundum personales proprietates discreta, sua omnipotenti virtute & bonitate, omnem de nihilo ab initio temporis condidit creaturam spiritua-lem, & corporalem, Angelicam & mundanam, ac deinde humanam quasi communem, ex spiritu, & corpore constitutam. Et DEUS quidem omnia valdè bona creavit, sed diabolus & alij dæmones, ipsi per se facti sunt mali: homo verò diaboli suggestionem peccavit.

Credo item, & confiteor, quòd Unigenitus Dei Filius, Patri consubstantialis semper cum Patre, & Spiritu Sancto existens, in plenitudine temporis (ut à peccato Adæ ac cæterarum culparum sordibus nostram animam emundaret, & nos à pœnis inferni liberaret)

raret) incarnatus est de Spiritu Sancto, in utero immaculato Beatissimæ semper Virginis MARIÆ; naturamq; hominis veram & integram assumpsit, corpus videlicet, & animam rationalem in unitate Personæ Divinæ: tanta unitate, ut unus, & idem Christus sit DEUS & homo, Dei Filius, & hominis Filius; ita quòd una natura non confunditur cum altera, nec una transit in alteram, nec una miscetur alteri, nec altera evanescit; sed in persona omninò una sunt duæ perfectæ naturæ, Divina scilicet & humana, duæ voluntates, duæ operationes, ita ut Christus sit tantum unus, & sicut forma servi, Dei formam non ademit, ita formam Dei, servi forma non minuit. Qui enim verus DEUS est, idem verus est homo. DEUS per id, quod in principio erat Verbum, & Verbū erat apud DEUM, & DEUS erat Verbum, Homo per id, quod Verbum Caro factum est, & habitavit in nobis, unus, & idem, secundum Divinitatem æqualis æterno Patri, & immortalis, secundum verò Humana-

nitatem minor Patre, mortalis & passibilis homo. Hunc verò prædico natum ex MARIA Virgine, & ideo ipsam Virginem fateor Dei Matrem esse appellandam. Firmiter etiam credo omnia & singula, quæ continentur in symbolo fidei à trecentis decem & octo Patribus in Concilio Nicæno, & à centum quinquaginta in Concilio Constantinopolitano tradito, ac semper inviolabiliter in Ecclesia custodito, cujus tenor talis.

Credo in unum DEUM, Patrem Omnipotentem, factorem cæli & terræ, visibilium omnium, & invisibilium, & in unum Dominum JESUM Christum, Filium Dei unigenitum, & ex Patre natum ante omnia sæcula, DEUM de DEO, lumen de lumine, DEUM verum, de DEO vero, genitum non factum, consubstantialem Patri, per quem omnia facta sunt, qui propter nos homines, & propter nostram salutem, descendit de cælis, & incarnatus est de Spiritu Sancto, ex MARIA Virgine, & Homo factus est. Crucifixus etiam pro nobis, sub Pontio Pilato, passus, &

M

sepul-

sepultus est, & resurrexit tertia die, secundum scripturas, & ascendit in cælum, sedet ad dexteram Patris, & iterum venturus est, cum gloria, judicare vivos, & mortuos, cujus Regni non erit finis. Et in Spiritum Sanctum Dominum, & vivificantem, qui ex Patre, Filioq; procedit, qui cum Patre, & Filio, simul adoratur, & conglorificatur, qui locutus est per Prophetas, & unam Sanctam Catholicam & Apostolicam Ecclesiam, confiteor unum Baptisma in remissionem peccatorum, & expecto resurrectionem mortuorum, & vitam venturi sæculi. Amen.

Credo, & confiteor, nullum unquam hominem ex semine Adæ conceptum & natum, fuisse salvatum, aut fore salvandum, nisi per fidem mediatoris Dei & Hominis Domini nostri JESU Christi, in sanguine & morte ipsius, quâ nos reconciliavit æterno Patri, & delevit Chirographum iniquitatum nostrarum æterna redemptione inventa.

Insuper credo, legalia omnia veteris

ris Testamenti quæ Christum figura-
 bant, ipso adveniente cessasse, servari-
 quæ non posse jam promulgato Evange-
 lio, sine interitu salutis æternæ. Novæ
 autem legis septem esse profiteor Sa-
 cramenta, nimirum: Baptismum, Con-
 firmationem, Eucharistiam, Pœniten-
 tiam, Ordinem, Matrimonium, & Ex-
 tremam Unctionem, quæ gratiam con-
 ferant dignè sumentibus, & perficiun-
 tur verbis, ut forma & rebus, ut mate-
 ria & ministro, qui facere intendat
 quod facit Ecclesia. Credo quoque,
 & approbo Sacros ritus in solenni co-
 rum administratione. Recipio, & ad-
 mitto quidquid de illis Sancta & Ca-
 tholica Romana Ecclesia docet, & præ-
 dicat. Firmissimè assero, quod si verè
 pœnitentes in Dei charitate decesserint,
 antequàm plenè satisfecerint Divinæ ju-
 stitiæ eorum animæ pœnis Purgatorij
 post mortem purgabuntur, à quibus
 tamen relevari possunt per fidelium,
 vivorum suffragia, per Missarum San-
 ctum Sacrificium, orationes, eleemo-
 synas, & alia pietatis officia secundum

Ecclesiæ instituta. Illorum verò animas, qui post Baptismum, vel nullam peccati maculam contraxerunt, vel à contractis plenè purgati sunt, in cælum mox recipi assero, & Deum sicuti est, clarè intueri, magis tamen vel minùs perfectè pro meritorum diversitate. At eos, qui decedunt in peccato mortali, actuali, vel solo originali, mox in infernum descendere ajo, disparibus tamen pœnis perpetuò puniendos. Apostolicas & Ecclesiasticas traditiones cæterasq; observationes, & constitutiones ejusdem Ecclesiæ firmiter admitto & amplector.

Itemq; Sacram Scripturam juxta eum sensum quem tenuit, & tenet Sancta Mater Ecclesia, cujus est judicare de scripturarum interpretatione, omnesq; Canonicos ejusdem libros suscipio, quos ipsa Catholica Ecclesia probat, & suscipit.

Amplector item, suscipio, & approbo Sacrosanctas Oecumenicas & Orthodoxas Synodos, quas Apostolica Sedes approbat, suscipit, & amplectitur,

tur, quidquid illæ approbant, approbo, quidquid damnant, damno, respuo, abominor, & in sempiternum rejicio.

Doctores, & Sanctos Patres, quos approbat Sancta Romana Ecclesia reverenter sustineo, & integerrima veneratione revereor.

Romanum Pontificem in universum orbem tenere primatum, & ipsum successorem esse Divi Petri, Christiq; Vicarium confiteor; ac ipsius ordinationibus, præceptis, censuris, me semper fideliter & absq; ulla tergiversatione obtemperaturum promitto.

Hæreses ab Ecclesia damnatas, & anathematizadas, ego pariter damno, & anathematizo in perpetuum.

Hanc autem Catholicam Fidem, sine qua nemo salvari potest, quam in præsentis spontè profiteor, & veraciter teneo, eandem integram & inviolatam Deo adjuvante ad extremum usq; punctum retinere, & custodire spondeo, voveo, & juro.

Hanc semper tenui, docui, & prædicavi, hanc semper tenebo, docebo,

& prædicabo, hanc doceri, & prædicari ab omnibus, quantum in me erit, procurabo.

Si quid autem à me dictum, aut scriptum est aliquando, quod cum hac fide & doctrina non consentiat (quod certè sciens ac prudens nunquàm feci) id pro non dicto, & pro non facto haberi volo. Et si deinceps tale quidquam præsertim in graviore morbo, ore proferam, id ex nunc abominor, & retracto, & ex animi mei sententiâ id nunquàm proficisci posse declaro, Dei Optimi, Maximi, favente gratia, sine qua nihil sum, nihil possum. Cæterum pro hac Fide millies mori paratus sum, idque vehementer peropto, non meis viribus confisus, sed Dei fretus misericordia, qui cum dederit mihi hanc voluntatem, dabit & constantiam, atque perseverantiam, ob suam infinitam bonitatem.

Hac solenni fidei protestatione præmissa, cum ingenti fiducia ad aram Divinæ misericordiæ confugio, ut veniam consequar de peccatis meis, quæ tamen
 si gra-

si gravissima sunt (tu solus Deus ea discernis) & multa nimis, major est tamen benignitas Dei, quàm sunt omnes omnium hominum iniquitates ab initio mundi usque ad finem. Et ego quidem omnia peccata, quæ commisi, die à quo primum peccare potui, usq; ad hoc punctum odi, & detestor, meque prorsus pœnitet ex toto corde, quòd Dominum meum offenderim, quem amo super omnia, firmiterque propono amplius non peccare, & omnes peccandi occasiones devitare.

Tu verò Domine mi, cui proprium est misereri semper, & parcere, reminiscere miserationum tuarum, & misericordiarum tuarum quæ à sæculo sunt. Delicta juventutis meæ, & ignorantias meas nè memineris, & nè statuas coram te: sed averte faciem tuam à peccatis meis, & respice in faciem Christi tui, in faciem dilecti Filij, pro me pendentis in cruce: ille enim, ut me redimeret, tradidit in mortem animam suam, & dignissimus est in quem respicias, quia ille pro meis, &

pro peccatis totius mundi justitiæ tuæ
copiosissimè satisfecit.

Hujus meritum offero tibi, in hoc
solo meam spem, & omnem fiduciam
defixam habeo. Hæc est justitia mea,
& satisfactio mea, redemptio mea, &
propitiatio mea. Ejus meritis onustus,
clementissime Pater, nimium confido,
quibus negare nihil potes. Accipe
itaq; spiritum meum quacunq; hora
illum repetere volueris, non contem-
ptibilibus, auro, & argento, sed pretio-
so sanguine Filij tui redemptum.

Exaudi Domine, placare, & fac,
ô utinam nunquam peccassem! ô uti-
nam omnes dies vitæ meæ in bonis
operibus, Deoque placitis actionibus
transegissem! O si dies perditos revo-
care possem! jam aliam vitam inchoa-
rem. Quàm vellem diligenter vel mi-
nimum defectum evitare, perpetuam-
que innocentiam illibatam custodire.
Sed proh dolor! præterierunt dies mei,
nec amplius revocari possunt, solaque
temporis jactura irreparabilis est. Quo-
niam itaque nulla ad præscriptum est
poten-

potentia, omnibus viribus animæ meæ avertens me ab omni temporis successione, ab omni locorum circumscriptio-
ne, in tranquillissimum æternitatis sta-
tum me conféro, in quo DEUS essenti-
aliter existit, in quo nihil est præteri-
tum, nihil futurum, in quo omnia de-
perdita inveniuntur. Hic me elevans
super omnem creaturam, totusq; in
DEUM transfusus, omni illo tempore
(quod ab initio mundi usq; ad finem
sæculi devolvitur) tam laudabiliter vi-
xisse vellem, tam purè & obedienter,
sicut omnes unquam homines vixere
in omni virtutum exercitio, in omni
afflictione, paupertate, desolatione, la-
bore, & operatione.

Hanc autem voluntatem omni mo-
mento renovare intendo, futurum con-
fidens, ut Benignissimus Dominus, qui
voluntatem timentium se facit, hoc ani-
mi mei votum respicere, & acceptare
dignetur. Quamvis autem pro pec-
catis meis abundantissimam Redempto-
ris mei satisfactionem obtulerim æter-
no Patri, ipse tamen pro illis satisfacere

re cupio in hac vita, ex vigore iustitiæ,
hic uri, hic secari desidero, ad omnia
flagella, ad omnia mala pœnæ toleran-
da, ad iram Domini portandam para-
tus, quoniam ei offensiones meæ mul-
tiplicatæ sunt. Omnia enim possum in
eo, qui me confortat, qui etiam facit
cum tentatione proventum, ut possim
sustinere, & in vita suæ misericordiæ
memor erit. Omnia peccata, quæ re-
us promissionis in Baptismate factæ, vo-
torumq; factorum sacrilegus prævari-
cator admisi; generali confessione,
tùm alijs sæpè, tùm hoc ætatis meæ an-
no, die, Divinâ opitulante gratiâ, ex-
piavi; nihilq; adhibita omni morali
diligentia, scienter omisi, quod clarè, ut
debui, non explicavi. Imò si cognovis-
sem, id DEO placitum fore, universa
delicta mea, & hic sigillatim describe-
rem, & coram omni populo in plateis
alta voce confiterer; ut qui iudicat ali-
quid de me aliter, quàm sit in me, ex
eo, quod foris apparet, manifestè co-
gnosceret, quot sordibus inquinatus
sum, quibus dignus sum omni pœna,
omni

omni ignominia, omniq; honore & consolatione indignus.

Quodli inadvertenter vel ignoranter omisi aliquid, id ut suggerat memoria, Salvatorem meum enixè precor, qui scit insipientiam meam, & à quo delicta mea non sunt abscondita, ut Sacramentali confessione eluere, ac pro his dignè valeam satisfacere. Cor enim meum conturbatum est, dereliquit me virtus mea, & lumen oculorum meorum, & ipsum non est mecum; comprehenderunt me iniquitates meæ, & non potui, ut viderem.

Et quis potuit, nisi speciali lumine desuper illustratus fuerit, omnes latebras conscientiae tam diligenter rimari, quin in tanta scelerum multitudine aliquid effugiat quærentis sollicitudinem?

Delicta quis intelligit, inquit Propheta: ideo consequenter cum eodem quotidie psallo. *Ab occultis meis munda me Domine, & ab alienis parce servo tuo.*

Quia verò scriptum est: Dimittite, & dimittetur vobis, ut hæc verba Domini ad me quoq; pertineant, omnibus
ini-

inimicis meis, qui mala voluntate erga me sunt, vel fuerunt, qui me verbo, vel facto quocunq; modo offenderunt, ex toto corde meo verissimè ignosco, & omnem injuriam remitto; si quid mihi de bono famæ debeant, illis omninò, in quantum possum, condono, ac eosdem intimè diligo, flexisq; genibus DEUM precor, ut eis in omnibus benefaciat, & pro infamia, quâ me læserunt, honorem, pro detractationibus, bonam famam, pro odio, sanctissimum amorem suum, & pro omnibus malis mihi irrogatis, bona temporalia salutis eorum utilia suo tempore etiam retribuat: fratres mei sunt; si oporteret, vitam pro illis libentissimè profunderem, eisque servire in omnibus, & omnem eis exhibere charitatem cum Dei adiutorio spondeo, & juro.

Ab illis autem, quos ego aliquando offendi, aut verbis, aut factis læsi, quos scandalizavi, & ad peccatum induxi, veniam humillimè peto, ipsos orans & adjurans per viscera patientis Domini mei JESU Christi, ut omne debitum

tum dimittant, meque in servum recipere dignentur, paratissimum, omnem injuriam, per me illis illatam, justa satisfactione compensaturum.

Ad mortem alacriter subeundam me Deo promptum offero, quocunque modo & loco ipse voluerit. Dominus est, faciat in me, & de me voluntatem suam. Et si ego possem mille adhuc annis in omni voluptate vivere, pro Dei amore mortem potius subire vellem. Et si liceret mihi genus, tempus, & locum mortis pro libito eligere, id nihilominus nullo modo præsumerem, quia nihil volo, nihil desidero, nisi Divinum beneplacitum, cui me in omnibus, & per omnia subdo.

Unum duntaxat rogo, ut Sacramento poenitentiae purgatus, Sacro refectus Viatico, & Oleo Sancto inunctus hinc discedam: quod circa, hæc Sacramenta toto cordis affectu, tota mentis devotione postulo, ut juxta ritum Catholicae Ecclesiae mihi in extremis ministrantur; ut totus eorum virtute & efficacia a peccatis emundatus, Divinae gratiae muni-

munitus præsidio, insidiantes mihi hostes superare, & ad DEUM victor valeam pervenire.

Omnem quamcunq; infirmitatem DEUS miserit quantumvis gravem, fœdam, & diuturnam patienter ferre (Deo favente) propono, cupiens cum Christo affligi, cum Christo in Cruce mori, desideransq; corpus infirmum, & laxam animam meam ex nunc, cum ejus afflicta anima, & membris pro me laceratis uniri, ea Deo Patri offerens in satisfactionem pro peccatis meis, & ad omnia, quæ tunc temporis necessaria mihi fuerint, impetranda.

Tentationibus dæmonum, quæ morientis animam apprehendere solent inter angustias, Divina gratia me custodiente nullatenus consentire intendo, sive sint spei longioris vitæ, sive infidelitatis, & desperationis, aut nimis fiduciæ, vel cujuscunq; alterius rei, illis autem oppono ex nunc Crucem, & Passionem Domini nostri JESU Christi, intercessionem Beatæ Mariæ Virginis, & omnium Sanctorum, eorum

rum præcipuè, sub quorum tutela vivo, Angeli mei Custodis assistentiam, quibus me devotè commendo: quod si fortasse ex pusillanimitate spiritus, ob terribilitatem Divini judicij, vel ex debilitate rationis, me in aliquam tentationem incidisse (quod DEUS per suam pietatem avertat) verbo, vel facto indicavero, hoc ipsum nunc sanæ mentis existens, revoco, detestor, & irritum fore, & pro non dicto, aut pro non facto haberi volo submittens me totaliter Divinæ ordinationi, & pietati.

Animam meam in egressu suo è corpore, & post ipsius exitum & separationem quanta possum submissione, & humilitate DEO Patri commendo, ejusq; Filio JESU Christo, & Spiritui Sancto, atque idcirco procumbens ante Thronum misericordiæ ipsius, indulgentiam ejus, fuis lachrimis postulo, velut positus in Articulo mortis.

Succurre mihi pijsime Domine in hac hora, & nè respicias peccata mea, nec me sinas in peccatis perire, quem creavit dextera tua. Memor esto verbi tui

hi tui servo tuo, in quo mihi spem dedisti. Tu enim dixisti per os Prophetæ tui benedicti, quod in quacunq; hora reversus fuerit peccator à vijs suis malis, omnes ipsius iniquitates trades oblivioni. In hac spe singulariter constitutus, audeo oculos levare ad te, qui non sum dignus respicere altitudinem cæli, præ multitudine iniquitatum mearum. Jube me domine à Sanctis Angelis suscipi, & ad Patriam Paradisi perducì, quam generi humano per Crucem & passionem suam dilectus Filius tuus acquisivit; non in meis meritis (quæ nulla sunt) nec in justificationibus meis precans postulo ante faciem tuam, sed in miserationibus tuis multis confido, & in sanguine Domini mei Filij tui JESU Christi.

In hoc confido, & non erubescam, in hoc spero, & non confundar. Benedic mihi JESU Amantissime, & nunc in pace dimitte me; quoniam tuus ego sum, & in æternum non dimittam te. Quis jam me poterit à tua charitate separare? Tu salus mea, quem time-

mebo? Tu protector vitæ meæ, à quo
trepidabo?

Et ecce ad te venio, quem amavi,
ad te propero, quem desideravi, in te
vivam, in te moriar, in te si volueris,
in æternum permanebo. O si totus in
te mergi! totus absorberi, & sepeliri,
in te volens moriar! O si anima mea
inter amplexus tuos suaviter requie-
scens tota absorbeatur in te, & felicis-
simè fruatur te Deo amatore suo! Quid
mihi jam ultra cum mundo mi charissi-
me JESU? Ecce nec in cælis quidquã
volui præter te. In manus tuas com-
mendo spiritum meum. Respice in me
dulcis Amor, ut in æternum bene sit
mihi in te, & in pace tecum obdor-
miam, & requiescam.

Sonet in auribus mentis meæ vox
illa jucunda, vox illa dulcissima, vox
illa beatificans: Hodie mecum eris in
Paradiso. Suscipe me JESU Christe
inter amorosa brachia tua, quæ pro me
in Cruce extensa cerno, & complector.
Suscipe me inter desiderabiles amplexus
tuos, & trahe ad te animam meam.

N

Susci-

Suscipe me bone JESU in misericordia tua, suscipe in pace spiritum meum.

Et tibi quoque; Beatissima Virgo Maria, Mater misericordiae, Regina mundi, consolatrix afflictorum, refugium peccatorum, salus pereuntium, tibi, tibi fons pietatis, in hac hora tremenda commendo animam meam: Adjuva me trepidantem, cadentem subleua, errantem dirige, consolare desolatum. Impetra mihi à dilecto Filio tuo misericordiam, quam semper optavi. Tu me semper in omnibus periculis clementer adjuvisti mitissima Mater, ne me deseras in hoc ultimo discrimine constitutum, à quo pendet aeternitas. Monstra te esse Matrem, & loquere pro me bona ad Filium tuum, ut recreet me jacentem in umbra mortis. Fac o benedicta per gratiam, quam meruisti, per misericordiam, quam peperisti, ut qui te mediante fieri dignatus est particeps infirmitatis nostrae, & miseriae, te quoque intercedente participem me faciat gloriae, & beatitudinis suae. JESUS Christus Filius tuus Dominus noster.

Sande

Sancte Michâél Archangele, qui venisti in adiutorium populo Dei, Princeps militiæ cælestis, qui Divina virtute diabolum contrivisti, subveni mihi apud altissimum Judicem, & eripe me ab immundorum spirituum insidijs, & perduc animam meam in locum refrigerij, & quietis.

Et tu Angele Sancte, cujus tutelæ, & custodiæ, ego indignissimus peccator commissus sum, assiste mihi in hoc puncto, & omnem satanæ potentiam à me procul expelle. Apprehende arma, & scutum, & exurge in adiutorium mihi. Salva me ex ore leonis, & à cornibus unicornium humilitatem meam. Educ me de laqueo, quem absconderunt mihi, & restitue à malignitate eorum animam meam.

Subvenite mihi & vos Patroni mei, & Tutelares Sancti N. N. Tu Joannes præcursor Christi, amicus sponsi, vox Divini Verbi, rectas fac semitas meas, & dirige in conspectu Domini viam meam. Tu claviger Regni cælestis, Apostolorum Princeps, Beatissime Pe-

tre pro tradita tibi potestate solve vincula peccatorum meorum, & aperi mihi januam Paradisi.

Tu Joannes Evangelista, qui de Sacratio Dominici pectoris ineffabiles divitias Divinæ suavitatis hausisti, illustra tenebrosam animam meam, afflictam recrea, mihiq; impetra in egressu meo ardentissimæ charitatis affectum. Vos reliqui Sancti & Sanctæ, quos speciali devotione veneror. N. N. postremam luctam meam precibus vestris adjuvate.

En ego flens, & gemens, & suspirans, quia manus Domini tetigit me. Iam mihi præterijt mundus, jam mihi tempus elapsum est, & quod hætenus operatus non sum, nunquam amplius operabor: jam mihi sese offerunt ante oculos res novæ, & extremæ, de quibus antea non cogitaveram, mors mihi in oculis est, jam scelerum meorum longè gravissimorum seriem audio publicari: iam parat se Judex ad sententiam inappellabilem pronuntiandam vitæ, vel mortis sempiternæ. Ah! non me deferite

serite in his summis angustiis meis, si quid unquam feci, quod vobis gratum fuerit, pro me supplices procumbite ante Dominum, & meum mihi Iudicem conciliate, quatenus vestra placatus intercessione ad veram beatitudinem me perducatur, in qua vos cum ipso regnatis in sæcula sæculorum.

Corpus meum egressâ animâ terræ consignetur, è qua sumptum est, in terram reversurum, donec in novissimo die resurgat, cum venerit Dominus ad iudicandum.

Suffragia pro animabus defunctis fieri solita precor ut fiant quàm plurima, & quàm citissimè pro misera anima mea, tam in Missarum Sacrificijs, quàm in Officijs & eleemosyna.

Quod si verò ad plures annos vita mihi à Deo prorogata fuerit, & longius spatium pœnitentiæ mihi concessum, protestor, & declaro, me velle omnino mores meos mutare in melius, & vitam perfectiùs instituere, omnemq; horam, & momentum, in Sanctis, & Deo placitis operibus peragere. Tu Domi-

ne, qui hanc voluntatem dedisti servo tuo, tribue gratiam perficiendi, quod te donante propono.

Ecce enim provolutus ante Majestatem tuam in centro nihilitatis meae, fiduciam habeo orandi ad te, quoniam fortitudo mea, & refugium meum es tu, & propter nomen tuum deduces me, & diriges in semitam rectam, ut custodiam mandata tua. O quàm me poenitet! quòd haectenùs tam negligenter vixerim; quòd tempus mihi concessum ad promerendam gratiam tuam in rebus vanis, & inutilibus consumpserim, quòd in currenda via mandatorum tuorum adeò piger, & remissus fuerim, quòd vota mea, quæ distinxerunt labia mea, tam frequenter prævaticatus sum, quòd varias & multiplices corporis infirmitates, & animi afflictiones, quibus me servum rebellem & contumacem erudire, & exercere dignatus es, non ea, quàm par erat patientia, & resignatione sustinuerim, & mentem obdurans servili nequitia ad Paterna flagella clementiae tuae cervicem iustuli.

sustuli. Retinebant scilicet me nugæ,
 vanitates, & ludibria terræ, teque re-
 linquens fontem aquæ vivæ, fodiebam
 mihi cisternas dissipatas, quæ continere
 non valent aquas. Et nunc Domine
 recogito dies meos in amaritudine ani-
 mæ meæ, & confiteor dedecora mea
 in laude tua, quia eruisti animam me-
 am ex inferno inferiori, & conversus
 consolatus es me. Nullum enim re-
 medium superest salutis, & emendatio-
 nis, nisi ut levem ad te Domine oculo-
 los meos, quia imperfectum meum vi-
 derunt oculi tui. Memento quæso ani-
 mæ meæ, attende gemitum meum, &
 da mihi virtutes sanctas, quæ tibi pla-
 ceant. Da in bono perseverantiam, da
 mihi assimilari tuæ sanctissimæ huma-
 nitati, tuæ Divinitati intimè uniri, &
 ad altissimum perfectionis gradum per-
 venire.

Gratias ago tibi Benignissime Pater,
 ob universa beneficia tua, quòd me
 creaveris, ad imaginem, & similitudi-
 nem tuam, quòd me hætenùs conser-
 vaveris, quòd me sanguine tuo rede-

meris, quòd per Baptisma, gratiæ tuæ dono, ditaveris, quòd me toties ad poenitentiam expectaveris, & à tot malis, & peccatis, præservaveris, tot bonis gratiæ, & naturæ, totq; occultis, quæ ipse non cognosco, cumulaveris, quòd præsertim ad perfectionem vitæ Christianæ me vocaveris, mihiq; immensam in cælo gloriam præparaveris.

Ideò quoties respiro, tot te laudibus celebrare intendo, quibus te laudaverunt, & laudabunt, omnes creaturæ tuæ ab initio mundi usq; in æternum, & laudibus omnium Angelorum, & Sanctorum, Beatissimæ Virginis Matris tuæ, & Sacrosanctæ Humanitatis tuæ, his quæ continentur in veteri & novo testamento, & in omnibus libris mundi, easq; laudes tibi dare, & offerre desidero, quibus dignus es, & quas tibi negant omnes impij & scelerati. Et quia affectus meus insufficiens est ad te dignè collaudandum, offero tibi in supplementum meæ imperfectionis omnium Angelorum voluntates, omnium Justorum corda, omnium rerum
mo-

motum, & essentiam, omnes ignotos affectus Beatissimæ Virginis, & omnium Sanctorum.

Offero tibi insuper animam meam, & corpus meum, omnes cogitationes, verba, & opera, quidquid habeo, quidquid cupio, quidquid sum. Offero tibi omnes divitias, & regna mundi, & si hæc omnia solus haberem, libentissimè omnia dimitterem propter te, & omnes facultates pauperibus distribuerem; offero tibi omnes infamias, dedecora, vituperia, omnes afflictiones mentis, & corporis, quæ fuerunt, & sunt ab initio mundi usq; ad finem: paratus hæc omnia pati, & tolerare propter te, si tu volueris. Offero tibi quidquid cogitatum, dictum, & factum est, vel cogitari, dici, & fieri debet, & potest, à cunctis Angelis, & hominibus, & ab alijs infinitis, quos potes creare; summè desiderans hæc omnia propter te, & alia plura cogitare, loqui, & perficere per gratiam tuam, sinè qua nihil possum, nihil sum. Adjuva me Domine, qui scrutaris renes &

corda. Tu nosti quàm verè & arden-
ter hæc cupiam, nam ante te est omne
desiderium meum, & gemitus meus
à te non est absconditus.

Procul, procul à me omnis terrena
delectatio, procul omnes amici & so-
dales, procul omnes civitates & castel-
la, omnes montes & valles, omnes ri-
vuli & fontes, omnia flumina & ma-
ria, omnes campi & sylvæ, omnia ne-
mora & prata, omnes volucres cæli,
& pisces maris, bestię, & universa pe-
cora, & omnis prorsus creatura. Pro-
cul omnes cantilenæ, omnia musica in-
strumenta, omnes flores & odores,
omnia convivia & colloquia, omnes
honores & favores, omnes ludi & di-
scursus, omnes deliciæ, & inutiles oc-
cupationes. Procul omnes divitiæ &
dignitates. His omnibus Domine, &
cæteris, quæ in mundo sunt, abrenun-
tio propter te. Quid enim mihi est
in cælo, & à te, quid volui super ter-
ram. DEUS cordis mei, & pars mea,
DEUS in æternum.

De cætero, Fratres, propinqui, &
amici

amici mei dilectissimi, qui residui eritis & supervivetis in hac valle lachrymarum, memores estote judicij mei, sic erit & vestrum. Mors omnibus communis est: ille autem Beatus vocari debet, qui omnem diem vitæ suæ tanquam postremum transigens, quotidie moritur ut supervivat, quotidie vivens, descendit in infernum, nè descendat post mortem; vitamq; suam ad præscriptum Divinæ legis sic instituit, ut omni momento paratus sit mori. Sic facite dilectissimi, mortem omni hora suspectam habete usq; ad finem vitæ: de momento, in momentum sub Divinæ voluntatis ordinatione satagite, ut per bona opera certam faciatis vocationem vestram, pacem habete, perfecti estote, ut DEUS pacis vobiscum in æternum maneat.

Hæc est voluntas mea ultima, quam Dei fretus auxilio nunquam mutabo: hanc renovare intendo omnibus diebus, omniq; momento vitæ meæ. Tu DEUS, qui das velle & perficere, conserva hanc voluntatem in me, erige
desi-

deficientem, atq; etiam rebellem propitius ad te compelle voluntatem, exure in me flammâ charitatis tuæ rerum mundanarum amorem, reseca ferro tribulationum, omnem dissimilitudinem spiritûs mei à spiritu tuo, omne quod tibi contrarium est à me prorsus eradica; argue me in virga tua, ut cum venerit extrema dies, nihil in me remaneat, igne purgandum.

Verùm tamen auge dolorem, auge & patientiam, nè deficiat in malis vita mea. Dum justè irasceris, memor esto miserationis tuæ, & dum superbum provocantem corrigis, nè despicias miserum invocantem. Quis enim poterit virgam correctionis tuæ sustinere, nisi tu qui sic purgas, quem amas, tolerandi vires subministras? Memento itaq; quòd sicut lutum feceris me, & sic renova, sic expurga, sic perfice figmentum tuum, ut nunquam deficiat.

Ego sum miser homo ille, quem tu potentissime DEUS creâsti propter te ipsum, & ad te ipsum. Ego sum miser homo ille, quem tu sanguine pretioso
Filijs

Filij tui misericorditer redemisti. Ego sum miser homo ille, quem tu salvare potes secundum abyssum misericordiæ tuæ.

Domine JESU sanctifica me, & per illam amaritudinem quam sustinuisti propter me in Cruce, maximè in illa hora, quando anima tua sanctissima egressa est de corpore tuo, misere animæ meæ in egressu suo. Fac mecum signum in bonum, ut videant, qui ode-
runt me, & confundantur, quoniam tu Domine adjuvisti me, & consolatus es me. Concede mihi dulcissime JESU, ut corpus tuum pretiosissimum sit mihi finalis refectio: gloriosissimum nomen tuum quod est JESUS, sit finalis locutio. Imprime cordi meo omnium vulnerum tuorum acerbissimam passionem, uni voluntatem meam cum sanctissimo beneplacito tuo, ut nihil aliud optare possim, quàm quod tu vis. Absconde me in aperto vulnere lateris tui, & non timebo mala ambulans in regione umbræ mortis. Illumina oculos meos, nè unquam obdormiam in
mor-

morte, nè quando dicat inimicus me-
 us, prævalui adversus eum. Locutus
 sum in lingua mea, notum fac mihi
 Domine finem meum, & numerum di-
 erum meorum, quis est? ut sciam quid
 desit mihi. Dirupisti Domine vincula
 mea, tibi sacrificabo hostiam laudis,
 & nomen Domini invocabo. Perijt
 fuga à me, & non est qui requirat ani-
 mam meam. Clamavi ad te Domine,
 dixi: Tu es spes mea, portio mea in
 terra viventium. Veni Domine JESU,
 veni, & noli tardare, relaxa facinora
 mea. Solve vincula, educ vinctum de
 domo carceris, de lacu miseriæ, & de
 luto fœcis. Expectans, expectavi te, in-
 tende mihi, & exaudi me. Ostende mi-
 hi faciem tuam, quam Angeli semper
 vident; sonet vox tua in auribus meis,
 vox gratiæ & remissionis, vox jucundi-
 tatis & lætitiæ. Recipe me ab homi-
 nibus, tempus enim est, ut revertar ad
 te, qui solus es principium meum, &
 finis ultimus, centrum animæ meæ,
 unicum solatium meum, satietas mea,
 requi-

requies spiritus mei, DEUS meus, &
exaltans caput meum, qui vivis, &
regnas laudabilis, gloriosus, & super-
exaltatus in sæcula sæculorum. Amen.

Affectus & Aspirationes
Ad DEUM Devotæ
Animæ Christianæ.

HYMNUS.

*Pro Invocatione Divinæ
assistentiæ.*

O Fons decori luminis,
O lux serena syderum,
Ignis DEVS purissime,
Vigor perennis cordium.

Te voce semper, te prece,
Te mente grata, vindicem
Meæ salutis concinam
A sole Æoo ad Hesperum

Tu

Tu spes mihi, tu præmium,
 Tu portus es fiducia?
 Te fretus uno, pertuli
 Sortis procellam turbidæ.
 Inter labores asperos,
 Lumen tuæ clementiæ
 Repentè fulgens, vim procul
 Abesse iussit Tartari.
 Salve supernum incendium,
 Clarumq; mentium jubar;
 Ad te revertor, supplicem
 Voca per ignes mysticos.
 Descende flamma, illabere
 Cælorum ab arce fulgida
 Infunde cæno pectori
 De fonte lucis, lumina,
 Cor, ossa, fibras, concrema,
 Venas, medullas, viscera,
 Ipsamq; mentem, ac spiritum,
 Vt totus ardeam tibi.

O fors

O fors Beata! ô gaudium!
 Conjuncta cum mens Numini
 Et immemor rerum omnium
 Te diligit perenniter.
 Summo Parenti cælitum,
 Natoq; & almo flumini
 Sit laus, decusq; perpetim,
 Nunc, & per omne sæculum.

*Quamvis expertis difficile non sit proprijs
 motibus ad DEVM assurgere, pos-
 sitq; unusquisq; ex Pharetra sui cordis sagit-
 tas orationum depromere; nè his tamen de-
 ficientibus animus ad DEVM directus, ari-
 dus reperiatur, defectu vé lignorum mysticus
 ignis in ara cordis extingvatur: ex Scriptu-
 ra & Sanctis Patribus siluula aspirationum
 proponitur pro triplici statu Incipientium,
 Proficientium, & Perfectorum. Habes hic
 eas in varias Decades distributas, quò faci-
 lius valeant memoriæ mandari. Quid enim
 prodest, multas Aspirationes in libello descri-
 ptas habere, nisi etiam memoriæ inscriptæ
 imò & insculptæ sint, ut in promptu habe-*

antur omni hora & momento? Proponitur autem primo loco Gemitus Animæ pœnitentis ad naturæ & doctrinæ ordinem, quia ut perveniamus ad id, quod nondum sumus, purgare primùm id, quod sumus, & lachrymis eluere debemus.

G E M I T U S

Animæ Pœnitentis,

Pro Incipientibus.

DECAS I.

1. **D**omine DEUS meus, ego vilissimus sum peccator, indignus planè, quem terra sustineat. Miserere mei, & salva me.
2. Domine, qui es summum bonum meum, quàm longè per peccatum recessi à te, & habito in regione hac, longinqua miseriarum, ubi perdidì me.
3. Pater Amantissime, peccavi in cælum & coram te, verè non sum dignus vocari filius tuus, fac me unum obsecro de mercenarijs tuis.
4. O quàm pœnitet me peccasse dulcissime DEUS! quàm pœnitet me,
quod

quòd legem tuam transgressus sum ,
amplius lava me ab iniquitate mea , &
à peccato meo munda me.

5. Domine DEUS meus , detestor
peccata mea, abominor universa flagi-
tia mea, confiteor ingratitude me-
am , & confugio ad aram misericor-
diæ tuæ.

6. Ablue me Christe JESU pretio-
so Sangvine tuo, & munda me ab omni
peccato.

7. Sana Domine animam meam ,
peccatis vulneratam, unge oleo gratiæ
tuæ cicatrices delictorum meorum, nè
quæso despicias me.

8. Domine DEUS pijsime, ab hac
hora nunquàm transgrediar legem tu-
am, nunquàm amplius consentire volo
in aliquod peccatum: malo incurrere
omnem pœnam, omnem infamiam,
atq; ipsam mortem quàm deinceps
peccare.

9. O Pater amantissime ! da mihi ut
faciam fructus dignos pœnitentiæ , &
puniam peccata mea , debita castiga-
tione.

10. Erravi sicut ovis quæperiit, audio tamen dulcissimam vocem tuam. Tu fornicata es cum amatoribus multis, tamen ad me revertere, & ego suscipiam te.

DECAS II.

1. **N**unc cœpi Domine, nunc vivere incipio, non in fortitudine mea, neq; in virtute brachij mei, sed in multitudine miserationum tuarum confirma hoc tu, quod operatus es in me.

2. Tu Domine integros sensus & cor docile tribuisti mihi, sed heu me miserum & infelicem! quia omnibus bonis tuis abusus sum. Tu verò Pater misericors peccantem revocasti, & à pœnis inferni misericorditer liberasti.

3. Doleo, & angor vehementer ob innumera peccata mea, quibus te Benignissime Redemptor offendi, diaboli servum me feci, indignationem tuam provocavi.

4. O si nunquàm Amantissime Pater præcepta tua transgressus essem! o si
nun-

nunquam in tantam miseriam & calamitatem incidissem! o si nunquam peccassem! o illos felices! qui innocentiam non perdiderunt, qui Baptismatis gratiam illibatam custodierunt.

5. Statuo summe DEUS impofterum non peccare: firmissimè propono tua sanctissima præcepta non transgredi: verè ex toto corde decerno cum adiutorio gratiæ tuæ universam legem adimplere.

6. Respice in me Domine oculis misericordiæ tuæ, dele præterita peccata mea, concede mihi per bonitatem tuam gratiam emendationis.

7. O quanta fuit hætenùs ignavia mea! tempus ad pœnitentiam concessum perdidi, gratiam, & auxilia rejeci, vocibus tuis, quibus me vocabas, obsurdi: & nunc Domine quid faciam? Pœnitet me peccasse, miserere mei.

8. Eheu Domine DEUS! quanta sunt vulnera mea, quanta infirmitas, & pravitas mea, pro quibus sanandis Crucifixus es, & occisus.

9. DEUS propitius esto mihi peccatori: JESU Fili Dei vivi miserere mei.

10. Dominator vitæ meæ, ecce vides, quia non est in me bonum meum, sanitas animæ meæ, pauper, & cæcus sum, nihil possum, nihil sum sine te.

DECAS III.

1. **O** Salvator pijsime! tu scis quot mala commisi, quot bona omisi? propitius esto mihi maximo peccatori, & salva me.

2. O magna Domus Dei! quàm vilis mihi fuisti, & quàm turpiter te pro nihilo contempsisti?

3. O quàm justè me in infernum detrudere poteras, justissime Judex, & mihi clementer pepercisti.

4. Confiteor Domine me omnium quos mundus habet vitiosissimum esse, sed nihilominus in immensa confido bonitate tua. Et si sunt super numerum peccata mea, non est etiam numerus bonitatis, & misericordiæ tuæ.

5. DEUS tu scis insipientiam meam, & delicta mea non sunt à te abscondita.

Deli-

Delicta juventutis meæ, & ignorantias
nè memineris.

6. DEUS meus, misericordia mea,
oro te per dilectum Filium tuum, da
mihi virtutes amplecti, vitia rejicere,
terrena calcare, cælestia sitire.

7. Væ tempori illi, quando te non
cognoscebam summum bonum animæ
meæ: væ cæcitati illi, quando te non
videbam.

8. Domine DEUS meus, quando
plenè mihi moriar, & tibi vivam? quan-
do me ab omnibus rebus terrenis expe-
diam? quando sensus meos & affectus
plenè cohibebo, & quidquid in me est
vitiosum, frænabo?

9. O si jam mundum contemnerem!
ô si terrena calcarem! o si amorẽ mun-
di pro nihilo haberem!

10. Utinam ab omni vitio purgatus,
& ab omni inordinata affectione emun-
datus divino illapsu dignus essem, &
charismatibus cælestium gratiarum.

DECAS IV.

1. **M**ortifica Domine passionem me-
as,

as, cohibe illas, & moderare amore, & præsentia tua, nè me perturbent, sed magis ad id juvent, cujus gratiâ eas dedisti, ad bonas scilicet operationes.

2. Amove à corde meo inanes cogitationes; & verear illud evolvere in conclavi animæ meæ, ubi tu habitas, quod, si ad notitiam hominum venturum esset, cogitare erubescerem.

3. Vilescat mihi Domine omnis creatura, & nihil mihi placeat, nisi tu.

4. Dulcis JESU, quàm amabilis est gratia tua, quàm suavis amicitia tua? nè quæso abijcias me propter peccata mea.

5. Nè proijcias me DEUS à facie tua, accelera precor, & sensus meos erue cito à luto fœcis.

6. Ablue me Domine pretioso sanguine tuo, sana me vulneribus tuis, sanctifica me amarissima passione, & morte tua.

7. Qui plasmasti me, & per Crucem tuam redemisti mundum, adjuva me, & miserere mei.

8. Aperi mihi viscera misericordiæ tuæ Clementissime Pater, recipe me in gratiam tuam, & dimitte omnia peccata mea.

9. Da mihi Domine fortis & patiens, tantam contritionem, quantam scis deberi peccatis meis, peccavi, misere-re mei.

10. Hic ure, hic seca, ut in æternum parcas, hic me castiga, & noli in æternum reservare mala mea.

DECAS V.

1. **P**Eccavi super numerum arenæ maris, indignus sum Domine miserationibus tuis, sed misericordia tua superat scelera mea.

2. Nonné dixisti Domine, gaudium esse in cælo super uno peccatore poenitentiam agente; exple igitur hoc gaudium in cælis de me.

3. Tu Domine, qui non vis mortem peccatoris, sed ut convertatur, & vivat, largire mihi vitam, quâ destituor.

4. Venistinè Domine, ut justos traheres ad te, an ut peccatores? Si pec-

catores? ecce me maximum omnium,
trahe me post te.

5. Miserere mei DEUS, secundum
magnam misericordiam tuam, & secundum
multitudinem miserationum tuarum dele iniquitatem meam.

6. Asperges me Domine sanguine
tuo, & super nivem dealbabor.

7. Cor mundum crea in me DEUS,
deterfis sordibus animæ meæ.

8. Redemptor animæ meæ, quàm diu
avertes faciem tuam à me, & non succurres gementi?

9. Ecce me Filium prodigum, &
prodigo deteriorem: miserere Pater,
& dona me annulo, & veste, & dignum
fac amplexu tuo.

10. Non sit frustra effusus pro me
sanguis tuus dulcissime Redemptor, sed
in salutem, & vitam æternam.

DECAS VI.

Quousq; non mederis vulneribus
meis medicorum peritissime, &
clementissime JESU Christe. Ecce cæ-
cus sum ad videnda, quæ recta sunt,
clau-

claudus ad preces, paralyticus ad opera bona: miserere, & salva me.

2. Sangvine tuo medere mihi Domine, & curâ vulneribus tuis vulnera mea.

3. Domine, nè in furore tuo arguas me, neq; in ira tua corripas me.

4. Ecce ego servus tuus sum, & filius ancillæ tuæ, lætifica animam servi tui, quoniam ad te Domine animam meam levavi.

5. Non mereor Filij nomen, & tamen tu Pater es, semper sis, ut semper sim filius.

6. DEUS, tu scis insipientiam meam, & delicta mea à te non sunt abscondita. Utinam non peream in insipientia mea.

7. Dixi, confitebor adversum me in justitiam meam Domino, & tu remisisti impietatem peccati mei.

8. Non veniat mihi pes superbiæ, & manus peccatoris non moveat me.

9. Delicta quis intelligit? Ab occultis meis munda me Domine, & ab alienis parce servo tuo.

10. Memento quæso, quòd sicut lutum feceris me, & in pulverem reduces me.

DECAS VII.

1. **N**on intres in iudicium cum ser-
vo tuo Domine, quia non justi-
ficabitur in conspectu tuo omnis vi-
vens. Misericordia indigeo, pacem
quæro, non iudicium.

2. Vide humilitatem meam, & labo-
rem meum, & dimitte universa deli-
cta mea.

3. Ostendo tibi Pater immania de-
licta mea, quæ libentiùs occultarem, si
possem, & obliterarem sanguine cor-
dis mei. Atq; utinam aboleantur unâ
guttâ sanguinis dilectissimi Filij tui Re-
demptoris mei, nè appareat coram te
foeditas mea.

4. Heu me Domine, quia peior dæ-
monibus sum, & in natura quidem
manifestum est, in moribus etiam fate-
or, nam video plura in me peccata,
quàm in illis.

5. Confiteor tibi DEUS meus, de-
deco-

decora mea in laude tua: recolo coram te scelera mea, non quòd ea amem, sed ut amem te lumen oculorum meorum, & fontem misericordiarum.

6. Purissime & Sanctissime DEUS, malo millies mori, quàm te vel levissimè offendere.

7. A nullo hoste magis timeo, quàm à me ipso: quis me custodiat à me ipso? non utiq; ego? Nisi enim tu custodieris me, frustra ego vigilo ad mei ipsius custodiam.

8. Veni Domine ad me, quia longè recessi à te. Doce me venire ad te, non enim possum, nisi tu, qui es via, doceas me.

9. Detestor peccata mea DEUS meus, corde Salvatoris mei: sicut cor JESU ea flevit, ita ea ploro, & abominor.

10. Quis mihi det? ut sit magna velut mare contritio mea, ex quo lachrymarum flumina exeant, & in illud intrent, ac iterùm & perenniter fluant?

DECAS VIII.

O Ubi estis lachrymæ! ubi dolores?
 Deferite omnes, & in me tot sce-
 lerum reum agminatim irruite.

2. O quàm bonum erat mihi! si na-
 tus non fuisset, neq; enim mihi vitam
 dedisti, ut te offenderem Deus meus.

3. O sol! mundi oculo, qui me to-
 tiès peccantem aspexisti, utinam me
 deinceps non nisi dolentem & lugen-
 tem aspicias.

4. Contremiscite omnes artus mei
 ad horrificum nomen peccati. Et vos
 omnes creaturæ judicate in me Crea-
 toris offensam.

5. O qualem DEUM offendi! quàm
 amabilem, quàm amantem mei, Deum
 dilectionis, beneficentiæ, & bonitatis.

6. Quid iniquitatis inveni in te ô
 bone JESU! ut tam crudeliter, tam
 impiè agerem tecum.

7. O si, quod factum est, possim infe-
 ctum reddere! ô si tempus præteritum
 revocare! quàm libenter cum perdita
 innocentia vitam commutarem.

8. Pœnitet me peccâsse DEUS meus, semperq; pœnitebit, & si possem infinito dolore dolerem, quòd offenderim te.

9. Convertere Domine, & eripe animam meam, saluum me fac propter misericordiam tuam.

10. Vide Domine afflictionem meam amaram nimis, quia non est, qui auxilietur mihi, nisi tu DEUS meus.

DECAS IX.

1. **S**iccine permittis Domine me indignissimam creaturam tuam à terra sustentari? ô quanta est bonitas & misericordia tua!

2. Placare Domine, & ostende mihi serenum vultum tuum.

3. Ecce DEUS tuus anima mea, ecce qui delet peccata tua: vide quanta pro te pertulit, quanta charitate te diligit, cave nè unquam ab eo discedas, & te alienes.

4. Hoc unum à te peto, Domine mi, exaudi me, ut non peccem, ut cognoscam, & faciam semper voluntatem tuam.

5. Veni Domine in cor meum, fac flagellum de funiculis, & eijce ab eo omnes profanantes Domum tuam.

6. Da mihi JESU Benignissime, unam ex tuis lachrymis, quas pro me uberrimè effudisti, ut eam offeram Patri tuo in condignam satisfactionem pro peccatis meis.

7. Recipe fugitivum tuum Clementissime Pater, pateat mihi pulsanti janua tua, accipe me fugientem ab inimicis.

8. Mortifica, & avelle à me quidquid displicet tibi, vivifica, & auge in me, quod tibi placet, tu, qui mortificas, & vivificas.

9. O Pater amantissime! si vis, potes me mundare: Sana animam meam miseram, quia fateor me peccasse.

10. O si omni vitio carerem! ô si sensus ab illicitis objectis cohiberem! ô si totus compositus intus & foris essem! Quando, quando ab omni labe purus ero: quando ita expurgatus & ordinatus, ut nihil appareat in me, quod intuentium oculos possit offendere?

re? Adjuva me Domine DEUS meus,
& peccatricis animæ meæ ablue sordes.

Pia Desideria ad usum Proficientium.

Anima quæ à DEO aberraverat, postquam redijt in viam bonam, similis est Filijs Israël, quos Dominus in manu forti de servitute Ægyptiaca liberavit. Sicut enim illi egressi de Ægypto in terram fluentem lac & mel duce Moyse progressi sunt: ita anima ad ulteriora procedere debet, contemptis hostium tentationibus ad reditum in Ægyptum sollicitantibus, quia Dominus pro nobis pugnat, & adiutor noster est, virtus nostra, & tutissimum refugium; ad quem fervidis motibus cor erigere, ejusq; opem jugiter implorare debemus pijs desiderijs & aspirationibus, quæ statui Proficientium specialiter conveniunt. Harum Decades aliquot subiiciuntur in usum & exemplum.

DECAS I.

1. **I**llumina Domine oculos mentis
meæ lumine fidei & sapientiæ, ut

P

te

te semper respiciam tanquam exemplum mihi datum ad vitam sanctè instituendam.

2. O si vires animæ Christe dulcissime, per vires sanctissimæ animæ tuæ perficeres & reformares! Utinam imaginem tuam in meo animo & corpore effingam!

3. DEUS meus, & vita animæ meæ, quis ego sum, & quæ Domus Patris mei, ut præstares mihi tot beneficia? A te Domine, & ad te creatus sum, tu requies mea, tu centrum animæ meæ.

4. Bone JESU, spes mea, & refugium meum, saluto, & veneror suavissima vulnera tua: immerge me, & absconde in illis, imprime illa cordi meo, ut tui amore totus ardeam, & medullitùs tibi compatiar.

5. Da mihi Domine intentionem rectam, ut ex filiali amore tuum honorem & beneplacitum in cunctis quæram. Da intentionem perfectam, ut nec spiritualem consolationem exquiram: sed in omni desolatione tibi adherere concupiscam.

6. Tolle Domine à corde meo nimium amorem mei, & infunde perfectum tui amorem: tolle cor servi pigri & minus fidelis, & da cor Filij per sanctam fiduciam in te sperantis.

7. O si tui duntaxat recorderer, te solum cogitarem, te solum diligerem.

8. O si januas sensuum meorum rebus mundanis occluderem! cunctisq; viribus conarer, ut tibi per omnia placerem.

9. O si mentem meam ab omni multiplicitate expedires! ô si eam penitus in te colligeres!

10. Quæram te diligenter summum bonum meum, te sollicitè cupiam immensa pulchritudo mea, ad te velociter curram vera requies animæ meæ.

DECAS II.

1. **D**iscedite à me creaturæ omnes, vestrarum curarum me expertem relinquite, nec impediatis salutem animæ meæ, nec me ab assidua Dei memoria interpellatis.

2. Nè me permittas Domine in sale-

bra tepiditatis hærere, & caligine ignorantie obvolui; sed expedi vires meas, ut ad perfectionem velociter curram.

3. In tuum pretiosum sanguinem me totum projicio, ut universa delicta mea & imperfectiones absorbeat, ac in humilitate, patientia, cæterisq; virtutibus contineat.

4. Hoc unum volo Domine, hoc unum desidero, hoc unum peto, ut benignis oculis semper respicias me.

5. Illumina cor meum, accende affectum, roboram manus, ut eum virtutis gradum, ad quem sum destinatus, per tuam misericordiam adipiscar.

6. Præsta Domine, ut per mei perfectam abnegationem, ad perfectum tui amorem perveniam. Tu jussisti, ut diligam te, da, quod jubes, & jube, quod vis.

7. Seda precor tentationum procellis agitatam animam meam, tu qui mari terminos ponis & dicis: Hucusq; venies, & hic confringes tumentes fluctus tuos.

8. Adorna Rex Sion thalamum animæ

mæ mæ sponsæ tuæ, ut nihil admittat,
quod non sit honestum, & decorum,
nihilq; in ea appareat, quod displiceat
oculis tuis.

9. Utinam Domine DEUS meus verè mitis essem & humilis corde, verè pauper & nudus spiritu.

10. Ecce Domine constituo me in infimo loco infra omnem creaturam, qui peccator sum, & omnium indignissimus.

DECAS III.

1. **O**Mnem voluntatem meam in tuam Domine transfundo, fiat voluntas tua de me, & per me, in tempore, & in æternitate.

2. Conformam me suavissime JESU, sanctissimæ humanitati tuæ, & da mihi liberam ad te introversionem.

3. Institue, dirige, & adjuva me in omnibus, ut nihil agam, nihil loquar, nihil cogitem, nihil velim, nisi quod tibi sit acceptum.

4. Benedico, & gratias ago omnipotenti clementiæ tuæ Domine DEUS
P 3 meus,

meus, nam quidquid mihi impendi potuit à largitate tua, recepi semper inæstimabiliter supra condignum.

5. Domine, quid me vis facere, fac, ut vivam in beneplacito tuo.

6. Da mihi Domine mentem tranquillam, & excita in me castæ dilectionis ardorem.

7. Illucesce mihi anhelanti ad te, nè tenebræ mortis me comprehendant.

8. Quàm bonum est pati pro Christo, pro Christo affligi, contemni, & mori.

9. Ave dulcis JESU, qui pro me mori dignatus es, nè permittas me damnari, quem tuo pretioso sanguine redemisti.

10. O dulcis societas semper esse cum Christo! ô dulcis vita cum Christo vivere! pati, & mori cum Christo.

DECAS IV.

1. **S**erviat tibi Domine DEUS quidquid ago, quidquid loquor, quidquid cogito, omne opus à te incipiat, in te finiatur.

2. Ser-

2. Servus tuus ego sum, da mihi intellectum Domine, ut discam mandata tua: nolo meipsum esse, tu libera me ab omni proprietate.

3. O quàm suave est sedere in solitudine, & tacere! cum solo JESU loqui, solum JESUM meditari, in quo sunt omnia bona.

4. Planta in me Domine radices solidarum virtutum, & fac excrefcere cum viriditate boni operis, nè velut arbor infructuosa otiosus sim in Domo tua.

5. O dulcis JESU fons omnium bonorum! fons vitæ & gratiæ, dirige gressus meos in semitis tuis, & doce me facere voluntatem tuam.

6. Cor meum evacua ab omni creatura, & ab omni impedimento: fac ut sim purus & simplex, ac totus in te defixus, ut nihil respiciam, nihil amem in creaturis, nisi quod tuum est, & propter quod creatæ sunt.

7. Da mihi fervorem spiritus tui JESU amantissime, accende in me ignem, quem venisti mittere in terram,

ut tibi soli placere studeam, & ab omnibus propter te contemni exoptem.

8. O unice dilecte JESU nè derelinquas me desolatum in hoc exilio! sed sicut promisisti, ita mecum age, ut vadas, & venias iterum ad me tempore opportuno, donec finito probationis certamine assumes me ad teipsum.

9. Domine virtus mea, sis in omnibus benedictus, in quibus me affligis; voluntatem tuam adimple in me, scio enim quòd nihil potes agere injustè.

10. Oro te DEUS meus, eripe distractum & captivum animum meum ab omnibus concupiscentijs, & corporalibus imaginibus, ut teipsum in me illuminata ratione inveniam, qui me ad tuam pretiosam & incorruptibilem imaginem fecisti.

DECAS V.

1. **D**EUS meus omne bonum meum, quando replebis me gratia & charitate tua, ut cognoscam quòd tu sis mihi omnia, quòdque verè extra te nihil sint omnia?

2. Ore-

2. Orere mihi lux sempiterna, & inclinentur umbræ vanitatis meæ, ut nè atomus quidem me separet à te, aut obumbret mihi.

3. O quàm suavis est Domine spiritus tuus ! & quàm dulcia faucibus meis eloquia tua, utinam semper eorum memor sim ad faciendum ea.

4. Domine DEUS, desidero laudare te pro omnibus, qui te ignorant, vel blasphemant sive in terris, sive in inferno.

5. Intuere me oculis misericordiæ tuæ, & injustitiâ meam longe fac à me DEUS meus, amor meus.

6. Tu scis Domine quia amo te, repelle à me quidquid displicet tibi.

7. Nihil habeo quod offeram tibi præter lachrymas contriti & amantis cordis; suscipe eas, & misce sanguini tuo Benignissime JESU.

8. Tibi Domine hoc corpus nutrio, tibi conservo hanc vitam, vires mihi largire, ut serviam tibi.

9. Utinam efficere possem dulcissime DEUS, ut omnia gaudia, quæ sunt, &

erunt in mundo, non sint, nisi de te: In te enim verum gaudium, in te vera consolatio.

10. Posside bone JESU cor meum, & reple illud gratia tua.

DECAS VI.

1. **I**N te vivam, in te moriar, suavissime JESU, & tam in vita, quàm in morte cantabo tibi, quia bonus es, & in æternum misericordia tua.

2. Absorbe Domine concupiscentiam meam dulcedine tua, quam abscondisti timentibus te, nè interior gustus vanis, illectus, & deceptus, ponat amarum dulce, & dulce amarum.

3. Confugiat Domine mens mea sub umbram alarum tuarum, ab æstibus cogitationum hujus sæculi, ut in te abscondita cantet. In pace in idipsum dormiam & requiescam.

4. Da quæso Domine cordi meo te desiderare, desiderando quærere, quærando invenire, inveniendo amare.

5. Fac me funditus mori huic mundo, & transeuntium rerum oblivisci,
præ

præ magnitudine timoris, & amoris tui,
ut nihil temporale diligam, aut metuam.

6. Deduc me Domine in iustitia tua
propter inimicos meos, dirige in con-
spectu tuo viam meam.

7. Salvum me fac Domine, quoniam
defecit Sanctus, quoniam diminutæ
sunt veritates à filiis hominum.

8. Perfice gressus meos in semitis tu-
is, ut non moveantur vestigia mea.

9. Tu qui dixisti, si quis sitit, veniat
ad me, & bibat, da sitienti animæ meæ
semper bibere ex te, ut secundum pro-
missionem tuam fluant aquæ vivæ de
ventre meo.

10. Expelle à me Omnipotens Deus
jactantiam mentis, & auge cordis com-
punctionem: minue superbiam meam,
& perfice in me veram humilitatem:
libera me ab insidijs inimici, & conser-
va in tua voluntate.

DECAS VII.

1. **C**ognoscam te Domine virtus
mea, inveniam te desiderium cor-
dis mei, diligam te vita animæ meæ.

2. Ti-

2. Tibi laus, tibi gloria, tibi gratiarum actio in sæcula sempiterna. ô Beata TRINITAS, pro omnibus contumelijs, quæ tibi ab impijs inferuntur.

3. Laudo te amor dulcissime, & glorifico te pro omnibus bonis, quæ tua gloriosissima Divinitas, & Beatissima Humanitas operata est in nobis per nobilissimum instrumentum cordis tui, & operabitur in sæcula sæculorum.

4. In te projectus sum ex utero, de ventre matris meæ, DEUS meus es tu, nè discefferis à me.

5. Dominus illuminatio mea, & salus mea, quem timebo? Dominus protector vitæ meæ, à quo trepidabo?

6. In manus tuas Domine, commendando spiritum meum, redemisti me Domine DEUS veritatis.

7. Complacet tibi Domine, ut eruas me, Domine, ad adjuvandū me respice.

8. Judica Domine nocentes me, expugna impugnantes me, apprehende arma & scutum, & exurge in adjutorium mihi, dic animæ meæ salus tua ego sum.

9. Mi-

9. Miserere mei DEUS, miserere mei, quoniam in te confidit anima mea.

10. Sitivit in te DEUS anima mea, quam multipliciter tibi caro mea.

DECAS VIII.

1. **M**iserere mei DEUS omnium, & ostende mihi lucem miserationum tuarum.

2. Benedicite omnia opera Domini Domino, laudate & superexaltate eum in sæcula.

3. Venite, audite, & narrabo, omnes, qui timetis Deum, quanta fecit animæ meæ.

4. DEUS in adjutorium meum intende, Domine ad adjuvandum me festina.

5. Repleatur os meum laude, ut cantem gloriam tuam, tota die magnitudinem tuam.

6. Domine DEUS virtutum, quis similis tibi, potens es Domine, & veritas tua in circuitu tuo.

7. Bonitatem, & disciplinam, & scientiam doce me, quia mandatis tuis cre-

credidi: Dote me justificationes tuas.

8. Quo ibo à spiritu tuo, & quo à facie tua fugiam? si ascendero in cælum, tu illic es, si descendero in infernum, ades.

9. Ad te Domine levavi animam meam, Deus meus, in te confido, non erubescam.

10. Vidi prævaricantes, & tabescen-
tiam, quia eloquia tua non custodiêrunt.

DECAS IX.

1. **Q**uis similis tibi in fortibus Domi-
ne? quis similis tui? magni-
ficus in sanctitate, terribilis, atq; lau-
dabilis, & faciens mirabilia.

2. Opto Domine patiens esse, & hu-
milis, & resignatus: tu pro me sup-
plere digneris quidquid mihi deest in
his virtutibus.

3. O quàm desidero humilitatem
habere! Da mihi thesaurum humilita-
tis tuæ, humillime JESU Christe.

4. O quantum desidero pati pro te
amantissime JESU! Tametsi induxe-
ris omnes fluctus tuos super me, lætus
omnia

omnia tolerabo per gratiam tuam ob
amorem tui.

5. Recordare Domine, quia Pater
meus es: ecce anima mea nuda est, in-
due eam virtutibus tuis: ad Patrem
enim pertinet, nudam, pauperculam fi-
liam vestire.

6. Quid volo præter te Domine,
aut quid mihi prodesse omnia sine te?
Tu solus sufficis animæ meæ.

7. Quàm vani sunt homines, qui te
non quærunt, quàm miseri & avari,
quibus tu non sufficis.

8. O si omnium hominum, quotquot
fuerunt, sunt, & erunt, corda, & volun-
tates solus haberem, ut ijs te summè
diligere, unicum bonum meum, &
consolatio animæ meæ.

9. In te Domine speravi, non con-
fundar in æternum. Et si Angelus de
cælo affereret mihi, me projectum esse
à facie tua, non crederem illi. Et si tu
ipse summe DEUS diceres mihi, ego
in æternum te damnavi, nolo audire
preces tuas. Ignosce Domine, in hac
re non crederem tibi, sed etiam si oc-
cidas

cidas me, & in inferno demergas me,
semper in te sperabo.

10. Da mihi Domine vulnera tua,
abhorreo enim videre cor meum, nisi
vulneribus plenum cum te adeò cru-
deliter videam pro me crucifixum.
Non possum vivere sine vulnere, cum
te undiq; videam vulneratum.

S U S P I R I A

Amantis Animæ, Pro Perfectis.

Perfectos appello non ex omni parte: quis
enim in hoc mundo? Imò ut verissimè
scribit Bernardus Drogoni Monacho. Nemo
perfectus est, qui perfectior esse non appetit,
& in eo quisq; perfectiorem se probat, quod
ad maiorem tendit perfectionem. Perfectos
igitur voco, expurgatos à peccatis, ornatos
virtutibus, qui in humilitate & charitate,
magnos jam progressus fecerunt, & ad inti-
mam cum DEO unionem ferventi affectu
aspirant. Quia verò perfectio in amore Dei
consistit, motus Anagogici ad perfectorum
statum

statum pertinentes, ex amore potissimum desumuntur, ut ex subjectis sequentibus formulis apparet.

DECAS I.

1. **O** Dulcedo cordis mei! ô vita animæ meæ! ô essentia essentiæ meæ, & jucunda requies spiritûs mei, abstraheme me ab omnibus creaturis, ut solum requiescam in te.

2. O Domine DEUS meus, spes mea, & refugium meum, ô dilecte votorum meorum! quando omnem dissimilitudinem, & imperfectionem absumes in me.

3. O charorum omnium charissime! ô sponse floride, sponse melliflue, quando me ornabis illis monilibus, quibus tibi placebo.

4. Trahe me post te sponse dulcissime, ut alacriter, purè, perseveranter curram in odorem unguentorû tuorû.

5. Effice me hominem secundum cor tuum, præpara tibi in me gratam habitationem, ut ad me venias, & mansionem apud me facias.

Q

6. In-

6. Inebria me vino charitatis tuæ ô pulcherrime amator meus! uni me tibi intimè, & me totum transmuta in te.

7. O ignis increate! quando me totum incremabis flamma ardentissima amoris tui? quando perempta omni in me proprietate, totus tuus ero?

8. O dilecte mi! quem solum quaero, quando mihi pulsanti & gementi aperies? quando teipsum mihi manifestabis, & dices; salus tua ego sum.

9. O immensa dulcedo mea! quando me totum in te rapies, absorbebis, & abscondes? Quod enim est mari absorbere unam guttam, hoc est tibi Domine absorbere me.

10. O felicitas mea! ô totum & solum gaudium meum, quando sublati omnibus impedimentis introduces me in cubiculum gloriæ tuæ, & me tibi inseparabiliter agglutinabis?

DECAS II.

1. Quæsi vultum tuum, vultum tuum Domine requiram, frustra enim laboro, quamdiù te non quaero.

2. No-

2. Nolo te sequi Domine per viam consolationum, & delectationum, sed veri, & puri amoris, nolo id, quod egreditur à te, sed te ipsum solum. Te solum volo, te solum desidero, nihil mihi extra te.

3. In te Domine est omne esse meum, omnis delectatio mea, omne bonum meum. Si quid meum dico, si me ipsum nomino, te solum intelligo, qui solus meus es, & omnis essentia mea in te solo est.

4. Anima mea, sicut terra sine aqua tibi: effunde ergo clementissime Deus largam super me benedictionem de rore cæli, & de pingvedine terræ viventium.

5. Utinam dirumperes cælos, & ad me descenderes, ut durities mea liquefacta deflueret, & amore tuo totus ignitus, inenarrabilibus te gemitibus, & suspirijs invocarem.

6. Heu mihi! quia incolatus meus prolongatus est, & cogor ibi vivere, undè mallet abesse: cogor abesse à te, cum quo tantoperè cupio permanere.

7. O amor quàm absconditus! quàm ignotus es! Te cupio Domine, & nihil aliud. Præbe mihi cor tuum, & accipe meum.

8. O si possem velocissimè totam terram peragrarè! & clamore valido ubiq; vociferari. Vivat amor JESU Christi: vivat amor JESU Christi.

9. O superlucida & deliciosa TRINITAS unus DEUS! pascè me tuis influxibus. O simplicissimum & jucundissimum bonum! ô bonum incommentabile! imple me teipso: transfer in te originem meam, introduce me in fundum animæ meæ?

10. O charum principium meum! quando te feliciter inveniam? quando te ardentissimè diligam? quando me totum in te rapies? quando me totum absorbebis, & sinè medio tibi unies.

DECAS III.

1. **Q**uando obdormiam, & requiescam in te pax mea dulcissima? quando plenè aspirabit mihi Divinitatis tuæ fragrantia? quando mihi exorietur

rietur dies sempiterna tuæ manifestæ visionis.

2. Per tuum cor transverberatum, transige amantissime JESU cor meum jaculo amoris tui, ita ut nihil terreni continere possit, sed à sola efficacia tuæ Divinitatis contineatur.

3. Ave JESU sponse mellifue, saluto, & veneror te omnium Electorum tuorum affectu. Excita, & rege spiritu tuo, vivifico omnes motus cordis mei.

4. O amor meus! & omne gaudium meum, quando inclinabitur umbra mortalitatis, & aspirabit dies æternitatis? quando depositâ sarcinâ corporis hujus cum Sanctis tuis te perenniter laudabo.

5. Respice me ô floride sponse inter suavissimos amplexus amoris tui, quibus constrictus spiritus meus totus ardeat, & comburatur.

6. O bonum supra omne bonum! ô finis finè fine! quando fruam te finè modo, & finè fine.

7. Pulcher es dilecte mi, & amabilis valdè,

valdè, non carni & sensui; sed animæ credenti, mundum cor habenti, & ad invisibilia se transferenti.

8. Dominus meus, & DEUS meus, amem te solum propter te, & nihil amem nisi te.

9. O suavissime cæli splendor! adure cor meum potentissimo charitatis incendio, viscera mea tibi sacrifico, ut ea æternis flammis comburas.

10. Cupio Domine JESU, ut quoties àërem ad me attraho, te ipsum cordiali affectu intra me attraham: quatenus omnes cogitationes, verba, & opera mea, tuis cogitationibus, verbis, & operibus uniantur, & sic unita Deo Patri ad majorem ejus gloriam represententur.

DECAS IV.

1. **D**A mihi Domine, ut te videam finè forma corporea, finè specie imaginaria, finè luce creata. Trahe me post te extra omnes creaturas.

2. Malo Domine ex voluntate tua acerbissimas inferni pœnas finè fine tolera-

lerare, quàm finè te gaudijs perfrui sempiternis.

3. Demerge dilectissime mi parvulam guttam spiritûs mei in immenso pelago bonitatis tuæ, demerge, & absorbe me totum in abyſſo infinitæ misericordiæ tuæ.

4. Veni suspirata quies, amantis animæ meæ, ut nulli mihi dies, nullæ noctes eant finè te, nullus mihi somnus finè te, tibi soli vivam, & moriar.

5. Quis ego sum, & qui es tu amor meus? Nunquid non multum esset, si te permitteres à me amari. Sed & insuper te amari præcipis, & mihi mortem sempiternam minaris, si te non amo.

6. Clementissime Pater, sicut tu in omni æternitate voluisti, antequàm ego essem, ita fiat: charior est enim mihi tua gravissima voluntas, quàm operandi libertas.

7. Quando me lætificabis in regno tuo Domine DEUS meus clarissimo vultu tuo? quando omnia, quæ credo, lego, & audio de te, & gloria tua, clarè & intuitivè videbo?

8. Sileat omnis creatura ante te Deus meus: tu solus mihi loquaris, adfis, & illumines, qui es omnia in omnibus, & super omnia amabilis, & gloriosus in sæcula.

9. Vulnere cor meum tam potenti jaculo dilectionis tuæ, ut omnis terrena consolatio amara mihi reddatur, & omni solatio creaturarum libenter caream.

10. Extingve Domine omnes externas imagines in corde meo, ut pacem nullibi sive delectationem vel quæram, vel inveniam, nisi in te dulcissime Deus meus.

DECAS V.

1. **O** Charitas DEUS meus, fac me obsecro unum tecum, sicut tu, & Pater unum estis, & sufficit mihi.

2. Utinam suavissime JESU, ea flamma amoris ardeam, quâ ardent Seraphin, quâ ardet Mater tua, quâ ardes tu.

3. O si possem ab omnibus cordibus, amorem, qui non est tuus, evellere! &
tuum

tuum inferere, ut amore tuo omnes ardeant, & langveant?

4. Amo te DEUS meus, quia æternus es; amo te immensitas mea, quia immensus es.

5. In amoris signum gratulor tibi DEUS meus, Divinitatem tuam, simplicitatem tuam, æternitatem tuam, omnesq; tuas perfectiones, quæ ita sunt in te, ut idem sint, quod tu.

6. Utinam omnia, quæ cogitavi, quæ sum locutus, & operatus, ex puro amore tui semper fuissent, utinam te semper amâssem.

7. O si possem DEUS meus retrovertere annos meos! & peractæ ætatis spatia amoris tui actibus replere! ô si te semper dilexissem! cum alia extra te dilexi.

8. Nihilum mei præcessit me à diebus æternitatis tuæ, DEUS æterne! nunc verò exulto tibi factori meo, & cupio annihilari, quidquid in me terrenum est, ut tu solus vivas in me.

9. O æternitas! quàm clarè luces, quàm blandè, quàm præcisè, quàm in

puncto! A te secedo, à mundo isto sensibili: in te meum solatium, & recreatio est, post negotia vitæ humanæ, post tædium vitæ labentis.

10. Tu desiderium collium æternorum dulcissime JESU, tu desideratus cunctis gentibus, tu sponsus, tu Rex cordium, tu amor meus, & omne bonum meum.

DECAS VI.

1. **T**U scis Domine, quia si possem omnem tibi laudem, gloriam, & honorem tribuerem, quibus te laudant, glorificant omnes Angeli, & Electi tui: sed quia impotens ad hoc sum, suscipe saltem desiderium meum, & bonam voluntatem.

2. Exclude à me DEUS omnia impedimenta gloriæ tuæ, & in eo statu me constitue, quem aptiorem fore nōsti, ut major tibi gloria ex me proveniat.

3. Possideam te in medio cordis mei beatitudo sempiterna! possideam te summa dulcedo animæ meæ!

4. Me tibi resigno Creator meus,
purè

purè propter te ad omnia officia, loca, casus, eventus, statumq; animæ, & corporis, qui tibi placuerit.

5. Nihil à te peto Domine, nihil volo, nisi pro majori tua gloria. Quod si per ignorantiam vel errorem aliquid peterem, nolo exaudiri.

6. Si tibi æquale præstatur obsequium, malo Domine desolationem, quàm consolationem, ut pro tui amore aliquid patiar internæ afflictionis.

7. Quia finè te nihil possum pati pro te, da mihi multam & magnam gratiam, ut multa & magna patiar pro amore tuo.

8. Major es omni laude DEUS meus, & ob id gaudeo, quia quidquid obsequij omnes purè creaturæ præstare tibi quocunq; modo conantur, longissimè impar est dignitati & magnitudini tuæ.

9. Quidquid virtutum, piorum actuum, & affectuum in libris editis & edendis describitur, quidquid fieri potest tibi gratum & acceptum, id omne approbo, & volo, & cum gratia tua perficere cupio.

10. Utinam possem DEUS meus aliquid hoc momento efficere, quod summè tibi placeat. En hoc quod nunc aggredior, purè ad hoc dirigo, ut maximam in eo habeas complacentiam.

DECAS VII.

1. **Q**uæso te Domine, nè patiaris quidquam in me, quod non sit usquèquaq; tuum & Divinum, & si quid est, illud protinùs evelle.

2. Si scirem DEUS meus, me fore annihilandum, adhuc tibi omni studio servirem; non enim tibi servio propter me, sed propter te.

3. Da bone JESU, ut oratio illa tua suam vim in me habeat, ut sicut tu in Patre, & Pater in te est, ita ego tecum unus sim voluntate, amore, opere, moribus, & vita.

4. Extingve me Domine in corde omnium hominum, & cunctos homines in corde meo occide, ut mihi mundus crucifixus sit, & ego mundo.

5. Mitte mihi DEUS quamcunque volueris afflictionem & crucem, & in
omni

omni tribulatione præsta, ut reum me fatear, & cognoscam, & ut meipsum in contemptu habeam.

6. Hactenùs quosdam amavi, qui me non amabant: jam te amabo amator æterne, qui me amâsti antequàm te novissem; quem amare virtus summa est, à quo amari felicitas.

7. De profundis cordis mei clamo ad te suavissime DEUS, ut auferas à me vanissimum amorem corporeæ pulchritudinis, & me totum transferas ad purissimum amorem decoris tui.

8. Illabere, precor te, in penetralia cordis mei, & imprime mihi servo tuo dulcissimam & admirabilem speciem tuam, ut quiescam in suavitate præsentiae tuæ.

9. Veni Domine, amator meus, gaudium meum, & corona mea: veni, & noli amplius tardare, nè ex nimio desiderio finè sensu efficiar.

10. Scribe dulcis JESU Nomen tuum in corde meo, & amorem tuum mellifluum per jugem memoriam pectori meo inscribe.

DECAS VIII.

1. **V**incat iniquitatem meam DEUS
 immensa bonitas tua, & imagi-
 nem tuam in me recognosce, quamvis
 deturpatam peccatis.

2. Revertor ad te felicissimum prin-
 cipium meum, dulcis origo, & finis
 meus, esto deinceps totum ac solum
 cogitationum mearum objectum.

3. O unum Divinum te solum desi-
 derat cor meum, libera me ab omni
 multiplicitate.

4. Diligam te DEUS pro dono tuo,
 & pro modo meo, exiguo quidem, &
 minùs justo, sed non possum ultrà,
 quàm possum: potero autem plùs si eam
 plùs donare dignaberis, nunquàm ta-
 men prout dignus haberis.

5. O quàm beati illi! qui edunt &
 bibunt ad mensam tuam in regno tuo,
 quoniam te ardenter diligunt, & te fru-
 untur in lætitia, & exultatione. Ego
 autem hic fame pereor, & projectus
 in cinere & caligine lumen cæli non
 video.

6. Si-

6. Sitio te clarè cognoscere, esurio te perfectè diligere, nec desiderium meum adipisci valeo. Obsecro Domine, si inveni gratiam in oculis tuis, ostende mihi faciem tuam.

7. Fac mihi Domine quodcunque placitum fuerit in conspectu tuo: in manibus tuis ego sum, & corpus meum, & spiritus meus: quocunq; pervenero, laudabo te: & exultabo vehementer.

8. Sitivit anima mea ad te, satia eam suspirantem, felicitas mea, & reple esurientem bonis tuis.

9. Deijciantur quæso omnia simulacra de throno gloriæ tuæ, ut tu sis solus regnans in corde meo, nec sim ego amplius miserabiliter instabilis, & fugitivus à te.

10. Uniat me sibi verbum Dei, gignat seipsam in me finè intermissione æterna sapientia, & pro minimo mihi erit, si me despiciant cælum, & terra, & omnia, quæ in eis sunt. Quod si me repuleris ab osculo tuo, non poterunt me omnia, quæ infra te sunt, consolari.

DE-

DECAS IX.

1. **V**eni gaudium meum, lumen oculorum meorum, veni amor meus, lux incomprehensibilis, imple omnes potentias animæ meæ intus & foris, ut nihil nisi te videam, cogitem, amem, & desiderem.

2. Tu dixisti Domine, ducam eam in solitudinem, & ibi loquar ad cor ejus. Et quid aliud est solitudo, nisi te solum amare, in te solo quiescere.

3. O Divina solitudo, tam concupiscenti animo desiderata, quando fiet istud, ut in te omninò quiescam?

4. Heu me! quia non diligo te vita animæ meæ, nam si verè te diligerem, semper te in corde haberem; scriptum est enim. Ubi est thesaurus tuus, ibi est & cor tuum.

5. Congrega nos in unum potentissime amator, data est enim tibi omnis potestas in cælo & in terra.

6. Trahe me post te suavissime Redemptor, qui dixisti, si exaltatus fuero à terra omnia traham ad meipsum.

7. Ac-

7. Accende cor meum igne tuo Deus meus, tu enim ignis comburens es, & facis ministros tuos ignem urentem.

8. DEUS meus es tu, qui infinita tua bonitate locupletissimus, nec bonorum meorum, nec alterius cujusq; rei indigentiam habere potes. Et in hoc gaudeo, & exulto, quod nulla tibi perfectio, nec quidem per imaginationem adungi potest.

9. Domine JESU, quantum te diligunt, qui te noverunt; Pater tuus te diligit, Spiritus Sanctus te diligit; omnes Angeli, omnes Electi, & amici tui, amore tuo exardescunt, & ego solus frigidus ero.

10. Libera me DEUS à multiloquio, quod patior intus in anima mea: non enim cogitationibus taceo, etiamsi vocibus taceam. Multæ sunt cogitationes meæ, quales tu nosti, cogitationes hominum, quoniam vanæ sunt. Da mihi eis non consentire, nec immorari, nè me impediant ab amore tuo.

DECAS

R

DECAS X.

1. **O** Amor! quàm parum cognosceris, & amaris? accede ad me ô amor, & si nullibi requiem invenis, te totum transfunde in me æterne & suavissime Amator.

2. Semper ardeat ignis amoris tui in Altari cordis mei, & in tantum crescat incendium, ut non solum sacrificium, sed & ipsum altare comburat, & consumat.

3. Nihil me lætificet Domine JESU Christe, nisi tu, nihil me contristet, nisi culpa mea, & offensio tuæ Majestatis.

4. Tu es unicum desiderium meum æterna sapientia, tu thesaurus quem quæro, tu beatitudo, ad quam suspiro.

5. Quàm pulcher es dilecte mi, quàm speciosus in delicijs tuis! Utinam potentissimus amor tuus, omnem extraneum amorem in me occidat. Quidquid videro, quidquid audiero, quidquid sensero, tu solus intres, & possideas cor meum.

6. O amor potentissime! qui lutum
trans-

transfiguras in Deum, transforma me totum in te. Nimis saxum est cor meum, nisi molliatur sanguine tuo: nimis distractum est, nisi colligatur in latere tuo.

7. O æterna veritas! & vera charitas, & chara æternitas. Tu es Deus meus, ad te suspiro die ac nocte. Te amo, te diligo, & magis amare desidero, percussisti enim cor meum verbo tuo, ut amarem te.

8. Quid amore dulcius? quid securius? quid suavius? Quare sagittis ejus non est transfixum cor meum? Ergonè amor tuus circumdat me undique, & nescio quid sit amor? cur sic maneo insensibilis? cur me magis attraxit creatura, quàm Creator?

9. Venustissime JESU vita mea perennis, per quam vivo, & sine qua morior, vita dulcis & amabilis, concede, ut tibi jungar, te amplectar, & suavi charitate soporatus in te obdormiã.

10. Quando te videbo dulcissime DEUS? quando apparebo ante faciem tuam? quando transibo in admirabilem

Domum tuam? quando videbo te in terra viventium? In ista enim terra jumentorum mortalibus oculis videri non potes, sed in Regione Angelorum videbimus te sicuti es.

A C T V S

Præcipuarum Virtutum per Aspirationes *Actus Fidei.*

1. **A**uctor fidei JESU Christe firmissime, me, credo vera esse omnia, quæ te revelante credit & docet Sancta Mater Ecclesia, & pro hac assertione, & veritate millies mori paratus sum.

2. Auge in me fidem à te semel infusam, vitamq; fidei consonam concede, ut quod mente credo, moribus exprimam.

3. Testimonia tua Domine credibilia facta sunt nimis, utinam secundum ea semper vixissem.

4. Verissima sunt omnia, quæ in sacris

cris libris, & Apostolicis traditionibus ac decretis Ecclesiæ continentur, pro qua veritate tuenda vitam meam libentissimè offero.

5. Omnino verum est te Deum meum unum esse in substantia, & trinum in Personis, quod ego per medios gladios, & ignes profitebor.

6. Utinam Fides tua integra semper, & sincera conservetur, qualem tu Domine tradidisti, qualem Apostoli prædicaverunt.

7. Credo tibi ô summa Veritas! & quia fides, si operibus mortua est, da mihi, ut fidem meam patientiâ & charitate, alijsq; virtutibus vivam esse demonstrem.

8. Gratias tibi ago Domine, quod mihi fidem dederis, quâ te cognoscerem, quod me Christianum feceris, & Catholicæ Ecclesiæ membrum. In hac fide vixi, in eadem mori volo, atque utinam pro eadem.

9. Credo te DEUM ingentum, Filium Unigenitum, Spiritum Sanctum ab utroq; procedentem. O credam &

fruar semper! quia tu DEUS meus es, principium meum, & finis ultimus, & mea æterna beatitudo.

10. Credo te DEI Filium, pro mea salute carnem humanam induisse. Credo te passum pro me, & mortuum in cruce. Credo te DEUM & Hominem in Sacramento mirabiliter existere. Credo hæc omnia & alia, quæ de te docet Ecclesia, & credens adoro, & amo te.

11. Revela Domine oculos meos, & considerabo mirabilia de lege tua. Quàm dulcia faucibus meis eloquia tua super mel ori meo.

12. O si fidem possem annuntiare in universo mundo, & omnes infideles ad Deum convertere! quàm libenter id facerem, & si propterea omnia tormenta sustinere deberem.

13. Utinam possem DEUS meus omnium fidelium intellectibus in te credere, omnium affectu te amare, omnium viribus tibi servire.

14. Discedite à me omnes pessimi, hæretici, filij diaboli, & pestes animarum

rum vos detestor, & abominor, & cum Ecclesia Dei anathematizo.

15. Quaecunq; docet fides, adeò firmiter credo, ac si oculis ea viderem. Adauge Domine, & confirma fidem meam: hac enim duce securus ibo, ad Tribunal tuum quacunq; hora me vocaveris, quia credo, & spero videre bona tua in terra viventium.

Actus Spei.

1. **C**lementissime DEUS, tametsi multa, & gravissima peccata commiserim, spero tamen ex tua misericordia, & ex bonis operibus gratiæ tuæ adjutorio præstitis me gloria sempiterna fruiturum.

2. Et si reus essem omnium peccatorum mundi, tamen in te sperabo, major est enim misericordia tua, quàm iniquitas mea.

3. Gaudeo Domine, nihil in me esse, in quo confidere possim: lætor quod nullibi spes mea consistere queat, nisi in te, qui solus es refugium meum, & firmamentum meum.

4. Dixisti Domine, & ita est. Sine me nihil potestis facere, quid ergo residui habeo, nisi ut oculos meos ad te dirigam, & tu ô Bonitas adjuves me.

5. Ad te confugio Domine, ut per patientiam, & consolationem scripturarum spem habeam, & in te sperans non confundar.

6. Adjutor meus esto, nè derelinquas me, neq; despicias me, Deus salutaris meus. Tanquàm prodigium factus sum multis, & tu adjutor fortis, & misericors.

7. Omnis spes mea optime JESU, & totius fiducia certitudo in pretioso sanguine tuo mihi est. In ipso respiro, & in ipso confusus, ad te pervenire desidero, non habens meam justitiam, sed eam quæ est ex te.

8. Quidquid asperum, & molestum mihi evenire permiserit Divina providentia tua, benignissime Pater semper in te sperabo: certus enim sum, quia si in inferno demersus fuero, inde me liberabis.

9. Magna est valdè misericordia tua
Domi-

Domine, & in ea sola posita est tota spes, & consolatio mea.

10. Mirifica misericordias tuas qui salvos facis, sperantes in te: custodi me, ut pupillam oculi sub umbra alarum tuarum protege me.

11. Bonum est confidere in Domino, quàm confidere in homine: bonum est sperare in Domino, quàm sperare in Principibus.

12. Domine virtutum, beatus homo qui sperat in te: In te eripiar à tentatione, & in Deo meo transgrediar murū.

13. Toto corde firmissime spero omnipotens DEUS me posse à te omnia obtinere, quæ mihi necessaria sunt ad salutem: & quia Filius tuus Redemptor meus, omnia bona mihi promeruit, tantam in ejus meritis fiduciam habeo, ac si bonam quod desidero, jam tenerem & possiderem.

14. Ego autem in te speravi Domine, dixi DEUS meus es tu, in manibus tuis sortes meæ.

15. O si cito adveniret Regnum tuum, summum bonum meum, Regnum, quod

quod spero, quod expecto, quod toto corde concupisco! Utinā cito adveniat, quia Regnum omnium sæculorum est, plena possessio totius felicitatis.

Actus Charitatis erga DEUM.

1. **O** Ro te dulcissime JESU, ut cordis mei principatum geras. Absit à me optatissimum bonum meum, ut aliquid amem præter te.

2. Ure me incendio decoris tui speciosissime Princeps cordis mei: sacrifico tibi omnia viscera mea, & præcordia mea.

3. Vive potentissime Imperator cordis mei, & dominare sicut decet te. O quàm mihi placet! ut regnes in æternum & ultra.

4. Utinam tot millia cordium, quot mihi placuerunt, vel placere possunt, ipse possiderem, ut te perfectissime amarem.

5. Utinam subdere tibi possem amabilissi-

bilissime Domine, omnia colla filiorum
Adæ, ut te solum requirerent, & a-
marent.

6. O unice amor meus! & serena
lux oculorum meorum, omnia mihi
sordeant, & vilescant præter te.

7. O amabile principium meum!
& tota sufficientia mea, nihil volo, ni-
hil cupio præter te.

8. O quantum gaudeo! quod Deus
sis summe bonus, & perfectus, immen-
sus, infinitus, justissimus, sapientissi-
mus, omnipotens, incomprehensibilis?
Amo te purè propter teipsum, & gau-
deo de bonis tuis ob hanc solam cau-
sam, quia bona tua sunt.

9. Ad te summum bonum, toto cor-
dis affectu feror in immensa bonitate
tua, exulto, gaudeo, quod omnes An-
geli & Sancti adorent, & laudent te.

10. Utinam possem amare te, quan-
tùm amabilis es! sed quia excedit vi-
res omnium creaturarum, utinam sal-
tem amem te quantum possum, quan-
tùm debeo.

11. Reple DEUS meus animā meam
amore

amore tuo, ut amore totus ardeam, & amore æstuans, amore moriar.

12. Quàm pœnitet me, quod alia extra te dilexi. Utinam possem transactos annos revocare, & amoris tui actibus replere.

13. O dulcissima vita animæ meæ! utinam deficiat in te cor meum. Quid enim mihi est in cælo? & à te quid volui super terram?

14. Unam petij à te Domine, hanc requiram, ut inhabitem in Domo tua, omnibus diebus vitæ meæ.

15. Utinam ultimus halitus quo animam efflabo, halitus amoris sit. Moriar amore tuo Deus meus, & quia vitam ab amore non inchoavi, da mihi vitam amando finire. Ultimus vitæ actus sit amare te.

Actus Charitatis erga Proximum.

1. **I**nsere Domine pectoribus nostris tuæ dilectionis affectum, ut diligamus

mus nos invicem, sicut tu diligis nos,
& alter alterius onera portemus.

2. Da mihi Domine non diligere
verbo, neq; lingua, sed opere, & veri-
tate, ut quæcunq; volo, ut faciant mihi
homines, id faciam illis.

3. Doleo DEUS meus, quod ea ha-
tenus non præstiti in obsequium pro-
ximi mei, quod tuo auxilio adjutus
poteram.

4. Detestor quidquid injuriæ, & of-
fensæ olim paravi verbo, opere, & co-
gitatione in proximum meum, paratus
singulis satisfacere, si quid alicui de-
beo. Inspira tu DEUS, ut sciam, & da
ut faciam.

5. Amator hominum DEUS, oro te
pro omnibus qui persequuntur, & ca-
lumniantur me, & qui me quovis mo-
do offenderunt. Da illis salutem men-
tis, & corporis.

6. Utinam clementissime DEUS o-
mnes peccatores resipiscant, & conver-
tantur ad te.

7. Obsecro Domine, ut omnes, qui
oppugnant Ecclesiam tuam, dexteræ
tuæ

tuæ potentiâ conterantur, & agnoscant veritatem.

8. Propono Domine omnes injurias & offensas, te adjuvante, æquo animo tolerare, nec ullum unquam hominem, quamvis mihi infestum odio habebo.

9. O si possem pro fratribus meis! ijs præsertim, qui me aliqua injuria aut molestia affecerunt, sanguinem fundere quàm libenter id facerem. Confirma Domine in me hanc voluntatem.

10. Fac obsecro Deus meus, per viscera misericordiæ tuæ, ut omnes ad te convertantur, qui rebus terrenis adhærent, & quos voluptas carnis illexit.

11. O si ego possem omnes peccatores ab erroribus vitæ suæ convertere, & jam cum vitæ dispendio id facere?

12. Utinam totus mundus in te crederet, & te cognosceret. Confiteantur tibi populi Deus, confiteantur tibi populi omnes. Omnis terra adoret te, & psallat tibi.

13. Diligo te Domine toto corde, & proximum in te, & propter te.

14. De bonis omnibus fratrum meorum

orum gaudeo, & de malis doleo, ac si mea forent: & mala quidem ab omnibus avertere efficaciter vellem si possem, bona verò multiplicare.

15. Libenter si possem omnium indigentium necessitatibus subvenirem, esurientibus cibum, sitientibus potum darem, reliqua etiam opera misericordiae spiritualia, & corporalia exercerem.

Actus Patientiae.

1. **S**I oportuit te Christe pati, & ita intrare in gloriam tuam, quo pacto ego in illam intrabo, nisi via Regia Sanctae Crucis.

2. Cognovi Domine, quia æquitas, judicia tua, & in veritate tua humiliasti me.

3. Opto potius cunctos inferni cruciatus tolerare, quàm tuam justitiam violare.

4. Iram tuam Domine portabo, quoniam peccavi tibi. Quod si bona suscepi de manu tua, quare mala non sustinebo.

5. In

5. In omni adversitate te bone JESU recogitabo, quia talem pro me sustinuisti adversus te metipsum contradictionem.

6. Utinam dignus sim gaudenter cum Apostolis tuis contumeliam, paupertatem, & quidquid volueris, pati pro nomine tuo.

7. Quidquid laboris mihi unquam acciderit, id propter te Domine patienter feram. Si tentationibus exercear, si mæror importunus ingruat, si morbi, si dolores, si quævis tormenta contingant, omnia te juvante fortiter, & strenue tolerabo.

8. Absit à me Domine, ut animum despondeam à Christiana perfectione comparanda: omnes enim difficultates te duce superabo, & in Deo meo transgrediar murum.

9. Absit à me, ut amore vitæ, vel timore mortis, à virtutis proposito desistam. Et si me oporteret universis mundi miserijs & calamitatibus obrui, nunquam à te recedam.

10. Imprime fortissime DEUS robur
ma-

magnum cordi meo, cupio enim te sequi per omnem afflictionem, & desolationem internam, & externam.

11. Ut jumentum factus sum apud te Domine DEUS meus. Tu nōsti, onus meum quale sit, da mihi illud patienter ferre, ut per viam crucis extollar ad te.

12. Offero me tibi Domine paratum ad omnia mala æquanimiter, hilariter, ac sinè ulla prorsus querimonia sustinenda.

13. O si patientiam Sancti Job assequi possem, & constantiam Sanctorum Martyrum.

14. Utinam dignus essem, martyrium pro te subire, Domine, virtus mea, & firmamentum meum. Utinam pro te vivus comburer: utinam affari cum Laurentio mererer!

15. Da mihi Domine disciplinam, ut non auferas misericordiam; cæde contumacem, ut reddas mihi promissam hæreditatem. Auge tormenta, sed auge & patientiam.

Actus

Actus Humilitatis.

1. **O** Gemma pretiosissima humilitatis! quando te possidebo? quando tranquillitatem animorum tibi obsequentium habebō? quando tuo splendore & pulchritudine ornatus ero?

2. Noverim te, noverim me, Deus meus, quoniam in te sunt omnia bona mea, & ex me nihil sum.

3. Hoc ex corde desidero bone JESU, hoc eligo, abjectus esse, & pusillus in domo mea, magis quàm habitare in tabernaculis peccatorum.

4. Nolo Domine, ut me homines laudent & honorent, quia omni laude & honore indignissimus sum, volo autem ad gloriam tuam despici, conculcari, & tanquàm canis mortuus, vilissimus reputari.

5. Latrones ipsi, & sacrilegi, ô misericordissime Domine! perfectiùs tibi famularentur, si tot beneficijs eos, ac donis cumulasses, quibus me benignissimè affecisti.

6. Peccavi Domine, & non sum dignus

gnus aspicere altitudinem cæli præ
multitudine iniquitatum mearum.

7. Omnia animalia pro captu suo
tibi Domine appropinquant, solus ego
infinita vitæ meæ turpitudine à te
recedo.

8. Unde mihi hæc insania DEUS
meus, ut audeam gloriari tot peccato-
rum reus, ob quæ potes hoc momen-
to mittere me in gehennam?

9. Abijcio me Domine propter te
infra homines universos, quia vilior,
& contemptibilior omnibus sum, ac
pro tali haberi, & tractari semper de-
sidero.

10. Nihil aliud volo, nihil opto
Altissime DEUS, nisi pati, & contemni
pro te, da mihi claram, & veram mei
notitiam.

11. Indignus sum Domine omnibus
donis tuis ob vilitatem, & ingratitude-
nem meam, indignus consortio homi-
num propter sordes culparum mea-
rum, quarum pessima tabe, vel àërem
ipsum inficio.

12. Utinam universi homines æquissime DEUS miseriam meam agnoscerent, & despicerent me, ac meam mihi indignitatem exprobrarent, ut spernerer propter te.

13. Domine non sum dignus calcare hoc pavementum, per quod transeunt tot servi tui, quibus comparatus vermis sum, & non homo, opprobrium hominum, & abjectio plebis.

14. Absit à me Domine, ut velim ambulare in magnis, & in mirabilibus super me. Magna enim est abyssus fragilitatis, & nihili mei, nihil sum, nihil possum sinè te.

15. Fac me DEUS tanquàm pavementum mundi, ut ab omnibus conculcer, & indignissimè tracter, quia sic exigunt peccata mea.

FASCICVLVS
ASPIRATIONUM
Ad JESVM,
Ad B. VIRGINEM,
& ad Sanctos.

TAmetsi Oratio, ut est actus Religionis cultum latriæ continens, ad solum Deum fundenda sit, tanquàm ad primarium auctorem boni, qui illud per seipsum nobis conferre potest, certum est tamen ex fide Catholica posse nos, & debere, Angelos etiam, & sanctos homines cum Deo regnantes humiliter exorare, opemq; illorum devotis aspirationibus implorare: Licet enim Christus sit principium universale totius meriti, mediator Dei & hominum, qui semper interpellat pro nobis, alijs tamen mediatoribus indigemus, qui pro nostris necessitatibus efficaciter intercedant. Notissima est sententia Eliphaz Themanitis ad patientissimum Iob: Voca, si est, qui tibi respondeat, & ad aliquem

Sanctorū convertere. Ideo operæ pretium me facturum existimaui, si huic lucubrationi caput istud attexerem, quo varias aspirationes breviter digessi ad IESVM Redemptorem, à quo primitus omnia bona speranda, tum ad Virginem Beatissimam ejus Genitricem, deinde ad Angelos, & reliquos Cives celestis Patriæ, ut ipsi nobis quidquid ad salutem, & perfectionem necessarium est, suis precibus obtineant pro sua in nos pietate, & apud DEVM autoritate.

Ad IESVM Redemptorem.

1. **J**ESU Sapiencia Patris, da mihi quæ
 Irere & sapere quæ sursum sunt,
 ut gustem quàm suavis es Domine.
2. JESU Verbum Patris, utinam audiam quid loquaris ad me.
3. JESU Redemptor, esto mihi in Deum protectorem, & in domum refugij, ut saluum me facias.
4. JESU Frater Primogenite, fac me tibi cohæredem in domo Patris nostri.

5. JESU Fili Dei, qui pro me factus es Homo, non sit mihi grave humiliari propter te.

6. JESU Creator meus, cor mundum in me crea, & spiritum rectum innova in visceribus meis.

7. JESU vita mea, tibi soli vivat anima mea, nam mihi vivere tu es, & mori lucrum.

8. JESU Domine mi, posside me servum tuum, & nemo præter te.

9. JESU Præceptor, doce me facere voluntatem tuam, ut discam à te, quia mitis es, & humilis corde.

10. JESU lux mundi, illumina oculos meos, & deduc me in semitas mandatorum tuorum.

11. JESU fons vitæ, sitivit in te anima mea, fac me haurire aquas in gaudio de fontibus tuis.

12. JESU Pastor bone, propter Nomen tuum deduces me, & enutries me.

13. JESU Salvator, salva me, qui venisti quærere, & salvum facere, quod perierat.

14. JESU sponse sanguinum, despon-

sa te mihi in misericordia, & miserationibus.

15. JESU amator speciosissime, trahere me post te, in funiculis charitatis.

16. JESU zelator animarum, cujus deliciae, esse cum filiis hominum, amem te ardentissimo amore, & cætera omnia propter te.

17. JESU Panis vitæ, anima mea sustinet te, nè dimitte eam jejunam, ut non deficiat in via.

18. JESU Judex misericors, qui non venisti perdere quemquam, parce mihi, & responde pro me indignissimo peccatore.

19. JESU corona, & merces nostra magna nimis, jube me venire inter Electos tuos.

20. JESU gloria mea, cupio dissolvi & esse tecum, da mihi vivere in te, & in te mori.

Ad

Ad Beatam Mariam Virginem.

1. **P**rotege me dulcissima Virgo Maria sub umbra alarum tuarum, & non recedat in æternum mellifluum Nomen tuum, ab ore, & corde meo.

2. Nè unquàm elongeris à me potentissima Mater Dei, quia circumdederunt me undiq; inimici mei.

3. Quid possum sinè te Virgo Beata, aut quid fiet de me, si averteris faciem tuam à me.

4. Quando venies dulcissima Virgo, quando apparebis indignissimo servulo tuo.

5. Spiritus tuus ô Maria super mel dulcis, & possessio amoris tui super aurum & topazion.

6. Sentiat anima mea suavitatem amoris tui, & in tuis semper versetur laudibus, quia unica post Deum consolatio mea es tu.

7. Compatere Domina animæ meæ
ad

ad te suspiranti, respice in me, & festina in adiutorium meum.

8. Da mihi gratiam tuam, ut semper de te gaudeam, & post illud exilium te contempler in gloria.

9. Sicut Filius ad sinum Matris, ita suspirat ad te anima mea, nè despicias me Mater gratiæ, & misericordiæ.

10. Quantum desidero videre vultum tuum speciosissima Virgo, assume me velociter ad te, & comple desiderium meum.

11. Quis non diligeret te Regina cordium, & Mater sancti amoris, quis non diliget te? Utinam omnes creaturæ tibi serviant, & in amore tuo vivant, & moriantur.

12. Suscipe cor meum dilectissima Mater mea, & offer illud purissimis manibus tuis, purissimo Filio tuo.

13. Gaudeo, & exulto Beata Virgo, quòd Deus te amet super omnia opera sua, & de hac re super omnia delector: magisq; optarem inferni pœnas, quàm ut momenti spatio quidquid de gloria, & dignitate tua minuatur.

14. Sperant in te, qui noverunt Nomen tuum gloriosa Virgo, quoniam non derelinquis unquam sperantes in te.

15. Gloriosus vultus tuus, mihi appareat in extremis, & consolatio tua lætificet egredientem spiritum meum Clementissima Mater.

Ad Sanctos Angelos

1. **A** Ngele Sancte, vitæ meæ gubernator & Custos, apprehende arma & scutum, & exurge in adiutorium mihi.

2. Custodi me sub umbra alarum tuarum ab insidijs inimici, & ab omni periculo, & tentatione.

3. Adesto mihi Beatissime Spiritus, doce, dirige, & protege me: cumque finis vitæ meæ advenerit, in extrema lucta versanti benignè succurrere velis.

4. Septem Spiritus, qui astatitis ante Dominum, purgate, illuminate, & perficite me, & dirigite omnia studia, & actiones meas ad gloriam Dei, & animæ meæ salutem.

5. Esto-

5. Estote mihi singulare solatium in morte Angeli Dei potentes virtute, qui estis in vita singulare mihi præsidium.

6. Infundite menti meæ Deificum lumen, ut absumpta omni materia totus ardeam divino amore.

7. Venite in adjutorium meum cælestis militiæ exercitus innumerabiles, & defendite me ab incurſu malignorum spirituum.

8. O supremi amatores Dei! succendite me illo igne, quem Dominus JESUS misit in terram, & voluit vehementer accendi.

9. Fontes sapientiæ pascite me cælesti doctrina, & docete me scientiam Sanctorum.

10. Facite me mentes purissimæ docilem Dei, ut discam justificationes ejus, & discussis tenebris divinum lumen inserite menti meæ.

Ad Omnes Sanctos.

1. **F**ELICES Sancti, qui jam nostræ mortalitatis pelagus pertransistis securi
de

de vestra immarcescibili gloria, solliciti estote de mea multiplici miseria.

2. Date manus infirmo cælestis Patriæ Cives, & erigite jacentem, ut convalescens de infirmitate, fortis efficiar in bello.

3. Eripite me de aquis multis, & limo profundi, fufis precibus ad eum, qui dominatur potestati maris.

4. Impetrate mihi fidem & perseverantiam, servire Domino in timore, & servare omnia mandata ejus.

5. Clamo ad vos potentissimi protectores salutis meæ, mittite è patria felicitatis pauculas guttas pretiosissimi vini charitatis vestræ, quia aruit sicut testa virtus mea, & defecit præ siti anima mea.

6. Subvenite mihi misero peccatori sedenti in tenebris, & in umbra mortis, & solvite vincula captivitatis meæ.

7. Liberate me à tumultuantium affectionum turba, ut sedeam solitarius, & taceam, & audiam vocem Domini loquentis in silentio ad cor meum.

8. Elevate me ab hac sordida terra,
ut

ut mihi mundus crucifixus sit, & ego mundo.

9. Ad me respicite gens illustrissima, & hæreditas summi Dei, adhuc peregrinantem in hoc exilio, & mitte de cælo opem, & consolationem.

10. Circumdate me gaudentem, & exultantem de vestra beatitudine, & gratiam impetrate virtutes vestras imitandi, ut vestris adjutus suffragijs, particeps fiam vestri gaudij, & coronæ.

ASPIRATIONES

Ex nominibus Dei, ejusq;
attributis, & perfectionibus.

Qui magna mentis adepta puritate ad unionem cum Deo aspirare jam digni sunt, præter affectus quos pro perfectis supra descripsimus, alios elicere possunt ex Divinorum attributorum contemplatione. Ad hos enim pertinent Dei verba per os Prophetæ dicen-

dicentis. Vacate, & videte, quoniam ego sum DEVS. Vacate, inquit, ab inutilibus cogitationibus, ab affectibus, & desiderijs terrenis, & videte oculo fidei ac contemplationis, quoniam ego sum DEVS omnipotens, immensus, infinitus. Recte Sapiens. Nossē DEVM, consummata iustitia est, & scire virtutem ejus, radix est immortalitatis. Si tamen ad cognitionem accedat amor; parum enim proderit nuda Dei speculatio, nisi simul voluntas ad eum assurgeret p̃ijs affectibus, & motibus Anagogicis. Id qualiter fieri debeat, sequentibus aspirationibus breviter indicatur, ut qui Theologica Dei notitia imbuti sunt, dicant cum Apostolo. Conversatio nostra in cælis est.

DECAS I.

1. **A** Peri Domine oculos animæ meæ
ut non contenti aspectu rerum
temporalium, quas percipiunt sensus,
ascendant ad æterna contemplanda, quæ
non videntur, teq; aspiciant Deum in-
visibilem, qui es in omnibus, & super
omnia.

2. De-

2. DEUS immensæ Majestatis verè mirabilis facta est scientia ex me, omnia tamen ossa mea, omnia membra, sensus, & potentiæ dicunt, quia tu es Deus, & non est similis tibi. Tu es meum esse, & mea vita, & gaudeo, quia te plùs quàm me diligere debeo.

3. O si omnia membra mea! omnes sensus, & fibræ verterentur in lingvas, ut hoc prædicarent toti mundo, quia tu solus es, qui es, ac propterea, omnes gentes, te laudarent, & glorificarent. O si te omnes agnoscerent! & diligerent, plùsquàm vitam suam, quia omnes in te vivunt, moventur, & sunt.

4. O pelagus omnis essentiae! & existentiae, tu es ipsummet esse, omne esse continens, à te omnia pendent, & effluunt, & in te refluunt, & eatenus sunt, quatenus aliquid tui esse participant. Me igitur despiciam, & omnia quæ non sunt, te autem amabo, & tibi adhærebo, qui solus es.

5. DEUS perfectissime, & causa omnium entium, perfice gratiâ tuâ esse, quod mihi dedisti, ut perfectum sit, quia ex me ipso nihil sum.

6. O substantia simplicissima! quæ omnia es, quàm intimè te diligere, & super omnia æstimare debeo! Tu nihil de temporibus, nihil de locis, nihil de rebus trahis. Non partibus constas ut corpus: non affectibus distas ut anima: non formis substas, ut omne quod factum est. Fac me æmulari simplicitatem tuam, ut in omnibus simplex, & purus sim, te solum quærens, & desiderans.

7. Tu solus impeccabilis es, tu solus habes immortalitatem. Per hanc te oro ut moriar morte justorum, & à morte peccati semper eripiar.

8. Clarifica Domine mentem meam ut cognoscam illud esse, quod tu habes per tuam essentiam, & illud non esse, quod ego habeo ex meipso, ut supra duplicem polum moveatur rota vitæ meæ, donec ad te perveniam.

9. Quàm immensa, & incomprehensibilis est, perfectio tua Domine, cui nihil deest, & à quo omnia, perfectionem accipiunt! sim & ego perfectus, sicut & tu perfectus es. Opera-

T

re in

re in me quod jussisti, & fac me ita perfectum, ut nihil mihi desit.

10. DEUS meus, & omnia, principium meum, & finis ultimus, tu es mihi omnia, quæ concupiscere possum: tu meæ divitiæ, meæ deliciæ, mei honores, & dignitates, ac thesauri infiniti: in te solo, omnia habeo, omnia autem finè te, nihil sunt mihi. Quando veniam ad te, ut in te, omnia habeam.

DECAS II.

1. **I**llumina intellectum meum, perfectissime DEUS, ut in creaturis omnibus te respiciam earum Creatorem, à quo illæ suam perfectionem accipiunt. Purifica affectum, ut in omnibus te amem, & quæram, qui es bonum, & finis omnium.

2. O Dilecte cordis mei, si ita me oblectet pulchritudo, & perfectio creaturarum, cur non potius pulchritudo & perfectio tua, à qua illæ processerunt? Diligam te præ omnibus, qui omnium pulchritudinem, & perfectionem excedis, in infinitum, nec illas diligam

ligam nisi in te, & propter te solum.

3. Tu solus Domine nullum terminum habes: omnes gentes quasi non sint, sic sunt coram te. Tuam igitur infinitatem adoro, & absq; ullo termino te amare desidero.

4. DEUS immense, qui excelsior cælo es, profundior inferno, latior terra, & mari, quia omnia replet, omnia continet, omnia penetras, clarifica internos oculos meos, ut certiùs te videam, quàm si te viderem oculo externo, & corporeo.

5. Rex superne, qui in toto tuo Regno ita es per essentiam, ut totus assistas cuilibet parti, concede mihi, ut totus coram te sim, tibiq; serviam ex toto corde, ex tota mente, ex tota virtute.

6. Domine DEUS, qui in omni loco contemplaris bonos, & malos, accue fidem meam, ut cùm solus sum, me solum non esse considerem, teq; præsentem attendens, nihil faciam tua præsentia indignum.

7. DEUS meus, qui realiter intra

me es, magis intimus mihi, quàm sim ego mihi ipsi, perfice in me hanc conjunctionem, quàm tecum habes, addens perfectissimam unionem gratiæ, & charitatis tuæ, ut unus tecum spiritus efficiar in æternum.

8. DEUS immutabilis, apud quem non est transmutatio, nec vicissitudinis obumbratio, fac me immutabiliter tibi adhærere, ut sicut tu idem ipse es, & anni tui non deficiunt, ita ego in via rectitudinis nunquàm deficiam, & in amore tuo semper idem perseverem.

9. Æterne DEUS principio carens, & fine, fac me despiciere temporalia, quæ caduca sunt, & transitoria, & diligere æterna, quæ semper tecum perdurabunt.

10. Omnes Dij gentium, dæmonia, tu autem Domine solus es DEUS, & non est alius præter te. Propugna causam tuam, & destrue multitudinem idolorum, ut omnes homines in te unum sint, teq; uno ore laudent, & glorificent. Da etiam mihi illud unum, quod solum est necessarium.

DECAS

DECAS III.

1. **D**EUS invisibilis, quando te videbo, non per speculum, & in ænigmate, sed facie ad faciem? O si te cognoscerem! sicut à te cognitus sum, ut sicut tu me amas, ita te amarem! sed quia cognitio obscura & brevis est, te amabo quantum possum, donec te videam, sicut desidero.

2. Incomprehensibilis, & ineffabilis DEUS, gaudeo, quod ipsi Supremi Spiritus in tuo conspectu quasi cæci sint, vincis enim omnem scientiam illorum, nec ulla creatura te nominare sicuti es, aut comprehendere potest. Utinam saltem vires omnes intendam, & applicem ad te diligendum, quandoquidem ad te comprehendedum non sufficio.

3. DEUS vivens, & verus, prima & summa veritas, verax in sermonibus tuis, & fidelis in promissionibus, da mihi obsecro veritatem amare, in veritate ambulare, in te sperare, & credere, & omnem hypocrisim, & duplicitatem detestari.

4. Sancte Sanctorum, DEUS exemplar, & finis totius sanctitatis, fateor, me nullam sanctitatem habere posse, nisi tu dederis, nec in ea persistere, nisi tu conservaveris. Funda me in hac profunda humilitate, ut dignus sim ascendere ad altissimam sanctitatem.

5. O summa suprema & essentialis bonitas DEUS meus, quam poenitet me, quod te derelicto fonte omnium bonorum ad bona fucata, & apparentia me converterim? Mirifica voluntatem meam, ut te unicum, & summum bonum meum quæram, & diligam.

6. Da mihi ô summa bonitas! summum amorem mihi possibilem, ut toto illo te summè amabilem amem. Deberem sanè infinito amore te prosequi, quia infinitè bonus es, sed quia incapax infiniti amoris sum, opto saltem te amare summo conatu mihi possibili.

7. Totus mihi es amabilis Dilecte mi, quia totum est bonum, quidquid est in te. Aufer ab anima mea omne genus culpæ, & maculæ, ut tota sit pulchra in oculis tuis, & amabilis cordi tuo.

8. Nè

8. Nè permittas bonitas infinita ullum esse hominem, qui te non amet: aperi oculos odientium te, si enim viva fide te cognoscerent, nunquam odissent.

9. Mirabilis es Domine in teipso, mirabilis in operibus tuis, mirabilis in Sanctis tuis: Tu facis mirabilia magna solus. Te igitur intellectus meus rerum novarum, & mirabilium indagator semper consideret, reliqua omnia tanquam vilia, & communia rejiciat.

10. Cor meum, & caro mea, exultaverunt in Deum vivum, licet enim horrendum sit incidere in manus tuas, tamen es Deus vivens, & vita ad misericordiam.

DECAS IV.

1. **D**EUS scientiarum, & totius sapientiae fons, qui omnia nosti, & nihil est absconditum ab oculis tuis: ecce colloco me in infimo loco mei nihili, & meae omnimodae ignorantiae, precorq; humiliter, ut tribuas mihi nosse teipsum, & voluntatem tuam, &

hæc cognitio sufficit mihi adjuvante me gratiâ tuâ, ut te cognitum diligam, & faciam, quod à me requiris.

2. Domine, discretor cogitationum, & intentionum cordis, in cujus conspectu nulla est creatura invisibilis; utinam noscas me ex nomine, ut me cognitum, & tuæ providentiæ subjectum sciens, omnem mei curam, & sollicitudinem in te projiciam.

3. O altitudo divitiarum sapientiæ & scientiæ Dei, quàm incomprehensibilia sunt judicia tua, & investigabiles viæ tuæ. Incerta, & occulta hujus admirabilis sapientiæ veneror & adoro, ejusq; justissimæ dispositioni me prorsus committo.

4. Emitte Domine sapientiam tuam à sede magnitudinis tuæ, ut mecum sit, & mecum laboret, ut sciam quid acceptum sit coram te omni tempore: præcedat illa omnia opera mea, comitetur me in omnibus, quæ fecero, ac eò deducat, ubi clarè te videam.

5. rerum omnium summe artifex
DEUS, qui omnia disposuisti in numero pon-

ro, pondere, & mensura, juxta exemplar in mente tua præexistens: fac me ita perfectum, ut ideam veræ perfectionis in te existentem quantum fieri potest imiter, & exprimam in me ipso.

6. Lux beatissima DEUS, & lumen cordium, qui lucem habitas inaccessibleem, & illuminas omnem hominem venientem in hunc mundum, emitte lucem tuam à montibus æternis, & splendoribus Sanctorum, illumina cor meum, ut verbo, & exemplo cunctis præluceam.

7. DEUS qui revelas abscondita, & vides in tenebris constituta, da mihi abyssum judiciorum tuorum timere, & venerari, tuamq; voluntatem in præceptis, & consilijs tuis revelatam semper agnoscere, & strenuè perficere, cætera verò, quæ ad me non pertinent, nequaquam perscrutari.

8. Ostende mihi DEUS magnitudinem amoris tui, ut eo cognito vehementer admirer, & secundum parvitatem meam tantæ dignationis vicem rependam.

9. Gratias tibi ago amantissime DEUS, quia ab æterno dilexisti me, & ex mera gratia tua voluisti, ut essem, & ut talis essem: Fateor impossibile esse, ut eo modo te diligam, quo tu me: possum enim tibi bene velle, sed non aliquid dare tibi, quo tu careas. Do nihilominus tibi, quod ipse mihi largitus es, serviens tibi, & pro omnibus gratias agens: quod verò tibi dare nequeo, dabo proximis meis amore tui.

10. Quàm admirabilis est amor tuus erga hominem; DEUS meus, propter quem tot creaturas in sua natura perfectas condidisti? O si tot haberem corda! quot illæ sunt, ut illis omnibus earum nomine te diligerem, & glorificarem, reddens tibi debitum, quod illæ nequeunt, & cujus ego illarum causâ debitor sum.

DECAS V.

1. **A** Mator sempiternæ, qui nunquàm cessas amare, & cum amore operari, nam si cessares, omnia desinerent esse, concede mihi, ut nunquàm cessem
ama-

amare, aut propter amorem tuum operari, si enim charitatem non habuero, nihil sum.

2. Diligam te toto corde DEUS meus, & omnem amorem meum in te uno collocabo, quia tu Pater meus es, tu frater, tu sponsus, tu amicus, & benefactor in æternum.

3. Dulcissime DEUS, amabilis super omnia, quæ cogitari possunt; magnum fuit beneficium, quod me ad imaginem & similitudinem tuam condideris, sed infinita charitas tua adhuc me voluit ad altiore similitudinem elevare per gratiam & charitatem, ut non solum servus, sed amicus tuus essem. Utinam hæc amicitia ex parte mea perfecta sit, sicut ex tua est perfectissima.

4. Utinam semper te dilexissem superoptime DEUS, ex quo sum homo, quia tu me dilexisti, ex quo es DEUS. Nè differas anima mea Deum diligere, ama amorem ab æterno te diligentem.

5. Quàm immensa est charitas tua æterne DEUS, qui solem tuum oriri facis super bonos & malos? Occlude

si fieri potest januas inferni, ut nemo eò descendat, ubi omnes te oderunt: aperi portas cæli, ut omnes eò conscendant, ubi omnes te diligunt.

6. O altitudo bonitatis Dei! ô amor ineffabilis! qui ut perfectam cum homine amicitiam contraheres, illum ad Dei æqualitatem sublimâsti! quas tibi referam gratias pro tam eximio beneficio? Laudet te ipsamet charitas tua, & benedicant opera, quæ ab illa proveniunt.

7. Exulto Domine, cum lego in scripturis tuis, quia tu charitas es. Quid enim dulcius, quid lætius audiri potest? Da igitur mihi teipsum, da charitatem tuam. Diligam te, sicut vis diligi, & da quod jubes, ut implere possim, quod desideras.

8. DEUS fortis, & zelotes æmulator, qui ob nimium erga me amorem zelo zelaris, nè amorem tibi debitum alteri tribuam: accendatur velut ignis zelus tuus, nec me unquam permittas ab amore tuo declinare.

9. Amator ardentissime, cujus amor
transit

transit in zelum, comedat me zelus gloriæ tuæ, & ad eam propagandam semper impellat.

10. DEUS author pacis, & amator, aufer à zelo meo omnem perturbationem, ut similis sim zelo tuo, pacificus, discretus, secundum scientiam. Tu es enim Princeps pacis; & Ecclesiam tuam fundasti in pulchritudine pacis: omnia in pace, & tranquillitate disponis, & factus est in pace locus tuus.

DECAS VI.

1. **M**isericors, miserator Domine, longanimis, & multum misericors, cui proprium est misereri semper & parcere; mirifica super me misericordiam tuam, & secundum multitudinem miserationum tuarum dele omnes iniquitates meas.

2. Præveniat me misericordia tua Domine, subsequatur omnibus diebus vitæ meæ, ut liber sim ab omni miseria animæ & corporis. Veniant mihi miserationes tuæ, & vivam, & cantabo in æternum, quia tu es DEUS, vita mea, & misericordia mea.

3. Justus es Domine, & rectum judicium tuum, justitia plena est dextera tua: Millies pro hac te laudo, precorqué, ut non intres in judicium cum servo tuo, quia non justificabitur coram te omnis vivens.

4. Justissime Judex, qui scrutaris Hierusalem in lucernis, & judicas æquitatem, vide, si via iniquitatis in me est, & deduc me in via æterna. *Vlciscere hîc, & in æternitate.* Libera me nunc ab omni peccato, ut in judicio tuo ab ultione liber evadam.

5. Fortissime DEUS, in quo omnia, & sinè quo nihil possum, vide infirmitatem meam, & laborem meum, & roboram me virtute tua, ut meipsum vincam, & omnia, quæ virtuti adversantur.

6. Scio Domine, quia tu es DEUS clemens, & benignus, & infinitæ patientiæ, qui dissimulas peccata hominum propter poenitentiam: suscipe me itaq; revertentem ad te, & præsta, ut patientia tua non abutar.

7. Verè tu Domine suavis es, &
mitis,

mitis, & multæ misericordiæ omnibus invocantibus te: quare precor, ut corripas me in mansuetudine, & suavitate tua, non autem in furore tuo, nè fortè ad nihilum redigas me.

8. Magnus es Domine, & laudabilis nimis, terribilis super omnes Deos, benedicant te omnia opera tua, cælum, & terra, & quidquid in eis continetur.

9. Quidquid eveniat mihi Domine, semper laus tua erit in ore meo. Lingua autem deficiente, omnis respiratio mea sit laudis tuæ significatio. Corpore verò extincto, & in pulverem redacto, laudes tibi infinitas dicant, minutissima quæq; pulveris grana usq; ad extremum judicij diem.

10. Universa propter temetipsum operatus es Domine, tu finis omnium rerum, & non est alius ultimus finis præter te. Verè fecisti nos ad te, & inquietum est cor nostrum, donec requiescat in te: Tu es Civitas, ad quam tendimus, tu portus, ad quem navigamus, tu magnes cordis nostri. Trahe nos igitur ad te ab hoc durissimo exilio, ab hoc mari procelloso. DE-

DECAS VII.

1. **T**erribilis es Domine, & magnus vehementer, & mirabilis potentia tua, fecisti enim omnia, quæ voluisti in cælo, & in terra, quia subest tibi, cum volueris, posse: imò plura infinites facere potes, quàm vel cogitatione ego assequi valeam. Robora impotentiam meam, omnipotentia tua, quia finè te nihil facere possum, & tu omnia operaris in me.

2. **DEUS** liberalissime, gratias ago tibi ob tot insignia opera tuæ infinitæ liberalitatis, concede, ut sim liberalis in reddendo tibi, quod à te larga manu accipio.

3. Offero tibi cor meum, suscipe illud Domine, quia melius, & securius apud te erit, quàm apud me.

4. **O DEUS** omnipotens! qui totam terræ molem appendis, nulli rei extra innixus, oro, ut mihi nihilum meum verè agnoscenti, tu solus mea sis firmitas, & in te segura sit virtus mea.

5. Benignissime Pater, cujus providentia

dentia in sui dispositione non fallitur, dirige omnes actiones meas in finem à te destinatum, quia in manibus tuis sortes meæ, & ijs me totaliter committo.

6. Amantissime Creator, qui admiranda providentia singulis prospicis creaturis, & mihi ab æterno bona præparasti quibus nunc fruor, fac me ita transire per bona temporalia, ut non amittam æterna.

7. Respexisti me DEUS ante mundi constitutionem, & dilexisti me antequàm quidquàm boni vel mali facerem, & ex mera tua bonitate elegisti me in Christianum, ut sequar vestigia tua. Et nunc Domine gratias ago tibi pro tam insigni beneficio, precorq; ut des mihi per bona opera certam facere vocationem meam.

8. Manus tuæ Domine fecerunt me, & plasmaverunt me, da mihi intellectum, ut discam mandata tua. Et sicut esse quod habeo dedisti mihi, ita etiam da perfectionem, quâ careo, ut opus tuum sit omni ex parte perfectum.

9. O Sapiencia Divina! quæ ex ore Altissimi prodijsti, primogenita ante omnem creaturam, quæ effecisti in cælis, ut oriretur lumen indeficiens, largire mihi partem aliquam tuæ lucis, quæ indeficiens in me permaneat.

10. Æterna Sapiencia, cujus deliciae creare filios hominum, & esse cum illis, quandoquidem me creâsti conversationis tuæ, & boni infiniti capacem, nè vacuum esse permittas hanc in me capacitatem, sed age mecum familiariter, & imple me teipsâ, quia tu sola sufficis mihi.

DECAS VIII.

1. **P**ater misericordiarum, qui Electos tuos prædestinasti conformes fieri imagini Filij tui, ita me illi conforma in sanctitate, ut cùm apparuerit, ei similis sim in gloria.

2. Benefactor immense, dator, & conservator omnium bonorum, qui omnia quæ fecisti, continua quadam creatione conservas, & ad omnes actiones nostras semper concurras, conserva

va me, quoniam in te speravi, & fac me semper operari, quod tibi placet, ut concursus tuus in meum commodum semper cedat, & ad maiorem nominis tui gloriam.

3. Rege me Domine, & gubername, nè quæso ego me ipsum regam, nec me gubernet mundus, aut caro, tu enim sollicitus es de me, meiꝑ; curam sapientissimè geris, ac si ego solus essem in mundo, qui tamen omnium sum miserimus.

4. Submitto me Domine providentiæ, & dispositioni tuæ in tempore, & in æternitate, in te projicio omnem sollicitudinem meam, quia non derelinquis diligentes te: & si quæsiêro regnum Dei, & justitiam ejus, cætera omnia adjicientur mihi.

5. Gratias ago tibi bonum infinitum, quia ex malis nostris bona deducis, & permittis nostram miseriam, ut magis eniteat misericordia tua: Ostende quæso in me hujusmodi providentiam, ut omnia mala mihi còoperentur semper in bonum.

6. O suavissima Dei providentia! quid amplius facere potuisti? sic nimirum dilexisti mundum, ut Filium tuum Unigenitum dares, Filium, inquam, tuum, ut servum redimeres tradidisti. Applica nunc mihi tam copiosæ redemptionis fructus, ut per gratiam tuam redemptus te fruar semper in gloria.

7. Esto mihi dulcissime JESU sapientia, justitia, sanctificatio, & redemptio; applicans mihi efficaciter pretium sanguinis tui, quem pro omnibus effudisti.

8. Tibi gratias ago amantissime Pater, quia me vocasti vocatione tua sancta ad fidem tuam, & statim natum per Baptismum regenerasti, à te autem aversum miris modis, ad te pertraxisti, & gratia tua justificasti. Nisi enim tua inspiratio me prævenisset immeritum jam meritis pro sceleribus pœnis afficerer.

9. Domine Dominus noster, quàm admirabile est nomen tuum in universa terra! Mirabilis enim fuisti in creatione, mirabilis in redemptione, sed multò mi-

tò mirabilior in convivio, quod parâsti nobis in dulcedine tua, in quo anima nostra Redemptoris nostri Carnem manducat, & sanguinem bibit. Utinam mihi placeat hac salutari mensa refectò dicere cum Apostolo. Vivo ego, jam non ego, vivit verò in me Christus.

10. Pastor Supreme salva me ex ore leonum, & luporum infernalium, quia parâsti in conspectu meo hanc mensam cælestem adversus eos, qui tribulant me.

DECAS IX.

1. **O** Fons bonitatis DEUS animæ meæ! quis sum ego, & quæ domus mea, ut me vocare dignatus sis ad te.

2. Gratias tibi ago, quod me in servum tuum elegeris, multis alijs relictis, qui me digniores erant. Da mihi sequi vestigia tua, & quod docuisti semper implere.

3. Adveniat Regnum tuum Rex semperiternæ, Regnum æternum, quod præparâsti diligentibus te: Ostende mihi

U 3

bona,

bona, quæ promissisti, & ita me excita ad illa procuranda, ut ea tandem obtineam.

4. Quàm dilecta tabernacula tua Domine virtutum! concupiscit, & præ magnitudine desiderij deficit anima mea, dum cogitat de atrijs tuis. O quando veniam! ut in ijs habitem, & tanta fruar pulchritudine.

5. Multa scio de te Domine, sed nescio quid dicam. Quidquid enim dixerò, quidquid cogitavero, finitum est, tu autem immensus es, & incomprehensibilis, & magnitudinis tuæ non est finis.

6. DEUS infinite, qui es trinus in personis, sed unus in essentia, & ita Divinitatem communicas, ut unitas non lædatur, communica mihi copiosam gratiam, ut sim tecum unus charitate perfecta.

7. Sancte Sanctorum Deus Spirituum, & universæ carnis, à cujus conspectu tremit cælum, & terra, omni, quæ valeo virtute, te benedico, quia per Ecclesiæ tuæ Sanctæ documenta in fide tua confirmasti me.

8. Te

8. Te invoco Beata TRINITAS, ut venias in me, & templum dignum gloriæ tuæ efficias me. Perfice me Deus, qui plasmâsti me usq; ad plenam formam imaginis, & similitudinis tuæ, ad quam fecisti me.

9. DEUS immense, à quo omnia, per quem omnia, in quo omnia facta sunt, custodi me opus manuum tuarum in te sperantem, & in tua solummodo misericordia confidentem.

10. Domine qui dixisti: Non videbit me homo, & vivet, moriar, ut te videam. Hæc est enim vita æterna, ut te Patrem, & Filium, & Spiritum Sanctum, unum, verum, & solum DEUM cognoscam, & amem, in sæcula sæculorum. Amen.

DECAS X.

1. **P**ater immensæ Majestatis, principium absq; principio, qui à nullo procedis; gaudeo quòd intra te ipsum Verbum tuum æternum concipias, Filiumq; generes, adeò tibi similem, ut sit unum, & idem tecum.

2. Pater cælestis, à quo omnis Paternitas in cælo, & in terra nominatur, obsecro te per Filium tuum Unigenitum, in quo tantoperè delectaris, ut multos alios gignas filios per gratiam adoptionis, ut Paternitas tua ubiq; dilatetur, & resplendeat.

3. Pater ingenite, innascibilis, improducibilis, fons Deitatis, ac totius entitatis origo, sanctifica me in veritate, ut qui à te processi, in te perpetuò maneam, nec unquam mens mea à te avertatur.

4. Fili Dei unigenite, qui æterna generatione à Patre procedis, ipsi co-æqualis, & consubstantialis, fac me pro modulo meo hujus similitudinis, & æqualitatis, aliqua ex parte participem.

5. Fili Dei, Deus de Deo, lumen de lumine, sapientia increata, candor lucis æternæ, fac me filium lucis in hac vita, ut in æterna lumine gratiæ illustratus videam te gloriosum, & benedictum in sæcula.

6. Splendor Paternæ gloriæ, & figura

ra substantiæ ejus, qui summè dilectus à Patre, ipsumq; Patrem summè diligens, simul cum ipso unica spiratione producis Spiritum Sanctum, emitte lucem tuam, & veritatem tuam, ut splendoribus tuis illustratus cognoscam te, & diligam sicut tu diligis Patrem, & eum perfectè cognoscis.

7. Sancte Spiritus, consolator dulcissime, donum altissimi, & unctio Electorum, da mihi teipsum donum infinitum, ut & ego spiritus sim sicut es tu omnis terrenæ cogitationis expers, & Sanctus sicut tu, curram inoffenso pede viam mandatorum tuorum.

8. Spiritus Patris, à quo accipis Divinitatem, & omnipotentiam, Spiritus Filij, à quo accipis ejusdem sapientiam: Spiritus utriusque, à quibus accipis infinitum amorem, quo te mutuò amant, illabere menti meæ, & fac concordiam in affectibus meis, ut conjungar tibi in uno spiritu, & totus convertar in spiritum amoris.

9. Sanctissime Spiritus, & amor suavissime, charitas essentialis, & totius

charitatis principium, bonitas æterna, à qua omnia bona in nos descendunt, inflamma voluntatem meam ferventissimo tui amore, & adstringe me tibi, ac Patri, & Filio, ut nec intellectu, nec affectu à vobis divellar.

10. Sancta, & adoranda TRINITAS DEUS meus, & omne bonum meum, da teipsum mihi, & sufficiet mihi: quid enim ei sufficiet, cui tu non sufficis.

**Vitam Christi esse
Fontem omniū Bonorum,
quomodò ex ea Pij Affe-
ctus eliciantur.**

Proxioris Voluminis opus foret bona omnia commemorare, quæ ex vita Christi velut ex fonte uberrimo, & nunquam deficiente scaturiunt, & perenniter fluunt. Ipse enim Salvator noster factus est nobis à Deo Sapientia, Iustitia, Redemptio, & Sanctificatio. In ipso habemus divitias salutis, thesaurum meritorum, cumulum perfectionis.

nis. Sicut sol aspectu suo letificat, influit, illuminat, nec unquam cessat operari, ita verus Sol animarum IESVS Christus jugi influxu infundit in nos, & imprimit mores suos, virtutes suas, suam Divinitatem. Vitæ ejus consideratio erigit in adversis, in prosperis reprimit, tollit peccata, conciliat gratiam, excitat ad amorem, juvat incipientes, dirigit proficientes, edocet perfectos. Quemadmodum unguentarij semper olent id, quod attrectant, sic Christianus, qui assidue cum Christo versatur ejus redolet patientiam, charitatem, humilitatem, ceterasq; virtutes, quas vitæ suæ studioso sensim instillat idem Dominus virtutum, cujus doctrina seminarium justitiæ, vita speculum prudentiæ, & temperantiæ, mors exemplum est fortitudinis. Sed quia non sufficit Christi vitam meditari, nisi etiam ex ea pij & devoti affectus eliciantur, hujus praxis hic breviter indicatur, ut auctorem Fidei respicientes eundem salutis nostræ, atq; perfectionis consummatorem habeamus.

DECAS I.

1. **D**omine JESU Christe, concede mihi misero peccatori vitam, & mores tuos præ oculis mentis semper habere, & pro viribus imitari.

2. O charitas infinita! ô admiranda dignatio tua Domine, ut servum redimeres, Filium tradidisti.

3. Vidisti suavissime JESU afflictionem populi tui, & grave onus filiorum Adam, & tactus stimulis charitatis intrinsecus cogitasti super nos cogitationes pacis, & redemptionis. Nam tibi advenit plenitudo temporis, visitasti nos oriens ex alto.

4. DEUS immensæ Majestatis, quid est homo? quòd memor es ejus, aut filius hominis, quoniam visitas eum: Laudent te Angeli tui ob tantum amorem, quo nos miseros prosequeris.

5. Salve dies, tot ætatibus optatata, qua Deus pro nobis factus est homo. Salve Gabriel Archangele tanti gaudij annuntiator. Salve Virgo gloriosa, in cujus castissimo utero carnem nostram assumpsit DEUS.

6. O

6. O quàm potens es Amor! qui ad
tàm infima abijcis Deum! ô quàm Di-
vino diffimilis est Amor meus!

7. Princeps supreme, qui de cælo in
terram pro mea salute descendisti tantò
mihi charior es, quantò pro me factus
es vilior.

8. Verbum incarnatum plenum gra-
tiæ, & veritatis, eadem gratia imple
animam meam, ut tibi placeat.

9. Verbum Divinum, partem ali-
quam largire mihi lucis, & gratiarum,
quas tribuisti assumptæ humanitati:
Deprime cor meum humilitate usq; ad
infimum locum, erige gratitudine, &
amore ad altissimum gradum.

10. Christe Salvator, qui adhuc clau-
sus maternis visceribus ad Præcursores
sanctificandum properâsti, da mihi pec-
catorum veniam, & spiritualement in tuo
obsequio lætitiâ.

DECAS II.

1. JESU amabilissime, qui pro me na-
sci in sordido stabulo voluisti, il-
lumina mentem meam, & voluntatem,
quò

quò tuam nativitatem contemplari valeā, & elucentes in ea virtutes imitari.

2. Cur non ardet cor meum tenerri-
mo tui amore infans formosissime, qui
salutem meam in ipso tui ortu operari
cæpisti.

3. Utinam Nativitati tuæ præsens
adfuisssem, dignusq; habitus, qui te am-
plecterer, & mea tibi obsequia defer-
rem? Accepta Domine hanc volunta-
tem, & præsta, ut quidquid possum, tuo
semper famulatui impendam.

4. O inaudita amoris prodigia! dile-
cti mei cubile stabulum est, desponsa-
tionis meæ thalamus præsepe, lectus
sponsi mei foenum, pulvillus stramen,
aula vilis spelunca.

5. O sanctam Filij Dei paupertatem
omnibus mundi divitijs pretiosiore!
hanc mihi commendabilem tuo exem-
plo reddidisti bone JESU, natus in sta-
bulo pannis involutus, qui cælum stel-
lis, terram floribus adornasti. Infunde
cordi meo ejus amorem, & da patienti
animo ejus molestias perferre.

6. O quantum lugere debeo pro pec-
catis

catis meis pijsſime JESU! quandoquidem tu pro eis ploras. Me enim ablunt vagientis tuæ infantiaæ fletus, mea delicta tuæ deplorant lachrymæ.

7. JESU ſapientiffime, qui tacendo doces, & vagiendo prædicas, doce me in ſilentio humilitatem tuam ſequi, tibiq; conformem fieri infantuli ſimplicitate, & innocentia.

8. Fortunati Paſtores, quibus ante omnes, lapſus è cælo Deus, ſtabuloq; reconditus, Angelica voce nuntiatur.

9. Verè gloria in excelsis Deo, nam cui gloria, niſi tibi Rex gloriæ. Trahe cor meum in excelsa, ut nunquam degenerem ab excelsis cogitationibus filiorum tuorum.

10. Da mihi Salvator dulciſſime, quàm omnibus offers, bonam voluntatem, pacemq; Divinam, ut abjecta mundi inconstantia, & discordia, in beneplacito tuo ſtabilis perſeverem.

DECAS III.

1. **L** Audo te Redemptor mundi, pro prima ſanguinis tui in tenerri-
matate

etate effusione cum tua caro immaculata pœnam circumcisionis, quàm non meruit, sustinuit.

2. O lapsus Adæ! quàm es amarus Domino meo, ego peccavi, & tu Domine pœnam exolvis, ego in concupiscentia conceptus, & natus sum, & tu suscipis in te ultionem.

3. Sponsus sanguinũ tui mihi es, qui cùm voce nondum possis ipso cruore tuo clamas pro me ad Patrem: mihiq; tribuis arrham desponsationis sanguinem tuum, pretiosum super aurum, & topazion.

4. Circumcide Domine omnia membra, & sensus meos spirituali petra, quæ tu ipse es, & quidquid in me repereris carnale, & superfluum abscinde, & extirpa, vitamq; meam disciplinæ tuæ rigore còerce.

5. O dulcissimum nomen JESU! super omne nomen in cælo, & in terra benedictum, esto mihi salus, & redemptio: non enim est aliud nomen hominibus datum, in quo oporteat nos salvos fieri.

6. Esto

6. Esto mihi JESU id, quod diceris. Esto mihi turris fortitudinis à facie inimici. Scribe nomen tuum salutiferum in corde meo, ut mihi maneat semper impressum, donec perducatur in æternam salutem.

7. Glorifico te Deus pro primitijs gentium, & earum admirabili illuminatione, cum eas ab oriente in personarum Magorum ad fidem tuam secreta inspiratione traxisti.

8. Adoro te Rex Regum cum Sanctis Magis, & pro illorum muneribus offero tibi aurum paupertatis, thus obedientiæ, myrrham castitatis.

9. Utinam omnes gentes te fide viva cognoscerent, & adorarent, & tibi fideliter servirent.

10. Da mihi Domine, horum virorum fidem, & constantiam, ut eadem, qua illi perseverantia, te quæram, donec inveniam.

DECAS IV.

1. **V**oluisti Domine præsentari in Templo, & more servorum quin-
W
que

que scilicet redimi, sit benedicta immensa charitas tua. Et quia Pater tuus te mihi tradidit quinque scilicet scilicet scilicet pretio, ego vicissim trado me tibi in servum perpetuum. Fiat per gratiam tuam, ut nec tu me unquam deseras, nec ego te.

2. Benedico te Sanctissime Redemptor, quia ut nobis veræ obedientiæ exemplum relinqueres te legalibus institutis tanquam unus de populo subdidisti, da mihi in omnibus perfectissimam obedientiam.

3. Offero tibi Domine, par turturum, geminam scilicet compunctionem, primo quidem pro peccatis, & negligentijs meis, deinde verò pro æterna felicitate, ad quam jugiter aspiro.

4. Da mihi bone JESU radium aliquem illius lucis, quam Sancto seni Simone tribuisti, cum te infantem in ulnas suas recepit, ut te agnoscam, & amem, sicut ille te novit, & amavit.

5. Sapientissime JESU, qui Sanctæ Genitrici tuæ doloris gladium: quo
trans-

transfigenda erat revelare voluisti, transfige animam meam gladio compunctionis, nè me dissolvant vanæ mundi cogitationes.

6. Vix natus eras Rex amantissime, cùm subito mundus te persequitur, & Rex Herodes statim te quærit, ut perdat te. Sicut autem te caput bonorum persecuti sunt impij, ita & membra tua. Da mihi igitur hanc veritatem agnoscere, & malorum persecutiones patienter ferre.

7. Tecum fugere, & omnia quæ mundi hujus sunt relinquere, grave mihi non erit JESU dulcissime, nam si tu mecum fueris, quid poterit mihi deesse.

8. Comitare fugientem Deum anima mea, nec erubescere ad hanc fugam. Gloriosum est, & dulce pro Deo abijci, & contemni.

9. Adesto mihi Deus gratia tua, ut in hujus vitæ exilio voluntati tuæ subiectus vivam, semper bonum exemplum illis præbens, cum quibus vixero.

10. Dulcis JESU, qui revocatus ab

Ægypto, ubi exul diu fuisti, in Nazareth secessisti, & Nazaræus vocatus es: da mihi leges Nazaræorum spiritualiter observare: abstinere nimirum ab omni amore inordinato, & nihil tangere, quod possit maculare animam meam.

DECAS V.

1. **N**ihil scimus de te, ô Sapiencia Incarnata! usq; ad annum duodecimum ætatis tuæ, & multa scimus. Ipsa enim taciturnitas tua clamat in cordibus nostris, ut silentium tuum, & humilitatem admiremur, & imitemur.

2. Sedisti in medio Doctorum Sapientissime Puer, interrogans prudenter, & respondens modestè, ita ut omnes mirarentur. Utinam illic adfuisset, & sermones tuos audire licuisset. Repete eos Domine in corde meo, ut fructu eorum perfruar in æternum.

3. O quàm dolenter quæsit te amissum Mater tua! quàm lætanter te invenit! Da mihi exemplo tuo in his semper esse, quæ Dei sunt, nulla habitatione cognationis, & sanguinis: &
fac,

fac, ut te absentem sollicitè semper quæram, donec inveniam.

4. Congratulor tibi Beatissima Virgo, quod Dilectissimum tuum invenieris; ora pro me, nè illum unquam amittam, aut ab eo discedam.

5. Proficiebas dulcissime Puer sapientiâ, ætate, & gratiâ apud Deum, & homines, quia majora quotidie edebas virtutis indicia, ego autem proficere opto à remissiore via, ad ferventem, & perfectam. Da tu mihi benedictionem tuam, ut juxta desiderium meum crescam de virtute in virtutem, donec ad gradum supremum perfectionis perveniam.

6. O humilitas Christi! quantum confundis superbiâ, & vanitatē meam! Tu latuisti Domine, & tacuisti usq; ad trigesimum annum, cū esses Sapientia æterna, ego verò stultissimus, cū sim, inaniter loqui præsumo, & apparere. Doceme viam solidioris humilitatis, & tuis semper inhærere vestigijs.

7. Domine JESU, fons bonitatis, &

origo virtutum, qui à Baptismo Joannis prædicationem tuam auspicatus es, quid tibi, & Baptismo isti, cum sis innocentissimus. Utinam superbia mea hoc tam mirabili humilitatis exemplo exterminetur.

8. Rex altissime, qui omnem justitiam sic implere voluisti, baptiza me in igne, & spiritu, & ablue animam meam ab omni sorde iniquitatum.

9. Imple me Domine Spiritu Sancto, ut eo inspirante sequar te in desertum, & secedam ab hominibus, orationi, jejunio, & poenitentiae semper incumbens.

10. Fortissime Athleta JESU Christe, qui strenuè contra diabolum dimicasti, & eum gloriosè superasti: da mihi viriliter contra ipsum decertare, & mitte Sanctos Angelos tuos, qui me fideliter custodiant, potenter adjuvent, & benignè consolentur.

DECAS VI.

1. **C**onfiteor tibi Pater, Domine cæli & terræ, quia redemptionis nostræ

stræ mysteria, abscondisti à sapientibus, & prudentibus hujus sæculi, & parvulis piscatoribus revelasti, ut mundi sapientiam destrueres. Fac me parvulum in oculis meis, ut sim magnus in tuis.

2. Dux Supreme, qui omnes ad te vocas per viam crucis, & abnegationis, gratiam tuam largire mihi, ut Crucem tuam indefessus portem usq; ad mortem meam.

3. Aliam viam Domine tenere nolo, quàm tuam: nec aliam, quàm tuam veritatem amplecti: nec aliam vitam ducere, præter eam, quam tu docuisti. Tu es enim via, veritas, & vita.

4. Gratias ago tibi æterne Pater, quòd talem mihi Magistrum, Legislatorem, & Confiliarium dederis, cujus præcepta, & monita via tutissima salutis sunt.

5. Aperi os meum Salvator mundi, & loquere ad cor meum, quia audit servus tuus desiderans id exequi, quod audièrit.

6. Illumina me splendoribus tuis su-

perne Magister, ut perfectionem agnoscam, quam mihi commendas: igne tuo accende, ut eam amem? potentiâ corrobora, ut eam quæram, & assequar.

7. Salvator Potentissime, qui tot miracula verbo virtutis tuæ patrare dignatus es; innova signa, immuta mirabilia, & animæ meæ langvores sana, eamquæ resuscita à morte vitiorum.

8. Inclyte JESU, lux mundi, salus populi, & gloria nostra, respice propitius infirmitatem meam, nemo enim potest spiritualia vulnera curare, nisi tu, qui solus es Deus.

9. Circuisti vicos, & plateas, dulcissime JESU, ut peccatores converteres, & pœnitentibus indulgentiam conferres. Fac me hujus charitatis tuæ participem, & miserere mei, quoniam iniquitatem meam ego cognosco.

10. Millies te laudo, & benedico JESU Sanctissime, exemplar omnium virtutum, pro vita tua pauperrima, humillima, purissima, patientissima. Tribue mihi miserrimo servo tuo mores tuos sedulò meditari, & ad eorum

nor-

normam omnes actus, sermones, & gestus meos efformare.

DECAS VII.

1. **Q**uàm immensa fuit charitas tua Benignissime Redemptor, quia non solum pro salute mea vitam ærumnosam ducere, sed eam insuper acerbissima Passione, & morte claudere voluisti. O quàm gravia sunt peccata mea! quæ talem poscebant satisfactionem.

2. Clementissime Pater, per passionem, & mortem Unigeniti tui, ignosce peccatis famuli tui. Suscipe sacrificium Filij tui, & obliviscere nequitiarum servi tui; multo enim plura ille solvit, quàm sit delictum meum.

3. O Passio Christi desiderabilis! ô amabilis mors! sana vulnera mea, & vivifica me, inflamma pectus meum, ut præ amore lique scat.

4. Non peto mundi divitias, sed tuas angustias Domine JESU, non carnis delicias, sed tuos dolores & flagella.

5. Rogo te dulcis JESU, nè finas unquam me oblivisci mortis & passionis
W 5 tua,

tuæ, sed præsta, ut in ea mihi sit requies, & accessus ad Divinitatem tuam.

6. Omnia vulnera tua Domine inscribe cordi meo, ut tu solus, tuaque Passio in eo legantur. Intra vulnera tua absconde me.

7. Domine JESU, qui nos sic amasti, ut tibi non parceres, veni, & nè differas vulnerare cor meum, ut solum tua vulnera sentiam, & in ijs jugiter maneam, & requiescam.

8. Tui sudores semper occupent petus meum, ut eorum memor dicam cum sponsa: Fasciculus myrrhæ Dilectus meus mihi inter ubera mea comorabitur.

9. Dulcis JESU, qui tanto fervore, & festinatione in Hierusalem ascendisti, ut durissimam mortem pro me patereris, fac me alacrem, & ferventem ad omnia quæcumq; volueris pro te sustinenda.

10. Salvator mundi, qui à perduto Discipulo venditus fuisti, nè quæso permittas, ut pro vili pretio rerum terrenarum te summum bonum meum vendam, & derelinquam.

DECAS

DECAS VIII.

1. **H**umillime JESU, qui servili obsequio lavisti pedes Discipulorum tuorum, amplius lava me ab iniquitate mea, & à spiritu superbix libera me.

2. O dilecte cordis mei! qui imminente Passione tua perpetui amoris tui pignus immensum reliquisti nobis, corpus tuum scilicet in cibum, & sanguinem in potum, præpara me ad hoc convivium, & orna animam meam virtutibus sanctis.

3. O Rex sempiternæ! qui nutris sanguine tuo populum tuum, ut simus omnes de Regio tuo sanguine genus electum, gens sancta. Fac me agnoscere genus meum, & de eo gloriari, & à moribus tuis nunquam degenerem esse.

4. Ut Passio tua sit acerbior Amabilissime JESU, omnem lætitiâ à te procul abjecisti, incipiens pavere, contristari, & mæstus esse: & ubi dolor meus in causa tua, & mea? Fac me semper memorem tristitiæ tuæ, ut omnem angustiam

gustiam quacumq; ex causa mihi advenientem pro tui nominis gloria libenter patiar.

5. O lætitia Angelorum! qui in tristitia tua ad orationis remedium fugisti, concede mihi misero, ut ablacter à lacte, & avellar ab uberibus humanarum consolationum, meq; totum orationi applicem, in qua sanctissimam voluntatem tuam & agnosca, & exequar.

6. Transeat à te Domine ad me calix tuus, omnis enim amaritudo pro te degustata, erit mihi jucundissima.

7. Quis mihi det dolores tuos ita sentire afflictissime JESU, ut vel eorum cogitatio sanguineum à me sudorem eliciat? Adjuva me gratiâ tuâ, ut voti hujus compos efficiar.

8. Laudo, & glorifico te mitissime JESU, pro tua ineffabili mansuetudine, quam ostendisti, à perfido Discipulo osculo traditus, & ab impijs comprehensus atq; ligatus: da mihi hunc spiritum lenitatis, quò erga meipsum severus sim, & erga proximum mansuetus.

9. Quàm celeriter ire cogeris à tuis hostibus raptus dulcissime JESU, sed multò magis à tua charitate, nè quæso patiaris, ut à te alacriter sequendo delistam, etiamsi multi labores, & dolores subeundi sint.

10. JESU innocentissime, qui per diversa tribunalia crudeliter trahi voluisti, victima meorum criminum; dirige gressus meos in viam pacis, & jube me venire ad te, nam et si oportuerit me mori tecum, non te negabo.

DECAS IX.

1. **O** Bone JESU, virtus, & fortitudo animæ meæ, qui tot irrisiones, percussiones, & contumelias admirabili patientia tolerasti, doce me omnia mihi adversantia miti silentio vincere, & tranquillo corde suscipere.

2. Pijssime JESU, qui nequissimo latrone, & homicida nocentior proclamatus fuisti, fac me vana hominum judicia contemnere, & opprobrium tuum semper præ oculis habere, falsisq; mundi honoribus præponere.

3. Mi-

3. Mitissime JESU, qui nudus ad columnam alligatus, & dirissime propter scelera mea flagellatus fuisti, concede animæ meæ, ut diuturnis criminum tempestatibus jactata in hac columna portum inveniatur. Liga me ad eam in funiculis Adam, in vinculis charitatis.

4. Rex Christe, corona Sanctorum omnium, qui inaudito supplicio spinis coronatus fuisti, & joculari purpura indutus, fac me omnem contemptum patienter ferre, atq; inglorium omnibus apparere, tuasq; spinas semper amare.

5. Benignissime amator hominum, qui ab iniquo Judice morte turpissima condemnatus fuisti, cum sis speculum innocentiae, & sanctitatis, quanto magis me pati oportebit sinistra hominum judicia, qui in multis tam sæpè deliqui.

6. Proficiscere Bone JESU, ligno crucis onustus, sed multò magis amoris onere pressus, & qui dolori tuo non parcis, parce peccatis meis.

7. Ju-

7. Jugum tuum Domine suave est, & onus tuum leve: Fac, ut illud gaudenter portem, abnegans memet- ipsum, & crucem meam bajulans post te Domine.

8. Suavissime JESU, qui tam inhu- maniter in cruce extendi voluisti, ut numerari possent omnia ossa tua; præ- sta, ut omnia membra, sensus, & po- tentias ad te semper erectas tibi aman- ter uniam, & clavis timoris tui cruci tuæ perpetuò affixus maneam.

9. Ad te Domine clamantem exau- di, & qui dixisti Apostolis tuis, cum exaltatus fuero à terra, omnia traham ad meipsum, trahe me ad te, & excipe animam meam in foraminibus petrae, in cavernis maceriae.

10. Agnosco gloriosissime Fili Dei titulum tuum, tu es enim JESUS NA- ZARENUS REX JUDÆORUM. Utinam orbis universus hunc titulum legat & admittat, teque omnes confi- teantur Regem suum, & Salvatorem.

DE-

DECAS X.

1. JESU vita morientium, qui cum iam mortuus esses pro nobis, latus tuum lanceâ aperiri voluisti, ut accedentibus ad te, facilis pateret aditus ad cor, admitte me in latus tuum, ut in eo sit requies mea in sæculum sæculi.

2. O quinque Christi pretiosa vulnera Divina dulcedine plena saluto, & veneror vos, in vobis enim medicina vitæ, copia gratiæ, plenitudo indulgentiæ.

3. In latere tuo, latere volo JESU mi Crucifixe, ibi orare, ibi tractare negotia mea, quidquid voluero, obtinebo.

4. Gratias tibi ago Salvator mundi, quia opus redemptionis nostræ perfectissime peregisti, perfice, & in me opus, quod incepisti, ut plena in me, & consummata justitia reperiatur.

5. Quanta duritia cordis mei, concutitur terra, dissiliunt saxa, obtenebrantur cæli moriente Domino! Solum cor meum immotum erit, qui tantæ ne-

tæ necis causa fui; scinde illud Domine, & frange sanguine tuo.


6. Sepeli cor meum tecum, & absconde me intra vulnera tua dilectissime JESU, ut extra te nusquam reperiar.

7. Obfigna cor meum Domine, & sensus, ac facultates sigillo charitatis tuæ, ut sic obfignatus tecum maneam in æternum.

8. O Rex gloriæ Domine virtutum! qui post mortem descendisti ad inferos, & justos è carcere eduxisti, gaudeo de hoc tuo triumpho, & precor, ut omnē tartaream potestatem virtute tua vincere me facias.

9. O Triumphator gloriosissime, fac me participē passionis tuæ, ut sim etiam resurrectionis; tecum moriar, ut tecum resurgam, & tecum tandem ascendam in cælum.

10. Rex sempiterne, qui sedes ad dexteram Patris, trahe me post te, ut illic fixum sit cor meum, ubi tu es thesaurus meus, & gloria mea, DEUS cordis mei, & pars mea DEUS in æternum. Amen.



) 337 (

EX TRACTATV

De

Divina Psalmodia

Seu

Pfallentis Ecclesiæ

HARMONIA;

M E T R A

EXCERPTA.

METRV M I.

INVOCATIO

Superni Auxilij.

*M*agnū opus aggredior laudū veneranda sacrarū
 Dogmata, & arcanos Hymnorū pandere ritus.
 Quid Psalmi, sanctaq; preces, quid mystica templi
 Religio, quid dia notent modulamina certis
 Horarum spatijs summo resonantia Regi.
 Quamvis priscorum dudum hæc illustria scriptis
 Eniteant; mihi plura tamen penetranda supersunt.
 Angelicos cantus, vixq; ulli audita priorum
 Verba referre juvat, superosq; recludere sensus.
 Tu Deus ignitis olim qui corda replēsti
 Lingvarum pluvijs, tanti tu muneris Auctor
 Dexter ades, nutuq; tuo reserare latentes
 Sacrorum causas liceat, grātissima dona
 Mystis, mortalem sinē te fallentia sensum.
 Tu quoq; divini purissima Mater amoris,
 Lux mundi, caliꝯ decus, quæ prodiga terra
 Æthereas largiris opes, ac divite dextrā
 Effundis supera septena charismata lucis;
 Duc, age, Diva, tuum salebrosa per invia vatem,
 Te sequor, audaci labor hic Tibi militat ausu.
 Este mihi faciles, & vos charissima mundi
 Lumina, vos cali proceres, vos conscia Christi
 Pecto-

*Pectora, sidereis vos me succendite flammis.
Forſitan hæc Laticas volitantia ſcripta per oras
Accendent pietate animos, cultuq; perenni
Crefcet in immenſum divina gloria laudis.*

QUOD hominum brutorumq; discrimen ipſa corporum figuratio demonſtret. Nam cætera animalia pronâ facie incurvantur in terram, quia & ventris, in quem defleſtuntur, ſolas ſequuntur voluptates. Homo verò recto ſtat corpore, deſpiciſq; terram, ut vultu ſublimi intueatur cælum, & quæ ſuſum ſunt, quærere diſcat, non, quæ ſuper terram, & ut pſallat laudes Deo Creatori ſuo.

Ex Silio Pòeta.

*Nonné vides, hominum ut celſos ad ſidera vultus
Suſtulerit Deus, ac ſublimia finxerit ora:
Cum pecudes, volucrumq; genus, formoſa ferarum
Segnem, atq; obſcanam paſſim ſtraviſſet in alvum.*

Ex Juvenali de Athæis.

*-- In fortuna casibus omnia ponunt,
Et nullo credunt mundum rectore moveri.*

Natura

*Natura volente vices & lucis, & anni,
Atq; adeò intrepidè quacunq; altaria tangunt.
Heu primæ scelerû causæ mortalibus ægris
Naturam nescire DEVM.*

METRUM II. Contra Athæos.

*E*Rgonè quispiam sub axe cælorum est,
Delirus adeò, ut dicat in suo corde
Non est Deus? vel plenus improbis votis,
Orbis Monarcham, siderumq; rectorem
Turpi veterno publicæ rei ignarum
Clausum latere in ædibus poli credat?
Sicne in Deum conspirat, & minas jactat
Vilis homo, spoliū mortis, urna fœtoris
Lutosa terræ massa, pulveris saccus?
Ergo solutus Numinis metu infelix
Sic in diurna luce sponte caligas,
Naturæ apertis abnegans fidem dictis?
Videsne ut undas legibus nitens Phœbe
Temperet? ut uda comprimat Thetis fluctus
Tenuis arenæ terminum mari ponens?
Vt semper Helles portitor parens florum
Iustis adæquet partibus diem nocti?

Vides

Vides ut æstu torridus ferus cancer,
 Capriq; sidus algidum statis horis
 Sistant diem, solisq; cursui metas
 Ponant? ut errent fulgidæ poli flammæ,
 Serventq; certo fœdere inditas leges?
 Quis voluit astra? quis rotat vices rerum?
 Quis è recondito, abditoq; thesauro
 Educit Æoli furentis insanam
 Turbam, procellarumq; concitat nimbos!
 Quis lacte pingit liliū, quis argento
 Ligustra, Calthas ignibus, rosas auro?
 Quis universam graminumq;, florumq;,
 Hortiq;, pratiq;, decorat venustatem?
 Annē reperiri vanitas potest major;
 Quām mentis effræni impetu Deū summum
 Temerare, & illi sceptrā denegare orbis?
 An quod scelestis prorogat viris pœnas,
 Dormire credit impius pigram Numen?
 Sed præstat alto nos silentio Divos
 Colere, luent mox impij scelus, tuncq;
 Vindicta cælum absolvet: & malos perdet.

Quomodò laudes Deo cecinerit Nòë
 post diluvium, explicuit his versibus
 Claudius Marius Victor Massiliensis.
 Non prius officij quidquam servatus inire
 Constituit, quām sacra Deo laudesq; rependat,

*Gratesq; evaso referat discrimine Noë.
 Mox niveo sacra exurgunt altaria saxo,
 Agnovitq; hæc prima recens altaria mundus;
 Antea totus enim convexo tramite cæli
 Templum mundus erat.*

De transitu per mare rubrum sicco pede electæ Gentis à Deo, & submerfione hostilis Exercitûs revolutis undis, quâ tam incruentâ obtentâ victoriâ, ait Sacer Textus. Tunc cecinit Moyfes, & filij Isràël hoc carmen Domino, & dixerunt: Cantemus Domino, gloriôsè enim magnificatus egit, equum, & ascensorem dejecit in mare.

*Pervia divisi patuerunt cæcula ponti
 In geminum revoluta latus, nudataq; tellus
 Cognatis spoliatur aquis, ac turba pedestris
 Intrat in absentis pelagi mare, perq; profundû
 Sicca peregrinas stupuerunt marmora plantas.*

Ex Gregorio Nazianzeno, qui Psalmodiarum concentus, & Nocturnas vigiliis commendat: & in Oratione undecima de laudibus Gorgoniæ Sororis. *O noctes insomnes, exclamat, & Psalmo-*

rum cantus, & stationem ex die in diem desinentem. O David! quàm tu pijs duntaxat animabus, haud prolixè cecinisti? In carminibus autem tanquàm de re notissima sic canit.

*--- Sed quod omnibus notissimum,
Nocturnè cernis, ut canat laudes Deo
Naturæ uterq; sexus oblitus suæ?
Quot, quamq; Sancti? cernis Angelicū Chorū
Qui nunc simul, nunc vocibus alternis canit.*

*De Vigilijs & Psalmodijs Nocturnis
Paulinus Nolæ Episcopus de vita Sancti Martini sic canit.*

*--- Vigiliocyus omnis
Turba ad cōsuetos modulamina dulcia psalmos
Advolat, & sanctis solatia quærit in hymnis,
Quæ pellant segnes vegetato corpore somnos,
Cantibus & sacris nocturna silentia vincant.*

Aurelius Prudentius hymno primo noctis vigiliis concelebrat, & hymno ad incensionem Cerei Paschalis, vel ut habent aliæ interpretationes; ad incensionem lucernarum ait.

Nos

*Nos festis trahimus per pia gaudia
 Noctem concilijs, votaꝝ prosperè,
 Certatim vigili congerimus prece,
 Extructoꝝ agimus liba sacrario.
 Pendent mobilibus lumina funibus,
 Quæ suffixa micant per laquearia
 Et de languidulis fota natalibus.
 Lucem perspicuo flamma jacet vitro.*

METRUM III.

Enthusiasmus, & dicendorum propositio.

*M*ystica sacrarū penetralia pandere rerū,
 Atqꝫ adyton reſerare poli, perſuſa ſuperno
 Lumine mēs geſtit. Procul gens vana recedat
 Quæ reſidem, tetrâꝝ animū caligine morſum
 Tollere neſcit humo ſcelerū devincta catenis.
 Si nihil ad veſtros cæli myſteria mores,
 Sanctaꝝ Relligio, pietasꝫ, & numina ſpectant;
 Parcite pollutis hæc ſcripta evolvere dextris,
 Parcite vulgus iners, dire plebs conſcia culpa,
 Cui fixū ſtat corde neſas, quàm vulnere ſædo
 In Bacchi, Venerisꝫ, lucē malus impulit error.
 Non hic obſcuræ rerum primordia pando

Natura

Naturæ è claustris: non hic digesta per annum
 Tempora, non Thebas, non alti sidera cæli
 Concino diversos hominum variantia casus;
 Non freta fatidicæ primum sulcata carinæ,
 Non stygiæ raptoris equos, non pocula Circes,
 Non clarum Æacidæ, formidatumq; novercæ
 Amphitryanidem, miseræq; incendia Trojæ.
 Nō resero hic varias subeūtia corpora formas,
 Nō sylvas, viridesq; plagas, Veneresq;, jocosq;
 Hæc, pereant, quicunq; colunt. Mihi splen-
 dida ab alto

Lux nitet, & diuo jã cor, perfunditur æstu.
 Ecce Deus, Deus ecce venit, procul est profani:
 Este procul, nocuos procul hinc avertite vultus.
 At vos sanctæ animæ, solidæ pietatis alumnae,
 Quas amor, & summi perstringit Numinis
 horror.

Vos pre cor hic paucas perituri temporis horas
 Conterere, & mecū veterū vestigia Patrum
 Certa sequi. Dignas, Deus est, cui pangere
 laudes,
 Legibus hic doceo sacris, quem jussū per orbē
 Terra colit, celebratq; polus, manesq; tre-
 miscunt.

Probat quod & Gentiles sacris arce-
 re so-

re solebant profanos: ut Pòetæ passim ostendunt.

Virgilius sic canit.

-- *Procul, ô procul este profani
Conclamat Vates, totoq; absistite loco.*

Et Silius Italicus.

*Parcite pollutis contingere vincula palmis,
Et procul hinc, moneo, procul hinc quæcunq;
profanæ.*

Titus quoq; Calphurius.

-- *Ite procul, sacer est locus, ite profani.*

Ovidius item in Fastis.

Innocui veniât, procul hinc, procul impius esto.

Et Statius Papinius.

--- *Procul hinc, procul ite nocentes.*

METRUM IV.

AFFECTVS

Erga Christi Passionem.

*CVrrite sanguineis lachrymarum flumina rivis,
Et corde ab imò tristis exundet dolor.*

*Erumpant moriente Deo suspiria, & intus
Oeculta amoris æstuent incendia.*

Ite manus nocuæ sceleratum tundite pectus,

Vin-

Vindexq; apertis sanguis è venis fluat.
O fluat! Et totus detur præ sanguine sanguis,
Measq; culpas diluat fusus cruor.
Dicite vos celi, vos conscia funeris astra,
Si majus unquam polluit terram nefas.
En jacet exanimis soboles aquæva Tonantis
Damnata ligno, crimina ut mundi luat.
Spinea ferta caput præcingunt, membra cruentis
Discerpta virgis sanguinis rivos pluunt.
Omnis abest species notam dignoscere formam,
Notosq; vultus ipsa vix posset Parens.
Horruit aspectu, densisq; in nubibus ather,
Phæbiq; siderumq; condidit faces
Æternas populi mundo timuere tenebras,
Stravitq; maestus anxias gentes pavor.
Grandia terrificis sunt saxa excussa ruinis
Et ipsa trepido terra subsiluit solo.
Scilicet (ô superi cur non emititis ignem?
Cur non ferocem armatis in me dexteram?)
Scilicet (ab scelerum nimis improba causa meorum
Quæ lucis Et vitæ reum Numen facis.)
Scilicet interitum summi gemuere parentis
Quæcunq; celi continentur ambitu.
Et vos mortales tantorum causa malorum,
Siletis? Et non irrigat fletus genas?
Ab fluite ô lachrymæ, totoq; è corpore sanguis
Vt sole nix soluta, rivis effluat.
Ecce sitit moribundus amor, date pocula amantes

Amoris

*Amoris haustum Rex amantium sitit ?
Nempè sitit lachrymas, lachryma nè arefcite: ve-
Sedare fletu fervidam cupit fitim.* (stro

Ad conservandam copiofæ redem-
ptionis memoriam, fepties in diem lau-
dem dicimus Domino, juxta vulgatiffi-
mos Gloffæ versiculos.

*Hac sunt feptenis propter quæ psallimus horis,
Matutina ligat Christum, qui crimina purgat.
Prima replet fputis. Causam dat tertia mortis.
Sexta cruci neclit. Latus ejus nona bipertit.
Vefpera deponit. Tumulo completa reponit.*

Item alio loco.

*In matutino damnatur tempore Christus.
Quando refurrexit, primam canit ordo fidelis.
Tertia cum canitur, tunc eft cruciamina paffus.
Sextâ sunt tenebra per mundi climata facta.
Emissus nonâ eft Divinus Spiritus horâ.
Vefpere clauduntur Christi facra membra fepulchro.
Christo biffenâ custodia ponitur horâ.*

METRUM V. De brevitate vitæ.

*S*ic nempè velox orbita temporum
Propellit annos : surgit & occidit
Quid-

Quidquid polorum continetur

Præcipiti nimium sub axe.

Cæco rotantur sæcula turbine,

Vesper sequenti vespere truditur.

Mortale nil longum, nec ætas

Præteritam reparat ruinam.

Vita quid auras, quid senium miser,

Diesve longos, stultaq; somnia

Mentiris? heu? puncto futurus

Præda necis, gelidum cadaver.

Quicumq; lucis munere vescimur,

Omnes eodem tramite currimus.

Mors æquat omnes, parq; sæpè est

Nestoreæ una dies senectæ.

Centena quamvis sæcula vixeris,

Æternitatis si numeras diem,

Nil ejus ætatem antecelles,

Vnica quem rapit hora vitæ.

Frustra senectæ tempora computet

Ales quæ ad undas nascitur Hypanis,

Quàm si videt nascentem Eous

Decrepitam aspicit occidens sol.

Hæc de fugaci fabula luditur

Vita. Quod ortum est vergit ad Hesperum,

Diesq; veloces, & anni

Pegaseo fugiunt volatu.

METRUM VI.

De horis & horologijs.

*Tempora præcipiti glomerantur concita cursu
 Et refruunt gyris, noxq̃, diesq̃, suis.
 Atq̃, ut bisseñis finitur mensibus annus,
 Sic totidem spatij dividit hora diem.
 Dividit hora diem, justis & partibus aquat
 Dum subeunt proprias cuncta creata vices.
 Vda prius siccos signavit Clepsidra soles,
 Et secuit calidos frigida meta dies.
 Scilicet impulsis agitur solibus orbis,
 Et refluus annus præcipitatur aquis.
 Tum capit tenues percurrere tempus arenas,
 Omnia nam rabido frangere dente solet?
 Mox quia sunt umbris humana simillima gnomon,
 Innuit umbroso tramite lucis iter.
 At nunc ad ferrum postquam migrastis ab auro
 Sacula, ferratis aufugit hora rotis.
 Aufugit, & sese per ferrea puncta trucidans
 Admonet ad duram nos properare necem.
 O quicumq̃, dies docuisti hac arte secari,
 Scito: non omnes hæc monumenta juvant.
 Nam cur tam lentum tempus remoratur amantes,
 Aut cur dissimili mobilitate viget?
 Flet siquidem longo sua duci stamina filo,
 Dum cupit æterni Regis amore frui:*

Alter

*Alter ait, faciem si quando cernit amantis,
 Cur mihi contractis præterit hora rotis?
 Nempe licet motum mensuret temporis hora,
 Non tamen affectus queis agitur amor.
 Credite: dilato cruciantur tempore amantes,
 Estq; illis anno longior una dies.
 O igitur quando fugitivi temporis expers,
 Lux mea, Christe Deus, te sine fine fruar?
 Illa dies tenebris horisq; ac sine carebit,
 Vnica si quando fulserit illa dies.*

In tractatu de horis diurnis & nocturnis, in quibus laudes Deo canuntur, descriptio signorum cælestium, quæ rectè, & quæ obliquè oriuntur.

*Recta meant, obliqua cadunt à sidere cancri.
 Donec finitur Chiron: sed cætera signa
 Nascuntur prono, descendunt tramite recto.*

Quam descriptionem Scotus Pòeta Eterodoxus hoc carmine conclusit.

*Ergo viâ surgunt flexa caper, hydria, pisces,
 Dux ovium, taurusq; minax, geminiq; puelli.
 Ast cancer, Nemeesq; pavor, virgoq; maligna
 Desertrix terræ, speciesq; bilancis, & acer
 Scorpio, centaurusq; truci spectabilis arcu
 Conscedunt recto calum sublime meatu.*

De distributione horarum matutinarum apud veteres Romanos Martialis.

*Prima salutantes, atq; altera continet hora,
Exercet raucos tertia caufidicos.
In quintam varios extendit Roma labores,
Sexta quies lassis, septima finis erit.
Sufficit in nonam nitidis octava palæstris,
Imperat extructos frangere nona thoros.
Hora libellorum decima est, Eupheme meorum
Temperat ambrosias cum tua cura dapes.*

Dracontius Christianus Pòeta fidem probans resurrectionis ex diei & noctis successionē, assumit argumentum & sic canit.

*Mortua nox sub luce cadit, perit aurea luna,
Atq; per ascensus ꝑ cornua colligit ignes,
Et dum cæca latet, reparato lumine fulget.
Mentiturq; diem lux frigida, solis imago.
Lucifero redeunte polo, moriuntur ꝑ astra.
Nuncius auroræ subductus morte diurna
Lucifer extinctas reficit per sidera flammæ.
Exhinc nocturnum jubar emicat igne corusco
Rosida puniceum spargens aurora ruborem
Ducit ubiq; diem periturum noctis ab umbris:
Et tamen hæc de sole perit, quo missa rubebat
Sol oculus cæli, famulus super astra Tonantis,
Cujus*

*Cujus ab immensis langvescunt sidera flammis,
Nè gelidis animetur aquis per cœrula ponti,
Occidit ipse dies super æquora sôle cadente,
Et quo demersus novus æquore manè resurgit.
Vespere nocturno hunc radiatâ luce rubentem.
Purpureis abscondit aquis, redditq; diurnè
Depositum naturæ suum sub nocte sepultum
Manè resurgentem de fluctibus orbe recepto.*

METRUM VII. Noctis Encomium.

O Nox purpureo splendidior die,
O nox delicijs omnibus affluens,
O nox, quæ radios prodiga cœlicos
 Spargis divite copia.
Huc te fer tacito, cœrula nox, pede,
Nox duris requies grata laboribus:
O curas animi, diraq; comprime
 Tristis murmura pectoris.
Iam non Thessâlicis diceris artibus
Præses, vel scelerum Mater, & horridi
Inferni soboles, Eumenidum Parens:
 Altrix fœda cupidinum.
Hæc de te veterum fabula finxerit:
At nunc Angelici conscia luminis,

*Nunc solis rutilâ luce serenior ,
Nigris in tenebris nites.*

*Tu nunc paciferum mentibus otium
Infundens , superûm munera dividis ;
Te nunc sollicito quærit anhelitu
Sanctis ustus amoribus.*

*O nox connubij pronuba mystici ,
Consors æthereæ nox sapientiæ ,
Cujus per tenebras sol novus emicat
Sponsi vultus amabilis.*

*Salve, & dum patriæ perdita gaudia
Merens hic recolo , præcipitem polo
Cursum nè acceleres. Da veniam, tua
Si nunc turbo silentia.*

*Vrit fidereæ me patriæ decor
Cum fulget tenero cynthia lumine ;
Vrit me nitidis pervigil ignibus
Stellati tholus ætheris.*

*O celsi placidas excubias poli ,
O noctis choreas , ô tremulas faces ,
O veras supera lucis imagines
Æterni thyasos chori.*

*Cur me jam nimio tempore corporis
Vinctum compedibus cernitis exulem ?
Heu ? terrena nimis desipiunt mihi ,
Si summum intueor polum.*

In Tractatu de Nocturnis Orationibus & Vigilijs; quòd ab ipsis Epicuri sectatoribus discenda est vigilantia citat. Horatium.

*Vt jugulent homines surgunt de nocte latrones
Vt teipsum serves non expergisceris? atqui
Si nolis sanus, curres hydropicus, & nū
Posces ante diem librum cum lumine, si non
Intendes animum studijs, & rebus honestis.
Invidiā, vel amore vigil torquebere: nā cur
Quæ ledunt oculos festinas demere, si quod
Est animū differt curandi tempus in annum.*

METRUM VIII.

Potentia amoris in nocte,
& somnium, atq; apparitio
sapientiæ.

ELEGIA SECUNDA.

*S*Virgit amor, jaclatq; faces & spicula vibrat
Mergit ut æquoreis lumina Phæbus aquis
Cumq; serenato luceſcunt ſidera cælo
Cæcāq; nocturno frigore terra riget :
Y 3 Tunc

Tunc amor arcanis populatur viscera flammis
 Pectora tunc rapidis ignibus usta calent?
 Lumine nempe novo nox ambitiosa refulget,
 Gaudet & occultâ luce referre diem.
 Flâmesunt gelidæ tremulis splendoribus umbræ
 Et polus æthereâ mittit ab arce faces. (das
 Squamigerû stupet omne genus luditq; per un-
 Dum natat in vitreo pendula flâma mari.
 In tenebris ardens scintillat pectus amantis,
 Nocte vigent flâmæ, nocte triûphat amor.
 Quod si fessâ iuvat componere membra sopore,
 Tunc magis ardenti fulminat ille manu.
 Fulminat, & tâtis langvescunt pectora flâmis,
 Langvet ut in calidis flosculus ustus agris.
 Nuper nocte meas urebat flamma medullas,
 Ætnæ non potuit seuior esse rogos. (tans,
 Dumq; ardens jaceo, dū langveo multa volu-
 Dormit sub vili tegmine stratus humi,
 Tunc mihi langvêti misit bona somnia Numë,
 Somnia formoso candidiora die
 Constitit ante oculos species veneranda puella,
 Et superâ facies prodidit esse choro.
 Induerat Tyrio distinctam murice vestem,
 Textili & intactas cinxerat igne nives,
 Stellantes oculi, miseri duo fulmina cordis,
 Lactabant rapidos frontis ab arce rogos.
 Dexte-

Dextera fulgebat viridi stellata smaragdo,
 Ornabat niveum plurima bacca sinum.
 Prætereo gemina radiantes aure pyropos,
 Albaq; purpureis lilia picta genis.
 Mitto quod Eois certarent labra corallis,
 Et rutilas premerent aurea sarta comas.
 Hærebam tantæ plectus imagine formæ,
 Fundebamq; humiles, ore tacente preces.
 Nec mora: jam lacrymas, jam mollia verba
 parabam,
 Quæis mihi tantus erat conciliandus amor.
 Illa sed insolitas spargens furibunda favillas,
 Hos mihi terrificos edidit ore sonos:
 Gloria summa poli, soboles primæva Tonantis,
 Non soleo ignavos sacra docere viros.
 Deliciæ, fateor, mihi sunt humana propago,
 Nî inficerent animum, deprimerentq; jolo.
 Dixi etiã quondã, nox est mea sola voluptas,
 Nec nisi qui vigilant, me reperire queunt.
 Nocte micat mea lux, mihi sidera lumine
 cedunt,
 Atrãq; sit radijs Cinthia victa meis.
 Ipse meo fulgens Titan aspirat honori
 Et recreo flammâ splendidior polum.
 Cũ mea lux fulget, cũ spargo per aëra flãmas,
 Vertitur in claram, nox tenebrosa diem.

Cumq; meo humanū perfundo lumine peclus,
 Dignus homo est superam conditione frui.
 Vix ea, cum subito tenues dilapsa per auras
 Ausugit, heu! lacrymis nō revocanda meis.
 Tunc votis frustrata suis mens excidit, omnis
 Me virtus liquit, destituitq; sopor.
 Et dixi recolens felicitis gaudia somni,
 Solus erit Sophiæ dignus amore vigil.

Horarum matutinarum Encomia Pindarus Christianus sic celebrat.

Nox, & tenebræ, & nubila,
 Confusa mundi, & turbida;
 Lux intrat, albescit polus,
 Christus uenit, discedite.
 Caligo terræ scinditur
 Percussa solis spiculo,
 Rebusq; jam calor redit,
 Vultu nitentis sideris.
 Hæc hora cunctis utilis,
 Quâ quisq; quo studet, gerat,
 Miles, Togatus, Navita,
 Opifex, Arator, Institor.
 Illum forensis gloria,
 Hunc triste captat classicum,
 Mercator hinc, ac rusticus

Avara

*Avara suspirant lucra.
At nos lucelli, ac fœnoris,
Fandiq; prorsus nescij,
Nec arte fortes bellicâ,
Te Christe solum novimus.
Te mente purâ, & simplici,
Te voce, te cantu pio
Rogare curvato genu,
Flendo, & canendo discimus.*

Dracontius Pœta de luce matutina.

*Lux jubar æthereum, lux noctis limes, & umbra,
Lux facies rebus cunctis, & lux elementis.
Lux genitis, factisq; calor, lux gratia solis,
Lux decus astrorum, lux aurea cornua luna,
Lux fulgor cali, lux & primordia mundi,
Lux splendor flammæ, lux magni temporis index,
Lux honor agricolis, requies lux omnibus agris,
Lux opus Authoris primum, candorq; pudoris.*

M E T R U M IX.

Laus Auroræ.

*Procul hinc tenebræ, & horror,
Procul sopor, procul nox.
Clara nitentis astri*

Caligo luce fugit ,
 Atrisque jam tenebris
 Tellus soluta ridet.
 Nox victa cessit , ortum
 Solis monent adesse
 Titaniae volucres.
 Dux Phosphorus nitorum,
 Lucis parens diurnæ.
 Inter globos Olympi
 Blandas init choreas.
 Procul ô procul faceffat
 Tenebrosa turba Averni.
 Procul hinc tenebræ , & horror ,
 Procul sopor , procul nox ,
 Iam læta surgit hora ,
 Quâ dulciore cantu
 Loquax avis canorum
 Modulamen ore promit :
 Omnisq; per vireta
 Proles amæna veris
 Asperâ luce vernat
 Rosæq; , liliumq;
 Venustiorq; Caltha ,
 Crocusq; purpurascens
 Produnt amoris ignes.
 Procul hinc tenebræ , & horror ,
 Procul sopor , procul nox.

*Cantemus, atq; amemus,
Dum lux serena fulget,
Interq; dulciorum
Fomenta gaudiorum
Sopore jam soluti
Vultu Dei fruamur.
O sola digna donis
Cælestibus, bonorum
Amica lux, levamen
Mæroris, & perennis
Parens beatitatis,
O lux decora salve.
Procul hinc tenebræ, & horror,
Procul sopor, procul nox.*

M E T R U M X.

Invitantur omnes creatu-
ræ ad cantandas DEO
laudes.

*O Quæ sidereos volvitæ axes
Mentes corporea fœce solutæ
O cæli Proceres, Incolæ Olympi
Mecum pangite laudes.*

Orbes

Orbes ætherei , fervide Titan ,
Phæbe noctivago lumine fulgens ,
Et vos flammigeræ lampades æthræ
Dulces pandite versus.

Vndæ , quæ superos cingitis orbes ,
Nubes , & pluvia , grando , pruina ,
Nix , ros , & glacies , frigus , & æstus
Lato plaudite cantu.

Venti Sylvisfragi , mobilis aura ,
Fulgur , Nubivagum , missile fulmen ,
Nimbi præcipites , flamma coruscans
Hymnos dicite cælo.

Vndosum pelagus , flumina , & amnes ,
Pontes irrigui ; turba natantum ,
Quicunq; in vitrea vivitis unda ,
Voces tollite ad astra.

Colles frugiferi , lignaq; sylvæ ,
Montes , & viridis gramina vallis ,
Fœcundæ segetes , dulcia poma ,
Summo psallite Regi.

Brutæ quadrupedes , reptile terræ
Immensas Domino reddite grates :
Omnisq; alituum Musica , molles
Promat gutture cantus.

Infan-

*Infantes , teneri , leta juvenus ,
Simplex virginitas , cana senectus
Huc denso properent agmine , & astra
Pulsent laudis honore.*

*Rector cœlituum , te canat Indus ,
Te psallat nitidi potor Enipei ,
Mauri te celebrent , & tua dives
Volvat nomina Ganges.*

*Alternis resonent , cantibus hymni ,
Iungantur modulis organa mille ,
Sambucæ , Cytharæ , tympana , plectra ,
Sistrum , fistula , cornu.*

METRUM XI.

Describitur Ortus Solis.

J*Am Phœbus rutilum caput
Vestus cœruleis equis
Elotum pelago extulit.
Noctem Phosphorus horridam
Clarâ percutiens face
Stellas depulit æthere.
Lux fulgens radiantibus ,
Pingens cuncta coloribus ,
Umbras lumine temperat.
Tellus omniferos sinus*

Pan.

Pandens ætheris ignibus
 Ardet murice flammeo.
 Errantes pecudum greges
 Herbis luce rubentibus,
 Carpunt gemmea pabula.
 Largis flet lacrymis polus
 Noctis tristia funera.
 Quas blanda excipit obstetrix
 Natura, & teneris cibum
 Hortis mellifluum parat,
 O quàm floriferum solum
 Vultu ridet amabili?
 Flammæ exacuunt rosæ,
 Candent lilia pulchrius,
 Rident prata venustiùs,
 Vernant cuncta decentiùs.
 Arguta alituum cohors
 Vocis nectare diffuens,
 Nascentem recinit diem.
 Cantat flebilibus modis
 Sylvosum recreans Nemus
 Ales garrula Daulias.
 Musæ ruris Achantides
 Ludentes hilari sono,
 Mulcent àëra cantibus.
 O solis nitidum jubar

*Squallentem tenebris humum
Optatâ irradians face:
Dum tu per tibi cognitas
Alti signiferi vias
Terris lumina dividis,
Nos certo quoq; tempore
Immixti superûm cheris
Summo carmina Numini
Psallentes terimus diem.*

Aurelius Prudentius Clemens ad-
versus Simmachum sic cecinit.

*Est, qui conspicuis superos quasiavit in astris,
Ausus habere Deum solem, cui tramite certo
Conditio imposta est vigilem tolerare laborem,
Visibus objectum mortalibus, orbe rotundo
Præcipitem, teretiq; globo per inane volentem
Et quod nemo negat, mundo calog; minorem.*

Martianus Felix Capella his versi-
bus solem veneratur.

*Ignoti vis celsa Patris, vel prima propago,
Fomes sensificus, mentis fons, lucis origo,
Regnum natura, decus atq; assertio Divum
Mundanusq; oculus, fulgor splendentis Olympi,
Ultra mundanum fas est, cui cernere patrem.
Te Seraphim Nilus, Nemphis veneratur Osirim,
Diffona*

*Diffona sacra Mitram, Ditemq̃, ferumq̃, Typhonē,
At ijs pulcher item, curvi & puer almus aratri.
Ammon & arentis Lybies, ac Biblius Adon.
Sic vario cunctus te nomine convocat orbis.*

Æthnicorum Sacerdotes ad Orientis
Regionem conversi, solebant sacrificare. De quo Virgilius.

*Illi ad surgentem conversi lumina solem
Dant fruges manibus salsas, & tempora ferro
Summa notant pecorum, paterisq̃ altaria libant.*

Honor, qui ab Æthnicis soli creato
deferabatur, datus est à fidelibus Christo verè soli. Sicut de Circensibus ludis, qui fiebant in honorem solis, loquitur Corripus Africanus his versibus.

*Hunc veterum primi ritum non ritè colebant.
Essè Deum solem rectâ non mente putantes.
Sed factor solis postquàm sub sole videri
Se voluit, formamq̃ Deus de Virgine sumpsit
Humani generis: tunc dempto solis honore,
Est Christo delatus honor.*

ME.

METRUM XII.

ORATIO

Ad Christum.

*M*agne Rex terræ, nitidiq; celi,
Christe, qui nutu moderaris orbem,
Mentis arcanum jubar, & paternæ
Lucis imago.

O sacrum cæli decus, & corusci
Luminis candor sine nube fulgens
Huc ades, puro tibi dum sacramus
Carmina voto.

Serviunt cursu Tibi concitato
Nox, dies, annus, properiq; Menses,
Teq; circumstant glomerata blandis
Astra choreis.

Huc nitens cæcis malè pulsa terris
Lux ades nulla temerata nocte,
Mysticum lumen, niveosq; nobis
Annue mores.

Pax, fides, tecum pietas, & omnis
Audeat virtus remeare ab alto.
Pectus illustra, restuatq; summi.
Flumen amoris.

*Erudi terras meliore flammâ
Et per ignotas tibi fundat oras
Prodigus laudes populus sacratam
Pronus ad aram.*

METRUM XIII.

Enthusiasmus ob adventû Spiritus Sancti.

*Q*uis me Numinis impetus
Sublimem vacuo vibrat in àère?
Falsâ ludor imagine?

An celsum volacris transilio polum?

Quo me nubila præpetem

Attollunt rapido turbine concitum?

Aut quis me potuit furor

Stellis inferere, & concilio Dei?

Absistant procul impij.

En præsens DEVS est. Sentio Spiritum.

Rugitu reboat polus,

Atq; æther rapidis depluit ignibus,

O vos pectora pandite!

Quos Numen populi cætibus eripit.

Nil parum, aut humili modo,

Nil mortale loquar, sed referens DEO

Gratas

*Gratas obsequij vices ,
Devotis feriam sidera vocibus.*

METRUM XIV.

• Describitur Adventus Spiritus Sancti.

*A*ccelerat cursū Titan, jam tertia magnæ
Pars est exacta dici.
Cū subito ingenti roboat nemus omne tumultu
Tellus concussa tremiscit.
Nubila terrifico quatiuntur pulsa fragore ,
Tonat alti Regia celi.
Perq; levem rutilæ discurrunt aëra flammæ
Tremulis micat aura favillis. (terris
Quæ nova tempestas ? miseris æq; fulmina
Displodit Numinis ira ?
Quæ flamma hæc ? varias efformat acumine
Pectusq; incendit amore. (linguas
Scilicet hic amor est, proprios effusus in ignes,
Placido qui fulminat ictu.
Pandite, mortales, penetralia pandite cordis,
DEVS ecce illabitur orbi.
Iam nova lux menti patefacto aspirat Olympo,
Iam sacris ardeo flammis.

*Adventum testata Dei, jam fervida totum
Spirant praeordia Numen.
Iam mea sublimi miscentur gaudia celo,
Votis jam sidera tango.
O Deus! ô Patris! natiq; è Numine Numen,
Divini Spiritus oris.
Amborû communis amor, pax, unio, nexus,
Bonitas, & flamma perennis.
O dator! & donû, divûmq; æterna potestas,
Mundum qui flamine comples.
Influe caelestis, septena charismata doni
Lumenq; infunde supernum.
Atq; mea æternus praeordia concremet ignis,
Penetret tua flamma medullas.
Nam nisi ab igne Deo non debet cordis in ara
Comburi victima amoris.*

METRUM XV. Verus Sol est DEUS.

*O Poli Princeps radiate Titan,
Naturæ eximium decus,
Cuncta, qui vectus rapidis quadrigis,
Celi è vertice conspicias.
Te Parens vatum fidibus canoris
Psallit Maenius senex.*

Te genus divum Rhodopes sub antro
Orpheus Threijcius canit.

Et tuas mendax veneratur aras ,
Cultu Græcia supplici.

Attamen cæcos pelagi recessus ,
Et terræ intima viscera ,
Haud potes clarâ penetrare luce
Vel tristes Erebi specus.

Sed celer cursu peragrans citato
Pronas Zodiaci vias ,
Lucidis nascens radijs coruscas ,
Et noctem revehis cadens.

Fulgidæ verò Dominator æthræ ,
Mundi maximus arbiter ,
Intimas rerum penetrans latebras
Et vastos animi sinus ,

Vnico mentis speculatur ictu ,
Quidquid subjacet ætheri.

Nec potest terræ prohibere moles ,
Aut nox , atragq; nubila ;

Quin sciat , quidquid spatiosus amplo
Orbis continet ambitu.

Verus hic ergo celebrandus est Sol ,
Qui solus videt omnia.

ME-

METRVM XVI.

ELEGIA TERTIA.

Affectus Sponsæ,

Id est ; Animæ quærentis
Sponsum.

TE semel ut possim mea lux, mea vita, videre,
 Quot mihi sunt sylva, quot penetranda iuga,
 Nec tamen ulla tui misera spes certa videndi,
 Vlla nec alloquij, spes mihi certa datur.
Ab! dixi, vacuo dum te perquiro cubili,
 Cur fugis, è nostro transfuga sponse, thoro.
 Dumq; iterum vicos, iterumq; requiro plateas,
 Perditus, heu? dixi, siccine Sponse lates?
 Siccine inaccessos te frustra quero per agros,
 Per iuga montanis non adeunda feris?
 Qua te lustra tegunt? qua te, mea vita, latebra
 Qua loca, qua sylva, qua tenet atra specus.
 Cur fugis, ut sero procut hostis ab hoste recedit,
 Quare tuæ potuit causa fuisse fuga?
 Credideram fictamq; fugam, fictumq; recessum,
 Iram namq; docet fingere cautus amor.
At geritur video, res seria: sæpe revertar
 Dixisti fugiens, attamen usq; lates,
 Vsq; lates, nec te mea multa pericula tangunt
 Nec saltem ostendis, quo tenere loco.

Aspice, jam medius flagrantibus astat horis
 Phæbus, & infesto fervet ab igne caput.
 Quis tibi, quis tantis nunc præbet in æstibus umbrâ.
 Ah? cave, nè teneros urat arena pedes.
 Sponse cave æstivo nè fortè calore liquefcas,
 Nè te ardens medio Phæbus ab axe cremet.
 O ego si scirem jaceas quo cessite languens,
 Umbrosi nemoris fungerer ipsa vice.
 Exciperem objecto ferventem corpore solem,
 Teq; meis tegerem, Sponse reperte, comis.
 Ergo ostende precor, mea spes, mea sola voluptas,
 Quæ regio invideat te mihi, quodvè nemus.
 Nulli te querens parcam, dilectæ, labori,
 Exul in extremo sis licet orbe vagus.
 Iamq; ego te agnoscens collo dabo brachia circum,
 Et pedibus ponam mollia vincla tuis.
 Sed quid ego? Moriar currens, languensq; per agros,
 Lassa etenim nequeo te fugitive sequi.
 Ergo ostende precor, mea spes, mea vita, meû cor,
 Quæ regio invideat te mihi, quisvè locus.
 Siste gradum, tantiq; semel misere laboris,
 Iam potes in pœnis mitior esse meis.
 Aspice jam medio sol altior astitit orbe,
 Herbiferamq; urens, æstus hiulcat humum.
 Iam pastor valles, umbrasq; animalia querunt,
 Inq; acri tellus vivit anhela rogo.
 In ramis volucres languent, Neptunus in undis,
 Ictaq; caelesti cuncta calore cadunt.

*Huc igitur, mea vita, veni; protectus ab aestu
 Hic eris, ad solitos Sponse recurre lares.
 Ac in dotali mihi commoda villula campo,
 Vere ubi perpetuo florida ridet humus.
 Hic antrum ingens est, convexo tegmine densum,
 Frigida ubi ardentes submovet umbra rogos.
 Inscius aestatis locus est, cumq; altior est sol,
 Incipit hic modicâ luce rubere dies.
 Nec desunt gelidi fontes riviq; loquaces,
 Murmure qui somnum consiliare queant.
 Abdita quin etiam tacito spelunca recessu,
 Celabit nostras, ô mea vita faces!
 Nullus erit, placidos qui turbet acerbus amores,
 Oscula, nullus erit, qui prohibere queat.
 Huc mea lux propera procul urbibus, atq; tumultu,
 Optatâ ut possim sola quiete frui.
 Aspice, stelligerum multo tibi flore paratur
 Sponse iter, & tremulo te vocat aura sono,
 Ergo age, jam propera, qui causa mei tormenti
 Solus es, ah? tantas spes mea, rumpe moras.
 Rumpere moras, alioquin languens, ustaq; flammis
 Sponse tuis, sinè te deficiens moriar.*

METRUM XVII.

Laudatur mediocritas.

*Non fasces igitur, non nimias opes,
 Non plebis cupiam munera divitis,
 Lætam*

Lætam fingere vitam

Si possim arbitrio meo.

Ridet terrificis fulminis impetum

Arbor, quæ gelidis vallibus incubat;

Nec cæli timet iram

Tecti pauperis incola.

Certat dum volucres vincere cælicas,

Nomen Dædalides eripuit freto:

Alter dum errat in axe,

In flumen solidus ruit.

Stet quicumq; volet culmine lubrico,

Regaliq; potens sanguine: mox erit

Stultæ fabula plebis,

Mundiq; instabilis jocus.

In magnis requies est minor: imminet

Mors illis gravior, qui nimis omnibus

Famâ & stemmate noti.

Ignoti pereunt sibi.

Seneca Tragicus canit:

Quisquis medium defugit iter,

Stabili nunquam tramite curret.

ME-

METRUM XVIII.

Affectus animæ amantis,
erga Christum crucifixum.

Non me revellet à tua, IESU, Cruce
 Quidquid minarum tristium:
 Aut quidquid armorum feroces Tartari
 In me Tyranni proferant.
 Non ensium horror, non fames, vel nuditas,
 Non bella, vel pericula.
 Si mille circumstent truces exercitus,
 Si mille, jactent spicula.
 Non hinc recedam. In me polus si corruat,
 Si terra nutet arida,
 Et si intumescat turgidis undis fretum,
 Aërg, flammæ depluat:
 Immotus hic jacebo, & acceptabilis,
 Hic immolabor victima
 Tuosq, clavos, & pedes amantibus
 Circumligabo brachiis.
 Non me probrosæ dedecus terret crucis,
 Non horridum mortis genus,
 Lubens peribo. Me necis tuæ DEVS
 Mactabit hic reum dolor.

METRVM XIX.

Comparatio antiquæ, &
nostræ ætatis.

O Nimum ætas aurea felix !
 Cum sponte suâ , vindice nullo
 Colerent homines jura , fidemq;
 Candor morum , castusq; pudor
 Querulas lites , diraq; vincis
 Bella premebant. Saucia nullo
 Vomere tellus teneras fruges
 Vbere cornu læta ferebat.
 Dulces epulas , herba salubris ,
 Dabat & potum frigidus amnis.
 Nondum certo limite campus
 Divisus erat : nondum cinctæ
 Mœnibus urbes , nondum foribus
 Munita domus , pervia cunctis
 Divitiarum gaza patebat ,
 Aberant fraudes , aberant cædes :
 Non Thessalicis mixta venenis
 Pocula mortis , non aconita
 Noverat orbis. Pietas sancta
 Amor , & summi Numinis horror.

Placidâ gentes pace regebant.
 At nunc miseros postquam infecit
 Deterioris vena metalli.
 Iam vitiorum scelerata cohors
 Agmine facto mundo incubuit,
 Ambitio exlex, præcepsq; furor,
 Intima livor viscera rodens,
 Rabies, cædes, furta, rapinæ,
 Dolus, & fraudum perfida larva,
 Venale nefas, dira venena,
 Luxus, & auri cæca cupido,
 Prodigæ rerum gula, lautæq;
 Gloria mensæ, quam morborum
 Immensa lues, celeriq; gradu
 Aspera sequitur, duræq; egestas.
 Tum jus, & amor, cultusq; Dei,
 Veræq; pietas, fasq;, fidesq;,
 Atq; omnis toto exulat orbe
 Candida virtus, formaq; morum.
 Ergo querelas fundite acerbæ
 Mæsta juvenus: plangite sævo
 Sidere nati, genus infelix.
 In quos ætas ultima venit!
 Sentiat æther gemitus vestros,
 Sentiat àer, tellus patens,
 Et vaga pelagi mobilis unda.

Soboles tantis obsessa malis
 Non est luctu plangenda levi.
 Nos infaustum genus, ô pueri!
 Flebile vulgus, malè nata seges
 Savi per iter triste doloris
 Celeres imus: nec sic tellus
 Infima supero distat ab axe.
 Quantum à senibus nova distamus
 Turba Nepotum. Nos senio piger
 Terræ opprobrium protulit orbis,
 Qui graviori pondere pressi
 Haud degeneres dabimus natos.
 Sed inutilibus parcite lacrymis,
 Parcite juvenes, parcite tantos
 Promere questus: dabitur vobis
 Alium vitæ nosse tenorem.
 Si nunc veteres renovet mores
 Præsens ætas. Aurea sæcla
 Aurea morum norma reducet.

METRVM XX.

Rerum vicissitudo.

Non semper spatiosos irrigat
 Turbidus imber agros
 Non semper rigidis Aquilonibus
 Pigra laborat humus.

Non

Non semper sylvis decus, & comas
Horrida tollit hyems.

Phæbeumq; quandoq; serenius
Surgit ab axe Iubar,

Quandoq; alternâ vice temporum
Solvitur acris hyems.

Flores quandoq; aura Favonij
Imperiosa vocat.

Sic tempus certo ordine digerit,
Quidquid in orbe viget.

Ille infans hodie qui nascitur,
Cras tumultatur humo.

Qui nunc semina grata Nepotibus
Spargit & arva colit.

Consita cras evellit, & arida
Concremat igne sata.

METRVM XXI.

ELEGIA QVARTA.

Invitatio ad lacrymas.

Ite igitur lacrymæ, rapidis concresecite rivis,

Ite, rigate genas; ite, replete sinum.

Exul enim patrijs tam longè dissitus oris

Num potero latos reddere voce sonos?

Non

Non bene confusum mentitur gaudia pectus,

Nec bene marenti fingitur ore jocus.

Heu? felix regio morsu deperdita pomi,

Questibus heu? quoties es revocanda meis.

Atq; utinam tristes gemitus, vigilesq; querela,

Flebilis aut posset te revocare sonus.

Mille genas, & mille oculos, & pectora mille

Optarem, & querulas fundere semper aquas.

O calum! ô supera felicia gaudia vite!

Fulget: ubi aeterno lumine clara dies?

O DEVS! ô superi! (cessa dolor anxie, cessa,

Nè impediās lacrymis, carminibusq; viam)

Nam quid delicias patria, quid perdita cali

Gaudia, quid superos commemorare juvat?

Heu! magis afficiunt maestum praesentia pectus,

Ipseq; sum lacrymis causa sat apta meis.

Exulat orbe pudor, terras Astraea reliquit,

Sub pedibus pietas, fasq;, fidesq; jacent.

Vis colitur, jurisq; locum sibi vendicat ensis,

Per vetitumq; ruit gens scelerata nefas.

Contemptrix cali, vilisq; avidissima terra,

Improba turba soli sordida frustra colit.

Omne scelus regnat, gula, luxus, furta, rapina:

Fanda, nefanda, malo mixta furore licent.

Ipsē ego post puras sancti baptismatis undas,

Post ea quae religant me tria vota Deo,

Heu? quoties merui violati Numinis iram,

Committens varijs crimina foeda modis?

Ergo

Ergò ferite genas, savite in pectora palma,
 Ergò truces virgis scindite terga manus:
 Imminet ecce dies post tot peccata verendus,
 Stamina quo vita mors furibunda secet.
 Tendimus huc omnes, nulli mors dira pepercit,
 In se quisq; sui funeris arma gerit.
 Delicias luctus sequitur, malè sana voluptas
 Multa sub Hybleo melle venena premit.
 Sustinet hanc scenam tellus, hæc fabula mundum
 Ludit, & in tragico vita dolore gemit.
 Atq; utinam cuncti cessarent morte dolores,
 Sed gravior post hanc luctus, & horror erit.
 Iudicium superest, & ineluctabile tempus,
 Arida quo tellus igne soluta ruat.
 Cinthia pallescet, vaga sidera luce carebunt,
 Celabitq; nitens Phæbus in axe jubar.
 Atq; iterum tellus effundet in aëra viva
 Corpora, quæ vasto claudit avara sinu.
 Tum veniet Iudex procerum comitante caterva,
 Et dicet reprobis, ite, venite probis.
 Heu? quantus feriet tunc noxia pectora terror?
 Impia quo poterit turba latere specu?
 Ab! miser, ab! quantis tormentis tunc cruciabor,
 Si mihi sit merito pœna luenda rogo?
 O mors! ô Iudex! & inexorabile Numen:
 O mors! extremum non habitura diem.
 Parce anima mens ceca tua, sorti q; futura
 Prospice, nè incautum nox tenebrosa premat.

Felices

*Felices nimium lacrymæ, quæ Numinis ira
Cedit, inexhaustis currite semper aquis.
Currite, & in duplices vertantur lumina fontes,
Perq; oculos undæ, qua data porta, ruant.
Nam licet Oceanus me fluctibus amplius inundet,
Nulla meis lacrymis unda sat esse potest.
Flebilibus capi nascens vagire querelis,
In lacrymis vixi, par quoq; finis erit.
Quod si mersa semel fuerint mea crimina planctu,
Tunc aberit, causâ deficiente, dolor.*

De Columba ex Arca Nôe dimissa
ad explorationem, an tellus jam sicca,
& detecta egressionem permetteret,
Claudius Marius Victor; sic canit:

*Ergo emissa semel vitali è sede columba
Nil referens certi, rursus dimissa reportat
Paciferae frugis parvum libamen olivæ.*

METRVM XXII.

Pax ubi invenienda ?

O *Sincera parens beatitatis,
Cæli delictum, Deiq; proles,
Pax terræ colamen, decusq; morum,
Pax cunctis potior Ducum triumphis,
Quos mundi colis abditos recessus ?*

Hic te sollicito requirit aestu,
 Urbanos fugiens procul tumultus,
 Hic inter scopulos, vagesq; fluctus,
 Spumantis pelagi latere credit,
 Hic deserta petit loca, & per antra
 Te quaerens varias peragrat oras.
 Quâ lucens oritur, caditq; Titan.
 Hic ut te celer assequatur, aurum
 Congestum colit, atq; dignitatum
 Regalem sibi præparat honorem,
 Hic demens juga scandit, & remotos
 Perscrutatur agros: tamen supernæ
 Hi pacis nequeunt bonis potiri.
 Cur sic ergo tuum benigna Numen
 Celans implacidum relinquis orbem?
 Pacem sic ego sciscitabar: illa
 Respondit: Proprio imperare cordi
 Si nôsti, tibi cognitumq; Numen,
 Possessumq; meum est: sinu receptam
 Sic me perpetuo coles amore.

ME.

METRVM XXIII.

Sicut sol, ita & homo, vix
natus, vergit statim ad
finem.

Phosphorus ecce diem solito properantior
offert,

En roseo fugat astra flagello.

Purpureis evecta rotis Tithonia conjunx

Iam reduci parat aethera Phæbo.

Ecce moræ impatiēs tremulis emergit ab ūdis

Claro fulgens Cynthius ore.

Nascenti arridet persusum lumine cælum,

Plaudit tellus, concinit aër,

Vix tamen æthereo, rutilans effulsi in axe

Terris undiq; luce relectis.

Cū subito excelsū cæli conscendere cliuū

Cursū nititur ocyor Euris

Attollitq; diem, medioq; è culmine victor

Totum flammis concremat orbem.

Mox jam defessus rutilantes contrahit ignes

Æquoreas declivis in undas.

Deficit heu senio languens, victusq; recedit

Obscuris obnuptus ab umbris.

Primum humili, hinc celsâ fulgebat lampade,

Furvæ cessit tempora nocti. (tandem

Flet largis cæcum lacrymis, soliꝫ cadenti

Tellus aggemit, aggemit ær

Funereis facibus prælucent sidera, terram

Nigro nox involvit amictu.

Scilicet hæc hominũ norma est, vitæꝫ fugacis,

Quæ nascens jam desinit esse.

Quid senium, & multos fingis mansura per

Vitæ gaudia cæca juventus. (annos

Hora volat, finis properat, nox atra tenebris

Imminet, & caligine multa.

Vive igitur, medio dum Phæbus in æther

Vive hodie, cras vivere serũ est. (fulget,

METRUM XXIV.

*Contemptus terræ, eleva-
tio ad cælum, varijꝫ affe-
ctus amantis animæ.*

Hæc est quod opto: cætera diffluunt

Vernæ more nivis, quæ tenui halitu

Spirantis Zephyri liquefit.

Quid mihi Regum culmina, quid opes,

Quid

*Quid mollioris gaudia vitæ,
 Aut vanæ ingeritis præmia gloriæ,
 Gentes sinistro tramite deviæ,
 Iussiq; indociles Dei?*
*Omnia sordent: quidquid celsum
 Magno cælum continet ambitu,
 Quidquid tellus fœcunda parit.
 Tu Rex beate cælitum,
 Mundi sator & rector,
 Humani generis spes, amor, & quies,
 Qui lucido astrorum in solio sedens,
 Intimos cordis penetras recessus,
 Interna pelle nubila,
 Compone fluctus turbidos,
 Ut spiritus contagio
 Emancipatus corporis
 Tranquillus ad te convolet.
 Da votis facilem te Pater optime,
 Tuæq; lucis fulgidum menti iubar
 Emitte cælitus,
 Ut rursus patrio reddita cælo
 Veri se repleat luminis haustu.
 Tu poli, terræq; præses, tumidi quoq; pelagi
 Moderatrix mens veni, cuncta regens vice
 stabili.
 O sacrû mundi decus, Patris & unica soboles.
 A a 3 Tuo*

Tuo semper Parenti sapientia similis,
 Intelligibilium expressio, nec Patre junior,
 Nec minor, lux sempiterna, effigies nitida Dei
 Te semper generat, & semper amat, tibi pla-
 cidus.

Annuit semper Parens: cōstat perpetuus amor
 Geniti & Genitoris, ambos nū fœdere sociat
 Eterno unus amor, & spiritus hunc sine nu-
 mero

Numerū facitis, Bonū simplex unica Deitas,
 Simplex o æternitas, parq; potentia, par amor
 Tibi cū Patre est. Nihil te sinē dicere potis est,
 Qui verbo cuncta dicit. Sine te nihil opifex
 Aut facit, aut firmat; à te omnia condita
 numerantur,

Artēq; habuēre, normā quoq; pondera, speciē.
 Huc igitur ades boni fons, sapientia, maculas
 Absterge mentis, cernere ut vultum queam,
 Vultum, beatos qui facit Angelos.

Tu quoq; amor DEVS,
 Amor perpetuus Patris,
 Perpetuus Verbi amor,
 Viriq; compar, utriusq; vinculum.
 Quom vis volendi, vis redamantium
 D corde semper intimo
 Spirat perenni amore,

Ades

Ades præpes ex alto
 Septena mitte munera.
 Tu lux siderea domûs,
 Sanctorum fomes ignium,
 Furor igneus Orbis
 Hospes pudici pectoris,
 Sanctiq; amoris pronubus;
 Dux ad astra, cordis ardor
 Et mentium voluptas.
 Huc opum Diviniorum
 Dives, pax animi veni:
 Arcem pectoris occupa,
 Nam tuo sine Numine
 Mens torpet, ut flumen gelu.
 At at recenti quo feror impetu
 Sublimis inter Nubila?
 Subitus unde mihi
 Venit furor? quis me vigor,
 Aut quæ vis nova concitat?
 Cernitis! an rerum species deludit amantem.
 Per medias equitare nubes,
 Stelliferumq; pede
 Iam videor calcare polum,
 Ad calitum consortium:
 Super nitentis æthræ
 Altum feror cacumen,

*Ecce domus, turesq; recedunt: (tellus,
Iam pendula in minimam coit pilam globosa
Iam solis, & lunæ supervenor, Iovisq; sedes.
Modò quod erat culmen refulgens siderum
pyropis,*

*Calco pavementum pedibus, & sancta cerno
Delubra Divum,*

*Trahit me spiritus post se, meumq; sacro
Amore pectus urit.*

O raptus, atq; excessus animæ,

O mysticum silentium!

O sancta solitudo!

(amoris

Pretiosa mors carnis, quies tranquilla, san

Intus ferens incendium,

Suspensio beata,

Pax cordis, & suavissima

Mentis bonæ volaptas?

O quas Aligerum lyras,

Dulcesq; cantus audio?

Carmina resonant non prius

Accepta æthereis choris.

Auditis ut decemplicem

Amor intus agit molem?

Amor hic est, nosco sonantium

Errores digitorum.

Vt blanda pubes calitum,

Arripit aure sonitum.
 Vt accinunt amor
 Aligerum Phalanges?
 Vt astra mulcent cantibus?
 Hic eloquenti verberare
 Chelym flagellat auream.
 Hic garrientes fistulas
 Blandis maritat vocibus.
 Hic leni auratum pectine tangit ebur,
 Doctus hic est molles ungue cedere fides.
 Hic patrios sacro personat ore modos.
 En ut decoris saltibus
 Errantes quatunt solum?
 Nunc implicantur invicem,
 Et sese manibus trahunt.
 Nunc delicatis gressibus
 Cantui occinunt sonoro.
 Nunc in obliquam celeres catervam
 Disgregant sese placido rotatu,
 Lætoq; plausu;
 O pura mentis gaudia!
 O sancti amoris orgia!
 Adeste amantes quotquot ad æthera
 Promovet virtus levioere pennâ
 Adhuc caduca corporis
 Mole gravatos.

Nunc est canendum, nunc superùm choris
 Fas est adesse, & psallere.
 Ergò huc canora tympana, & lyras ferte,
 Ferte vota, ferte laudes.
 Ludite, plaudite, psallite amanti:
 Dulcia carmina pangite amanti:
 Pangite laudes, fundite versus,
 Calica promite cantica amanti.
 Pulsate novo sidera cantu.
 Plaudite cæli, plaudite terræ,
 Plaudite amanti.
 Sed quis repente corripit mentem dolor,
 Et nostra turbat gaudia?
 Scilicet injecta curarum compede, & arcto
 Carnis ligata vinculo
 Ad ima rursus labitur
 Mens è polorum culmine.
 O amor! ô tetricæ tandem fastidia vite!
 Tolle: ut sidereâ tibi liber sistar in arce,
 Tunc mea securus jactabo gaudia, quando
 Unica vita duos junget, & una dies.

ME.

METRUM XXV.

Invocatio Beatæ MARIÆ
Virginis.

*V*irgo Regina polorum ,
 Summo quæ proxima Regi
 Mundi moderaris habenas ,
 Huc è celsa ætheris aula
 Descende , & disijce mentis
 Rutilo splendore tenebras
 Meritas tibi promere laudes
 Amor est , cupitq; per omnes
 Te dignos currere honores.
 Apis , ut studiosa , per arva
 Quæ circumludit Hymetti ,
 Non uno è cespite florum
 Carpit fragrantia mella :
 Sed leti plurima veris
 Præguſtans munera , rorem
 Depascitur avia cæli.
 Laudes sic ipse , tuasq;
 Celebrando carmine dotes ,
 Si tu , dulcissima Virgo ,
 Lucem digneris , & æſtum

Tene-

Tenebroso infundere cordi;
 Tu nostræ es gloria stirpis,
 Tu lux, tu vita, decusq̃,
 Hominum spes certa, tuumq̃
 Observant omnia nutum.
 Placido me respice vultu
 Inopem, incertumq̃ salutis.
 Da verè cernere solem
 Cæcâ caligine pulsâ.
 Duce te, mihi gratia semper
 Divina aspiret, ut omni
 Deterfa ærugine culpæ
 Puro tibi pectore possim
 Canere hymnos, pangere versus.

Sedulius de laudibus Beatissimæ Vir-
ginis **MARIÆ.**

Salve Sancta Parens, enixa puerpera Regem
 Qui calum, terramq̃ tenet per sæcula, cujus
 Imperium sinè fine manet, qua ventre beato
 Gaudia Matris habens cum Virginitatis honore
 Nec primam similit̃ visa es, nec habere sequentem;
 Sola sinè exemplo placuisti famina Christo.

METRVM XXVI.

ELEGIA QVINTA.

Laudes & Invocatio

Beatæ Virginis.

*V*irgo Parens, utcunq; polo me cernis ab alto,
 Audi pulsantes sidera celsa preces
 Quod mea cumq; sonat fidibus testudo canoris.

Lenior è summis excipe, Diva choris.

Tu sinè labe nitens precibus sera crimina mundi

Diluis, & certam pandis ad astra viam.

Te duce tuta ratis rapidis dat carbasa ventis.

Iussa cadit nutu fracta procella tuo.

Te sinè nec flores horti, nec gramina valles,

Nec fruges campi, grataq; poma ferunt.

Te celebrant tardiq; senes, juvenesq; decori,

Et quibus invicto robore membra vigent.

Te teneri cantant pueri, innuptaq; puella,

Gratus perspicua virginitate chorus.

Et tibi lacteoli, dulcissima turba, puelli

Truncatis recinunt carmina blasa sonis.

Te calum, te terra colit, te pontus adorat,

Omnia te mundi vota, precesq; petunt.

Me licèt horrenda circumsonet ira maleæ,

Demersumq; minax obruat unda caput.

Dum pelagi rabies sævit metuenda per ipsas

Eripiet nantem, me tua dextra neces.

Sive

*Sive Pharos, pontiq; jubar, navisq; vocari
 Ambiguus nautis, seu cynosura cupis.
 Si me mortifero comburat Syrius aestu.
 Afflet & ardenti dirus ab axe calor.
 Tu mihi tegmen eris, seu cello in colle cupressus,
 Seu cedrus dici, seu terebinthus amas.
 Bellica si armato circumstent agmina campo,
 Si me mille enses, spicula mille petant.
 Tu mihi, tu Virgo, diceris eburnea turris.
 Quam nequit excussis rumpere flamma globis.
 Si te sideribus noctu mea Musa fugatis
 Evocet, ut referas ore nitente diem,
 Clarior aurora potis es tu sola tenebras
 Discutere, & roseâ fronte aperire diem.
 O tandem titulo gaudes quocunq; vocari,
 Huc ades huc felix ad tua sacra veni.
 Mille tibi spirant teneri suspiria cordis,
 Mille calent ara, pectora mille gemunt.
 Quaq; patet tellus liquido circumflua ponto,
 Mille tibi laudes, carmina mille sonant.
 Scilicet horribili scelerum sub nocte sepultis
 Tu rutilam praefers per vada caeca facem.
 Celsaq; calorum referas penetralia genti,
 Quae propè Tartareis mersa peribat aquis.*

*Radulphus ardens in sermone de
 laudibus MARIAE sic ait.*

*SI malignus spiritus nos infestat, si
 caro*

caro nos tentat, si mundus nos oppu-
 gnat, ad MARIAM respiciamus, ad
 MARIAM confugiamus, ad MARIAM
 conclamemus. Ipsa est nostra singula-
 ris apud DEUM Advocata, Adjutrix
 Christi in humani generis redemptio-
 ne, apex gaudij nostri, dulcedo cre-
 dentium animarum, spes & anchora
 Christianorum. Ipsa est Arca sancti-
 ficationis, quæ manna cæleste portavit;
 capacitas illum capiens, quem nulla
 res capit; cælum ejus, qui fecit cælum;
 receptaculum Divinitatis. Ipsa est
 fons lucis omnem hominem illuminan-
 tis; ortus solis, qui nullum potest fer-
 re occasum, puteus aquæ semper vi-
 ventis; Bonum & lætitia generis hu-
 mani, fons incorruptionis, fons mise-
 ricordiae, janua poenitentiae; Fons si-
 gnatus sigillo totius Trinitatis, Inter-
 emprix universæ hæreticæ pravitatis.
 Ipsa est navis institoris de longè por-
 tans panem suum, Mater clementiae,
 & pietatis; Flos de spinis spinâ ca-
 rens; solatium eorum qui affliguntur,
 ultio eorum qui vexantur; amictus
 eorum,

eorum, qui sunt nudi, quæ semper suis
 ulnis fovet Christianos. Ipsa est fide-
 lium fax, Nutrix omnia nutrientis,
 omnia continentis comprehensio; Ru-
 bus ardens qui non exurit, revoca-
 tio Adæ, Evæ redemptio; castitatis
 speculum, sigillum virginitatis; Ta-
 bernaculum non manu factum, id est
 non hujus creationis, per quam omnia
 ad unitatem, & perfectam charitatem
 sunt redacta.

Esto igitur protectrix nostra Bea-
 tissima Virgo, & audi preces servo-
 rum tuorum ad te clamantium die ac
 nocte. Deprecare unicum Filium tu-
 um pro excessibus multorū filiorum,
 ut per te nos suscipiat, qui per te da-
 tus est nobis. Excuset apud ipsum in-
 tegeritas tua culpam nostræ corruptio-
 nis, & humilitas Deo grata nostræ ve-
 niam impetret vanitati. Copiosa cha-
 ritas tua nostrorum cooperiat multi-
 tudinem peccatorum, & foecunditas
 gloriosa foecunditatem nobis conferat
 meritorum. Domina nostra, Media-
 trix nostra, Advocata nostra, tuo Filio
 nos

nos commenda, tuo Filio nos repræ-
 senta. Ecce procido coram te, ô Be-
 nediſta, Inventrix gratiæ, Mater salu-
 tis, procido, & humilior coram te, ut
 obtineas deleri facta peccati mei, ut ju-
 beas mundari me ab iniquitate operis
 mei, ut facias me diligere gloriam vir-
 tutis tuæ, ut reveles mihi multitudi-
 nem dulcedinis Filij tui: ut des mihi
 loqui & defendere fidei sinceritatem
 Filij tui: concedas etiam mihi adhæ-
 rere Deo, & tibi, servire Filio tuo, &
 tibi, illi, sicut Factori meo, tibi, sicut
 Ancillæ Domini omnium, illi, sicut
 DEO, tibi sicut Matri Dei. Attende,
 & fac per gratiam, quam invenisti,
 per prærogativam, quam meruisti, &
 nè deseras sperantem in te. Ad te
 confugio singulare solatium cordis
 mei, ut te intercedente, JESUS Chri-
 stus Redemptor meus participem me
 faciat gloriæ suæ, qui te mediante fa-
 ctus est particeps humanæ miseriæ,
 & infirmitatis.

ME-

METRVM XXVII.

Conjuratio inferni, ut portas pandat.

*V*Os a vernales lacus, stygisq; squalentes specus,
 Tanari tristes hiatus, ac inamenum chaos,
 Vos gementum dira regna, Ditis obscura domus.
 Semper orbis orbis, infames paludes tartari,
 Igneis quæ fluctibus manes rotatis noxios,
 Vos sorores dissolutis concita serpentibus,
 Quæ cruentis fœda pœnis vindicatis crimina:
 Vos furoris administri, quæis severa Numinis
 Conterit reos manus sævisq; castigat modis.
 Si quid in surdo igne voces prævalent viventium.
 Huc adeste, & immitis pandite cito portas stygis.
 Pandite horrendos sinus, liceatq; mæstifica obstitum
 Nocte diem cernere: liceat lucunas sulphure,
 Fœtidaq; pice plenas intueri: ubi vindex
 Pœna justè noxiorum sævit in præcordijs.

METRVM XXVIII.

Mortis contemplatio, vera
 Philosophia.

*N*il me ampliùs cultos legere libros juvat,
 Et noctu ad tremulas evigilare faces.

Quid-

Quidquid lycaum, porticus quidquid sonat
 Despicio: Et quidquid Castalis unda rigat.
 Iam nolo putri squalidas chartas situ
 Excutere, Et vigili volvere scripta manu.
 Docere parvus plura me potest cinis,
 Dum pede nobilium contero membra Ducum.
 Cessate maestis questibus funus sequi,
 Si Patris, aut nati flamina Parca secet.
 Sincera amarum comprimat luctum fides,
 Discite, quid mutis vocibus urna sonet.
 Quod cernitis cadaver in me conditum
 Nunc Mage Riphæo diriguissè gelu.
 Non semper esca vermibus fœdis erit,
 Nec rigidus semper conteget ossa lapis.
 Sed surget arcta vincla dissolvens necis,
 Cum dabit extremum buccina in orbe sonum.
 Non ergò mors est horrida, ut vulgus putat,
 Nec miserum, ut vivas, est periissè semel.
 Quid larva inanis incutit viris metum?
 Mors nihil horrificum, quod timeatur, habet.
 Hæc post tumentis naufragum murmur maris
 Navibus optatâ dat statione frui.
 Hæc post laborem premium justis refert,
 Matris Et in gremio corpora fessâ locat.
 Hæc vita mors est, sic graves tradunt Sophi,
 Mors est in mundo vivere, vita mori.

Silius

Silius Italicus tumuli & cinerum
discordes sententias apud diversas gen-
tes his versibus describit :

*Tellure, ut perhibent, is mos antiquus Ibera,
Exanima obscenus consumit corpora vultur.
Regia cum lucem posuerunt membra, probatum est
Hircanis adhibere canes. Ægyptia tellus
Claudit odorato post funus stantia saxo (bram.
Corpora, & à mensis exangvem haud separat um-
Exhausto instruit Pontus vacuare cerebro
Ora virum, & longum mytrata reponit in ævum.
Quid qui reclusa nudos Garamantes arena
Infodiunt? quid qui saxo sepelire profundo
Exanimis mandant Lybicis Nasamones in oris?
At Celta vacui capitis circumdare gaudent
Ossa (nefas) auro, & mensis ea pocula servant.
Cecropida ob Patriam Mavortis fortè peremptos
Decrevêre simul communibus urere flammis.
A gente in Scythica suffixa cadavera trunco
Lenta dies sepelit putri liquentia tabo.*

METRVM XXIX.

Omnia cōtemnenda, quia
mors inexorabilis est.

Utilis placet dolor,
Quem spes futura mitigat salutis,
Nec

Nec labor premit gravis ,
 Si mereor illo gloriæ coronam.
 Terra quid mihi , aut polus
 Offert colendum ? vilibus probrosas
 Gentibus relinquo opes ,
 Satis beatus pauperum lacernâ.
 Quid juvat domum auream ,
 Iovemq; clausum possidere in Arca ?
 Lautâ quid refert gula ,
 Et empta magnis sumptibus voluptas ?
 Quid metalla , quid Goe
 Merces beatæ , Mexicig; gazæ !
 Nam nec aurea domus ,
 Quæ levigatis emicant columnis ,
 Nec clientium favor ,
 Aut sceptrum Eois fulgidum lapillis ,
 Nec minax tubæ fragor ,
 Mortis rapacis impetum còercent.
 Ite nobili luto
 Tagi , vel Hermi , splendidisq; cænis
 Ite divitum manus ,
 Lethig; duras submovete leges.
 Quòd si avara civium
 Potentiorum dona , vel coronæ
 Nil juvant , & ultimis
 Revulsæ ab Indis , ac Hydaspæ gemmæ

Si nihil valent opes,
 Nec sceptrâ Averni leniunt furorem:
 Sat mihi abdito in specu
 Arcto cibari pane, & amnis undâ.

METRUM XXX.

Felicitas Pœnitentis

Quam felix est, cui scelerum
 Christus vincla resolvit,
 Quem nullæ inficiunt sordes,
 Imo in corde latentes.
 Conditur huic ferrum, & redeunt
 Auri fulgida sæcla.
 Nectare manant huic colles,
 Sudant balsama campi.
 Huic Regales fundit opes
 Pleno copia cornu.
 Et quocunq; terit pedibus
 Terram, sub pede florent
 Lilia, purpureæq; rosæ,
 Et veris decus omne.
 Hunc fas, hunc sequitur pictas,
 Hunc sincera voluptas.
 Hunc terræ, cæliq; bonis
 Virtus alma coronat.

Sive

*Sive citum rapit hora diem ,
 Seu sol lumina reddit.
 Ille hilaris semper superos
 Curvo poplite adorat.
 Quidquid crastina lux referat
 Expectat placido ore.
 Innubiq; nitens vultu
 Fraudes nescit & iram.
 Horrida terris bella fremant ,
 Tristis sæviat Orcus.
 Immineat terribilis mors ,
 Fractus corruat orbis.
 Hic lætus constansq; animi
 Semper pace potitur.
 At qui mortifero infectum
 Gestat crimine pectus ,
 Quanta miser patitur , quanta
 Intus prælia sentit ?
 Quot curæ cor dilacerant ,
 Quot pœnis cruciatur ?
 Sic sic præcipites Erebo
 Damnat fœda Dione.
 Sic Bacchi , sic perdit opum
 Effrenata cupido.
 Discite mortales sapere ,
 Veram discite vitam.*

*Ponite criminibus finem
Culpas mergite planctu.
Ipsa pijs cedit lacrymis.*

Alcimus Avitus Archiepiscopus Vienne-
nensis his versibus explicavit.

*Pœnitet ambigüe, quem serò pœnitet : ergo
Præsens spatium nobis dum creditur ævi,
Dum patulam cunctis Christi clementia sese
Præbet, præteritæ plangamus crimina vitæ,
Pœniteatq; olim negligenter temporis acti
Dū licet, & sano ingenioq; animoq; valeamus.
Nam qui peccatum moriens dimittit, & ipsa
In seruum tempus differt admissa fateri,
Non tam dimittit, quàm dimittatur ab illis.*

METRUM XXXI.

Litaniæ.

Densa triumphali video procul agmina
pompâ,

Atq; hilares placidosq; choros.

*Plurima pars niveis, varijs pars altera fulget
Vestibus, auratisq; stolis.*

*Iam sinuosa leves rapuerunt stemmata venti
Iamq; micant pia signa crucis.*

Tarta-

Tartareas Christi propellit imago phalanges,
Et Superi properant cives.

Ordo Sacerdotum, venerandaq; turba canoris
Carminibus passim exultant.

Iam devota sacris aperitur scena viretis

Iam sanctæ resonant voces.

Alternis precibus pueri, innuptæq; puella,

Atq; senes; juvenesq; canunt.

Ter circum viridi tremuerunt vertice colles

Ter longè tremuit tellus

Terq; repercussas resonabilis edidit echo

Voces, ter sonuere spæus.

Audio divinæ dotes titulosq; Parentis,

Audio virgineas laudes.

Sed prius Ingeniti, Genitiq; & Pneumatis al-

Placârunt precibus Numen. (mi

Tū puras, celeresq; canunt sinè corpore mētes,

Ter triplici agmine distinctas.

Nec veteres reticent Patres, mundi q; parētes,

Et sacros recinunt vates.

Quos & Apostolici sequitur sacra turba senatūs

Magna q; Discipulorum acies.

Et pueri insontes, rabies quos sæva Tyranni

Sustulit è gremio Matrum.

Vos quoq; commemorant, partā qui morte co-

Vertice sacrato geritis.

(ronam

Et vos Pōtifices, & quos sinè sanguine virtus
Vicinos dedit esse DEO.

Postea feminei celebratur candida sexus
Virginitas, castusq; pudor.

Sic omnes cæli Proceres, patriæq; beatos
Solicitant precibus cives.

Deniq; per Christi mysteria sacra precantur
Annuat ut votis Numen.

Sit procul omne malū, det prospera cūcta sereno
Respiciat populum vultu.

Vtq; Dei mitis, mundi qui crimina tollit,
Agnus sit miseris clemens.

Ista ter effati reticent: sed multa perorat
Pronus humi sacer Antistes

Et cū sancta preces plebs finiit, æthera pulsan-
Plausus ac tremulæ voces.

Picteq; tolluntur Christi vexilla, recedit
Hinc chorus, & repetit templum,

Tum subito Aligerum manibus collecta ferun-
Ante Deum populi vota. (tur

Annuat his Numen, Divinaq; munera terris
Divite largitur dextra.

METRUM XXXII.

Affectus animæ videndi
DEUM.

*T*V magne cæli Reſtor, & mundi Arbitr,
 Tremende, ſempiternæ, incluſtabilis,
 Idem ſeverus ultor, & clemens Pater,
 Immenſa rerum ſpatia qui nutu regis,
 Cui ſervit orbis, trinus, ac unus DEVS.
 Da celſa virtutum juga, & ſuperum choros
 Transcendere. Obſident iter vepres mali,
 Et denſa tribulorum ſeges: bellum ferox
 Intentat hoſtis, fingit & vanos metus.
 Sed, te juvante, per rubos & per truces
 Spinas iter parabo: me nullus labor,
 Pericla tenent nulla, ſunt dudum mihi
 Hæc tela præviſa. Adjuva audentem Deus.
 Serena donec fulgeat mihi dies,
 Qua ſiſtar innocens, & omnis inſcius
 Labis tuo conſpectui. Quid hic moror,
 Et hæcenus mortalium ſordes colo?
 Vos nubila ſuper ſolis & lunæ vias
 Me citius erigite volatu præpeti.
 O me beatum! jam mihi tellus perit,

*Et regna decreſcunt, ſummus mundi globus
 Vanefcit in punctum: ô veneranda Numinis
 Præſentia! ô cæli coruſcantes faces!
 Perenne vitæ gaudium, verum decus;
 Et clauſa nullo margine voluptas? dies
 Quem nulla temerat nox, honorũ fons patens?
 Utinam ſemel veſtris receptus ſedibus
 Quiete verâ perfruar. Tu nè cadam
 Adſis Pater. Gravi ruinæ eſt proximus
 Quicunq; ſinè te ad ſidera aſcenſum parat.*

Divina manus hominem ſic effinxit,
 ut erectus vitæ negotia obiret, & oculis
 cælum reſpiciat, & inde liqueat
 actiones hominum, à terræ facibus re-
 moveri debere: de quo Manilius.

*An quoquam genitos niſi cælo credere fas eſt
 Eſſe homines? projecta jacent animalia cuncta
 In terra, vel merſa vadis, vel in ære pèdenti:
 Omnibus una quies venter, ſenſuſq; per artus.*

- - At homo ſtetit unus in arcem
 Erectus capitis, victorq; ad ſidera mittit
 Sidereos oculos, propiusq; adſpectat Olympum,
 Cognatũq; ſequens corpus, ſe quærit in aſtru.

METRUM XXXIII.

Divitum curæ.

*N*on tot monstra cubant tartareo in specu
 Non tot parit Lybia feras:
 Quot curæ lacerant pectora Divitum,
 Quot opprimuntur fluctibus.
 Magnatum requies exulat atrijs,
 Auro bibuntur toxica.
 Nec mentis stolidæ prælia, sopiunt
 Fasces, opes, & purpura.
 Ah! regnum miseri, veraq; gloria,
 Quâ sede lateat nesciunt.
 Rex est, & tumido ditior Attalo,
 Rex esse qui potest sui.
 Hæres ipse sui possidet omnia,
 Qui se obsequentem possidet.

METRUM XXXIV.

Vera felicitas.

O Curas hominum stultaq; pectora!
 O quàm desipiunt! qui nimium suo
 Credunt arbitrio, qui sapiunt nimis?
 Quàm desiderijs difficile est modum,
 Et metam proprijs ponere sensibus?

Ne-

Nescitis cupidi quo lateant loco
 Mundi prosperitas, veraq; gaudia:
 Felicem Tyria non faciunt opes,
 Non gemmae, & Perues munera divitis,
 Non regni solium, rubraq; purpura.
 Sed laetis fruitur conditionibus
 Aeternis inhians semper honoribus,
 Qui prudens timidos edomuit metus,
 Foedoq; imposuit frena cupidini,
 Nec vultum variè fingit ad improba
 Plebis consilium, nec popularibus
 Arcatur studijs, quem sapientia,
 Et virtus solidi pectoris hospita,
 Quem simplex probitas, nudaq; veritas,
 Quem firmat pietas, & niveus pudor.
 Quem fluctus tumidi non quatiunt freti,
 Non missum supero fulmen ab æthere,
 Non vultus procerum seiva minantium.
 Qui tato latitans eximius loco
 Infra se placidus conspicit omnia.
 Quem non ambigui dura necessitas
 Fati terrefacit, nec queritur mori.
 Hic felix nimium, solus & Entheco
 Per nubes medias percitus impetu,
 Sublimem intrepidus transiliet polum.

Quod

Quod solæ virtutes faciant beatum,
& ille sit verè beatus. Silius canit.

*Quæ non ambigui fasces, non mobile vulgus,
Non leges, nō castra tenent, qui pectore magno
Spemq̃, metūq̃, domat, vitio sublimior omni,
Exemptus fati, indignantemq̃, refellit
Fortunam, dubio quem non in turbine rerum
Deprendet suprema dies, sed abire paratum,
Ac plenum vitâ.*

METRUM XXXV.

Viri justī constantia.

*S*eu tibi blando speciosa vultu
Fortuna sæpe rideat.

*Sivè te sævis agitet procellis,
Durisq̃, curis implicet.*

*Disce fatalem superare sortem,
Omnemq̃, casum vincere.*

*Nulla te sursum vehat aura, nullus
Te mæror infra deprimat.*

*Mitius diræ ferient sagittæ,
Si te paratum torqueant.*

*Iustus, & mentis solidæ futurum
In pace bellum præparat.*

*Si ruat mundus, pelagusq̃, terræ
Vndas furentes misceat.*

Si

*Si polus flammis rapidis cremetur ,
 Si monstra sevant stygis.
 Spernet hic stultos populi tumultus ,
 Spernet fragores fulminum.
 Et per angores pereuntis orbis
 Fragmenta calcans ætheris
 Transiet constans timidusq; lætus
 Cernet cadentium metus.*

METRUM XXXVI.
Conformitas humanæ vo-
luntatis ad Divinam.

H*Oc fixum est mihi, Numinis verenda
 Leges, ac nutus, jussaq; sancta sequi.
 Vultus nam gero pendulos ab illis ,
 Meta voluntati figitur ista bonæ.
 Deprensa ut pelago levis carina,
 Horrida præcipiti bella movente Noto,
 Sidus Parrhasiæ requiritur ursæ,
 Tutior ut dubium naufraga radat iter.
 Arclos sic mihi erit Dei voluntas ,
 Seq; mea hoc semper sidere vita reget.
 Seu langvore velit , malaq; feбри,
 Fractaq; continuo membra dolore premi.*
 Seu

Seu me pauperie imperet gravatum,
 Libera servili subdere colla jugo.
 Sen duro jubeat labore fungi,
 Reddere & ingenuâ sordida pensa manu.
 Nil fœdum, nil aestimabo durum,
 Quamvis ille novis sæviat usq; modis.
 Quod si me jubeat lacus, nefandis
 Quos merui noxis, sponte subire Stygis;
 Ah? malle Stygias Deo jubente
 Pœnas, quàm celsi splendida regna Poli.
 Calorum Proceres, celiq; Regna
 Quid mihi vobiscum, si meus absit amor?
 Ut solem Glyciæ aspicias fugacem,
 Panditur Eoo, clauditur occiduo.
 Sic sol est mihi Numinis voluntas,
 Hac sinè cuncta mihi non tenebrosa forent.

METRUM XXXVII.

Oratio Dominicalis.

Fallor? an excelsa nemorosi è vertice mōtis
 Me DEVS ipse vocat?
 Orantes, inquit, claudant penetralia cordis,
 Sit procul omne nefas.
 Nam Pater è clara nitidi caligine celi
 Abdita cuncta videt.

*Sit modus hic precibus, longo sermone loquaces
Non amat ille viros.*

*Sūme Parens hominū, solio qui celsus Olympi
Conteris astra pede.*

*Sit tibi laus, nomenq; tuū venerabile prorsus
Orbis ubiq; colat.*

*Magna triumphantis veniant cito Regna co-
Imperiumq; poli. (hortis*

*Angelicis sociata chorus gens jura sequatur,
Quæ tibi cumq; placent.*

*Da nobis hodie panem, da pakula, gentes
Ne premat atra fames.*

*Fratribus offensas ut nos dimittimus, & tu
Omne remitte scelus*

*Hostis tartarei victos succumbere iniquis
Nè patiare dolis*

*Sed cunctis relevet presentibus, atq; futuris
Nos tua dextra malis.*

De adventu Spiritūs Sancti super
Apostolos, & quod variæ lingvæ ab
uno ore ingenti prodigio auditæ sunt
Rusticus Helpidius canit :

*Consona diversas fundit narratio lingvas,
Barbara quæq; suam cognoscit natio vocem,
Quàm sacer humano profatur spiritus ore.*

ME-

METRUM XXXVIII.

Myſteria Fidei.

Numen coruſco ſidere pulchrius
 Non uſitatis per liquidum æthera
 Vidi triumphans curribus, & vagos
 Circumvolantes Aligerum choros,
 Quis credet? ingens jam nebula globus,
 Clariq; Nimbus luminis, æra
 Perrumpit æthræ non ſine gaudio.
 En jam beatis ſepta cohortibus
 Regina celſo venit ab æthere.
 Agnoſco vultum: nam fidei ſacra
 Dudum mihi ſunt cognita ſtemmata,
 Sanctaq; felix religio Crucis.
 Quæ forma & oris quanta ſerenitas,
 Qualis venuſtas? audio jam propè
 Vocem loquentis, jam reſonat polus,
 Favete linguis: nil humili juvat
 Cantare plectro, fas mihi grandia
 Non dicta priſcis carmina vatibus,
 Fas & ſupremi ſit mihi Numinis
 Arcana cunctis gentibus eloqui.
 Fas ſit canoris verſibus ardui
 Tentare cæli difficiles vias.

Nec me paventem sancta fides vetet
 Incomparandæ vim sapientiæ,
 Veriq; fontem, lucis & igneas
 Lustrare sedes, & superum domos.
 O grata summis cœlitibus fides,
 Per quam sereni semper iter poli
 Cunctis apertum Terrigenis patet.
 Tu sola nobis das penetralia
 Semper verendi noscere Numinis.
 Tu sola Trinum fallere nescia
 Vnumq; dicis quem colimus DEVM.
 Divinitatis principium Pater,
 Auctor bonorum sufficiens sibi,
 Immensus, omni principio carens,
 Expers fugacis temporis, ac modi,
 Dum se beatus, cunctaq; perspicit,
 Verbum Paternæ mentis imaginem,
 Prolemq; gignit persimilem sui.
 Sed cum Parentem Filius inspicit,
 Amans amantem diligit, atq; amor
 Spiratur unus, tertia scilicet
 Persona summum perficiens chorum:
 Vtriq; compar Numine simplici.
 Post hæc ad extra ter triplici gradu
 Rerum Creator per sobolem suam
 Distincta cœli condidit agmina.

Sed dum supremi de numero chori
 Vnus receptâ dote superbiens,
 In conditorem spirituum ferox
 Insanientum prælia concitat,
 Heu? pulsus amplo corruit æthere
 Præceps rebelli cum comitum grege
 Damnatus igni carcere in infimo:
 Tunc erubenti pulvere compotem
 Mentis creavit progeniem, boni
 Summi capacem, nî Stygijs dolis
 Seductus eheu? mox hominum Parens
 Omnes eodem crimine posteros
 Fœdasset hosti credulus improbo.
 Natis misertus, sed miseris DEVS
 Offensionis debita noxia,
 Et dira solvit vincula criminum.
 Lignum salutem Terrigenis dedit,
 Si prima lignum perniciēs fuit.
 Nam missus alto de folio Patris
 Mortale corpus Filius induit
 E ventre puræ Virginis editus:
 Ferroq; fixus supplicium grave
 Injuriosæ sustinuit crucis,
 Vt quæ draconis conciderat dolo
 Gentem Paterno redderet ætheri.
 O ter beatos cælituum choros,

Quos scripta cælo pagina censuit.
 Iam vincla mortis, jam Stygiæ fera
 Timenda non sunt castra Tyrannidis.
 Victor resurgit Christus ab inferis,
 Infertq; fratrum primitias polo,
 Venturus inde est, cum sonitus tubæ
 Omnes tremendo iudicio offeret.
 Sed quo furenti concita spiritu
 Mens tendit audax. Desine, desine,
 Et magna parvis nè tenues modis.

METRUM XXXIX.

ORATIO

Pœnitentis ad Christum.

O Tremende Rex polorum,
 Vindex maxime criminum.
 Cui potestas & maligni
 Vis est arbitra pectoris.
 Te requiro, ad te revertor,
 O mentis vigor! ô amor!
 Qui labores, & dolores,
 Et curas hominum vides.
 Parce fonti, parce seruo
 Mortis perpetuæ reo,

Quem Catenis alligatum

Hostis tartareus tenet.

Tolle culpas, solve nexus,

Vt te perpetuò canam.

Vt videntes me solutum

Vinclis horribilis necis,

Angelorum turba psallant,

Quæ spes sit lacrymantibus.

Justinus Imperator verba facturus
ad populum se signo Crucis muniebat:
Teste Corripo Africano Pòëta, qui
dum ejus laudes prosequitur, sic canit:

Ipse coronatus solium conscendit Avitum,

Atq; Crucis faciens signum venerabile sedit,

Erectaq; manu cuncto præsentè Senatu

Ore pio hæc orans ait.

De signo Crucis sic canit Prudentius
Pòëta Christianus.

Fac, cùm vocante somno

Castum petis cubile,

Frontem, locumq; cordis

Crucis figura signet.

Crux pellit omne crimen,

Fugiunt crucem tenebræ,

Tali dicata signo
 Mens fluctuare nescit.
 Procul, ô procul vagantum
 Portenta somniorum,
 Procul esto pervicaci
 Prestigiator astu.
 O tortuose serpens!
 Qui mille per Mæandros,
 Fraudēsque fluctuosas
 Agitas quæta corda,
 Discede, Christus hic est,
 Hic Christus est, liqueſce.
 Signum, quod ipse nôſti
 Damnat tuam catervam.
 O lignum felix! in quo Deus ipſe pependit,
 Non te terra capit, ſed cæli terra videbit,
 Cum renovata Dei facies ignita micabit.

Tytirus Chriſtianus ſigno Crucis à
 peſtilentia ſervatas pecudes adſtruit
 his verſibus.

Hoc ſignum medijs frontibus additum
 Cunctarum pecudum certa ſalus fuit.

ME.

M E T R U M XL.

ELEGIA SEXTA.

Varij affectus amantis ani-
mæ erga Sponsum absentem,
& præsentem, dulcisq; lucta
amoris creati & increati.

Hei mihi, dulcis amor, mea qui suspiria
solus,

Et gemitus nōsti, cordis & ima vides,
Hei mihi, te quarens, qua non loca tristis obiui,
Nec mea vita tamen te reperire queo.

Non mihi sunt sylva, non spinea lustra relicta.

In via luctu vagi nec via spreta maris.

Sed mare dum peragro, dum terras lustrō, nec ulla

Respondent lacrymis compita trita meis:

Sentio me tantos frustra impedisse labores,

Perq; viam insuetos attenuasse pedes.

Dicite vos socj. populus genialis amantum,

Dicite, si nōstis, quā meus iovit amor.

Ille meus, vitā quem diligo carius ipsā

His erit indicijs cognitus ille meus.

Pulchrior est rutilo radiantis lumine solis.

Cælis splendidior, cum sine nube nitent.

Cynthia flammiferis quanto supereminet astris,

Tanto est Angelicis pulchrior ipse choris.

Cernite odoratis gemmantem floribus hortum,
 Cernite puniceis lilia mixta rosis.
 Cernite florifero vernantes gramine campos,
 Cernite quàm lato prata colore virent.
 Omne decus terra, nitor omnis fulget in illo,
 Et cali supero quidquid in axe micat.
 Nondum opifex rerum calorum extenderat orbem,
 Nec librata suo pondere stabat humus.
 Non Phœbus nitida lustrabat lampade terras,
 Non pelagi spumans cinxerat unda solum.
 Iamq; meus vivebat amor, flammâq; perenni
 In semet refluus fons bonitatis erat.
 Sed licet æternos sine tempore computet annos;
 Attamen illum omnis parturit usq; dies.
 Ardet, & ardenti perfundit lumine solem,
 Deq; ejus radijs sidera lumen habent.
 Iaculat ubiq; faces, terras comburit, & astra,
 Illius & gelidis incubat ardor aquis.
 O superi! ô vigiles! ô vos qui nôstis amorem!
 Dicite quando abiit, quo simulavit iter.
 Dicite vos Sancto quondam mihi fœdere juncti,
 An meus, ille meus, perditus usq; latet?
 Sed tu dulcis amor, cur non te ostendis amanti?
 Cur fugis, & sponsam deseris usq; tuam?
 Ergone, sponse animas ad vulnera cogis amanti,
 Atq; venenatâ cuspide corda feris?
 An fortè hic præsens vultum tegis obice nubis,
 Nec sinor ore tuo, nube tegente frui?

Sic tu nempe soles tacitis illudere votis ,
 Sicq; meam speras posse probare fidem.
 Ast ego te nunquam dulcissime Sponse relinquam,
 Nec mea comburet viscera falsus amor.
 Spiritus antè meus tenues vanescet in auras ,
 Quam mea mens possit non meminisse tui.
 Te mihi non enses, non unda, nec auferet ignis ,
 Ipsa licèt tristis Styx adeunda foret.
 Ergo veni mea lux: cur longà absentia amantem
 Vexat, & infestum pectora vulnus edit ?
 Ora notat pallor, totoq; in corpore langvor,
 Et tetrico in vultu mortis imago sedet.
 Sed quo nunc rapior? quis me novus occupat ardor?
 Quæ flamma insolito membra calore cremat?
 An te conspicio mea lux, & amore faciscens,
 Te mihi præsentem, sponse, latere puto.
 Ah? præsens Sponse es: nec se mens credula fallit,
 Intus nam sentit Numen adesse tuum.
 Iam mea Divinum spirant præcordia amorem,
 Involo in amplexus jam, mea vita, tuos.
 Iam super astra feror, pedibus sublimia calco
 Culmina calorum: sordida terra vale.
 Terra vale, & mundi vos impia turba valete ,
 Gens infixæ solo, turbæq; amoris inops.
 Fas mihi nunc tecum, mea spes, mea vita, morari:
 Fas mihi te solo nunc sinè teste frui.
 In te suavis amor, votorum meta meorum,
 Sit mihi certa salus, sit mihi tuta quies.

Oscula jam liceat per amica silentia tecum,
 Oscula per longas jungere pressa moras.
 Te plenum, vacuumq; sui ad te pectus anhelat,
 Et mea vita tuis ignibus ušla perit.
 Ignibus ušla perit mea vita: ô parce sagittis!
 Parce amor, ah! tantas comprime, Sponse, faces.
 Pone modum flammis, ignem compeſce furentem:
 Quàm jaciſ ah? miſera figit arundo necem,
 En morior, jam victor ovans prædare jacentem,
 Oreg; grandiloquo parta trophæa cane.
 O amor! ô furor! ô qua me dementia cepit!
 O mors! ô miris perdita vita modis!
 O ſigna! ô monſtra! ô ſanæ ludibria mentis!
 O vigilans ſomnus! ô ſine nocte dies!
 O rutilans nox! ô ſapiens dementia! flamma
 Ardorem extingvens! os ſinè voce loquax?
 O caſta ebrietas! clamor ſilentia cordis!
 O ubi ſum! quid ago? quò furibunda feror?
 Deſipio, tu cogiſ amor. Sed numquid inermis
 Semper ero? Et mortem ſemper inulta feram?
 Arma, arma huc ferte, huc fidi properate ſodales,
 Ferte enſes, gladios, ſpicula, tela, faces.
 Quid moror? Et ceſſo jaculũ torquere, vel haſtam?
 Et non incertâ figere tela manu?
 Sed jam victus amor proprio comburitur igni,
 Et patitur telis vulnera facta ſuis.
 Dicite jo paan, jo plaudite: victor amoris
 Eſt an.or, en victas porrigit ille manus.

*Ponite vos socij tumultum, tum cadite saxo
Hæc duo perspicuis carmina scripta notis :
Hæc tenet urna duos, alternâ cade peremptos :
Victus uterq; fuit, victor uterq; fuit.*

METRUM XLI.

Laudatur David ejusq; Psalmi.

*N*emo Iessiadis carmina Principis
Æquo reddere plectro ,
Vel dignis studeat tollere laudibus
Vanâ concitus aurâ.
Nam præceps liquidum vectus in æera
Falsis nititur alis ,
Audet qui temerè culmina scandere
Non concessa polorum.
Vt campos tumidi fluminis impetus
Rupto gurgite inundat ,
Sic mentem rapidis cursibus irrigant
Magni carmina Vati.
Nec tot flammivomis faucibus egerit
Ardens Ætna favillas ,
Quot flammis populat viscera, quot faces
Psalmus vibrat amoris.

Seu

Seu Regem superum concinit, & Patrum
 Laudat facta priorum
 Et castra Isacidum, justaq; praelia,
 Et stantes pelagi undas.
 Seu seris reserat facta Nepotibus
 Caeli insculpta pyropis.
 Evolvitq; Patris consilia, & sacros
 Scribit verbi Hymenaeos.
 Sive implorat opem Numinis, & preces
 Pronus fundit Olympo.
 Divinus fidicen semper amabili
 Mulcet carmine caelum.

METRUM XLII.

De Sanctis Martyribus.

FELICES Animæ, quas nec mora, nec Orci
 Furor cruentus terruit,
 Non mundi vis tanta fuit Stygiq; tyranni,
 Ut corda eorum frangeret,
 Sed pœnis nutritur amor, vitæq; periclis,
 Et sanguinis dispendio.
 Ut pelagi rupes, circumlatrante procellâ
 Crebris resistit fluctibus,
 Sic devota cohors, Soboles generosa Tonanti
 Immota cunctis ictibus,

Hor-

Horrendæ genus omne necis vitæq; cadentis
 Annos fugaces despicit.
 Membra secet ferro, salientia viscera rostris
 Ferax satelles extrahat.
 Pectora dilaniet rigidis moribunda flagellis,
 Dilcerpat ungulis genas,
 Congerat in ventrem liquefacti pondera plûbi
 Tundatq; terga fustibus,
 Torqueat ignitis facibus, corrupta veneno
 Propinet ori pocula,
 Pedinibus carnem laceret, nexuq; rotarum,
 Et bestiarum dentibus,
 Lumina diripiat, dentes evellat, & artus
 In frustra cunctos amputet:
 Attamen invictum patienti in corpore robur,
 Viresq; servat integras,
 Statq; animo constans Martyr, sæviq; laceffit
 Liſtoris ad pœnas manus. (gum
 Heu quantum fremuit scelerata potentia Re-
 Vt Christi amantes perderet? (pellex
 Quanta seges mortis! quàm multa reperta su-
 Quæ rumperet lethi moras?
 Ille suis pascit flammaram incendia membris,
 Sed crescit in flammis amor.
 Hic trabe suspensus caput inter sidera condit,
 Terram perosus impiam.

De-

*Detractâ cute regales ostentat honores
Amictus ille murice.*

*Quid memorẽ fumo extinctos, tetroq; vapore,
Taurisq; clausos æneis? (terrore*

*Quid pice perfusos, mediâ quid in urbe pro-
Ludibrio plebis datos?*

*O nimium dilecta Deo, pars magna polorum
Phalanx beata Martyrum. (dent*

*Non ego (si faciles superi mea vota secun-
Mibiq; dent pati, & mori)*

*Non ego præ vestra fortunâ optavero Regum,
Vestræ Coronæ particeps. (cœli*

*Hoc nempe ad superos iter est. Iam claudite
Viam, Poëtæ, lacteam. (cuti*

*Sanguinem docuit Christus, Christumq; se-
Quotquot suere Martyres.*

METRUM XLIII.

Concentus Musicus in lau- dem Dei.

*Eia cantu personate
Quotquot estis Musici
Eia laudes, eia nomen
Personate Numinis.*

Huc

Huc adeste, voce, plausu,
 Orbis omnes Incolæ,
 Huc adeste mente purâ
 Qui Deum veremini.
 Barbito dulci sonate,
 Mollibusq; Canticis.
 Organorum, buccinarum,
 Et lyre concentibus.
 Nuntiate quam potenti
 Cuncta firmet dextera.
 Prædicate, quam benigna
 Nos regat clementia.
 Ferte laudes, ferte cantus,
 Eius ad Sacrarium.
 Plaudat Orbis, plaudat æther
 Nablis & tympanis.
 Angelorum Candidati
 Personent exercitus.
 Cœlitumq; gloriosa
 Turba laudes concinat.
 Astra laudent, & serenum
 Quidquid ornat æthera.
 Terra saltet & choreis
 Læta blandis perstrepat.
 Alta plaudant floridorum
 Montium cacumina.

*Pontus adsit, & capaci
 Quidquid alvo continet,
 Amniumq; pura rauco
 Psallat unda murmure.
 O Superne Rex polorum
 Quo iubente vivimus,
 Te Parentem prona adoret
 Trina rerum machina.
 Te potentem læta honoret
 Omnis orbis natio.
 Eia cantu personate
 Quotquot estis Musici
 Eia laudes, eia nomen
 Personate Numinis.*

*Prudentius de Concentu Musico in
 Ecclesijs.*

*Quidquid in are cavo reboans tuba curva remugit,
 Quidquid in arcano vomit ingens spiritus haustu,
 Quidquid casta chelys, quidquid testudo resultat,
 Organa disparibus calamis quod consona miscent,
 Æmula pastorum quod reddunt vocibus antra,
 Christum concelebrat, Christū sonat, omnia Christū
 Muta etiam fidibus Sanctis animata loquuntur.*

*Juliani Epigramma in Organum.
 Quam cerno alterius natura est fistula: nempe
 Altera produxit fortasse hanc anea tellus.*

Hor-

*Horrendum stridet, nec nostris illa movetur
 Flatibus, at missus Taurino è carcere ventus
 Subtus agit laeves calamos, perq; ima vagatur.
 Mox aliquis velox digitis, insignis & arte
 Adstat, concordēs calamis pulsatq; tabellas.
 Ast illa solito exiliunt, & Carmina miscent.*

METRUM XLIV.

Harmonia mundi.

*NAm me quis melior recreet sonus,
 Quam moribus vox consonans?
 Mystica transcendunt modulamina
 Quoscunq; vocales tonos.
 Vera etenim menti, non sensibus
 Solet placere musica.
 O si perpetuum aures intimas
 Permulceat mundi melos?
 O si dulcisonos pangat modos
 Latè patens vox ætheris?
 Quam subito Citharas, aut Organa,
 Choriq; voces & tropos
 Sperneret indocilis mortalitas
 Assueta Cœli cantibus?
 Harmonicis dissultant motibus,
 Lætisq; subsiliunt choris*

*Astra polo lucentia dum vago,
 Cælum rotatur ambitu.
 Sic elementa animum dulcedine
 Aureſq; complent cantibus,
 Cum modalis reſonant gravioribus
 Tonosq; acutos temperant
 Æthææ ſic terra conſonat
 Canore miro muſica.
 Reſpondetq; reſcurſio ſiderum
 Mundi ſonoris motibus.
 Omnis ab harmonico ſyſtemate
 Et terra pendet, & polus,
 Vt nullis ſit diſſona litibus
 Natura muſicæ ſtudet.
 Nempe tonis conſiſtunt myſticis
 Quæcunq; Phœbus aſpicit.
 Complexuq; ſuo omnia colligat
 Dulcis modorum ſuavitas.
 Nil concinna tamen concordia,
 Vocisq; nil prodeſt melos.
 Diſſona ſi morum ſit muſica,
 Deiſq; juffis diſcrepet.
 Seſe igitur veris concentibus,
 Suosq; mores imbuat
 Pſallere qui dignas laudes cupit,
 Numenq; cantu flectere.*

Despicit orantam modulos DEVS,
Cum moribus vox dissonat.

METRV M XLV.

Laudes Divi Benedicti.

L Vx oculos divina ferit, descendit ab alto
Culmine Cælorum globus igneus.
In medio veneranda senis præsulget imago,
Mirantescq; animos ad se trahit.
Quis novus hic heros? quod sidus, quæ nova cæli
Progenies variat rerum vices?
An novus occiduis surgit rubicundus ab oris
Phæbus, & Eoi obscurat faces?
An Benedictus hic est Itala lux maxima gentis
Miliæq; Sacra dux inclytus?
O properate omnes, ille est. Quàm multus euntem,
Prosequitur Monachorum exercitus!
Quàm pia festivo glomeratur pompa triumpho?
Atq; Patrem lætis celebrat Choris?
Huc ades ô mundi Columnen, spes altera terra,
O & præsidium pereuntium.
Dexter ades, placidusq; melos, quod pangimus, audi
Carminibusq; tuis Pater annue:
Te canimus, Regum soboles, Divina propago,
Non sine summi plausibus ætheris
Te celebrat tellus, mare tibi concinit omnis
Te dignis gens laudibus evehit.

*Aurea submittunt Proceres tibi stemmata, curvo
 Te Reges venerantur poplite.
 Te penes est morum probitas, studiosaq; recti
 Norma, fidesq;, & Cultus Numinis.
 Te pietas gremio fovit, te candida Virtus
 Nascentem tenero excepit sinu.
 Diceris harmonicis maternâ clausus in alvo
 Motibus exultasse, & cantibus.
 Iam tunc divinis præludens laudibus, orbem
 Quæis jugiter docuisti incumbere.
 Diceris & faciem clarè vidisse Tonantis
 Æthereo persusus lumine.
 Nempe serenatâ Cœlos in mente ferebas,
 Atq; DEVM claudebas pectore.
 Si miseris poteras terris DEVS alter haberi,
 Nî rapuisset te mors invida.
 O Pater, ô tandem Monachorum respice cætus,
 Atq; tuis da vivere moribus.
 Aspice, nec vasto luctantes desere ponto,
 Et nostrum repara antiquum decus.*

*Carthusianorum vitam, & mores hoc
 Epigrammate expressit Bernardus
 Bauhusius.*

*Pallentem nuper rigidi Brunonis alumnum
 Sic adiit mundum linguere certus Odo.
 Ede Pater, quæ Carthusiæ est regula vita,
 Quæ nox, quævè dies : quid fugiant, quid agant,
 Ede,*

*Ede, quibus studijs hic vivitur. Ille tacendo
Fugit, & ingemuit. Non potuit melius.*

METRVM XLVI.

Ubiq; Deus.

*SCande polum, medioq; sinu celsi abdere cali,
Illic rotator siderum.*

Te DEVS inveniet.

*Turbida si inclusum caput inter nubila condas,
Latè patentes nubium*

Disgregat illa globos.

*Frustra telluris gremio stygüsq; cavernis,
Aut rupe te cavà teges;*

Numine cuncta replet.

Fortè cupis nigro te noctis condere peplo?

At noctis umbras intimà

Rumpere luce solet.

*Eia age prapetibus pennis ad littora Thules,
Extremam ad Arcton evola,*

Quà fera sævit hyems.

Decolor Eoo, quà cingitur India Gange,

Quà sol fluente fervidas

Abluit amne rotas.

Quàq; dies medius pallentes denegat umbras,

Et solis ustas ignibus

Torret ab axe plagas.

*Seu terrâ pelagoq; fugam, Cæloq; capeffas,
Iustus DEVS te vindici
Prendet ubiq; manu.*

METRUM XLVII.
ELEGIA SEPTIMA.
Angeli orantibus, & psal-
lentibus assistunt.

O *Ego si possem rutilo fulgore micantes
Mortali Aligeros cernere luce choros?
Ipsaq; corporei deterfa ærugine sensus,
Obvia Cœlituum se mihi castra darent.
Aut saltem posito terrena pōdere molis
Dent superi æthercas scandere posse plagas.
Et super astrorum mundiā, volubilis arcem,
Quo nequeo ferri corpore, mente ferar.
Quam multis glomerata choris, distincta catervis
Agmina conspicerem Numinis ante thronum?
Agmina tam numero, quam Maiestate decora,
Agmina Divinum psallere sueta melos,
Non tot sylva feras, tot pisces continet unda,
Totq; insculpta micant sidera clara polo.
Non tot spumofum rejedat littus arenas,
Quot turma Aligerum Cœlica templa colunt.
Hos opifex rerum mortali labe carentes
Edidit, æterni participesq; doni.*

Quos

Quos nec perpetuo labentia sacula cursu,
 Nec potis est gelida vis abolere necis.
 Immunes senij tranquillos Cœlico ab ævo
 Dinumerant annos, sidereosq; dies.
 Tristia connubij non nôrunt jura, nec ullis
 Urget eos stimulis imperiosa fames.
 Plurima quin etiam miro sermone loquuntur,
 Nulla licèt linguis mutua verba sonent.
 Et jugiter summo nova pangunt carmina Regi,
 Carmina mortali non referenda sono.
 Festinantq; sacras certatim currere ad ades,
 Cum gratos reso fundimus ore preces.
 Hic ineunt placidas cœlo plaudente choreas,
 Et miscent nostris verba canora modis.
 O templum! ô templum! ô felicia lumina cœli!
 Solaq; digna Deo, Cœlicolisq; domus!
 Hic dulces resonant melicis concentibus hymni,
 Hic colimus castâ relligione Deum
 Mergimus hic undis culpas, hic sanguinis haustum
 Sumimus, hic algens pectus amore calet.
 Hic volucres animæ puræ sine corpore mentes
 Occulta irradiant viscera nostra face.
 Cernitis ut celeres liquidum per inane feruntur
 Et gaudent templi tecta subire sacri,
 Utq; hilares inferre polo suspiria cordis,
 Et gemitus satagunt sollicitasq; preces?
 Scilicet ut numen faciles admittat ad aures
 Luctifonos gemitus, sollicitasq; preces.

*Sapè etiam læsi compescunt Iudicis iram,
 Cum foret æternis pæna luenda rogis.
 O vos felices, divinorumq; capaces,
 Vos quibus astrorum splendida Regna patent.
 Vos, quibus arrisit Cælum jussitq; tueri
 Angelicos vultus, Angelicosq; Choros.
 Dicite, quam densæ properent ex æthere turmae,
 Dum pia festivis personat aula choris?
 Dicite quàm lepido demulcent àëra cantu,
 Dum pulsant patriæ dulcia fila lyra?
 O mihi si mentem corpusq; attollere Cælo,
 Et vestra liceat conditione frui?
 Protinus Elysij immiscens Carmina turmis
 Perpetuæ colerem laudis honore Deum.
 Effundensq; novos succenso è pectore versus,
 Acciperem votis præmia digna meis.*

Oratio, cùm sit depositio cogitationum, non potest homo perfectè orare negotijs terrenis implicatus, & assiduis curis onustus, & quòd divitiæ & mundi facultates distrahant cor, mentemq; perturbent, & anxiam reddant: his Versibus eleganter edisserit Cornelius Gallus Pòëta.

*Quid mihi divitiæ, quarum si demeris usum,
 Quamvis largus opum, semper egenus ero?*
 Imò

Imò etiam pœna est partis incumbere rebus

Quas cum possideas est violare nefas.

Non aliter sitiens vicinas Tantalus undas

Captat, & appositis, abstinet ora cibis.

Efficior Custos rerum magis ipse mearum,

Conservans alijs, quæ periëre mihi.

Sicut in auricomis pendentia plurimus hostis

Pervigil observat non sua poma draco.

Hinc me sollicitum torquent super omnia curæ,

Hinc requies animo non datur ulla meo.

*Quòd oculi tota nostra luxuria, hi
nos in omnia quotidie vitia præcipi-
tent, mirantur, adamant, concupiscunt
rectè Propertius.*

Qui videt, is peccat, qui te non viderit, ergo

Non cupiet, facti crimina lumen habet.

METRUM XLVII.

Laudes solitudinis.

O Solitudo mentibus
Orantium gratissima,

O vera cordis suavitas,

Ignota vulgi sensibus,

Vt te requiro, & expeto

Turbam perosus improbam?

Hic₂

Hic, hic serena spiritus,
 Aspirat aura pectori.
 Hic nullus auditur fremens,
 Tumultuantium fragor.
 Hic Corda nullus inquinat
 Vapor, vel umbra criminis.
 Campi sonant hic mellicis
 Psallentium concentibus.
 Hic Angelorum cœtibus
 Immixtus, & vindex sui,
 Sapiens quietam transigit
 Curis procul nocentibus,
 Solutus omni jurgia,
 Hic alta vitans curiæ
 Potentioris limina,
 Innoxios ducit dies
 Inanis expers ambitus.
 Hic lucra conscientia
 Quadrante justo computans,
 Studet mereri fletibus
 Amissa Cœli gaudia.
 Optet superba culmina
 Opes, domosq; splendoras
 Quicumq; vult: me nescium
 Fraudis; iuvat, Silentium.
 Me solitudo, me quies

*Abcondat ignotum omnibus,
Deoq; soli cognitum.
Hoc scire demum hoc vivere est,
Sibi, Deoq; vivere.*

Quamdiu sumus in hac vita, caro cō-
cupiscit adversus spiritum, & non fi-
nit eum jugiter rebus Divinis inhærere:
de quo Nazianzenus in Carmine adver-
sus carnem :

*Exitiosa caro, Belial tenebrosa procella,
Exitiosa caro, quâ fluit omne scelus.
Cœnum, massa gravis plumbi, limosa Catena,
Bellua pugnaci prodita materiâ.
Pestifer æstus, heraq; tuæ vinclum, atq; sepulchrū
Forma, quæ supera venit ab arce mihi.*

METRUM XLIX.

Amoris Potentia.

***A**bsiste vulgus cœlicos nunc me decet
Pangere versiculos
Amore perculsum gravi.
Amore nempe, pura qui semper novo
Vulnere corda secat,
Mucrone diro sæviens.*

Nam

Nam cor potentem armatus ille dexteram
 Cuspide, & igne ferit,
 Hæretq; totum vulneri.
 O æstuans incendium, ô fervens rogas,
 Siccine corda cremas,
 Nec ulla speratur salus?
 Ut sole nix tabescit, ut ceræ solet
 Solvere flamma globum:
 Sic mens calore absimitur.
 Vivensq; morte occumbo, & expers sensuum
 Vivo in amore miser
 Dum pectus ustum liquitur.
 Ah? nulla amoris asperum vulnus potest
 Docta fovere manus,
 Seivum dolorem leniens.
 Tanti est amoris ignis, ut eius faces
 Nec maris unda queat,
 Nec ulla vix extinguere
 Vicisti amor: jam quæ jadis ferociter
 Ignea tela, pati
 Cor penè mortuum nequit:
 Sed vulnera me amans amor, mihi in tuo
 Vulnere vita manet,
 Si amore me sinas mori.

M E T R V M L.

Hymnus Eucharisticus.

In gratiarum actionem pro finito Opere.

O Mibi iam plures multum vigilata per annos
 Pagina, sat spatij longum confecimus equor.
 Naufraga flucti-vago jactata carina profundo
 Iam portum tranquilla tenet: jam dente tenaci
 Anchora de prora jacitur, iam littore gaudet
 Navita, iam Scylla monstrum, rabiemq; Charybdis,
 Et Syrtes, scopulosq; & venti evasimus iram.
 Iam licet optatam saltu contingere terram
 Et Superis meritas pro munere solvere grates.
 Omnipotens Genitor, Celi suprema potestas,
 Principium sine principio, Sator unice rerum,
 Immensus, sine fine potens, sine tempore durans,
 Absq; loco loca cuncta replens, sine luce coruscans,
 Cuncta simul sine voce loquens, sine robore fortis,
 Mundum mente gerens, sine motu cuncta gubernans:
 Unicus, & simplex, placidus seu parcis amanti,
 Expectasq; tacens; seu crimina vindice poena
 Corrigis iratus, seu justis premia reddis.
 Haud opis humana est dignas tibi solvere grates:
 Sed cæli dum luce fruor, te carmine semper,
 Pectore te memori cantabo, nulla carebit
 Laudibus hora tuis. Tuq; ô Sapientia Patris,
 Principium de principio, de lumine lumen,
 A vero verax, soboles aquæva Parenti, Fons

Fons lucis, mentale jubar, verbumq; paternum,
 Omnia cognoscens divina notio mentis,
 Ars Summi Artificis, primi q; expressio veri,
 Tu precor ignaro, maioraq; viribus auso
 Ignosce, & clemens audacibus annue scriptis.
 Tu bonitas, tu Patris amor, tu mutuus ardor,
 O Patris, & nati flamen, qui compar utriq; ,
 Imperium sinè fine tenes spirabile numen,
 Tu quoq; si potui, per tot adire labores,
 Has licèt exiguas pro munere suscipe laudes.
 Auspice te, quacunq; fides Romana patebit,
 Ore legar populi, nec me Lybitina sepulchro,
 Nec ventura dies tenebrosa condere nocte,
 Nec poterunt flammæ, nec edax abolere vetustas,
 Candida posteritas, duce te, mihi digna laboris
 Premia, & immeritam statuet cum laude coronam.


His versibus Juvenci Pòetæ facit Au-
 thor Epilogum Operis sui.

Nec metuo, ut mundi rapiant incendia secum
 Hoc opus. Hoc etenim forsàn me subtrahet igni,
 Tunc, cum flammi vomâ descendet nube coruscans,
 Iudex altithroni, genitoris gloria

CHRISTVS.



In-



Index Libri.


S urgens mane	- - -	5
O rationes matutinæ Prolixiores.		6
Adoratio	- - - ibidem	
Gratiarum Actio	- - -	8
Contritio	- - -	11
Petitio	- - -	13
Oblatio	- - -	14
Invocatio Deiparæ & SS.	-	17
Postulatio pro vivis & defunctis	-	21
Oratio matutina brevior	- -	26
Oratio matutina brevissima	-	32
Oratio Vespertina	- - -	35
Alia Vespertina	- - -	40
Protestationes ad DEUM sæpius re- novandæ	- - -	45
De Oratione Mentali	-	52
Oratio Præparatoria	-	53
Oratio post Meditationem	-	56
De Examine Conscientiæ	-	58
Oratio ante Examen	- -	59
Oratio post Examen	- -	61
De Generali Spirituali Confessione		62
Ee	Ora-	



Oratio	- - -	64
De Confessione Sacramentali	-	73
Oratio ante Confessionem, & Actus		
Contritionis	- - -	77
Oratio post Confessionem	-	80
Actus diversarum Virtutum ante Com- munionem	- - -	81
Cōmemoratio Dominicæ passionis		93
Orationes ante Cōmunionem	•	95
Ad Deum Patrem	-	ibidem
Ad Dominū IESUM Christū	-	97
Alia ad eundem	- -	99
Alia ad Spiritum Sanctum	-	101
Ad B. Virginem	- -	103
Ad SS. Angelos	- -	104
Invocatio Omnium Sanctorum		106
Post Cōmunionem Actus amoris		109
Gratiarum actio	- - -	112
Oblatio	- - - -	115
Petitiones	- - -	117
Aspirationes ad SS. Virginem, Ange- los & Sanctos	- -	120
Aspirationes post Cōmunionem sæpè per diem repetendæ	-	121
	Ora-	



Oratio circa Cōmunionem, vel ante SSmū	
Sacramentum dicenda	126
Oratio ad Quinq; Vulnera Christi	132
Paraphrasis Anagogica Dominicæ Oratio-	
nis	135
Paraphrasis Angelicæ Salutationis	142
Oratio ad Sanctissimam Trinitatem	147
Affectus Animæ amantis DEUM	152
Actus humilitatis	155
Oratio ante Missæ Sacrificium	160
Ad Elevationem	162
Ad finem Missæ	163
Fasciculus aspirationum	164
Testamentū seu præparatio ad mortem	170
Affectus & Aspirationes ad Deum devotæ	
Animæ Christianæ	206
Hymnus pro invocatione Divinæ assisten-	
tiæ	ibidem
Gemitus animæ poenitentis	209
Pia Desideria	224
Suspiria amantis animæ	239
Actus præcipuarum Virtutum per aspira-	
tiones	
Actus Fidei	259
Ec 2	Actus



Actus Spei	-	-	262
Actus Charitatis	-	-	265
Actus Charitatis erga proximum	-	-	267
Actus Patientiæ	-	-	270
Actus Humilitatis	-	-	274
Fasciculus aspirationū diversarum ad IESUM, ad B. Virginem, & ad Sanctos			276
Aspirationes ex Nominibus DEI, ejusq; attributis & perfectionibus	-	-	285
Vitam Christi esse fontem omnium bonorum, quomodo ex ea pij affectus eliciantur			313
METRA EXCERPTA	-	-	332
Invocatio Superni Auxilij	-	-	338
Contra Athæos	-	-	340
Enthusiasmus, & dicendorum propositio			344
Affectus erga Christi passionem	-	-	346
De brevitæ vitæ	-	-	348
De horis & horologijs	-	-	350
Noctis encomium	-	-	353
Potentia amoris in nocte & somnium atq; apparitio Sapientiæ	-	-	355
Laus Auroræ	-	-	360
Invitantur omnes Creaturæ ad cantandas Deo laudes	-	-	362
Describitur Ortus Solis	-	-	364
Oratio ad CHRISTUM	-	-	368
Enthusiasmus ob adventum Spiritus S.			369
De-			



Describitur Adventus Spiritus Sancti	370
Verus Sol est Deus	371
Affectus Sponsæ	373
Laudatur mediocritas	375
Affectus Animæ amantis erga Christum	
Crucifixum	377
Comparatio antiquæ, & nostræ ætatis	378
Rerum vicissitudo	380
Invitatio ad lacrymas	381
Pax ubi invenienda	384
Sicut sol, ita & homo, vix natus, vergit statim ad finem	386
Contemptus terræ, elevatio ad cœlum, va- rijq; affectus amantis animæ	387
Invocatio Beatæ Mariæ Virginis	349
Laudes & Invocatio B. V.	396
Conjuratio inferni, ut portas pandat	401
Mortis contemplatio, vera Philosophia	401
Omnia contemnenda, quia mors inexora- bilis est	403
Felicitas pœnitentis	405
Litanæ	407
Affectus Animæ videndi Deum	410
Divitum curæ	412
Vera felicitas	ibidem
Viri justî constantia	414
Conformitas humanæ voluntatis ad Di- vinam	415
Oratio Dominicalis	416
	My-



Myſteria fidei	-	-	418
Oratio poenitentis ad Chriſtum	-	-	421
Varij affectus amantiſ animæ erga Sponſum abſentem, & præſentem, dulciſq;			
luſta amoris creati & increati	-	-	424
Laudatur David ejuſq; Pſalmi	-	-	428
De Sanctiſ Martyribus	-	-	429
Concentus Muſicus in laudem Dei	-	-	431
Harmonia mundi	-	-	434
Laudes Divi Benediſti	-	-	436
Ubiq; Deus	-	-	438
Angeli orantibus & pſallētibus aſſiſtunt	-	-	439
Laudes ſolitudiniſ	-	-	442
Amoriſ potentia	-	-	444
Hymnuſ Euchariſticuſ in gratiarum actio-			
nem pro finito Opere.	-	-	446



Asat.

1.20




#80126

Bibliotheca

5001

P.P. Camaldulensium in Bielany

Depozyt w Bibliotece Jagiellońskiej



06771

